

**Нормурод НОРҚОБИЛОВ**

# **БЎРОН ҚўПГАН КУН**

*Кисса ва ҳикоялар*

**«ШАРК» НАШРИЁТ-МАТБАА  
АКЦИЯДОРЛИК КОМПАНИЯСИ  
БОШ ТАҲРИРИЯТИ  
ТОШКЕНТ – 2007**

## **Норқобилов, Нормурод**

Бўрон қўпган кун: Қисса ва хикоялар. — Т.: «Шарқ», 2007. — 304 б.

Маъсулият хисси инсондаги энг тўзал туйғулардан бириди. Агар инсонда ушбу туйку кучли бўлса, у борликка ўзгача бир нитоҳ билан назар ташлайди. Тириклик олдида ўзини масъул сезади. Тоғдаги тошни, ўрмондаги дарахтни, дала-даштдаги чечакни, қисқаси, борликин, табиатни кўз корачигидай асрайди, авайлайди. Нега деганда, инсоннинг тириклиги табиат билан. У табиат неъматларидан баҳра олиш билан бир қаторда, унга нимадир беришга, беролмаган тақдирда эса, уни асрал ва авайлашга интилади. Табиатга меҳр кўзи билан қарай биладиган эзгу қалб эгаси, ўз навбатида, кишилик жамиятига ҳам худди шу хил муносабатда бўлади. Бунинг акси бўлган одам эса, худди табиатга зуғум ўтказганидек, инсон қавмига нисбатан меҳрсиз, шафқатсиз бўлади. Ўзидан ўзгани ўйламайди. Бир умр нафсига кул бўлиб яшайди. Ва натижада бу икки хил муносабат ва қарашлар ўртасида зиддият — кураш юзага келади. Бу қандай кураш? Сиз бу саволга таникли ёзувчи Нормурод Норқобиловинг ушбу китобидан жавоб топасиз. Адид ўзининг мазкур китобга кирган киссалари ва хикояларида ўзликни англатувчи тўзал туйғуларни рангин бўёкларда очиб беришга харакат қилгай.

**ББК.84.(5\$)**

**ISBN 978-9943-00-084-1**

## ШАЙДОЛИК

Нормурод Норқобилов 1953 йилнинг 7 июнида Яккабоғ туманининг тоғ ёнбағри ҳудудида туғилди. Ёзувчининг қачон, айникса, кайси куни туғилганлигини маколада таъкидлаш шартмас. Аммо Нормуроднинг кайси йили, қайси кунда туғилганлигига атайн эътибор беряпман. Шўро адабиёти пайдо бўлиб, социалистик реализм унга ўз ҳукмини ўтказибди: «Биз табиатдан инъом-эҳсон кутмаймиз. Аксинча, табиатни ўз иродамизга бўйсундирамиз», — деб келинди. Табиат гўзалликларига маҳлиё бўлганлар, тоғу тошларни, бепоён водийларни улуғлаганлар, нари борса, иккинчи, учинчи даражали адаб — ижодкор деб билинди. Нормурод Норқобиловнинг ижодкор сифатидаги баҳти шундаки, она сути билан қон-конига сингтан шайдолик, табиат мураккабликларидан завқ олиш фазилати ижодининг илдиз-асосини белгилади. XX асрнинг 60—70-йилларидан бошлаб Саид Ахмад, Шукур Холмирзаев, Менгзиё Сафаров, Тоғай Мурод сингарилар табиатни — ҳайвонот, наботот, жамодотни завқ-шавқ билан тасвиirlадилар.

Нормурод Норқобилов ўтган асрнинг 70—80-йилларида хаётнинг мушкул, мураккаб мактабини ўтади: армия сафида хизмат қилди, турли ташкилотларда оддий ишчи, ҳатто қоровул бўлиб ишлади. Бўлажак ёзувчи ёзишни жуда-жуда севарди. У не-не мушкулларни енгиб, «Тошкент оқшоми» ва бошқа газеталарга материаллар тайёрлади. У ҳозирги Ўзбекистон Миллый университетининг журналистика факультетида тахсил кўрди. Ўкишни тугатгач, у Ўзбекистон телевидениесида кичик мухаррир, мухаррир, бўлим бошлиғи бўлиб ишлади. Интилганга толе ёр деганларидаи, Нормурод Норқобилов телевидениеда ўзига мос, қалбига якин мавзуларда — урф-одатлар, миллый удумлар, амалий санъат турлари, мамлакатимиздаги машҳур форлар, коризлар, тоғ йўллари, чўқкилари ҳакида бири-биридан қизиқарли кўрсатувлар тайёрлай бошлади. Ҳануз унинг кўрсатувлари томошабинлар томонидан интиқлик билан кутилади.

Ёзувчининг мазкур тўпламдаги «Белбоғ» қиссаси миллый удум таъсирида ёзилган. Ҳалқ — доно, чин санъаткор: у ўзининг санъат тилини, имо-ишораларини ҳамиша

сайкаллаң келгән. Қаранг, қиссадаги Зумрад Отамуродға: «Мен Сизни яхши күрамаң, танлаганим сизсиз», — демайды. У узок мушоҳада юриттагач, эрининг руҳидан рухсат олгач, Отамуродға белбоғ совға қиласы. Белбоғ — никоҳдай мұқаддас, расмий идора гувохномасидай эъзозли. Ажабки, қишлоқнинг чапани бўз йигитлари Отамуроднинг пўстагини қоқмоқчи, қишлоқнинг олд жувонига кўз олайтирган меҳмоннинг адабини бермокчи эдилар. Белбокка кўзлари тушиши билан улар ҳозиргина ракиб бўлиб турган йигитга қариндошдай муносабатда бўладилар.

Нормурод Норқобилов — ўндан ортиқ қисса, қанчадан-қанча ҳикоялар мұаллифи. Унинг асарларида ҳайвонот ва инсон аро мураккаб муносабатлар тасвириланади. Ёзувчи тоҳо наботот (яшил табиат), тоҳо жамодот (тоғ тошлар, қир-адирлар) оламига назар ташлайди. Унинг «Қоялар ҳам йиргайди» қиссасида инсон ва тош, тоғ ва одам боғлиқлиги маҳорат билан очилган. Ҳайвонот оламини яшил дунё — набототдан ажратиш мумкин эмас. «Пахмоқ» қиссасидаги айик ўзини дўлана, зирқ, олма сингари меваларга уради. «Тоғ одами» қиссасининг қаҳрамони Жондош жарликка кулайди. Қояда ўсган дараҳтнинг чайр шохи Жондошни «тутиб» қолади. Ёзувчи ҳайвонот, наботот, жамодот аро алоқаларнинг ўта табиий тасвирига эриша олади. Бу, аслида, табиий ҳол: ҳайвонот, наботот, жамодот бир ота-она фарзанди. Улар одамдай туғилганлар.

Кузатғанмисиз, биз фантастик асарларни ўқисак, ўзга сайёralардан келган мавжудотлар билан учрашсак, нимагадир уларни ўзимизники деб билмаймиз, бегонага муносабатда бўлаётганлигимизни хис килиб турамиз. Ҳайвонот, наботот, жамодот ўзимизники, борлигимизнинг узвий бўлағи. Инсон, сўзсиз, зоти шариф, ўзга туғишганларини йўлга солиб турувчи улкан, сеҳрли куч. У вакти-вакти билан ҳайвонлардан, яшил олам «фуқаролари»дан, жонсиз табиатдан фойдаланади. Нормурод Норқобилов инсон — ҳайвонот — наботот — жамодотни бирбутун ҳолда тасаввур қиласы. Ҳайвонлар инсонга хизмат қиласилар, яшил олам бус-бутун одам ихтиёрида, жамодот тирик мавжудотнинг уйи, ҳамишалик макони. Н.Норқобилов ҳайвонлардаги зийраклик, хид билиш укуви, инсонга чексиз садоқати ҳакида кўп ва ҳуб ёзади. Сафар исмли ўсмир вафот эттанида, Ёлдор бўрию Толмас бобо («Ғанимлар») фифон чекадилар, ўзларини қўярга жой тополмайдилар. Жуфтига садоқатда ҳам байзи кимсалар бўри, айик, шердан ўрнак олсалар чакки бўлмасди. Чўнгкалла бўри эрка, тантиқ жуфти

Оқёлнинг дардида ўзини ўққа-чўққа уради, ҳаётини хавф остида қолдириб Оқёл жасади ётган омборга ҳам киради. Афсуски, Сардор, Отамурод («Белбоғ»), Қиличбекнинг («Тунги меҳмон») хотини севгига хиёнат килади. Боборайим гов («Қуёш тутилган кун»), Сувонқул («Даштда») сингарилар одам бўлатуриб хайвон ҳам қилмайдиган тубанликка қўл урадилар.

Нормурод Норқобилов асарларида эркак киши, ул (ўғил) одам табиат тартиботларидан келиб чиқилган ҳолда табақалаштирилади. Ёзувчи эътиқодича, эркакнинг гули – полвондир. Полвон одам ориятли, чайир, тошдай беўхшов, лекин метиндай пишиқ бўлади. Муҳими, полвон заифаларга суюнчиқ, элга етакчи, ёшларга ўrnak бўлади. Нормурод яратган полвонлар интеллектуал етук, билими опиб-тошиб ётган кишилармас. Улар эркак деган номни, ул деган тушунчани улувлайдилар. Собир полвон («Қуёш тутилган кун») улни қанча улуғласа, тул (шунчаки зурриёт)ни ёқтирамайгина тилга олади. Эрназар полвон («Қоялар ҳам йиғлайди») ўсмирларни курашда синаса, итни айикқа рўпара килиб саралайди. Оддий ит айикни кўриши билан чотини ҳўллаб қўяди, жўн бола ўзини курашдан четта олади. Нормат полвон («Алп онадан») навниҳол қизларни, келинларни оғир ишлардан асрайди. Кизлар, келинлар – түғилажак алпларнинг оналари. Она нимжон, касалманд бўлса, алплар уруғига кирон келади.

Нормурод Норқобилов асарларида чавандоз, мерғанлар ҳам юқори тоифага тааллукли кишилардир. Абдураҳмон чавандоз («Белбоғ») Сардорни ўлимдан асраб колади. Унга ҳаётий ўғитлар беради. Шу қаҳрамон: «Биз айикни тоға, бўрини оға» деб ўргангандиз», – дейди. Салом мерған («Оувул оралаган бўри»), Панжи саёқ («Тоғу тошларда») ҳам мерған. Лекин бу мерғанларда қалб қўридан қўра мажбурият, ижтимоий буюртма етакчилик қилади. Уларнинг полвон, чавандоз бўлишига ҳали анча вакт бор. Лекин уларда эркакнинг кўрки бўлиши имконияти мавжуд.

Нормурод Норқобилов асарларида омма тимсоли ниҳоятда тиник, ишонарли кўрсатилади. Мен ёзувчининг кисса, хикояларини ўқир эканман, рухимни ғалати туйғу чулғайди. Кишлопклар бефайз, тароватсиз бўлиб қолаётганини хис қиласан. Ўға-ўша жойлар, ўша-ўша тогу адирлар, ўша-ўша далалар, дов-даражатлар. Одамлар тўй қиляпти, ўтганларни эъзозлаб мангу маконига кузатмоқда. Лекин одамларда майдалик, сергаплик, фиск-фужур авж олган: Энг ёмони, ҳар бир кас ўзини осмон дея англайди. Тўғри,

мустакилялар одамларга бекиёс эрк берди. Лекин бу эркни курук гапбозлик, эрмакталаблик дея англаш түбримас. Шундай инсонлар борки, одамлар тинчини бузиб қўйишдан ҳузур килади. Аммо курук гап ўрнига озгина меҳнат, озгина савоб ишлар килса, ҳамма нарса из-изига тушиб кетарди. Бадиий адабиёт оммани эмас, аниқ инсонни, бетакрор киёфани тасвирлайди. «Белбоғ» киссасида увоқцина бир персонаж бор. Отамурод хотинидан ажралгач бир бева хотиннига бориб туришга одатланган. Аёл ниҳоятда ширин сўз, ниҳоятда меҳрибон, ниҳоятда самимий. Отамурод шу аёлга уйланиши ҳам ўйлаб қўяди. Бир куни йигит аёлдаги ўта нозик бир нуқтани кафш этади: аёл эркакни кутиб олар экан, дарҳол кўлига қарап, таъмасини никоблаб ололмай қолади. Шу арзимасгина камчилик аёлнинг бош хусусияти бўлиб чиқади. У аввал ҳам Алишер деган йигитни жоним-жоним дея, ҳолдан тойдирган экан. «Бўрон кўпган кун» ҳикоясида Баҳром қассоб, Эшқул сомсалаз, Абрай киррикларнинг моҳияти зинокорона назарлари орқали ёритилади. «Қабртош» ҳикоясида Эрали, Тожи шоирларнинг майда, кўзбуюмачи эканликлари тасвирланади. «Кизча» ҳикоясида эр-хотин орасидаги можаролар туфайли кизча итнинг инига кириб ётишдан ҳузур топғанлиги кўрсатилади.

«Фанимлар» киссасида, «Куёш тутилган кун», «Кудук», «Энатепа» ҳикоясида майда одамлар борлиги ишонарли ёритилган. Сарвар, Шойим йўғон, Эргаш боди, Абдурайим («Фанимлар»), Бегим оксоқол, Рўзикул боди, Мамадали шофёр, Маъруф чавандоз («Кудук»), Барот семиз, Бозор оксоқол; Бердикул, Сафар мелиса («Энатепа»), Раҳим пакана, Бобур сариқ, Шоди пўрим, Шоврук посон («Куёш тутилган кун») сингарилар томошага ўч омма вакиллари. Бундайлар истаган одам устидан мағзава тўқадилар, ўзларини ҳаммадан устун қўядилар. Лекин амалий иш қилишга келганда секингина ўзларини четга оладилар. Нормурод Норқобилов полвонларни, Ёлдор бўрини, Пахмок айниқни қанчалик меҳр билан тасвирлаган бўлса, бекорчи, гийбатчи дангасаларни шуичалик фоши килади.

Нормурод Норқобилов тажрибали, эстетик принципи шаклланган ёзувчидир. Мен унинг қисса ва ҳикоялари заминида мураккаб, жиддий роман концепциясини кўрятпман, хис этмоқдаман.

Абдуғафур Расулов,  
филология фанлари доктори,  
профессор.

# *Киссалар*

ЖУМРАД НИСБАТАН

## **БЕЛБОҒ**

Отамурод тонгги қуёш нурига йўғрилган қишлоқда ўзига нисбатан туғилган адоватни ички бир туйғу билан қайта хис этаркан, унинг муқаррар оқибати эрмуш мавхум хавфни қидиргандай, ёнбағирликнинг кунгай томонида пала-партиш сочилган қишлоқ уйларига, қуидаги тезоқар сой ёқалаб чўзилган қуюқ ёнроқзорга, чўққиси яккам-дуккам арчалар билан безалган қаршидаги баланд қояга ва қўкиштоб губор оғушида сокин мудраётган тоғларга бир-бир бокаркан, маъюс ва дилгир нигоҳи ҳовли этагидаги бостирмага ёндош тушган чоғроқ кулбада тўхталди. Кичкина деразаларига қизғиш парда тутилган шу кулба ҳам ўзига таҳдидли тикилиб турган-дек туюлди.

Бир қарашда теварак ғоят осойишта эди. Күшлар чукури, ёнгил эпкиндан силкинаётган япроқлар саси, пастдаги сойнинг бир маромда гувиллашига коришик қишлоқнинг англарсиз шовури, булутсиз кўкда бемалол дайдимоқ истагида тоғ чўққисига тирмашган офтоб нурининг аллаловчи тафти-бари соз ва ғоят ажойиб эди. Аммо бу фусункорлик мувакқат — қишлоқнинг қай бир буржида бикиниб ётган ўша номаълум хавф ҳализамон мазкур тароватга соя ташлайдигандек эди.

Кечаки тушдан сўнг Зумрадни сой бўйида ҳоли учратгандаёқ бу ерда ортиқ ўралashiши яхшиликка олиб бормаслигини пайқаб улгурганди. Кўзи ҳар дакиқада кийикдек дик сакраб қочмокқа шай турган жувонда экан, ўзига ўқдек қадалган нигоҳни сезмай қолмади. У беихтиёр ортига ўгириларкан, наридаги буталар орасидан адоватла тикилиб турган йигитчага кўзи тушди. Отамурод бошда ажабланди, сўнг уни жувоннинг хешларидан бири бўлса керак деб ўлади. Кўнглида ёмонлик йўқлигини билдириб, хижолатомуз илжайди. Йигитчанинг эса

бир туки қилт этмади. Бакадек котиб тураларди. Кўзларини олиб кочмоқдан ўзга иложи йўклигини англаған Отамурод жувон томонга қайриларкан, уни жойида топмади. Зумрад кумга синггандек ғойиб бўлганди. Аммо «кейи-ин» дея шивирлаши қулоқлари остида қолганди. У жувонни кидириб, ёнгокзор бағрига сингган сўқмоқка, юкорига ўрлаган тор йўлакка аланг-жаланг бокаркан, тирик инсонга эмас, рўёга дуч келгандек хис қилди ўзини. Бу етмагандек, буталар орасидаги йигитча ҳам кўринмас, хилват бу гўшада ёлғиз ўзи қолганди.

Аламдан гудраниб сўқинди.

— Ёввойилар!

Ахир у айни шу дақиқани қанчалик интиқлик билан кутмади. Бир парча мактуб орқали билдирилган кўнгил изҳорига жавоб олмоқчи эди, холос. Мактубни шахардан атай келтирган совға-саломлари орасига кистириб узатганди. Гапни узок-узоқлардан бошламай, ярали кўксимга тоғ чечагини тақмоқчиман, шунга сиз нима дейсиз, дея мақсадини очиқ баён этганди. Ва шундан бери жувоннинг оғзини пойлайди: Аксига олиб, у тутқич берай демасди. Ошиқманг, ошиқмай туринг, деганга ўхшаш сирли ва илтижоли қарашдан нарига ўтмасди.

У алами келиб, дуч келган тошлардан бирига чўқди. Тор йўлакдан ўзи томон энаётган жувоннинг отаси Сардор чолга кўзи, тушди. Алами разабга айланди: «Булар хар бир қадамимни пойлашайти шекилли!». Аммо бу нарса чолнинг ҳурматига ўрнидан кўзғалмоғига мөнелик килмади. Сардор чол, елкасида ўрок, хушхол кулимсизди.

— Кўйларга пича ўт ўрай деб тушувдим.

Отамурод жилмайган киши бўлди. Шу тобда кўнглига чироқ ёқса ёришмас, чолнинг қаршисига келиб чўккалашидан эса баттар ғаши келди. Бироқ буни билдириб бўлмасди. Чол уй эгаси. Боз устига... Йўқ, қизимни узоққа бермайман деб турса, нима ҳам қиласди. Негаки, бу ер шахар эмас, тоғликларнинг эса ўз феъли, ўз тутуми бор. Айрим қарашлари-ку ҳеч бир ўлчамга сиғмайди.

Сардор чол йигитга синчков назар ташларкан, чўнтағидан носқоворини қидира-қидира, негадир жўшиб оқаётган сойга бир муддат тикилиб колди. Сўнг эса

ўроқ сирти билан гарданини қашлай-қашлай, узундан узун бир ривоятни сўзламоқни бошлади.

Йигитнинг тушунгани шу бўлдики, бир замонлар бу кишлокни ёв босибди. Қишлоқ эркаклари душман қўлига тушмаслиги учун бола-бакраю қиз-жувонларни қутуриб оқаётган мана шу сойга чўктириб, ўзлари тенгсиз жангда ҳалок бўлишган экан. У замонларда тоғда кор мўл, сойда сув сероб, томдай-томдай тошларни худди хasdай оқизиб кетаркан, ҳозир ҳам шиддати ёмон эмас, тушган одамнинг тирик қолиши гумон эмиш. Буни қарангки, кишлокни ёв босгандা, Худонинг каромати билан бир қизча-ю, бир ўғил бола дўлана тергани тоққа чиқиб кетишган экан. Улар қўни-қўнжини мевага тўлдириб қишлоққа қайтишса, ҳамма ёқ вайрон... Хуллас, кишлокдаги кейинги авлод мана шу икки норасидадан тарқаган экан. Улар айикни тоға, бўрини ака, охуни хола билиб улғайишган экан. Шунингчун бу қишлоқ йигитларида айикнинг ҳайбати, бўрининг важоҳати, қизларида эса охунинг хурраклиги мавжуд экан. Аммо қизларининг гўзаллиги бошга битган бало, айrim пайтларда қонли можароларга сабаб бўларкан.

Чол шуларни ҳикоя қиларкан, сўнг ўзини бу қишлоққа бегоналигини, аёли эса асли шу ерлик эканлигини кистириб ўтди. Йигитнинг ажабланиб қараб қўйганини сезгач эса, кейинги жумлани шошқалоқ бир тарзда ифода этди:

— Лекин мен бу ерга хотин деб келмаганман. Тарихи узун бунинг...

Отамурод коса тагидаги нимкосани илғаса-да, бу билан нимага шაъма қилаяпсиз, деган маънода иддаоли қараш қилди. Бироқ Сардор чолнинг ўткир нигоҳига бардош беролмай, кўзларини олиб қочди. Сўнг ер остидан унинг елкасидаги ўроққа разм солди. Қизи ҳакида гап очсан, ўроғи билан тушириб қолса керак, деган ўйга борди. Шунда юраги тубидан қайсар бир туйғу бирдан бош кўтарди. Кўнглимта тушов солмоққа хеч кимнинг ҳакки йўқ! Агар ошик кўнгилни англаёлмас эканлар, майли, айикдайин фижимласинлар, бўридай ғажисинлар! Булар тоққа хўжайин, кўнглимга эмас!

У бу сафар чолга тик қаради. Бироқ энди чолнинг нигоҳи одатдагидек мулоим тортган, мезbonлиги эсига тушгандай, одобла боқарди. Шунга қарамай, кўзлари

тубидан хануз совуқ бир ифода аримаган, салгина ножүя сүздан бу нарса ададсиз қаҳрга айланиши мумкіндек эди.

Отамурод ховли ўртасида тик қотганча, тобора күтарилаёттан тонгти офтоб нуридан фусункор тус олаёттан тоғу тошларга дилгир назар ташларкан, ортидаги шарпаңи илғаса-да, кайрилмади. Кайрилмаса-да, нелигини яхши билади. Чол обдастани ҳозирламоқда, кампири эса у ҳозиргина тарк эттан ўринни йифиш билан банд. Ҳар сағар шу — уйрониб ташқарига чиқиши билан чол обдастага уннайди, кампири тұшагини йифиширишга тушади.

— Бетди чайинг, меҳмон.

Йигит юз-құлини наридан-бери юваркан, орада ҳадикланиб чолнинг афтига бокди. Ундан адоват аломатларини қидирди. Йўқ, Сардор чолнинг қарашлари мулойим, ҳатто бир қадар меҳрли эди. Бундан йигитнинг кўнгли андак таскин топиб, яна ховли этагидаги эшик-деразалари ёпиқ кулба томон қаради. Қизингиз кўринмайди, деб сўрагиси келди. Ботинмади. Ичи қизиб кетаётган эса-да, сўроёлмади. Биладики, ташрифи қишлоқ йигитларига малол келгандек, сўрови чолга ёкмайди. У кўп юримли одам сифатида кечәек шуни фахмлаб етгандики, бу қишлоқнинг йигитлари анча чатоқ. Улар боши очиқ аёли туғил, кўтиритига даҳл қильдирмайди.

Бу хил туйғу Отамуродга бегона эмасди.

Оқшомлардан бирида ён қўшниси, художўй бир кампир эркак зотидан нолиб қолди. Дедики, маҳаллада ҳақиқий эркак қолмади, агар бор бўлганида, маҳаллани наҳс бостириб, буйтиблар қараб ўтиришмасди. Отамурод маҳаллада янги эди. Кўпчиликни яхши танимасди. Аммо кампирнинг гапларини ўзига олди. Ёмирили тунлардан бирида каршидаги тул аёлнинг дарвозасига тирғалган нотаниш кимсаннинг йўлига кўндаланг бўлди. Буниси, эшигингни оч, дея хираки қиласди. Униси ё ноз қиласди, ё аразли эди. Хархолда эшик очмай, кетинглаб турарди. Аммо буниси ўзига етганча сур экан, кетишини хаёлига келтирмасди. «Кетинг кўп куявермасин, — деди Отамуродга иршайиб. — Келиша олсак, икковимизга хам етади. Ё сенга бошқача ваъда берганими у?» Йигит юрагида туғилган нафратни сўзда ифода этиб беролмади. Зоро, бундай онларда сўз ожизлик қиласди.

Натижада, у бор газабини муштумига жамлади... Эртасига эса бу вокеа маҳаллада реса гап бўлди. Отамурод аёл талашиб уришганга чиқди.

Ўшанда нимани талашиб ёқалашганини Отамурод ҳануз тузук идрок этолмайди. Чинданам нимани химоя қилди у — маҳалланинг шаъниними ё аёлнинг қадриними? Бу ҳақда бош котиришни кўпда истамаса-да, тубан ва жирканч нарсага қарши чиққанини яхши фаҳмлайди.

У қўлидаги намиққан сочиқни сим дорга ташлаб, ортига ўғириларкан, чоғроқ супачадаги тузалган дастурхонни кўриб, ичидан зил кетди. Чойни ичиб, жилмоғи шарт. Ортиқ судралиши яхши эмас. Унинг эса ҳеч кетгиси йўқ эди. Умрида илк бор тузалган дастурхон кўзиға ёмон, жуда ёмон кўриниб кетди.

\* \* \*

Сардор чол дастурхон теварагига истамайрок чўккан йигитнинг авзойини зимдан кузатаркан, ичдан унга раҳми келди. Аммо иложсиз эди. Негаки, ҳовлисида йигитнинг ортиқ даражада ўралашиши ўзининг ҳам шаънига яхши гап олиб келмайди. У буни кечаёқ сезган.

Йигит, кетгиси келмай, атай машинасини чукилаб ўтирганида, қайнисининг ўғли Акрам қора бошлиқ икки йигит ҳовлисиға кириб келган.

— Мехмонингизни машинаси бузилиб копти деб эшилдик, — дея Акром қора чол билан қуюқ сўрашган.

— Темир чукилиб юрган одамлармиз, ёрдамишимиз тегиб қолар деб келавердик, — деган иккинчиси.

Учинчиси лом-мим демаган. Қалин қошлари остидан ўқрайиб қараб қўйиш билан чекланган.

Уч йигит ҳаш-паш дегунча машинани созлашган. Камерага ел берив, атай узилган симларни улашган ва машина ўт олган.

— Энди сизга оқ йўл, меҳмон! — деган Акрам қора куракдек кафтини йигитга узатиб.

— Қичаб ҳайдасангиз, коронги тушмай давондан ўтиб олишингиз мумкин, — деган иккинчиси.

Учинчиси ҳўмрайиб қараб қўя қолган.

Аммо бу ҳол чолнинг хамиятига қаттиқ теккан. Ҳар ҳолда меҳмон уники. Бир кизини эплаб химоя қилишга ҳали куввати етади. Иккинчидан эса, меҳмон йигит

ҳали бирон шубҳали хатти-харакатга йўл қўйганича йўқ. Шунинг учун давоӣ йўлининг нобоплигини баҳона қилиб, йигитнинг кетмоғига изн бермади.

— Бугун кеч, эртан йўлга чиқарсиз, — деди.

— Унда меҳмонни биздикига оп ўтинг, почча, қўзи сўйганман, — деди Акрам қора ўлганининг кунидан илжайиб.

— Баҳонада гурунглашиб ўтирамиз, — деди иккинчиси.

Учинчисининг чехраси баттар тундлашди.

Йигитларнинг bemavrid қўмагидан ичдан энсаси котган Отамурод ҷолнинг гапидан сўнг тезгина моторни ўчиради. Одоб юзасидан йигитларга раҳмат айтган бўлади. Чол эса мийирида жилмаяди: «Кўмак баҳонасида сени қишлоқдан ҳайдамоқчи эди, нодон! Булар келдими, демак, қишлоққа ёмон бир гап ўрлаған. Ҳай, омон бўлсан, не гаплигини билиб олармиз».

Отамурод яна бир тун колишидан, Сардор чол эса йигитларнинг ташрифидан мамнун эди. Демак, ҳали орият бутун, бу йигитлар қишлоққа бегонани оралатиб қўймайди. Айниқса, Акрам қора бобоси Абдураҳмон ча-вандозга жуда тортибди. Тили ширин, бокишилари салобатли. Унга қолса, меҳмонни уйига олиб кетса-ю, эрталаб ўзи кузатиб қўя қолса. Бироқ бу қилифи ўз қадрини билган одамга сира тўғри келмайди. Чол тутокиб, бир меҳмонни кузатмоққа чоғи келмайди деб ўйтайсанми, нима, ўладиган жойдаманми, деб бақириб бермоқчи ҳам бўлди-ю, бир амаллаб ўзини босди. Ҳархолда Акрам корани койиб бўлмайди. Бобоси олдида қарздор. Эсласа, ёмон туш кўргандай, ҳануз эти сесканади.

Ўшанда милтиқ чақилмаганди. Тепкини кўтариб, учбор босса-да, милтиғи отилмаган. Ўқини алмаштирганда эса, бошигъа тушган соядан бир зумга чалғиган. Тепасида хотиржам турган ҳайбатли кимсани ёқтиримай қараган. Бу одамларга нима бўлган ўзи, хатто тинчгина ўлишингга ҳам қўймайди-я, леб ўйлаган. Нотаниш кимса қўлидаги яроғини тортиб олиб қўядигандек, уни бағрига босган. Кимса эса пинак бузмаган, наридаги тубсиз жарга ишора қилиб деган:

— Жонингда қасдинг бор экан, буйтиблар куйманмай, анову жардан сакраб қўя қол! Этинг суюгингга аралашиб, осонгина жон берасан!

Сардор милтирини маҳкам бағрига босганча туралерган. Нима ҳам десин. Кимса эса қўлидаги буклоғли камчи дастаси билан иягини қашлай-қашлай, унга бошдан-оёқ разм соларкан, шафқатдан йирок оҳангда сўраган:

- Бошингта на мусибат тушдики, буйтиблар овлоқ жойда ўлмоқ истаб қопсан?
- Шу... одамзоддан кўнгил қолган, амаки!
- Чатоқ! — Кимса бош чайқайди, лекин ҳаракатида ачиниш сезилмайди. — Бу ишга аёл киши аралашганми дейман?

Сардор жавобдан қочиб, ерга боқади.

Кимса ортиқча ижакилашни бас қилиб, теваракка хаёлчан термулади. Сўнг йигит эсига тушиб қолгандай, унга ўтирилади.

— Унда бундай килсак, — дейди гавдасига мос йўғон ва салобатли овозда. — Шу бугунча меникода меҳмон бўсанг. Сал тафтинг босилармиди дейман-да. Агар жудаям ўлгинг келаётган бўлса ва бунга қасам ичган бўлсанг, эртан ҳам улгурасан бу ишга. Бугунча шу ишни қимай турсанг девдим. Нима дейсан?

Сардор, калака килмаяптими, деган ўйда сергак боқади. Йўқ, у жиддий эди.

— Йўқ, мен шу ерда қоламан, — дейди сўнг қайсарлик билан.

- Йўқ, қомайсан!
- Холи қўйсангиз яхши бўлармиди дейман-да.
- Холи қўйиш йўқ-да.
- Худди товди хўжайнидай муомила киласиз-а одамга.

— Ўзиям шу-да, — Кимсанинг гал оханги янада ўқтамлашади. — Бу товнинг хўжайнини мен бўламан! Анови қор босган чўққилар ҳам менга қарашли. Ишқилиб, қўзинг нимайики илғаса, бари меники. Ўлмоқни эвини қилолмадингми, изимдан юрасан-да, энди. Аммо-лекин дунёдаги хеч бир иш ўлмоққа арзимайди. Мабодо одам ўлдириб қочиб-почиб юрган бўсанг, ҳукуматга ўзим обориб топшираман сени!

- Ўлдирмоқчи эдим, ўлдиролмадим!
- Унда ўзингният ўлдирма!
- Кўксим куйиб кетаяпти-да!
- Фамга теринг юпқалик кипти-да.

— Одам боласини күрарга күзим йўғу, сиз фам дей-сиз!

— Унда дардинг оғир экан. — Кимса хўрсинган бўлади. — Мен жийдалик Абдураҳмон чавандоз бўламан. Эшитган чиқарсан? Айтганча, ўзинг қайси қишлоқдансан?

— Беватанман! Қишлоғим бор эди, энди йўқ.

— Нима, кўчки тагида колдими қишлоғинг?

— Ундан баттари.

— Чинданам ғаминг қаттиқ экан. Тур, кетдик!

Унга қандай эргашди, ўзиям билмайди. Абдураҳмон чавандоз не воеа юз берганини ортиқ суриштирмади. Дарвоқе, сўрагап тақдирда, айтишга тили ҳам бормасди.

Ўша тунда юз берган воеа хотирасида абадий сақланиб қолган. Эсласа, хозир ҳам юраги симиллаб кетади. Икки гуноҳкор банданинг қилмишидан лол туриб қоларкан, жигарим дегани кўзига чўп сукканига ҳеч ишонгиси келмади. Отмоқ истаб қўлига яроқ тутганда эса, улар кочиб бўлишганди.

Сардорга ҳодисадан кўра, моҳияти кўпроқ таъсир қиласди. Аёлига ишонарди, еру кўкка ишонмасди уни. Тоғасининг ўғли эса ука ўрнидаги одам эди. Ота-онасидан эрта етим қолиб, тоғасининг қўлида ўстгани боис, унинг болаларини «укам» дерди. Унга яқинлари — «ука»си ва аёли хиёнат қилганди. Яқинларинг хиёнат қилдими, бу дунёда яшаётган маъни йўқ, дея бир ўқ билан кўнгил азобига чек кўймокчи эди, яроғи панд берди. Худди осмондан тушгандай кархисида Абдураҳмон чавандоз пайдо бўлди. Бундан чиқди, бу дунёдан ҳали насибаси узилмаган экан.

— Шундай деб беватанман де? — дея сўради йўлда Абдураҳмон чавандоз шунчаки.

— Ҳа, беватанман, — дейди Сардор алам тўла оҳангда. — Аввалига улоқмоқчи эдим. Жондорга қўшилиб, айиққа ошна тутинмоқчи эдим. Бўмай кетди-да, кейин...

— Жондорлар сени қабул қимайди, — Абдураҳмон чавандоз чўрт кесади. — Айиқлар эса сенга ўхшаганлардан ор килади.

— Ҳали хайвондан харобсан денг?

— Осмондан келаянсан! — Абдураҳмон чавандоз ис-техзоли жилмаяди. — Одам бўлганим учун жонивор-

лардан пешман деб юрибсанми? Улар ҳакида фикринг кемтиқ экан.

- Мендан не ўтди, сиз билмайсиз-ку.
- Айтмасанг, қаердан билай.
- Айтгилиги йўк-да!
- Унда айтма.

Абдурахмон чавандоз не воеа юз берганини кейинчалик ҳам суриштирмади. Бу ҳақда ўзи ҳам бирорга тиш ёрмади. Бу ходиса юраги тубида қолди. Оғриғи, азоби, мудҳиш хотираси қолди.

Агар Отамурод шунчаки гурунг учунгина гап қўшмаганида, Сардор чол ҳали-бери хотиралар гирдобидан чиколмасди. Шунингчун йигитнинг гапини бошда англа-мади.

— Ноңларингиз ширин экан, — дея қайта таъкидлади йигит.

— Ҳа-а, — деди чол хаёлини базўр жиловлаб. — Тегирмоннинг унида. Магазиндикси бундай ширин чикмайди.

У гап орасида йигитнинг кулба томон ўғринча қараб қўйганини сезди. Унга раҳми келди. Буйтиб қийналиб ўтиrmай, қизимнинг қўлини ўзимдан сўраб қўя қолмайсанми, деган ўйга борди. Бироқ ичидагини тилига чиқаришни хаёлига келтирмади. Бу шунчаки ўй эди ва ҳар қандай ўй ҳам сўзда ўз ифодасини топавермайди...

\* \* \*

Отамурод собиқ хотинидан кўп азоб тортган эса-да, ҳануз севмоқ, унинг таъбири билан айтганда, бирор-бир ожизага паноҳ бўлмоқ илинжида яшарди. Айрим оқшомлари шаҳарнинг шимолий қисмидаги қад ростлаган кўп қаватли уйлар томон йўргалаб қолиши шундан эди. У қизғиши қопламали эшикни ҳаяжон ила аста қоқаркан, соғинч тўла нигоҳни кўрмоқ истайди. Афсуски, ҳар сафаргидек таъмагир кўзларга рўпарў келади. Эшик очган жувоннинг назари ўз-ўзидан унинг қўлидаги нарсаларга кетиб қолади. Бу холат сониянинг юздан бир улушкида юз берса-да, Отамурод аёл нигоҳида ёлқинланган таъма учкунларини пайкамай қолмайди. Қалбидаги соғинч хислари ўрнини надомат эгаллаб улгурмай, жувон унинг бўйнига осилади. Соғингани ва севишини айтади. Бу гапларга йигитнинг жон-жон деб ишонгиси келса-да,

жуон тимсолида қандайдир хатарни англагандай бўла-веради. Сўнг бу хонадонни кўнгли ғаш холда тарк эта-ди. Қидирган нарсасини тополмай, бекорга овора бўлган кишидек хис этади ўзини. Олам кўзига кир кўриниб, бозор шовкини ғашига тега бошлайди. Мижоз кутиб, майдонча четидаги чойхонада валаклашиб ўтирган ше-риклари даврасига бориб қўшилгиси келмайди. «Камаз» русумли машинаси кабинасини дидига мослаб жихозлаб олган эмасми, кабинага биқинганча, маҳзун хаёлга бота-ди.

Сардор чол кия очик кабина эшигини аста чертган-да, у мискин ва тушким кайфиятда мудраб ўтиради.

Кузалган мошгуруч соқоли соғлом чеҳрасига ғоят ярашиб тушган нотаниш бу чол бунгача чойхонадаги хайдовчилар билан бир-бир гаплашиб чиқкан, аммо у айтган нархга ҳеч ким рози бўлмаган. Тоғ йўли оғир, овора бўлишга арзимайди.

Чол айтган манзилга Отамурод умрида бормаган эса-да, негадир дарров рози бўла қолди. Тезроқ йўлга туш-са-ю, ғала-ғовурга тўла бу бозордан узоклашса.

Кўнгли шуни истади.

Чолнинг бир неча қопдан иборат юкини машинага ортиб, йўлга тушаркан, шаҳардан чиқаверишда барча киракаш хайдовчиларга хос ўй миясини тирнаб ўтди: «Сал чўфи кам бўлди-ёв...» Бу ўй машина дастлабки кияликка тирмашгандиаёқ, писанда йўсинда, сўзда ўз ифодасини топа қолди: «Йўлнинг бунақалигини билга-нимда, ўйлабгина келардим-а». Аммо Сардор чол тўғри сўзга ўрганганди одам, бу хил илмокли гапларга парвоям килмади. Жим кетишни ноқулай билиб, ўз ташвишлари-ни баён этди. Бу йил мева-чева зўр бўлибди-ю, картош-канинг мазаси қочибди. Бориням тўнғизлар кавлаб ташлаётганмиш. Довонни қор босмасдан туриб рўзгор учун керакли нарсани ғамлаб олиши керак эмиш...

Аммо чолнинг дарди йигитга ёт эди. Менга деса, ўша қишлоғингда бир умр қолиб кетмайсанми. Неча пуллик ишим бор бу билан менинг. Ундан кўра машина-нинг кучанишига қаранг, зўриққанидан тўкилиб тушай деялти...

Йўл бўйи бинойидек сўзлашишган, бироқ бир-бирла-рининг дардига бутунлай бефарқ бу одамлар тушган ма-шина қишлоқ четидаги ҳовлига гуриллаб кириб борган-

да, кун пешиндан оғтанди. Ичдан тезроқ изига қайтмокка ошиқиб турган йигит пешайвонли уйга қарама-қарши тушган кулбадан югуриб чиққан кизга күзи түшди-ю, ҳамма нарсаны унуди. Рул чамбарагини мажкам туттанча бақадек қотиб қолди.

Ёқасига кашта чатилган қирмизи күйлакли бу киз охудек чаққон, қайрилма қошлари остидаги каттакон шахло күзлари кишига шу қадар ишонч ва самимият билан боқардик, юрак ўз-ўзидан ҳапқириб кетарди.

Кулоги бозорнинг ғала-ғовурига күнккан, ҳар уч уйнинг бирида қўлбола дўкончаси бўлган, шом тушмай аёлидан тортиб эркакларигача кўчага чиқиб оладиган сершовқин маҳаллада яшаб келаётган йигитга овлоқ бир маскандада шундай бир паривашни учратиш фавқулодда ҳодисадек туюлди. Пешвоз чиққан қизнинг қарашларида, кўйингки, бутун вужудидан шундай бир самимият балқиб туардик, унинг қошида кусур хаёлларга бориши гуноҳдек эди. У табиатнинг ноёб бир чечагидек кишини ўзига мафтун этаркан, кўнгилда беихтиёр унинг бўйидан тўйиниши, кўркидан баҳра олиш истаги туғиларди.

Аммо бу бир лаҳзалик ҳолат.

Довдирашдан базўр ўзига келган одам ичдан тошиб келаётган бу истакка йўл йўклигини дарров фаҳмлайди.

Отамуродни эса қизнинг хусни-жамоли эмас, бокишлидаги сокинлик ва хокисорлик ўзига мафтун этганди. Негаки, ўзи яшайдиган маҳаллада уйлар зичдек, одамлар қанақадир жizzаки, нигоҳлари оғир ва меҳрсиз эди. Торлик ҳамма нарсада — турмуш тарзидан тортиб, муомалаю муносабатда ҳам яққол акс этиб туарди. Тоғликларда эса бунинг акси — худди юксак тоғлардан улгу олгандек, уларнинг қарашларида ажиб бир улуворлик мавжуд эди.

Одатда, Отамурод борган жойида ҳеч қачон узоқ қолмасди. Юкни туширади-ю, дарҳол изига қайтарди. Бу сафар эса чолнинг биргина таклифиданоқ супа томон интилганини сезмай қолди. Бироқ чой устида бўлиб ўтган сухбатда, чол шундай бир гап қилдики, йигитнинг назарида, олам хира тортгандай туюлиб кетди.

У бамайлихотир гурунг берәётган уй эгасига бақра-йиб боқаркан, унинг сўзлари ортиқ кулогига кирмас, тасаввурида жонланган воқеа бутунлай хаёлини банд этиб

күйганди. Каклик овига чиккан күёв йигит, бостириб келаётган кор күчкиси, чиллалик келиннинг дод-фарёди — барини аник-тиниқ кўраркан, қалбида рашкка ўхшаш нимадир уйғонганини хис этди. Ўчоқ бошида куймаланаётган қизга, яъниким жувонга ғамгин караш килди.

Чолнинг кейинги гаплари ундаги қизғаниш хиссини баттар кучайтиарди.

— Ўзиям ғайрати ичига сифмаган йигит эди-да. Кишнинг чилласи демаган, чимилдикда ўтирган келинчагини ўйламаган... Шундан бери қизимиз бевалик азобини тортмоқда.

Уй эгаси бу галларни нечун айтди? Қизига маҳлиё бўлганидан ғаши келдими ё бошқа бирор сабаби бормиди? Қопларини чимирибрөқ сўзлашига қараганда нимадир фахмлагандай эди.

Аслида йигит ўшаңдаёқ Сардор чолнинг кўнглига анча ўтиришганди. Йўлдаёқ Отамуроднинг кирриклардан эмаслигини, ўз таъбири билан айтганда, тузуккина бола эканини пайқашга ултурганди. Бу хил йигитлар мухит таъсирида салгина ўзгаргандек туюлса-да, лекин ҳамиша аслилигича қолаверади. Чол бунга бозор майдонидаёқ амин бўлган. Чойхона сўрисини тўлдириб ўтирган хайдовчилардан бири деганди: «Сиз айтган нархга бу ердагиларни қўзғотишингиз қийин. Лекин чеккада турган хув анову «Камаз»да биттаси бор. Фойда-зиён деб турмайди. Бизди гурунгни унча писанд қилмай, кабинасида газет ўқиб, шеър ёдлаб ўтиради. Илтимос қиъсангиз, йўқ демайди у».

Чол уни кабинада бутунлай тескари, яъни эзгин ва мудроқ ҳолатда учратаркан, чўчиб, жавдираб бокишиданоқ тузук йигитлигини фахмлаганди. Йўлдаги илмокли гаплари эса қасб тақозоси юзасидан қилинган шунчаки инжиқлик эди. Одам боласи шу, қанчалик яхши бўлмасин, мухитнинг таъсири қоқса ёнгил кетадиган гарддек барибир унга кўнган бўлади.

Асил эса гарддан айнимайди.

Қизи хақидаги гапидан кўзланган мақсади эса, меҳмоннинг этини ўлдириш, қизига нисбатан қизикишини сўндириш эди. Бунга ҳов бирда уйига бир тун меҳмон бўлиб кетган овчи йигит сабаб бўлганди. Қизига бсихтиёр ошиқ бўлиб колган овчи йигит ҳе йўқ-бе йўқ,

эртаси куниёқ совчи юборганди. Аммо қиз деб ўйлаганлари эр кўрган жувон чикиб колгач, шўрлик совчилар шу қадар нокулай ахволга тушишгандики, эсласа, хануз чолнинг етмиш етти томири тортишади.

Ўшанда жувон ҳақидаги ҳақиқатни билгач, Отамурод андак маъюсланган. Йўлдаёқ унутиб юборсам керак деб ўйлаган. Йўқ, бунинг акси бўлган. Жувоннинг ёш қизалоқларницидай бесубор боқишлари йўл бўйи уни тарк этмаган. Симёғочлардаги яккам-дуккам чироклар нуридан хира ёришган маҳалласига кириб келаркан, қулоғига чалингтани қўшни хотинларнинг даҳанаки жанги бўлган. Шунда хаёlinи бутунлай банд этиб қўйган жувонни сершовқин бу маҳалладан кизғанган. Булоқ сувидек тиник нарса экан, бу бўтанага аралашиб кета олармикан, деб ўйлаган. Сўнг бу ўхшатиши ўзига эриш туюлиб, ховлисига кирган, бу ердан кўчиб кетмок керак, деган хаёлга борган. Илгари ҳам бу ҳақда ўйлаган, лекин ҳозиргидек қатъий эмасди. Ичкарига кирган ерда, бостирма тагидаги капалакнусха қурилма ёнида тўхтаган. Унда тоғ томонга учмокни истаган ва шундагина жувонни севиб қолганини англаган.

Кўкка парвоз этиш унинг учун шунчаки орзу эмас, азалий иштиёқ эди.

Токи инсон тирик экан, орзулари йўлида, ундан бирор наф этиш-етмаслигидан қатъи назар, ҳамиша ҳаракату изланишда бўлмоғи лозим. Бу унинг, негадир ўзгалирнинг фашини келтирадиган, фикрларидан бири эди. Хаёлидаги тасаввуру аниқ ҳисоб-китоблар асосида тикланяётган капалакнусха қурилмаси эса, шу каби фикрларнинг амалдаги ифодаси эди. Таниш-билишлари эса унинг бу уринишлари устидан кулишгани кулишган, дейдиларки: «Хай, бу зормандангда бир марта учдинг ҳам дейлик, кейин нима қиласан буни? Ё кейин кўргазмага қўйиб қўяссанми?» Айни шу «кейин»и Отамуродни мутлақо қизиқтирмасди. Кўнгли парвоз истарди, тамомвассалом. Бироқ бу истагини тушунадиганлар йўқ, масҳараловчилар эса хоҳлаганча топиларди.

Аёлига талоқ айтаркан, уйидан ўзи билан олиб кетган бирдан-бир нарсаси мана шу капалакнусха машинаси бўлган. Ва шу куннинг эртаси орзусига этишмоғига саноқли сониялар қолганди. Афсуски, «машина» филдираклари бедапоядаги чукурга тушиб, қанотларини син-

дириб олган. Бир хисобда бу яхши бўлган экан. Негаки, ўшанда юраги тўла алам эди. Осмону фалакка кўтарилиб, сўнг ер-парчин бўлмоқчи эди. Чунки аёли уйидан чикиб кетишга мажбур килгани етмаганидек, мактабига келиб роса тўполон кўтарган, ўкувчилари хузурида шарманда-ю шармисор килиб кетганди-да.

Ўша кеч анчадан бери яқинига йўламай кўйган курилма теварагида ўралашаркан, тоққа парвоз килиш истагидан ўртанарди. Ақли-хушини ўғирлаб кўйган тоғлик жувон қошига қанот чикариб учгиси келарди. Ўткир чироқ нурида машинани тузатиш билан банд бўларкан, қаршидаги дарвозага келиб суйкалган кимсанни пайкамай қолмади. Тор кўча хиёнат эшигининг аста очилиб, секин ёпилганини ўзгалар қулогидан яширолмади.

Салдан сўнг жойи алмашган қизалоқнинг уйқусираб йиғлагани эшитилди...

\* \* \*

— Махаллани наҳс бостирдинг, ё кўчиб кет, ё ҳаммани ўзингга илакиширавермай, бирини танла!

Ўша ёмғирли тундаги муштлашувнинг гувоҳи бўлган қўшни аёл қўркувдан ранги ўчиб, унга тикиларкан, Отамуроднинг пўписа қилмаётганини англади. Бир хаёли, ишонган қуроли-шаллақилигини ишга солмоқчи бўлди. Аммо йигитнинг авзойидан ҳайқди. Кизик, жувон шармандаликдан эмас, инсондан чўчиди. Шу пайтгача эрқаклар унинг учун бир пул эди. Кош-кўзини сузуб, мана-ман деганини ўз ноғорасида ўйната оларди.

Буниси эса ҳеч эвриладиган эмасди.

У йигитни кўчиб келган куниёқ кўз остига олганди. Бир-икки ишва қилиб ҳам кўрганди. Бироқ янги қўшни жуда жиддий чикиб қолди. Жувонни таажжублантирган нарса, ўзи аллакачон кўнишиб улгурган иллатга ўзга нигоҳ билан қараш мумкинлиги эди. Махалла эрқакларининг биронтаси бу ишидан жирканмасди. Қайтамга, кўнглини овлаб, бир тун кўйнида ётиш пайида бўлишарди. Бу эса йўқ ердаги шартлар билан бошини котирмоқда. Ё сен кет эмиш, ё мен. Кетсанг кетавермайсанми!

Жувон каршисида разабнок турган йигитга бошдан-оёқ тикиларкан, шу дамгача ҳеч панд бермаган маккорлигини қўллаб кўрмоқчи бўлди.

— Акам бўлинг! — деди кўзига ёш олиб. — Ҳимоя килинг мени!

Бироқ йигитнинг кўнгли юмшамади. Кўзи аёлнинг этагидан тутиб турган қизалокда эди.

— Норасиданинг олдида шу ишни қилгани уялмайсанми! — деди оғир нигоҳини қайта аёлга қадаб. — Увол-ку бу ахир!

Отамуроднинг газабланганича бор эди. Чунки ўзи шахарнинг шимолий қисмидаги кўп қаватли уйлардан бирида турувчи жувоннинг хонадонида тунлари шунинг учун қолмасдики, аёлнинг кўзлари жавдираган ўғилчаси бор эди. «Бари никоҳдан кейин, — дерди хирсини китиклаётган шайтоннинг измига бўйсунмасликка тиришиб. — Ҳалолига нима етсин!» Бироқ бу масалада жувон ўқтамроқ экан, бир сафар ўғилчасини онасиникига бериб юбориб, йигитнинг васлига етишмоққа эришганди. Йигит эса бу хил муносабатни хеч бир таъмасиз, соғ мұхаббат туфайли юзага келишини истарди. Ҳар сафар аёлнинг жон олгувчи табассуми қаршисида ожиз қоларкан, ичиде улкан кураш кетарди ва оқибат, хамиша ақли ғолиб чиқарди. Иккинчидан, болаларни яхши кўргани учунми, бола феъли ҳам йўқ эмасди. Болага ўхшаб йўқ нарсалардан қувонар, шунингдек, тезда кўнгли ҳам қоларди. Норасида олдида гуноҳга йўл кўйишни кечирилмас ҳолат деб биларди. Кўшни жувонни шунинг учун ҳам жуда ёмон кўрарди.

Собиқ аёли унинг ана шу заиф томонини мўлжаллаб зарба берганди. Биладики, эри мактабни яхши кўради, болалар эса жони-дили. Судга қаноат қилмай, мактабда тўполон қўтариши шундан. Тўполондан сўнг Отамуроднинг мактабда ортиқ қолишга юзи чидамади. Оғайнисининг машинасини олиб, бозор майдонига чикди. У бўлиб ўтган бу воқеалардан жуда караҳтади. Қолган барча харакатлари мана шу караҳтлик оғушидаги бўлган-дек эди. Ва бор аламини янги ионхўрни унча ёқтирмай қаршилаган Ботир довонгдан олди. Энди у жилд кўтариб юрган кечаги муаллим эмасди. Бир кечада ҳамма нарсадан мосуво бўлган аламзада эди. Улар хўқиз болтадан қайтмас дегандек, Ботир довони билан эркакчасига гаплашиб қўя қолди.

Аммо аёллар — на собиқ хотини, на қўшини жувон билан бу хилда гаплашиб бўларди. Улар нафрятдан

бошқасига ярамасди. Бироқ йигитнинг нафрати баҳор ёмғиридай ўткинчи эди. Қанчалик кучайса, шунчалик тез тинарди. Кейин топган аёлини севмок истади. Ўзига кўрғон, ўғилчасига ота бўлмокни ўйлади. Шунда билдики, киши табиатида мавжуд одамийликни ҳеч бир нафрат маҳв этолмас экан. Одам боласи қандай туғилган бўлса, шундайлигича, яъни яхши ёки ёмонлигича қолавераркан.

— Чойдан ичинг, меҳмон!

Отамурод бошини кўтариб, қаршисидаги чолга қарди. Хаёлга ботганидан хижолат тортгандай, махзун жилмаяди. Эрталабдан бери қорасини кўрсатмаётган Зумрадни ўйлаб, умидсизликка тушаётганини хис этаркан, кизнинг кўнглини сўрамай, тўғридан-тўғри совчи юборган ёшлик кезларини эслади. Кейин хотини кўп бор юзига солган, сизга суйиб тегмаганман, отам мажбурлаб берган, деб. Худди шу нарса сабабми ё жувонда қандайдир бир сир борми, аввало унинг кўнглини овлашни ўйларди. Агар у ризолик берса, чолнинг оёғига бош уришга ҳам тайёр эди.

Аммо бу кечаги орзу эди. Жувон «кейин» дея умидлантирувчи алланимага шама қилгандай эди. Бугун эса гўё қочиб кетгандай, ҳануз қорасини кўрсатмаётган эди. Айтишларича, бу қишлоқ қизлари йигит томонни ёктири маса, ортиқ кўзга ташланмай қўя қоларкан.

Наҳотки щундай бўлса!

Шу пайт йигитнинг қулоғига ёқимли бир гап чалингандай бўлди.

— Таом пишгунча чой билан қоринди алдаб турамизда энди, меҳмон.

У, шартмиди шу, бекорга овора бўпсизларда, дея минфиrlаса-да, ичдан ғоят шодланди. Негаки, вактни бир оз чўзмоққа зўр имкон эди-да бу. Тагида гуриллаб ўт ёнаётган қора қозондаги овқатнинг сира пишмаслиги-га ҳам рози эди у.

Йигитнинг беихтиёр жонланганини сезган Сардор чол мийифида кулимсиради. Аслида эса, ўзи ундан кам безовта эмасди. Кизининг қаерга кетганинг ўзича тусмоллаётган бўлса-да, қандай кайфиятда қайтишидан бутунлай бехабар эди. Агар кизи ҳали-бери қайтмаса, демак, йигит умидини узгани маъқул. Эшигига ортиқ танда кўйишидан маъни йўқ. Зумрад зоҳиран юмшоқ

кўрингани билан, анчагина қайсар. Кўнгли чопмаган кимсага қорасиниям кўрсатмайди. Бу ҳол илгаријам бир-икки бор содир бўлган. Ўшанда чол қизининг катъиятидан лол қолганди. Шунга қарамай, қизнинг бевалиги чол-кампир учун улкан дард эди. Тезроқ жойини топиб кетишини исташарди.

Сардор чол бугунги синоат хақида кампиридан сўрашга оғиз жуфтлади-ю, истиҳола қилди. Қачондан бери аёлларнинг сирига қизиқадиган бўлиб қолдингиз, дейишидан ийманди.

Ахир кампирида Абдураҳмон чавандознинг қони бор, ўқтам ва чўрткесар. Мехри, меҳри қатори қаҳри хам дарё. Аксарият аёлларга ўхшаб ҳуда-бехуда нарсаларга аралашавермайди. Аралашар бўлса, хар қандай ишни бир ёқлик қилмасдан кўймайди. Кечаги йигитларнинг мулоим келиб, мулоим чиқиб кетишларининг боиси шундан. Кампири овозини кўтарган кимсани ёқтирмайди. Шу битта қизимнинг бошини кўриқлашга ўзимниям кучим етади, сенларга пишириб кўйибдими бу ерда, дейишдан ҳам тоймайди.

Бу қишлоқнинг удуми шу – уйингдаги меҳмонга кўшнининг ити ҳам хурмаслиги керак.

Сардор чол бу ҳикматни биринчи бўлиб Абдураҳмон чавандоздан эшигтанди. Довонда милтири чақилмай, Абдураҳмон чавандоз уни ўз қишлоғига бошлаб келаркан, тўқиз боларли уйини бўшатиб деганди:

– Кетсанг, ана катта йўл, қолсанг, мана уй. Бу қишлоқда уйга келган меҳмонга қўшинининг итиям ҳурмайди. Мабодо ҳалиям жонингга қасд килиш фикридан воз кечмаган бўлсанг, мана яроғинг. Мен буни манову михга осиб кўяман. Хоҳлаган пайтингда олмоғинг мумкин. Фақат неки номаъкулчиликка қўл урсанг, аввалига танангта бир ўйлаб ол. Ҳозирча меҳмоним экансан, чиқиб мезбонлигимни килай.

Абдураҳмон чавандознинг ўқтамлиги, айникса, ҳеч нарсани сўраб-суриштираслиги Сардорга жуда ёкиб тушганди. Сўраган тақдирдаям, сўйламоги жуда оғир эди. Сўилаш тугул, эслашнинг ўзи қийин эди. Аммо ҳарчанд эсламасликка уринмасин, хотира дегани бами-соли кора қузгундай бостириб келаверарди.

Ўшанда айқашиб ётган ялангоч таналарга кўзи тушганида, дастлаб унда ғазабдан кўра, ҳайрат кучлироқ

эди. Чирмашиб ётганларнинг бири ўзининг жуфти ҳалоли-ю, иккинчиси «ука»си эканлигига ҳеч ишонгиси келмади. Тоғасининг шаҳарда ўқийдиган ўғлини ўз укасидай кўрарди. Орамиздан ҳеч бўлмаса шу ўқисин деб, ҳар келганида чўнтағига пул солиб кўярди. Бу сафар тупканинг тагидаги бир оғайнисидан пул олиб қайтганди. Мана, чўнтағида дўппайиб турибди. Эрталаб ўзи автобусга чиқариб кўймоқчи эди.

Сардор кўз ўнгидаги шармандаликни идрок этолмай тураркан, йўлдан озганларнинг конида жўш ураёттган шайтон фурсатдан фойдаланиб, лип этиб унинг елкасига миниб олган. Кулолига шивирлаган: «Ўлдириш керак! Ҳаяллатмай отиб ташлаш керак! Яроғинг нариги хонада турибди. Олиб чиқ-да, иккаласиниям шартта отиб ташла!» У шайтон куткусига учиб, қўшни бўлмага отилиб киради. Яроғини осонгина топади-ю, аммо ўкларга келганди, раҳмон халақит беради. Ўқ жойланган қутичани толиши қийин кечади. Пайпасланиб қидиради, қани энди, лаънати қути топила қолса.

Милтигини ўқлаб чикканда эса, шармандали тўшак вайрон... Зинокорлар аллақачон ғойиб бўлишганди.

Тонг қоронғисида мудраб ётган қишлоқ бу синоатдан бехабар. Милтиқ тутган йигит ҳовлида бехуда кезинади.

Аламдан ҳайқирмоқ истайди.

Овози чиқмайди.

Уйга қайтиб кирмоқни ўйлайди. Киришдан жирканади. Фазабдан қилт-қилт титраганча, уй пештоқларига, деразаларига боқади. Ҳаёлидан, бу уйда энди қандай яшайман, деган ўй ўтиши билан, яроғини деворга суюб, ошхонадан керосин тўла идишни олиб чиқади.

Тонгги қоронғиликни парчалаб, уйи лангиллаб ёна бошлаганида, у аллақачон дўнглиқда эди. Яхши ит ўлигини кўрсатмайди, дея боши оққан томонга кетиб борарди. Қасос олиш, ўлдириш истаги сўниб, ўз жонига қасд қиммоқ куткуси кучайганди. Бу кутқу етовида канча юрди-билмайди. Йўлда дўппайган чўнтағидаги пулни сезиб, уларни шамолга сочиб юборди.

Нотаниш булок бошида бир зумга тин оларкан, етимлигидан ўксинди. Жигарининг хиёнати туфайли тоғаси ва бошка хешларидан айрилганини ўйлади. Ортга, қишлоғига йўл йўқлигини англади. Юз берган воқеа-

ни тоғасига қайси тил билан айтади. Дарвоқе, айтгани билан нима ўзгаради? Майли, бу мудхиш сир сирлигича қола қолсан. Тоғаси құлиға косов тутиб, жасадини кул орасидан қидираверсін. Вөкөани эшитса, минг күяди, ўлган дея гумонланса, бир күяди.

Үша куни ҳаво намхуш, булутли әди. Қуёшдан дарал үйк, күнглида маңзұнлик кучайғандан кучаярди.

У құлидаги яргини құксига тираганини сезмай қолди. Елкасидаги шайтон эса баттар пишант берарди: «От! От ўзингни! Яшаб нима қиласан бу бевафо дунёда! Биргина ўқдан сұнг барини унұтасан!»

Аммо умри бор экан, түсатдан келиб қолған Абдурахмон чавандоз барига чек қўйди. У унущиши истаган ходисалар эса бир умрга хотирасида михланиб қолди. Дастреб ёмон, жуда ёмон кийналди. Ҳайтовур айик воқеаси орага тушиб, бир оз чалғиди.

Тонглардан бирида эшик кескин очилиб, останада Абдурахмон чавандоз пайдо бўлди.

— Айик овига қалайсан? — дейди гулдираган овозда. — Биз айикни тоға, жондорни оға деб улғайған одамлармиз. Хеш деб биламиз уларни. Аммо-лекин қутурганини аяб ўтирумаймиз. Қоратошда айик бир кишига хужум қипти. Қани, лаллаймай, милтиқни құлинингга ол! Баҳонада сёкни чигалини ёзиб келасан.

Энди билса, айик фожиаси уни сескантириб, тушкунликдан асраран экан. Ўзга бир жоннинг ўлеми уни ҳаётта қайтарған экан. Ўшанда Сардор чол ўлемга рўпара келиб, унинг совуқ нағасини туймокқа улгурғанди.

— Товда айик кўпга ўхшайди, — деди Отамурод ўз навбатида унинг ҳаёлинин бўлиб. — Кеча пастда тезакларини қўргандай бўлдим.

— Улар бизга тоға-да, — дея кулди Сардор чол. — Индамасак, ховлигаям кириб келаверади.

— Қанақасига? — Йигит ҳайратини яширмайди.

— Шунақасига.

— Отмайсизларми?

— Йўк.

— Нечун?

— Нечунлигини кеча сўзлаб бердим шекилли.

— Мен эртак деб ўйлабман.

— Биз эртак сўзламаймиз.

— Бунақада товни айик босиб кетмайдими?

— Босмайди, — Чол енгил хўрсинди. — Нега деганда, дўстлари катори фанимлариям кўп. Уларни биз орувлаймиз, бошқалар аяб ўтиришмайди. Кунботишига қараб юрсангиз, Сувлок деган қишлоққа дуч келасиз. Одамлари чаток, сувдагини тутиб, осмондагини отиб ейишади. Бундай олиб қарасак, уларам товлик, бизам товлик, фарқ эса катта. Жониворлар қаерда кўп ӯралашибади, қадр топган ерида-да. Лекин қутурган жониворни аяб ўтиришмайди. Жон беришига кўмаклашамиц. Сизди ёшингизда биттасига бет бўлганман. Ўлишимга сал қолган. Айик қутурган экан, қовурғамни эзib ташлаган. Мана шу момонгиз оёқлаттан мени. Жонимдан тўйиб юрган пайтим эди, сўнг ўлимни истамай қўйганман.

— Қанақасига?

— Тарихи узун бунинг.

Чол кулимсиарркан, йигитнинг чанқоқ нигохини пайқаб, хикоя қилмоқ истагини туяди.

\* \* \*

Ўлим бу сафар ҳам четлаб ўтганини ўша тўққиз болорли уйда ҳуши ўзига келиб билди. Шифтта тикилиб ётаркан, не воқеа юз берганини тезда англаёлмади. Шарпани илғаб, эшик томон бош буаркан, қўлида ёғоч кося билан кириб келган кизнинг ташвишманд қиёфасидан ўз ахволи тузук эмаслигини фаҳмлагандай бўлди. Танида кўзғолган кучли оғриқдан шуури тиниклашиб, тириклигидан фоят ажабланди. Бу бир мўъжизадай туғулди. Яхши эслайди, кўкси ва ягринидан яралангандай айик бор бўйича унинг устига босиб тушганди. Йиртқичнинг қайнок нафаси юзига урилганида ҳушини йўқотдими ё кейинми, аниқ эслаёлмаса-да, тирик колганидан ажабланган кўйи, бошига келиб чўнқайган кизнинг хатти-ҳаракатларини зидан кузатаркан манглайига босилган нам латтадан сесканиб тушди. Шунда бутун вужудига азоб бераётган оғриқ ўчокларини аниқ хис килди. Кўкси ва қорнида чидаб бўлмас оғриқ бор эди. Даастлаб миясига келгани шу бўлди: «Ишқилиб, ичакчавоғим жойидамикан?»

Кўрпа остида шалвираб ётган қўллари беихтиёр пай-насланишга тушганди. Қиз, тек ётинг, дегандай қош чимирди. У чаккаларидаги бармоқ учларини хис қилиб, оҳиста кўзларини юмди.

Кейин қишлоқда яроқ тутишга қодир йигитлар сероб бўла туриб, Абдурахмон чавандоз нечун ўзини танлаганидан ажабланди. Ажабланиши шубҳа-ю гумон билан алмашинди: «Минг қилсаям бегонаман-да, ўлса ўлиб кетавермайдими деган чиқар». Бирдан ўзини баҳтсиз се-зиб, мижжалари ёшланди. Бегона қишлоқ, бегона том остида ётиши ёмон кор қилди. Тоғаси қуриб берган уйга ўт кўйиб, мана, етти ёт бегоналар орасида хешсиз, биродарсиз ётибди. Тоғаси қидираётган чиқар. Ё ёниб кетган дея гумон қилдимикан? Тоғасининг ўғли шаҳарга кетгани аниқ. Хотини қайси гўрга бош уриб борди экан. Хойнаҳой, эрим уйдан ҳайдади, дея отасиникига боргандир. Балки ўйнаши билан шаҳарга қочиб кетгандир.

Ўшанда нега хотинини қидирмади? Фазаб устида уни топиб, конига беламади! Қаҳри чексиздай эди, аммо қаҳридан умидсизлик ва рухий тушкунлик устуворлик қилди... Қизик, яқингача ундан баҳтли одам йўқдай эди. Кўрасида беш-олти моли, уйида гўзал хотини, шундоккина бикинида меҳрибон тоғаси. Буни қарангки, бир сониядда бари саробга айланди. Аёли қочди, уйи ёнди. Ўзи эса ити танимаган ёт бир қишлоқда шифтга тикилиб ётибди.

— Вой, манову кишининг йиглашини!

Сардор ўзига келиб, кафти сирти билан янокларини суртди. Ўзига ҳамдардлик билан қараб турган қизга хижолатомуз бокди.

— Амаки қани? — деди шундагина Абдурахмон чавандозни эслаб. — Тирикми ишқилиб?

Қиз, тирик, деган маънода бош иргаб, эшик томон юрди.

Абдураҳмон чавандознинг омонлиги Сардорни унча кувонтирумади. Кўнглида ададсиз иддао бош кўтарганди: «Қишлоқда шунча йигит бўла туриб, ажалга мени рўларў қилди-я. Минг қилсаям бегонаман-да».

Аламли ўйлардан янада тиниклашган шуурида бўлиб ўтган воқеалар секин-аста ёркинрок жонланга бошлади.

Айик кутилмаган ердан чиқиб келди.

Улар Кўшсув теварагини кўздан кечиришаётган эди. Кўнғир айик қоя тубидаги буталар орасидан тўсатдан чиқиб қолди. Абдураҳмон чавандоз қутуриб ташланган. Йиртқичга кетма-кет ўқ узди-ю, эпчиллик билан ўзини четга олди.

— От! — дея ҳайқирди милтигини қайта ўқлашга уринаркан. — Отсанг-чи!

Сардор ўқирганча устига бостириб келаётган айикқа хар иккала ўқни бўшатишга базур улгуаркан, ортига тисарилаётуб, тошга коқилди. Чалқанчасига йикилди. Йиртқич унинг устига босиб тушди.

Кейин эшитса, Абдураҳмон чавандознинг сўнгти сонияларда узган ўки жонига оро кирган экан. Узилган ўқлардан бири жониворнинг қулоғини, бири эса миясими титиб юборган экан. Жони узилётган йиртқичнинг биргина панжа силкишиёқ йигитни абгор килган экан. Улкан панжаси билан бир уришда хўқизни йиқитадиган хайбатли жониворга одам боласи нима бўлибди, хасдек бир гап-да.

Ўлимга илк бор юзма-юз келган Сардор лаҳзанинг ўндан бир улушкига тенг вақт оралифида кўп нарсани, яъни тирикликтининг нақадар омонатлигини, ҳаёттинг фоят ширинлигини, тирик жон борки, ўлимга осонликча бўй беришни истамаслигини, сўнгти нафасигача талашиб-тортишишга хозирлигини, бунақа пайтда нурга йўғрилган борлик ўзга бир тус олишлигини англашга улгурди. У коронфилик қаърига сингиб кетаркан, сўнгти сонияда сезгани йиртқичнинг қонга тўла нигохи бўлди. Унинг кўзларида жазава қаторида, чорасизлик, аллақандай ададсиз илинж учқунлари ҳамда ҳаётга ташналик бор эди.

Бироқ у бу ҳакда ортиқ ўйламасликка тиришар, ўзича Абдураҳмон чавандоздан ўпкаланиб ётарди. Кўйиб берса, пиқиллаб йиғлашга ҳам тайёр эди-ю., қизнинг қайтиб кириб қолишидан ийманиб турарди. Хуллас, ёлғизлик қаттиқ кор қилиб... Аммо дунёда шундай кишилар борки, уларнинг туриш-турмушию ҳатти-харакатидан ҳаёт нафаси уғуриб туради. Бундайларнинг кенг қўксига бир зумга бош қўйишинг биланоқ хар қандай дардан халос топгандай бўласан. Уларда тириклик деб аталган қудратли бир куч мужассамки, эзгин ҳаёлларингни қувиб, яшашибга иштиёқ уйғотади.

Эшикдан гуриллаб кириб келган Абдураҳмон чавандоздан шу нарсани хис қилган йигитнинг гумонлари тумандек тарқаб кетди. Чавандознинг соғлом чехрасига ёш боладай жавдираб, ютиниб бокди.

— Қалай, ўзингта кеп колдингми? — деди Абдурахмон чавандоз гуриллаб. — Кўлинг бут, оёғинг соғ, қовурғаларинг бир оз лат еган, холос. Ҳечкиси йўқ, ҳадемай отдай бўп кетасан. Аммо қойилман, сира ўзингни йўқотмадинг. Эмасам, иккимизни ҳам таппидаи эзив ташларди у. Бунаقا жоноворни икки-уч ўқ билан йикитиш кийин-да.

Сардор инграпиди қўйди.

— Хи-и, ўлим осонмикан? — Абдурахмон чавандоз истехзоли жилмайди. — Сен эса Худо берган ширин жонингдан осонгина воз кечай деб ўтирибсан. Ўлим нелигини ўз кўзинг билан қўргин деб эргаштириб чиқдим сени. Эмасам, қишлоқда йигитлар камми. Айтганча, довон орти қишлоқларидан бирида қизиқ воқеа бўпти. Бир йигит хотинини ҳайдаб, уйига ўт қўйиб, бошини олиб кетганмиш. Тағин сен бўлмагин у? Тусмолимча сенсан-ов. Воқеага қараганда, аёл кишидан каттароқ гап кочганга ўхшайди. Акс ҳолда йигит одам уйига ўт ёқиб, кўкрагига милтиқ тираб юрмасди. Рангинг кўп ўчмасин, не гап ўтганини сендан сўраётганим йўқ-ку. Гап шу, бугундан бошлаб сен шу қишлоқнинг фарзандисан. Менинг жигаримсан! Яраларинг битиб, ўйноклаб кетсанг, ҳали уйланаман дерсан. Ҳаёт-да бу. Агар ниятингни сўзда айттолмасанг, чакмон остидаги манову белбоғни ўрта михга осиб кўй. Шунчаки белбоғ эмас, авлодимиз «тил»и бу! Тил андишага боргандা, бу сўзлайди. Тушунмадим дейсанми? Тушунишинг шарт эмас, айтганини қиласанг бас. Қолган гапни эса кейин гаплашаверамиз. Қишлоқда қолиши-қолмаслигинг ўзинга ҳавола. Ҳозир эса тезроқ оёклаш пайида бўл!

Ўшанда у Абдурахмон чавандознинг ўқтам гапларидан руҳ олганди, кувват олганди. Назарида, ҳозир каршисида жони ҳалак ҳолда эзилиб ўтирган Отамурод ҳам шу хил кўтаринки хитобларга жуда муҳтождек эди. Афуски, у Абдурахмон чавандоз эмас, камсуқум бир одам. Ҳозирги ҳикояси эса йигитни чалғитиш, аникроғи, гурунг учун эди. Ахир меҳмоннинг олдида мум тинплаб ўтиrolмайди-ку.

Сардор чол шуни аниқ билардики, агар бугун қизи томонидан тайнинли бир жавоб бўлмаса, йигитнинг яна қишлоқка келмоғи жуда қийин кечади. Бу сафар-ку тўрт-беш қоп ёнғоқни баҳона килиб келди. Ана, машина

устида кераксиз буюмдай уюлиб ётибди. Йигит асл максадини яширган бўлса-да, чол аллақачон барини фахмлаб ултурганди. Нега деганда, арzon-гаров мева-чева илинжида келганлар ҳеч вакт совға-салом тўлдирилган ялтироқ қути билан ташриф буюрмайди. Кейин бир тийин устидан ўлиб-тирилиб тортишади. Сўнг харид қилган нарсасини олишади-ю, худди ёв кувгандай дарров изига қайтишади. Ўша ялтироқ қутида бир гап борлигини чол қизининг хатти-харакатиданок пайқаганди.

Бироқ чолнинг ташвиши бутунлай бошқа томондан эди. Қишлоқдан йигитнинг эсон-омон чиқиб кетишини ўйларди. Кеча қишлоқда кимdir хунук гап тарқатибди. Чол не гаплигини шомга яқин мулојимгина бўлиб келиб-кетишган уч йигитнинг авзойидан сезганди.

Улар аяб ўтиришмайди.

Чол мана шунисидан хавотирда эди.

У аллақаерга гум бўлган қизини йигитгина эмас, қозон бошида куймаланаётган кампири ҳам илҳақ кутаётганини фавқулодда фахмлаб қолди. Кампири атай имиллаган кўйи, сой томонга, киши билмас, қараб-қараб кўймокда эди.

Айик тўғрисидаги гурунг орасида тилга олиб ўтилган белбоқка йигит қизиқиб колганида, чол бу ҳақда ҳам гапирмоқчи эди. Йигит қизикмагач, у хотиралари билангина чеклана қолди.

Ўшанда ипак билан безак берилган кирмизи ранг қадимий белбоғни икки токча оралиғидаги катта михга осгани билан ниятини илғатиши жуда қийин кечганди. Ахир қандай қилиб айтсин. Айтса, Абдураҳмон чавандоз ўлдириб кўядигандек эди.

Абдрахмон чавандоз бир-икки сўровдан сўнг, ниманидир сезди шекилли, қисташни бас қилди. Йигитнинг очилишини кутди.

Сардор эса ҳануз жим. Ҳатто қайдандир дарагини эшитиб келган тоғасига ҳам бу ҳақда оғиз очмади. Тоға эса, тўсатдан ғойиб бўлган жиянидан роса ўпка-гина қилди. Сабабини сўраб-суриншитирди. Бўлиб ўтган хиёнатдан тоғанинг бехабарлигини сезган Сардорнинг айтган гали шу бўлди.

— Ичимда бир касалим бор экан, унга шу қишлоқнинг ҳавоси даво экан.

— Ҳаво лейсанми? — Тоға баттар ажабланди. —

Бизам товда яшаймиз шекилли?! Ё бу ернинг хавоси сутга чайилган эканми, ёки асалга қорилганими? Ҳай, унда нега уйингга ўт қўйдинг? Бунисига нима деб баҳона толасан?

Сардор дастурхон четини букиб, ёзганча тўнфиллайди:

— Ичи тўла микроб экан, ёкиб юбордим...

Абдураҳмон чавандоз мезбон, тоғанинг чойига қарди, овкатига қаради, лекин сухбатига аралашмади.

Тоға ҳайрон кетди, қўзларини намлаб кетди.

Эртаси эса михдаги белбоғ тўсатдан ғойиб бўлиб колди. Абдураҳмон чавандознинг аёли уни кизининг хонасидан топиб чиқди. Чавандоз белбоғни тутамлаб, узок ўйга толди. Тошга ўтириб, ўйлади, ҳовлига чиқиб ўйлади, тоғларга бокиб ўйлади. Сўнг йигитни каватига чорлади.

— Ниятинг қолиши, кетиш? — деб сўради.

— Ҳозирча кетиш ниятим ўйк, — Сардор ердан кўз узолмай гапирди. Қора терга тушиб, вужуди қалтираб сўзланди: — Кейин... бир гап бўлар!

— Унда иморатга ер танла!

Сардор теваракка кўз солди. Ер танлаши қийин бўлди.

— Иморатни, анову газага сол, — дея кўмакка келди Абдураҳмон чавандоз. — Бу газанинг қишлоққа ҳеч дахли ўйк...

Сардорга илгари қишлоқдан айро бўлган бу дўнглик жуда маъқул келди. Қишлоққа ичкуёв бўлишни истамай турганди. Абдураҳмон чавандоз буни дарров фахмлади ва эртаси қишлоқ йигитларини дўнгта бошлаб чиқди.

Йигитлар хаш-наш дегунча иморатни тиклашди.

Сардор михдаги белбоғни олиб қўйган қизга ўйланди. Абдураҳмон чавандозга куёв бўлди. Қишлоқ ахли учун эса «яккatomлик куёв»га айланди.

\* \* \*

Отамурод эшик ва деразалари зич ёпик кулбага, сойга энган сўқмоққа зимдан-зимдан кўз кирини ташлаб қўяркан, жувоннинг рад жавобидан қалби ўпирилиб тушишини қайта ҳис қилди. Сардор чолнинг гурунги ортиқ қулоғига кирмай, маҳзун хаёлга толди.

У тұсатдан севиб қолиши мүмкінлігінің ҳеч үйіга келтирмаганди. Бу түйғу шириң, үз навбатида, агадсиз азобларға гирифтор қилишини билмаган экан. Айни дамда эса, күнглида саркашликка үхашаң нимадир үйғонған. Илкис ўрнидан құзғалиб, умиду армоналарини, азобу тотли ҳисларини шу хөвлида қолдириб, жұнаб кеттиси келарди. Бирок у құрінмас бир ип билан шу қадар чирмаб ташланғандықи, уни шартта узмоққа на холи, на истаги бор эди. Қараалардың әш қызалоқтарнан кидай хокисор, табассуми ғоят жозибали, юзлари шудрининг ювған тоғ лоласидай товланувчан бу паривашнинг ҳуркак никохлари нималарни дір вайда қылардик, уни биргина күрмай кетишнинг ўзи бориб турған азоб эди.

Каерда у? Наҳотки күнгил изхорига унинг берган жавоби шу бұлса!

Йигитнинг турли гүмөн ва умидсизлик гирдобида азоб тортишига сабаб бўлған Зумрад эса айни дамда қишлоқдан унча олис бўлмаган арчазорда тиззаларини күчганча хаёлга чўмиб ўтиради. Оёқлари тагида вафодор ити Тўрткўз ётарди. Жувоннинг маъюс никох сийрак арчали бетта қадалғанди. Бу қишлоқ аёллари мозорга боришмайди. Рози-ризолик учун жувон бу ерни бекор танламаганди. Кўз очиб қўргани мана шу бетдан кўчган кўчки остида колиб ҳалок бўлған. Қишлоқ ахли қидириб топгунга қадар, ўн кундан ошик шу ерда ётган. Жувоннинг назарида, унинг биринчи қабри мана шу маскан эди. Бу ерга келиб-кетишига эса ҳеч ким монелик қилмайди. Исталғанча хаёлга чўмиб, хоҳлаганча кўз ёши тўкиши мумкин.

Ҳар сафар бу ерга келганида, наздида, бутун олам унга кўшилиб, мотам туттандай туюлади. Арчалар сұкутда котади, майин шабада шўхлигини бас қилади, тоғ жониворлари сас чиқармасликка тиришади...

Кече йигит ёнғоқзорда холи учратиб, ризолигини сўраганида ҳам у мана шу манзилни кора тортғанди. Сийрак арчали бетта тикилғанча, қалбидаги кечинмаларини қуйидагича баён эттанди: «Тўрт йил иззатингизни қилдим. Шу вақтгача ёлғиз сизнинг хаёлингиз билан яшаб келдим. Бундан сўнг бу тарзда яшаётмайман. Яшашим ҳам мумкин эди. Аммо қулаган харсанг эзиди үтган арча новдасиям қайта кўклашга уринади, офтобга интилади. Мен-ку бир тирик инсон. Агар билсангиз, бе-

шик тебратгим келади! Гўдак хидидан маст бўлгим кела-ди! Назаримда, меҳмон йигит ёмон йигитга ўхшамайди. Караплари самимий, кулишлари ёқимли... Мени таш-лаб, узоқларга кетаркансанда деб ўпкаламанг мендан. Аёл бамисоли бир тош, қаерга отилса, ўша ерда тек қот-моғи лозим. Бу қишлоқда менинг tengim йўқ. Бари уй-ланган, жойланган... Менам гўдак кучсам дейман! Су-ким кирмасин деб, дугоналаримнинг боласини қўлимга олишдан кўрқаман. Кийналиб кетдим жуда! Шунинг учун айбламанг мени! Рози бўлинг мендан! Тушларимга кириб, ризолигингизни билдиринг. Шўрлик йигит жуда кийналиб кетди. Кўзлари тўла мунг. Кўп азоб тортганга ўхшайди. Рози бўлсангиз, у шўрликнинг ёқасини оқартирай, бошини кировдан асрай! Бешик кучиб, гўдак хидлай! Белги беринг менга. Бу ёқда қишлоқ йигитлари фимиirlab қолишиди. Нимадандир фаши келаялти улар-нинг...»

Бугун эса жувон ўзида йўқ шод эди. Эрининг руҳи-дан миннатдор эди. Тонгта яқин тушига эри кирибди. Узоқ жилмайиб туриб, қўйнидан оппок шоҳи рўмол чиқариб берибди. Рўмолингни қайтардим, баҳтингни берсин, дея аста қўздан ғойиб бўлиби. Бундан миннатдор жувон эрининг руҳи билан сўнгти бор хайрлашгани келганди.

Табиий, Отамурод бу синоатдан бехабар. Зумрад-нинг тўсатдан ғойиб бўлишини ўзича тусмоллаб, турли хаёллар исканжасида коврилиб ўтиради. Кўнглига йўл тополмадим, дея азобда эди.

Одатда, аёллар билан тил топишиш Отамурод учун хеч кийин кечмасди. Самимият билан ёндашгани учунми, аёллар унга тез эл бўларди. Аммо нозиктаълиги ту-файли, ҳар қаңдай аёл ҳам унга ёқавермасди. Анчадан бери қўпол, серғалва хайдовчилар даврасида тирикли-лик килиб келаётган эса-да, хали-ҳануз нозиктаъблиг-дан кутулмаган, чапанилик унинг табиатига бутунлай ёт эди. Шунинг учун ҳам оғзи шалоқ ҳамкаслари гурун-гига қўпда қўшилавермас, гоҳида одам қайнаётган бозор майдонига хаёлчан тикилиб, нима қип юрибман ўзи бу ерда, деган ўйга бораради. Шунда тириклик туссиз, одамлар эса ҳиссиз кўриниб кетарди кўзига.

Бир хилдаги туссиз кунлар — на кувонч бор унда, на умид. Бирор сенга талпинмайди, сен бирорвга интил-

майсан. Мулокотлар ўта жүн. Күн билан туннинг айланниши ва эврилиши тирикчилик деган ҳиссиз тушунча теварагида кечәёттандек туюлади.

Нимаси бу?

Бир вактлар ўзи мұқаддас деб билған, әзгу орзуларга түлиқ тириклик нечун бу қадар жўнлашиб кетди?

Хаёлга толади.

Бунаقا пайтда луғат бойлиги нихоятда қашшок, серғалва ҳамкасларининг овози қулоғига кирмайди. Девона, дейишади бошқа хайдовчилар унинг бир чеккада хаёлга ботиб ўтиришини кўриб. Шунда «девона»нинг хаёли бирдан бўлинади. Бошини кўтариб, ўзинга салом берган кимсага ажабланиб бокади. Тезда таний қолмайди. Кархисидаги кимса «устоз» сўзини тилга олгандан сўнггина, рўпарасида собиқ ўқувчиларидан бири турганлигини фахмлайди. Қуюқ сўрашаркан, ўсиб кетибсан, униб кетибсан, деганга ўхшаш чучмал гаплар қиласди. Ичдан эса ўзини жуда иоқулай хис этади. Ўз навбатида, қархисидаги кимсанинг кўзларида зухурланган ҳайратни илғамай қолмайди. Бунга сари баттар сикилади. Ахир бир вактлар дарё ва денгизлар, ўрмон ва кенгликлар хақида берилиб сўзлайдиган, зиёли бир одамнинг ирkit чойхонада, бақироқ кишилар орасида ўтириши кизик-да. Боз устига, эгнидаги кўйлаги фижим, соқоли киртишланмаган, фақат қарашларигина ўша-ўша, сокин, хотиржам ва меҳрли.

У, бу ишда оппок кўйлак кийилмайди, бўйинбоғ ҳам ортиқча, дегиси келади. Нега? Негалигини эса ўзи ҳам билмайди. Изоҳ нечун, бари рафторингдан кўриниб турибди-ку! Қизиқ жиҳати, күёш илгари ҳам худди ҳозиргидек нур сочарди. Ҳозир ҳам шундай. Бирок нимадир ўзгарган. Ташида эмас, ичида. Демак, олам дегани кўнгил экан-да. Кўнгилдаги эврилишларга қараб, қўёш тусланаркан-да. Манглайида хол-ахвол сўраб турган собиқ ўқувчиси унинг ўтмиши, мақсад ва маслакка йўғрилган кечаги куни. Бугуни эса жуда ночор. Нақалар ночорлиги эса кархисидаги кимсанинг кўзларида акс этиб турибди. Шунингчун ҳамиша собиқ ўқувчиларидан қочмоқ истайди. Аммо улар узокдан кўрибок югуриб келишаверади. Ҳатто яқинда бири шеърий китобчасини ташлаб кетди. Шапалоқцеккина.

У бир лаҳзага ўтмишга қайтди. Кафтидаги китобчани авайлаб вараклadi.

— Эхтиёт бўл, тагин тушириб синдириб қўйма.

У бошини кўтаради. Ўзига ишшайиб тикилиб турган ҳамкасларини кўради. Чукур хўрсиниб, теваракка кўз ташлайди. Бозор, тирикчилиги билан банд оломон. Юраги ториқади. Кўланса бир гапдан сергак тортади.

— Китобчангдан бир-икки варак йиртиб бер, нарёққа ўтиб келай.

Йигит шу дамгача ҳақорату камситишларнинг турли-туманини эшитган. Лекин бунисига тоқат қилмоқ қийин-дек туюлади. Ўнг панжаси беихтиёр мушт бўлиб тугила-ди. Бопладимми, деган маънода илжайиб турган йўғон хайдовчи йигитнинг ҳиссиз афтига ғазабнок тикилади. Дўппосламоқ ўйида ўрнидан кўзғаларкан, бирдан ни-ятидан қайтади. Онгиз бир вужуд-ку бу, урмоқдан не фойда, деган хаёлга боради. Ўзини боса олганидан қувонади. Сўнг қўлидаги китобга чалғиади. Ундаги гўзал сатрларни кимгадир ўкиб бергиси келади. Тааж-жуб, тевараги тўла одам-у, лекин бирор тингловчи йўқ. Шунда сўрида оёкларини осилтириб, валақлашиб ўтирган шерикларига, тирикчилик фамида ивирсиб юрган бошкalarга шогирдининг гўзал түфёнлари кераксиздай туюлади. Унда нима учун ёзилади бу беғубор таш-бехлар?

Йигитнинг кўнгли ғаш тортиб, ўзини бу ерга боғлаб турган сабаб ҳақида ўйлайди. Ўйлашиб билан яқин ўтмиши қаъридан кўзлари қаҳрга тўла аёлнинг маккор сиймоси қалқиб чиқади. Аёлнинг юпқа лаблари орасидан «қанот қоқкан» сўнгги иборагача Отамурод дунёда ки-ракашлик касби борлигидан бехабар эди. Бозор майдони чеккасида қатор турадиган машиналарга кўзи тушарди-ю, лекин бу олам сир-асрорлари билан иши бўлмасди. Кейин юз берган воқеалару кескин равишда ўзгарган турмуш тарзи мисоли занжирдек бир-бирига боғлиқ эса-да, барча тафсилотлар бошида шу биргина заҳарли ибора қалқиб турарди.

«Сен ҳам эркакмисан!»

Сайилда киз танлама, безаги тишда-ю иллати ичида бўлади, деганларидек, аёлининг «ялтироқ» лигига учиб уйланган Отамурод кейин бошини чанглаб қолди. Аёлнинг уқувсизлиги етмагандек, дили сўқир, тили узун

эди. Сўзнинг фаҳмига етавермасди. Сўнгти бор айтган гапи эркак киши учун нақадар таҳқирли эканини кейин ҳам англаб етолмаган. Уйидан бош олиб кетган эрининг қилиғидан ажабланган, аразлайдиган нима дебман? Саволи жавобсиз қолгач, енг шимариб, чинакамига ҳужумга ўтган. Ҳафа қилиш мана бунақа бўлади, дея йўқ ергаги туҳматларни қалаштириб, судга шикоят ёзган. Мактабга келиб тўполон кўтарган. Мактаб жамоаси йигитни химоя қилишдан кўра, тинчликни афзал билган. Кўпчилик эса қуруқ бу туҳматга чипна-чин ишонган. Одам боласи ичида-да, ким ўйлабди дейсиз, бу одамнинг бунчалик ёвузлигини!

Отамурод мактабни тарк этди-ю, аёлининг таъқибидан кутулди.

Аёли эса, ўзича ундан боплаб ўчини олган бўлди.

Отамурод ичкиликка муккасидан кетиб, ишини ташлаб қўйган жўраси Дониёрнинг машинасини ижарага олиб, бозор майдонига чиқди. Юқорида таъқидлаганимиздек, эркаклигини Ботир довонгта намойиш этиб, киракашлар жамоасига аъзо бўлиб олди.

Бўш пайтларида бостирма тагидаги қурилма билан андармон бўларкан, жўраси Дониёр ширакайф холда кириб келади.

- Битмадими ҳали?
- Битиб қолар.
- Сўнг маза қилиб учасанми?
- Насиб этса.
- Бунинг икки кишини кўтарадими?
- Кўтарса керак.
- Кейин қаёққа учамиз?
- Бошимиз оққан томонга.
- Унда товга учамиз.
- Нега энди товга?
- Биласанми, умримда ҳали баланд товга чикиб кўрмаганман.

Икки жўра ҳовлидаги ёғоч ўриндикка ёнма-ён чўкишиб, узоқдаги тоғларга тикилишади.

— Агар мени товга оборсанг, ичкиликни ташлаб кетсан керак, — дейди Дониёр сигаретини буруқситиб. — Товда дўкон йўқ, демак, виноям йўқ. Одамлар ғашингга тегмайди. Жондорларга ошна тутиниб, тинчгина яшайсан.

Отамурод тоғ томонга дикқатла бокади. Шу пайтгача хеч тоққа чиқмаганини ўйлади.

— Шунинг учун манову матоҳингни тезроқ битир, — дея минғирлайди Дониёр. — Кетамиз товларга бош олиб. Булок сувидан итиб, жўхори нон еймиз.

— Нега энди жўхори пон?

— Товда жўхоридан бошқаси унмаса керак деб ўйлайман.

Отамурод кулади.

— Кулма, бизам газит-лазит ўкиб турамиз, — Дониёр жаҳлланган киши бўлади.

— Бунинг битишини кутиб тургандан кўра, ўзим сени мошинда тоқка олиб чиқа қолай.

— Йўқ, — Дониёр лабларини чўччайтириб, бош чайқайди. — Фақат мана шунда чиқамиз. Учи-иб чиқамиз.

Отамурод тоғларга бот тикилади. Тоғлар негадир кўзига сирли кўринади.

Мана энди эса, у жўраси орзулаган тоғда ўтириби. Тоғлик жувоннинг ишқида юраги хун, жигари пора... Ундан эса, ҳануз дарак йўқ.

У ўйлига кўзғалган бўлади.

— Турай мен энди.

— Таом пишай деб қолди, — Сардор чол жиддий эътиroz билдиради. — Биратўла суб кетасиз энди.

Дилгир кўнгли бу гапдан оройиш топиб, қайта жойига чўкади.

\* \* \*

Ичкаридан бир жуфт чинни коса кўтариб чиқкан кампирни кўрган Отамуроднинг кайфияти баттар бузилди. Мана, ҳадемай овқат сузилади. Таомдан сўнг унинг бу ерда ортиқ қолиши мумкин эмас. Хурмати борида кетгани маъқул. Агар Зумраднинг кўнгли бўлганида, кетишини билади, аллақачон корасини кўрсатарди. Демак, юрагида уйғонган барча орзу ва умидларини мана шу тоғлар бағрига кўмиб, изига қайтишга мажбур. Олдинда эса уни бир-бирига ўхшаш руҳсиз ва рангиз кунлар кутмоқда. Дилгир оқшомлар пайт пойламоқда.

Оқшомлари у бирор юмуш билан банд бўлиш учунгина қозон осади. Қизиган қозонга ёғ сола-сола, сигарет тутатади. Ҳовли юзига ўйчан тикилганча, музлатгичдан

түрт-беш тухум олади. Азбаройи овқат егиси келганидан эмас, азалий одатга бўйсунади. Эсида, кечки таом болалигидан унда ғаройиб бир кайфиятни уйғотарди. Деворлари кирмизи ранг сўзаналар билан безатилган чоғроқ хонада бу кайфият негадир янада кучаярди. Таом сузиги кирадиган онаси, тўрда ёнбошилаб ётадиган отаси нечундир бу дунё одамларига ўхшамас, кўзига бошқача кўриниб кетарди. Кисқаси, сирли ва сурурли дамлар эди. Бироқ кейинчалик бу хонадонга кириб келган хотини деворлардаги сўзаналарни юлкиб ташлади. Уйни мебел билан тўлдирди. Йигит кўнинкан эртакнамо тус йўқолди, шунингдек, ғаройиб рух ҳам. У ўзини тақир ерда қолгандек ҳис эта бошлади. Бу ҳакда аёлига «нола» килганда, хотини уни тентакка чиқарди. Тақдири аёлидан айро тушиғач эса, у бозордан турли хил кирмизи ранг сўзаналар сотиб олиб, ҳозирги уйига бошдан-оёқ осиб чиқди. Ўзича безатди. Аммо бу қирмизи ранг у болаликдан кўнинкан ўша таниш хароратни беролмади. Сўзанали уйга суюкли аёл ҳам керак экан. Бироқ уни бозордан сотиб олиб бўлмасди. Мушкул иш бу – ёмонни келса, уйингни куйдиради. Унда яхшисини қандоқ топмок керак? Бунинг учун эса, аввало юрак қурғур жиз этмоғи лозим.

Юрагини жизиллатган аёлдан эса ҳануз дарак йўқ. Аҳмок бўлиб, неча кундирки уни ўз хонадонида тасаввур этиб юрибди! Унинг хаёли билан туриб, унинг хаёли билан яшаб юрибди! У эса, мана, рад жавоби сифатида корасиниям кўрсатгани йўқ.

Отамурод, сен бўлмасанг, бошқаси, дейдиган йигитлардан эмасди. Мухаббатсиз турмушнинг нақадар со-вуклигини у бошидан кечирган, бундай рўзгорнинг боридан йўғи яхшироклигини англаб улгурганди. Яна билардики, ёмонни яхшилаб бўлмайди. Айрим эркакларга ўхшаб аёлни зулм остида ушлаб туришни жини сўймасди. Аёлинг шундай бўлсанги, уни кўчадан соғиниб қайтсанг, дерди. Худди отасидек. Кўчадан кирган отасининг кўзи онасидан бошқасини кўрмасди. Аланг-жаланг қараниб, онанг қани, дерди. Онаси ошхонадан, ё қўрадан туриб овоз бергачгина тинчланарди-да, сўнг болаларининг мавжудлигини сезгандай бўларди. Келини ёмон чиққач, у ёмон келинга аёлини талатиб ўтирмади. Чоғроқ ҳовлисини ўғлига ҳадя қилиб, ўзи катта ҳовли

олиб, чиқиб кетди. Ҳозир ҳам беозор мусичалардай бир-бирига сүйкалишиб умргузаронлик қилиб көлишади.

Йигит ҳаётини жувонсиз тасаввур этишга ўзини кўнигиришга тиришаркан, бирдан юраги орқасига тортиб кетди. Яна ўша совуқ уй, ҳамиша ширақайф Дониёр, ғала-ғовур шовқинига тўла бозор майдони, хистайғудан йироқ киракаш шериклари... Йилт этган нурдан эса дарак йўқ. Рўшнолик истаб борадиган аёлидан аллақачон қўнгли қолган. Бошда шаҳарнинг щимолий қисмидаги кўп қаватли уйлар кўзига жуда иссиқ кўринарди. У бу уйлардан бирида турувчи жувонни чинакамига сўймоқ истарди. Бироқ аёлнинг таъмагир нигоҳлари бу туйғуга изн бермасди. Жувон, севаман, дерди-ю, севмаслиги, аникрофи, сужа билмаслиги кўзларидан билиниб коларди. Унинг барча айланиб-ўргилишлари риёкорлик асосига курилгандек, йигит бу хонадонни ҳамиша эзгин бир кайфиятда тарк этарди.

Хўш, йигитни унда нима борлаб турибди?

Отамурод хаёлига келган бу савонни ҳамиша нари кувлашга тиришарди. Жувоннинг тақдирига эш бўлмоқ кўйида ўртанади. Аммо... Аёл феълидаги очкўзлигу таъмагирликни яширмокка минг уринса-да, барибир билдириб кўярди. Хархолда буни йигит сезарди.

У таъмасиз меҳни қўмсади.

Ойда бир келиб, топган-тутганидан каттагина улуш олиб кетадиган хотинидан фарқли ўлароқ, бу аёл жуда шириңсўз эди. Жонимлаб жонини оларди. Йигитнинг назаридаги, ўзидан кўра, пулинни яхшироқ кўрадигандек эди. Ва сўнг шундай бир воқеа юз бердики, йигит ўзининг қадр-қиммати нечоғлигини фахмлаб етгандек бўлди. Жувон сўраган маблағ унда бор эди. Негадир ўзича ноз қилгиси келди. Ҳозир ёнимда йўқ, кейин тўғрилаб бераман, деди. Шунда аёл шундай бир энса котар қараш қилдики, йигит уни таниёлмай қолди. Жувон ортиқ бир сўз айтмади. Айтишни истамади. Қарашлари билан йигитни жойига михлаб, чиройли қоматини кўз-кўз қилганча кетди борди. Йигит сездики, агар ҳозир чўнтағидан у айтган пулни чикарса, аёл яшчаб кетади. Ялаб-юлқашу, суйиб эркалашдан ҳам той-найди.

У чинни косаларни ювиб, бир четга териб қўяётган сампирнинг харакатларини зимдан кузатаркан, уни ун-

чалик ошикмаёттганини сезди. Назарида, чол хам ниманидир кутаёттандек эди.

Андиша деб аталмиш туйғу исканжасида бехаловат ўтирган Сардор чол тонгда ғойиб бўлган қизини йигитдан кам кутмаёттанди. Бироқ буни билдиринасликка уринар, гоҳо эса тўсатдан ғазаби қўзиб, бу уруғ шунака — на ғазабини ошкор этади, на қувончини, бошда менам роса қийналганман, дегиси келарди. Бироқ бу гапларни меҳмонга айтиб бўлмасди. Йигитнинг қизига бефарқ эмаслигини сезган кундан буён ошкора гурунглардан ўзини тийиб келарди. Ўзига қолса-ку, буйтиблар қийналмай, одамингни юбор, шунда бир гап бўлар, қизим хоҳласа, никоҳингта оларсан, йўқ деса, манглайнингта бир уриб, изингга қайтиб кетаверасан, дегиси келарди. Бунинг энасиям шунака эди, чимилидикка кирмагунча суярини билдиримаган, михдаги белбоғни олганига суюниб, ўзимча сал суюлмоқчи бўлман, ўшанда укаларидан калтак еб қолишинга озгина қолтан, дея гурунг бермокни истарди.

Чол, сиқилгани етмагандек, қишлоққа чўмган мудхиш бир сукунатдан жуда хавотирда эди.

У бу хил ҳолатни узок йили, яъни Шавкат шапка ўлдирилган куни ҳис қилганди. Ўшанда ҳам қишлоқ худди бугунгидек гаройиб бир сукутга чўмганди. Барча ниманидир кутаёттандек, гунг ва дилгир эди. Бўрон олдидан бўладиган қандайдир сокинлик, бўрон кўпиши эса аниқ эди.

Буни фақат туман ҳарбий бўлимининг вакили бўлмиш Шавкат шапкагина сезмади. Қўнғир отига мишиб, қишлоқни тарқ этаркан, катта чинор тагида тизилишиб ўтирган чолларга писанда қилди: «Партия ва хукуматимиз учун ҳамма бир. Улларинг ҳарбийда хизмат қилишлари шарт! Тупканинг тагида бикиниб, фукаролик бурчларингни бутунлай унутиб қўйибсанлар. Энди бундай бўлмайди...»

Аммо ўша куни довон ошиб, манзилига етолмади. Муюлишдаги жардан учеб ҳалок бўлди. Уни жардан улоқтирган Шокир кичкинанинг топган баҳонаси шу бўлди: «Мени ҳарбий хизматта борасан деди, боргим келмади...» Шундан кейин ҳарбий бўлинма ходимлари қишлоққа ёлғиз келмайдиган, қуролсиз юрмайдиган бўлди.

Аслида Шокир кичкинанинг икрори фирт ёлғон эди. Фожиага Шавкат шапканинг оғзи шалоқлиги-ю, ўзига беҳад бино қўйганлиги сабаб бўлганди. Чиними, ҳазилими, ишқилиб, шу гап оғзидан чикқани рост эди: «Анову бева опангни бир кечага берсанг, сен армиядан бутунлай озодсан...» Уйнинг эркаги ҳисобланмиш йигитнинг жуссаси пачоқроқ эди. Тоғлиқ йигитларга ўхшамас, анчайин ушоқроқ эди. Бироқ фурури тоғдан баланд эди. Ҳозирча меҳмон ҳурмати учунгина ўзини босиб ўтиради. Чайир бармоклари тагидаги яккат кўрпача четини асабий гижимларкан, юзидан табассум аrimасди. Кўзларидан ёлқинланган ғазабини ўша табассум қатига яширомққа уринарди. Ҳурматини билмаган меҳмон қаршисида ноилож одоб сақлашга тиришарди.

Шавкат шапка хийла ширакайф эди. Унинг бу ҳолатини сезмади. Бошига кепка кийганидан буён унча-бунча нарсани фаҳмламайдиган бўлиб қолганди. Ҳарбий бўлинмага ишлашдан аввал у милицияда ишилаган. Эҳтиётсизлик оқибатида даладаги пахта хирмонини ёндириб юборган бечораҳол бир йигитнинг ишини кўраётганида, ёлғиз ўғлининг камалишини истамаган бева аёл ноиложликдан кизини Шавкат шапкага кўшиб қўйганди. Аммо тоғликлар пахта дея ўмгани ээилган, фурури беҳад топталган даштлик эмасди. Уйида кулиб, чеккада жонини суғуриб оладиганлардан эди. Бироқ тўқимтабиат Шавкат шапка буни қаердан ҳам билсин. Билгани, йилнинг тўққиз ойи давомида катта ердан узилиб қоладиган бу кишлоқ йигитларининг шу пайтгача ҳарбий хизматга олинмай келгани эди. Бу хатони тўғрилаш гўё ёлғиз унинг гарданига тушганди. Шу боис, ўзини қишлоқда Худо ўрнида кўрмокда эди. Бирор кимсанинг эътиroz билдириши ёки бурнидан ошикроқ гап қилиши мумкин бўлмаган хол эди.

Эртаси муюлишдаги жарлик тепасида қишлоқ йигитларига рўпара келганида ҳам шу ўйда эди. Шунингчун оти юганидан тутишга ботинган пачоқ йигит – Шокир кичкинанинг боши-кўзи аралаш қамчи тортишдан ҳайқмади. Тагидаги оти юкорига сакради. Аммо пачоқ йигит чайир экай, от юганини унинг кўлидан узолмади. Бу тахлит муомалани кутмаган Шавкат шапка буни ўзига нисбатан, янада аникроғи, давлат одамига нисбатан хақорат деб билди. Бот қамчига зўр берди. Сўнг

эса ўзининг жар тубига тошдек учиб бораёттанини сезди...

Бу Сардор чол гувоҳ бўлган воқеалардан бири эди. Қишлоқнинг кўримсиз йигитларидан бири бўлмиш Шокир кичкинанинг ҳамиятига нисбатан хаваси сўниб-сўнмай, қишлоқни милиса босди. Давлатнинг одамига қарши тажовуз қилган пачок йигитни хибсга олмоқчи бўлдилар.

Қишлоқка отлиқ милиционерлар кириб келишганида, Шокир кичкина ҳовлиси этагида Сардор билан ҳасратлашиб ўтиради. Миршабларни кўриб, дарров воқеани англайди.

— Чакки бўлди-да, — дейди манглайи асабий тиришиб. — Опамга кўз олайтиргани учун ўлдирдим уни дейманми буларга! Опамнинг номини тилга оламани?

— Бошқа баҳона топа қол унда, — дейди Сардор унга не тахлит кўмак беришини билмай.

— Йўқ, зўр бўлишса, аввал мени тутиб кўришсин!

Шокир кичкина ҳовлиси ёқалаб дўнгта интилади. Аммо дўнглик ярок тутган миршаблар томонидан аллақачон тўсиб қўйилганди. Қишлоқ йўлига туташ сўқмок ҳам улар тарафдан банд этилганди.

Унинг кулбаси Бурунтипада жойлашган бўлиб, ҳовлини этаги тик жарликка туташ эди. У оқшомлари жарлабидаги харсанг тошларга чўкиб, қуёш ботишини томоша қилишни яхши кўрарди. Сардор ҳам ўта камсукум бу йигитни жуда ёқтиради. Бу қишлоқда илк орттирган жўраси ҳам шу эди. Аммо ҳали юраги тубида чўкиб ётган дардини тўла айтишга улгурмаганди. Ўша куни негадир хиёлгина учини чиқарганди. Бутун ҳаётини алғов-далғов қилиб юборган хиёнатнинг залворидан ўзи қолиб, Шокир кичкинанинг афти қорайиб кетганди: «Менга айтдинг! — деганди овози алланечук қалтираб. — Бошқа бировга асло айта кўрма! Жуда ёмон иш бўлган экан лекин...» У гапини тугатишга улгурмай, ҳовлида миршаблар пайдо бўлганди.

Йигит учун жарлик томонгина очик қолганди. Бироқ у қуш эмаски, қанот чиқариб учиб кетса. У дўнгликка интилган ерида, секин-аста жарга чекина бошлади. Тўхта, отиласан, деган хитобларга парво қилмай, тисарилишда давом этди. Сўроқларда опаси номини тилга

олишдан ор қилиб, ўзини тубсиз жарга ташлади. Бу ҳолни хеч ким кутмаганди. Яқин-ўртада турғанлар даҳшатдан «вөх» деганча қолаверди.

Бу фожиа сабаби фақат Сардорга аён эди. Кимдир у деди, кимдир бу, ёлғиз угина тилини ичига ютди. Шу воеадан сүнг юрагини аёвсиз ўртаётган дард — аёлининг хиёнати тўғрисида бирорвга чурк этмайдиган бўлди. Бу хил нарсаларни тилга олиш эркакларга хос иш эмаслигини боз англаб етди. Шу пайтгача Шокир кичкинадан ўзгасига сасини чиқармаганидан ўзида йўқ шодланди. Кўксига миљтиқ тираган онларини ёмон тушдек дамбадам хотирларкан, бу фоний дунёда яшамоқнинг ўзи бир жасорат эканлигини фаҳмлаб етгандек бўлди.

У юксак тоғларга маъюс бокди. Эзгин ҳисларини қалбига димлади. Чукур қайфу ила дўстининг маъракасига бош қўпди. Бу энди бошқа бир қайфу, жудолик алами эди. Ҳархолда ўзлигингга қарши ич-ичингдан гимирлаётган ғаламис ҳислардан кўра, бу қайгуниңг юки сал енгил эди. Негаки, тан бўлак, бугун куясан, эртаҳ қўникасан ва сўнг унутасан. Ёмони ўзингники, яшаб яшолмайсан, ўлиб ўлолмайсан, дилингни забт этган қасос ҳисси сени хеч қачон ўз эркингга қўймайди.

Сардор тишдан сокин кўрингани билан ичдан қасос ўтида ўртанарди. Қўлбола икки ўқни хамиша ёнида олиб юрарди. Аввалига тушкунликка тушиб, яшашни истамай қўйган йигит энди интиком ўтида ўртанарди. Айниқса, Шокир кичкинанинг фожиасидан сўнг бу ў хаёлидан кетмай колди. Ундан қаерим кам, номус дея жонидан воз кечди. Мен эса... Йигитдаги бу ҳолатни Абдураҳмон чавандоз сезгандай бўлди. Бир куни қаватига чорлаб деди:

— Кимларданdir улгу олиб, қийшиқ ўсган дарахтни кесиши пайида юрибсанми дейман?

Чавандоз бу гапларни айтаркан, негадир узоқ-узоқларга ўйчан тикилади. Сухбатдошини унугандай тутади ўзини. Қизиқ жиҳати, ўша машъум тундан у бутунлай бехабар. Аммо гап оҳангидан барини биладигандай. Сардор унинг қўзларига тик бокишга интилади. Баҳс истайди.

- Иш арзиса-чи! — дейди.
- Иш арзисаем, бандаси арзимайди.
- Юрак ёнса-чи?!

— Юрек ёнган кезлари сабрнинг этагидан махкам тутоқ керак. Шунда сени Оллоҳ сийлайди.

Йигитнинг ўрлиги тутади. Лекин Абдурахмон чавандоз уни ортиқ әшитмайди. Ўрнидан қўзғаларкан, Сардорга лоақал қайрилиб қарамайди.

Аёл зотидан бутунлай кўнгли қолган Сардорни Худо хақикатдан сийлади. Унга ҳозирги кампирини рўпара қилди. Вактида қишлоғининг олди қизларидан бири ҳисобланмиш сулувнинг муҳаббатига сазовор этди. Қиз дилдаги туйгуларини тилда эмас, хатти-ҳаракатлар воситаси ила баён этди. Аммо қизи тушмагур теварагини қуршаган тоғлардек мағрур эди. Мағрурлиги ила йигитни адл бўлишга чорлади. Сардор билдики, бу киз олдида минғирлаб ёхуд шалвираб бўлмайди. Акс ҳолда унинг чангиди қолиб кетиши мумкин.

Сардор чол хотираларидан андак чекиниб, қаршисида кизининг йўлига илҳақ бўлиб ўтирган йигитга зимдан назар солди. Палаги тоза, яхши хотин тушса гуллаб кетади бу, деб ўйлади. Йигитга меҳри ийган сари унинг қишлоқдан эсон-омон чиқиб кетиши ҳақида кўпроқ қайфура бошлиганди. Қишлоқ йигитларининг зимдан гувранишларидан вазият қалтислигини сезиб турарди. Бироқ бу ҳолатда йигитга кўмак бермоғи мушкул эди. Қизига қўшмоқ ниятида ўзи югуриб юрган экан, деган маломатга қолиши мумкин. Йигитта у-бу гап ўргатай деса, гапнинг бир учи яна қизига бориб тақалади. Ота учун эса, бундан оғирий йўқ эди.

Ўйга чўмган чол йигитнинг галини жуда узоқдан әшитгандай бўлади. Унга ажабсиниб қарайди. Йигит ўртадаги сукутга барҳам берип учунгина сўзланаётганини сезади. Бош ирғаб, тинглаган киши бўлади. Каҳаҳ шуури шу гапларни англайди. Йигит шофферликдан тўйган эмиш, мактабни, болаларни жуда-жуда соғинганмиш. Кунда қўлига тушиб турадиган тўрт-беш танга эмас, сўйган касбигина кишига қувонч бағишлармиш. Айниқса, шогирдлари бўй кўрсатганда, ундан зўр баҳтнинг ўзи йўқ эмиш...

Бу туйгулар чолга фирт бегона эди. Йигитни тингланган бўлиб, бетдаги боғини ўйлади. Бетдаги боғ янги, дараҳтларнинг олди бу йил ҳосилга кирди. Аммо қўйидаги ёнғоқзор ва муюлишдаги теракзор кўрган кўзни қувонтиради. Тоғда ер сероб, бирор уни эк-буни эк де-

майди. Ҳар ким ўз майлида боғбонлик қилиб туради. Аслида Сардор чолнинг боғбонликка унча иштиёки йўқ эди. «Келгинди» деган қарашларга қарши қўл урганди бу ишга. Кишлокдан олислаб, шу дўнгта иморат ташла-гач, бўш ер борки, дараҳт ўтказди. Бу харакати билан, тоғ ўзимники, демоқчи бўлди. Кишлокда ўзига хос обрў топди-ю, лекин «келгинди» деган қарашлардан барибир кутуломмади. Баҳонада ерга қаттиқ меҳр қўйгани қолди. Эндиликда барпо эттан боғларига тикилиб кўзи тўймайди. Назарида, йигит ҳам шунга яқин гаи килмокда эди. Фақат у шодликни мактабдан, болалару ва яна алланималардан қидирмоқда эди: «...ёзган шеърла-рида шундай бир теран маънолар борки, шу менинг ўкувчимми дея нуурланиб кетаман. Ўзим эса неча йил-лардирки, одийгина бир учар машинани эплаб ясаётма-япман. Аммо-лекин бир марта бўлса-да, осмонда парвоз этиш ниятим бор...»

Чол тўсатдан сўзамоллашиб қолган йигитга хайрон боқаркан, нуқул бош иргар, гўё сухбатдошини орзу ва режаларини маъқулларди. Ўзи эса айни пайтда, ўтган куни ёввойи тўнгизлар кавлаб ташлаган томорқасини ўйларди.

Ўз навбатида, иккиси ҳам бир-бирига сездирмаган холда Зумраднинг йўлини пойларди.

\* \* \*

Аёли унинг нозик жиҳати – касбига нисбатан бўлган айрича муҳаббатини яхши биларди. Билгани учун ҳам, чинакам ракиблардай, асосий зарбани ўша то-монга қаратди. Отамуродни жохил ва муштумзўрликда айблаб, мактабига шовкин қўтариб борди. Барчанинг олдида обрўйини бир пул қилди.

Йигитнинг мактабдан кетмокдан ўзга чораси қолма-ганди. Энди қайси юз билан дарс беради? Ўкувчилар-нинг кўзига қандай қарайди? Ахир у жонкуяр, талабчан муаллимдан жохил, ароқхўр, зинокор кимсага айланган-ди-да. Буни у болаларнинг қарашларидан англаркан, ҳамкасларининг ўшандаги қиёфаларини ҳали-хануз унуполмайди. Ўша пайтда кимдир ачинган, кимдир эса мактабнинг фахри хисобланмиш ҳамкасларининг шармандаю шармисор этилишидан ўзида йўқ севинганди.

Отамурод, қаерда хатога йўл қўйдим экан, деб кеинчалик кўп ўйлаб кўрган ва оқибат, аёлига уйланганинг ўзи катта хато бўлганлигини фаҳмлаб етган. Бирни тирикликни ейиш-ичиш, кийинища деб билса-ю, иккинчиси эзгу мақсад йўлида гувранса, аллақандай ўқувчи болалар камолидан қувониб юрса, кўкка парвоз қилиш иштиёқида алламбало «самолёт» ясад ўтиrsa – њеч замонда келишармиди улар.

Аёлининг назарида, у фирт аҳмок эди. Ўзганинг болаларига нисбатан меҳрини сира тушунолмасди. Қанақасига етти ёт бегоналарга бу қадар меҳр қўйиш мумкин, а? Мактаб етмагандек, уйида ҳам тинч қўйиш майди. Телефонда ҳали уни-ҳали буни сўраб жонига тегишиади. Аёли уни ўзгалардан қизғанмасди, шунчаки тушунмасди. Жанжалга сабаблардан бири шу эди. Даҳанаки жанг кўп ҳолларда таҳқирлашта айланиб кетарди. Фалакнинг гардиши билан Отамуроднинг тоғаларидан бири қайси бир замонларда хотин олиб, хотин қўйган экан. Бу ҳолат аёлининг тилида шундай бир търифлар илиа эврилардики, билмаган одам Отамуроднинг бутун авлод-аждоди хотинбоз ўтган экан-да, леган хаёлга бориш мумкин эди. У эрини дарс пайтида қизларнинг қўкрагини томоша қилишда айбларди.

Отамурод барига чидаб келарди-ю, лекин бир оқшом ўта таҳқиромуз оҳангда айтилган гапга ортиқ бардош қилолмади. Аёли бир айтиб қўймади. Фазабдан шамдай котган эрининг юзи-кўзига тикилиб, юқоридаги иборани такрор айтди: «Сен ҳам эрқакмисан!»

Йигитнинг урмоқка кўтарилиган қўли костюмига етди. Михда илиғли турган костюмини елкасига ташлади-ю, уйидан чиқди кетди. Кейинги барча галва мана шундан сўнг бошланди... У эса бор аламини киракашларнинг «шеф»и хисобланмиш Ботир довонгдан олди. Ботир довонгнинг баشاрасига мушт тушириб, ўзгалар назарида «зўр»га айланди. Ҳолбуки, у зўр эмасди. Мунтлацишни жинидан ёмон кўради. Бироқ тевараклагилар йигитдаги бу беадад аламни «куч» деб билдилар. Ўзларича ундан «зўр»ни яратдилар. Хозир ҳам шундай деб ўйлайдилар ва анча-бунча хайикадилар.

Ярим ойча бурун машинаси ёнида хаёлга ботиб ўтиаркан, қархисига келиб елкасини босган кимсани одатдаги мижозларидан бири деб ўйлаган. Аста бош кўтар-

ган. Кулимсираб турган жувонни таниб, шошиб қолган. Ўзини жуда нокулай хис этиб, ха, юкингиз борми, деб юборган.

— Юким йўк, — деган жувон қулиб. — Мактаб директори сифатида сизни ишга таклиф эттани келдим.

— Кутлуг бўлсин, қачондан буён?

— Яқинда, — жувонни овозида фурур оҳангি сезилди.

Тиниб-тинчимаслиги ва жонкуярлиги туфайли мактабда «Читтак» лақабига эга бўлган бу аёлни Отамурод қаттиқ хурмат қиласарди. Ўша ғалвада ҳамдард бўлганларнинг бири ҳам шу эди.

— Хуллас, мен сиз билан ишламоқчиман, — дея жувон расмий оҳангда қўшиб қўйди. — Сиздек мутахассис бизга ҳаводек зарур.

— Бошлиғингиз кўнармикан, — Отамурод мужмалланади. — Бошқа мактабга ўтиб ишлашга изн сўраб борганимда, сиздай ахлоқсиз одамга мактабда ўрин йўқ деб, ҳайдаб чикарган мени.

— Ҳайдаровни айтаяпсизми? — Жувон ижирғанди. — У киши анча бўлди раҳбарликдан кетганига. Бозорда ўралашиб, дунёдан бехабар колибсиз-ку. Хозиргиси ёш, жуда файратли йигит.

— Кўнгил қолганда, Мехриҳон.

— Болаларданми? — Жувон жиддий тикилади. — Биз катталарни кўяверинг, лекин болаларда не айб? Фельлимни биласиз, рози бўлмагунингизча, тинч қўймайман. Иккинчидан, лойқаланган сув аллақачон тиниб бўлган. Сиз болаларни ўйлант.

— Ўйлаб кўрай.

— Ўйланг-ўйланг.

Йигит шундан бери ўйлайди. Ўйлаб ўйига етолмай турганида, кўнглига ишқ ўти тушди.

Шу тобда у бу кутиш дақиқаси минг йилга чўзилишигаям рози эди. Қозондаги овқат ҳеч қачон пишмаслигини, чойнакдаги чой тугамаслигини истарди. Ноумид қайтиш ғоят даҳшатли эканлигини хис этгани сайин юраги гупуриб, уюшиб кетмоқда эди.

\* \* \*

Сардор чолга йигитнинг мактабга қайтиш фикри унчалик ёқинқирамади. Мактабга қайтиши эмас, тасаввуди

рида туғилған муаллим сифатидаги туси — бүйінбоғ таққан, пүрим костюм-шымдаги қиёфаси қўнглига ўтиришмади. Ҳозирги ҳолатида, яъни ҳайдовчиларга хос жўнгина либосида йигит юрагига яқинроқ эди. Уни пүрим ҳолда тасаввур этгиси келмади. Айниқса, бўйинбоғни кўришга кўзи йўқ эди.

Тоғасининг ўғли шаҳардан башанг қайтганда, хотининг ўғринча сукланиб қараганларини бир-икки сезгандай бўлган, лекин унинг хиёнат кўчасига киришини хаёлига келтирмаганди. Боз устига, тоғасининг ўғли ўз жигари, хасмига ола қўз билан қарамас. Шунга қарамай, ҳархолда бир сағар ўз норозилигини билдирган. Аммо аёли довдирмаган, галстуғига қарайтман, нега шаҳарда ўқийдиганлар галстук тақишиди, а? Саволига савол билан жавоб олган Сардор ўшандагина қариндошининг бўйнидаги бўйинбоқка эътибор берган, бир парча рангдор латтани бўйинда осилиб туриши ғалати туяулган. Уйда хеч ким йўқлигига қариндошининг бўйинбоғларидан бирини бўйнига тақиб, ойнага юзланган. Йўғон бўйнига бўйинбоғ сира ўтиришмаганини сезиб, юлқиб отган. Аёл зоти аҳмокда, йўқ нарсаларга ҳаваси тушиб юради, деб ўйлаган. Аёлининг ҳаваси бўйинбоқка эмас, йигитга тушганини хаёлига ҳам келтирмаган.

Қариндошидан умиди катта, унинг шаҳарда ўқишидан жуда фахрланарди. Юрт сўрайдиган чўнг одам бўлади деб ўйларди. Шаҳарни эгаллайдиган сиёғи бор, деб умид киларди. Қариндоши эса шаҳарни эмас, унинг тўшагини эгаллади. Шундан сўнг дунё деганлари тўнкарилиб кетди. Борлик ўз аҳамиятини йўқотди. Қишлоғидан бош олиб кетаркан, охирги дакиқаларда ҳам тоғасини авайлаганидан ҳозиргача ажабланади. Мехри бор эканки, мудхиш сирни тоғасидан яширди. Тоғаси бу сирнинг тагига етиб-етмай, гумонлар оғушида бу ёруғ оламни тарк этди.

— Келинни ҳайдадинг, уйингга ўт қўйдинг, нима бўлган ўзи сенга, а? — деди кейинги келишида тоға.

— Қутургандим, тоға, қутургандим, — деди Сардор ердан қўзини олмай. — Ҳов бирда сизга айтган ичимдаги дард шу эди.

— Қутурган одам ё ўлади, ё қолади. Ранг-рўйинг бинойидек-ку.

— Қутургандим, тов гиёҳларидан шифо топдим.

— Шифо топганинг яхши, энди кайт уйингга. Шодикул хотинингга оғиз солаётган эмиш.

— Уйга қайтсам, тағин қутураман-да, тоға. Ҳавоси-ям ёқмайди менга.

— Шунча одамга ёқкан хаво, нечун сенга ёқмай колди?

— Билмадим, билолмадим, тоға.

— Унда бориб хотинингни опке, бээга ташлаб қўйма буйтиб.

— Дардим қўзиб колишидан қўрқаман, тоға. Касалим юқмасин дея, қутурган заҳотимоқ, талогини бериб, уйга ўт қўйганман.

— Биринг кишлокни тарк этдинг. — Тоға оғир ҳўрсинади. — Биринг шаҳардан бери келмайсан. Сенларга нима бўлган ўзи?

— Ҳеч гап бўлгани йўқ, тоға. — Сардор уни юпацишга тиришади. — Беҳуда гумонларга борманг.

— Қачон кишлокқа қайтасан?

— Бориб қоларман.

У кишлоғига қайтиб бормади. Шу ерни ватан тутди. Аслида бу ерга мувакқат қўнганди. Кетиш нияти йўқ эмасди. Кейинчалик буни аёлидан ҳам яширмасди. Аёли эса сокин тарзда ҳамиша уни маъкулларди: «Сиз нима десангиз шу, эр қаерда, хотин шу ерда». Хотини жиндаккина эътиroz билдирганида, кетмоғи тайин эди. Бунинг устига, Абдураҳмон чавандоз аввалдан айтиб қўйган, дунё кенг, лекин киши кўнгли тортган ердагина яшайди, яшаб кўр, ёқса қоларсан, ёқмаса, кетарсан.

Сардор чол йигитга зимдан тикиларкан, ўзидан уни қай бир маъниода устунлигини хис қилгандай бўлди. Йигитнинг борар жойи, агар тақдири қўшилиб, қизига уйланадиган бўлса, тушириб кетарга тайинли маскани бор. У эса вақтида мана шу имкониятдан маҳрум эди. Абдураҳмон чавандоз дилидагини сезгандай, унга мана шу дўнгликни кўрсатган: «Келгиндиман деб сикилма, — деган. — Аслида хаммамиз ҳам келгиндимиз. Факат буни тан олувчи йўқ. Агар жуда сикилаётган бўлсанг, хув анову газага жой сол. Ўз қўргонингни барпо эт. Ўзинг хон, кўланканг майдон бўп яшайверасан...»

Сардор чол дўнгни макон тутганда, бу атрофда кишлок үйларидан асар ҳам йўқ эди. Кейин тушди улар. Негадир тоғ табиати кишиларни қасрмонанд уйлар

куриб хаволанишларига йўл қўймайди. Ўн йиллаб дуппа-дуруст турган уйлар, тупроқ силжиши туфайли, тўсатдан деворлари тарс-турс ёрилиб, яроқсиз ҳолга келиб қолаверади. Замии табиатининг бекарорлиги сабабли бу қишлоқ одамлари ҳар ўн-ўн беш йилда уйларини янгилаб туришга мажбур эди. Аммо чолнинг кулбаси қурилганидан буён килт этмай турибди. Қишлоқ йиллар давомида силжий-силжий, дўнгни тевараклаб қолган бўлса-да, дўнг чолнинг номи билан юритилади. «Сардорнинг газаси» гоҳида «Яккатом» деб ҳам аташади. Шунга қарамай, чол гоҳида ўзини бегона ҳис этади. Довон ортида қолган қишлоғини қўмсайди. Кўмсайди-ю, ўша мавҳум тунни эслаб, тағин кўнгли музлайди: Беихтиёр икки қишлоқ одамларини бир-бирига қиёслай боллайди. Бу қинилўқда эшикларга қулф осилмайди. У қишлоқда қулфсиз эшикни кўрмайсиз. Бу қишлоқ йигитлари бамисоли бургут, қизингта бирор қош қокса, қўшнинг ёнг ҳимариди чиқади. У қишлоқда эса, қўзингни шамалат қилиб, тўшагингга киришга ҳаракат қилишади...

Бу қиёслар билан чол шунчаки ўзини овутади.

Хозир ҳам хотира сабаб, дилидагини тилига чиқармай туролмади.

— Шу ишингиз дурустмасми, юрасизми энди бўйинбое такиб.

Отамурод унга ажабланиб қаради.

— Бўйинбо... эркакка ярашмайди-да, — деди чол. — Уни такқан одам эркакка ўхшамай қолади...

— Эркаклик бўйинбоқ такиш-тақмасликка караб қолган бўлса, бўйинбоғиз аблаҳлар қанча!

Бу ҳақ гап олдида чол жим қолди.

\* \* \*

Уй бекасининг овқат сузаётганини кўриб, Отамурод нинг юраги симиллаб кетди. Таом ейилгач, турмоқдан ўзга иложи қолмайди.

Чамаси, жувондан энди умид қилмаса ҳам бўлади. Дараги йўклиги — севгиси рад этилгани. Акс ҳолда тонгдан изсиз йўқолмасди. Аммо унда умидлантирувчи бокишилару ва «кейин...» деган сирли шивирни қандай тушунмоқ керак? Бу нарсалар жувоннинг йигитга нисбатан беэътибор эмаслигига ишора-ку. Аммо Отамурод

бунга қаноат этмай, эътирофни унинг ўз оғзидан эшитмокчи эди. Сўнг эса севги қанотида парвоз этиб, изига қайтмокчи эди. Назарида, шундан кейин ҳаёти бутуилай ўзгариб кетадигандек, мўъжазгина гўшаси баҳту тароватга тўладигандек эди.

Зумраднинг бедараклиги барча умидларини пучга чиқармокда эди.

Мана энди, ҳадемай йўл тадоригини кўришга мажбур. Хўш, олдинда нималар кутмоқда уни? Ҳафталааб супурги юзини кўрмайдиган ховлиси, ҳамкасларининг хиссиз нигоҳлари-ю ҳолидан хабар олиш баҳонасида келиб, вино учун тўрт-беш сўм ундириб кетадиган Дониёр жўраси... Рангиз ва рухсиз кунлар. Қизик, шахар тўла одамлару, бирор дардкаш йўқ, кўча тўла аёллару, лекин кўнглига ўтирадигани йўқ. Ишонган ва умид қилган аёли яқинда кўнглини чилпарчин қилиб кетган. Йигит юзсизлик қархисида лол қолиб, чўнтағида борини чикариб берган. Бу аёлни сўймоққа нечун бунча уринди, не кидирди ундан? Жавобсиз саволлар сероб эди. Қўлига тутказилган пулдан қаноатланган аёл эса мамнун кетган. Мамнунлигини яшириб ҳам ўтирган. Балки ўтган сафар куруқ қайтаргани учун ўзича боплаб ўчини олгандир. Ҳар ҳолда топган баҳонаси куракда турмасди. Бўйида бўп қолганмиш, дўхтирга қаратиши лозим эмиш. Қанакасига? Ахир бормай қўйганига бир неча ой бўлди-ку. Бироқ бу ҳақда хижжалаб сўраб-суриштирмоққа йигитда забон йўқ. Ошкора таъмагирлиқдан эсанкираб қолганди. Алам ва изтиробдан қаншари ачишиб, тахтадай қотганди.

У ердан кўз узиб, сўрида оёқларини осилтириб ўтиришган ҳамкасларини кўрган. Барининг юзида шум ифода, тиржайишар, яъники, олчоқлик қархисида ночор қолган инсон ҳолатини андишасизларча томоша килишарди. Аёл эса аллақачон бозор тўла оломон ичига сингиб кетганди.

— Бопладими?! Аёлларнинг бариси шу...

Отамурод гап эгасига қарамади. Бу гапда ҳамдардликдан кўра, қандайдир қониқиши ҳисси кучли эди. Мамнунлик аломати устувор эди.

— Аввал Алишерни тоза соқканди, энди навбат сенга кепти-да.

Бу гап унинг учун тамомила янгилик эди. Аёлни ал-

лақандай Алишерга илакишиганидан бутунлай бехабар эди. Билгани, аёлнинг ёлғизлиги, турмушидан ажрагани эди. Аёл унинг қайноқ оғушида эркаланар экан, эридан сўнг бирор кимсага қиё бокмаганини ҳамиша таъкидлар, севаман, дерди, борлиғимсиз, сизсиз дунё менга қонронги, дерди. Бу гапларга йигитнинг жуда-жуда ишонгиси келарди. Бироқ инномоғига доимо нимадир халақит берарди.

— Куйинаверма кўп, бариси бир гўр буларнинг!

Бу гапга йигитнинг қўшилгиси келмади. Эркакка ҳам жон, ҳам тан бўла оладиган аёллар борлигини, ўзига аталгани эса дунёнинг қай бир бурчагида мавжудлигини ҳамиша хис этарди, умид киларди. Агар бунинг тескариси бўлса, бу оламда яшамоқ не даркор? Аслида дунё шундай яралган — ким кимгадир доимо интилиб яшамоғи лозим. Бирорга интилмайдиган одамнинг нигоҳи бефарқ, идроки мудроқ бўлади. Унакалар Худо берган умрни яшаб ўтмоқлари учунгина йўқ ердаги нарсаларга ўралашиб, ташвишларга алданиб яшайдилар. Кўнгиллари тор, мақсадлари бачканга, кибрли бўладилар. Ана сўрида бир талайи валақлашиб ўтирибди. Улар билан оддий бир нарса юзасидан ҳам баҳслашиб бўлмайди. Барча нарсадан ёмонлик қидиришади. Аёл зотига нисбатан қарашлари шу қадар куфрлики, бу мавзуда, яхшиси, сўзлашмаган маъқул. Иймонингни қочириб, шайтонга ҳамроҳ қилиб қўйишади. Негадир окдан қора, нурдан соя қидиришади. Ҳатто газетага тикилиб, китоб вараклашингният калака қилишади. Ўз навбатида, бари ўзини ғоят ақлли санайдилар. Йўқ-бор нарсага қах-қах уришади. Мижозлар қолиб, бир-бирларини алдашга тиришадилар. Оддий инсоний хислар бегона, ҳар қандай туйғу кулгига сабаб бўлади. Нечун улар бунақа? Мижозга рўшарў келганида нега ўзи ҳам уларга ўхшаб кетади? Кўпроқ ундириши пайида бўлиб, тили ёлонга кетганини ҳам сезмай қолади. Ёмон хислатлар нечун бу қадар ёпишкоқ? Яхши хусусиятлар эса кийимга кўнган гарддек қокиб ташланаверади. Нега?

— Биттаси бор, жуда бой лекин. Гаплашиб берайми? Эридан қолган машинасиям бор. Яп-янги. Маза қип мишиб юрасан.

Отамурод гап эгасига қарамайди. Эркаклик шаъни, ор-номуси ҳақидаги қарашларини эътироф этмоқдан

наф йўқлигини ўйлайди. Қаватидаги кимса эса унга ачиниб қарайди.

— Аммо-лекин ёмон тушириб кетди-я сени. Булар шу, кўз сузуб, пулингни олади.

Йигит эса берган пулига эмас, аёлга ачинарди. Туйгулари унинг учун бир пуллигидан эзиларди. Шунинг билан биргаликда, аёл кишининг сирли мухаббатини қўмсарди. Бу туйгусиз тириклик ғоят нурсизлигини ўйларди.

Охири у кўнгилдаги ёрини одам тўла шахардан эмас, тоғлар орасидаги мўъжаз бир кишлоқдан топди.

Тотди-ю...

Чўмичнинг қозонга урилиши юрагини ўртаб, дилини вайрон этаётганини ҳис этиб, афти тиришди. Чолнинг гаплари ортиқ қулогига кирмай, теваракка маъюс назар солди. Тонгги қуёш нуридан ақлни лол қолдирар дараҷада фусункор тус олган табиат чиройини сезмайди. Аммо адоваратни ҳис этади. Бу қишлоқдаги жамики нарса унинг дарвозадан чиқишини пойлаётгандек, ташқарига чиқиши билан мўрмалаҳдек ёпишадигандек эди. Ҳатто қархисидаги чол ҳам меҳмон ҳурмати дея, зўр-базўр ўзини босиб тургандек эди.

Отамурод тақдирига тан берган бир алфозда косадаги овқатга қошиқ урди. Таом лаззатини туймади. Назарида, маза билиш сезгиси ўлгандек эди.

У беихтиёр кавшанаркан, ортиқ теваракка боқмас, умиди бутунлай сўнганди. Олдинда кутаётган севгисиз, маза-матрасасиз ҳаётнинг бор залворини вужудида ҳис қилгандек, елкалари чўккан, шалвираган бир ахволда шўрва хўпларди.

\* \* \*

Нонушта охирлагани сайин, чолнинг ташвиши ортмокда эди. Кизининг дараксизлигини эмас, йигитнинг қишлоқдан омон-эсон чиқиб кетишини ўйламоқда эди.

Йигит кўнглига ўтиришган, айниқса, ёлғон гапириш пайтидаги холати чолга жуда ёқиб тушганди. У, тўртбеш коп ёнғоқ керак эди, деркан, хижолатдан дув кизариб кетганди. Кейин ёлғон сўзлаганини яшириш учун тоғларга бокқан, машинаси теварагини айланган киши бўлган. Чол эса уни хижолатдан чиқаришга аҳд қилгандек, айтган ёнғонини бирпасда тўғрилаб берган. Бундан

Йигит заррача севинмаган, бошини қашлай-қашлай, бу кераксиз матоҳларни машина устига тезгина улоқтирган. Аммо пул санашга келганда, роса имиллаган. У пул санамаган, пул санаган киши бўлиб, бир оз колишига баҳона қидирган. Шу ерда чол қўмакка келган: «Бир кеп қопсиз, меҳмон бўп кетинг энди». Йигитнинг кўзларидаги ўшандаги қувончни чол ҳануз унупотмайди: «Тавба, худди ёш болага ўхшайди-я», деган негадир унга меҳри ийиб.

Йигит кампирига ёққанини чол дарров илғаган. Одамни билишда кампирига тенг келадигани йўқ. Бу хусусият унга отаси — Абдураҳмон чавандоздан ўтган. Хайбатли бу одам итдай зийрак, бўридай ёвкур эди. Одам боласининг нелигини ва нималарга кодирлигини бир карашдаёқ биларди. Дилидагини образли йўсинда ифода этишни яхши кўрарди. Гап келганда, отасиниям аямайдиганлар хилидан эди. Буни қарангки, Сардорни шу масканда муқим яшаб қолишини ўшандаёқ сезган экан: «Чангалинг бўйроқ кўринади, жигар, — деган бирда. — Чунон истасангда, бургутлик сиёғи йўқ сенда. Аммо-лекин яхши йигитсан. Кўнглингда киринг йўқ. Шунингчун ортиқча чиранмай, ҳолингни билда, ризкингни териш пайида бўл».

Бу пайт Сардор пойгаҳда яроғини кайта тозалаб, мойлаётган эди. Юрагидан ҳануз алам аримаган, кўзига чўп сукқанларнинг қонини тўкмоқ қасдида ўртанарди. Таажжубли жиҳати, ўшанда Абдураҳмон чавандоз уни бу йўлдан қайтаришга уринмади, увол-савоб ҳакида сўзламади. У йўлга тушганда, айтар гапи шу бўлди: «Бугун кўзи сўйман, ҳаялламай қайт». Йигитнинг кўзларида алам учкунлади: «Мен энди эт емайман, қон ичаман, уларнинг қонини ичаман!» Абдураҳмон чавандоз унинг нигоҳида аланталанган бу ифодани пайқасада, лилик бузмаган, тунга қолмай, қайт, деб кўя қолган, холос.

Сардор эса қайтиш ҳакида ўйламасди. Куну тун рухини эговлаётган азобдан биратўла кутулмоқчи эди. Тўшакда бир-бирига айқашиб ётган яланғоч таналарни эслагани сайин, кони кўпирмоқда эди. Бу ишни биринчи куниёқ амалга оширганидан изтиробда эди.

Яроғини елкасига ташлаб, йўлга тушаркан, кета-кета ортига кайрилди. Ўзича туз-наъмак тотинган хонадон

билан хайр-хўшлашмоқчи бўлди. Шунда таңдир ёнида хаёлчан турган кизга кўзи тушди. Аланглаб Абдураҳмон чавандозни қидирди. Уни топмади. Бундан йигитнинг алами келди. Чавандозни совуққонликда айبلاغан бўлди. Сўнг жаҳд билан олға юришда давом этди. Шу залтда довон бошига етди. Довон тепасида бир зум тин олмоқни истади. Харсанглардан бирига елкасини тираб, оёқларини узатиб ўтиаркан, дунёнинг бу қадар кенглигини энди кўраётгандек, бир-бирига мингашган тоғларга, кулранг ҳошия тортган уфққа хайратли тикилиб қолди. Ўзини зарранинг зарраси эканлигини дафъатан ҳис этди. Чексизлик олдида юрагини ёндираётган интиқом ўти сусайгандек бўлди. Кўз ўнгидаги барча нарсаларда яшашга инилиш мавжудлигини теран идрок этди.

Авваллари у борлиқка бу даражада синчков эътибор бермасди. Энди эса, худди хайрлашаётгандек, барча нарсаларга жиддий разм солмоқда эди. Аслида ҳам шундай, агар у кўнглига туккан режасини амалга оширадиган бўлса, бу тоғу тошларни қайта кўрмаслиги тайин. Шунинг учун ҳам у бўрон буккан арчаларга, елга бўй бермай қуёшга талпинаётган тоғ чечакларига, майсаларга айрича дикқат билан бир-бир назар соларкан, улардаги яшаш иштиёқини ҳис этди.

Бу ҳол илгари унда бўлмаган. Бурун у борлиқни яхлит кўрарди. Яхлитлик бағрига разм солмоққа наукуви, на ҳафсаласи бор эди.

Айни пайтда қалбида англарсиз нимадир уйғонгандек эди.

Ҳадемай яна йўлга тушади. Кўзга ташланиб турган навбатдаги довондан ошиб, пастдаги тоғ тизмаларидан бирида жойлашган кишлокқа кириб боради. Қайнотаси-нинг уйига тикка кириб, хиёнаткор аёл кўксига митлиқ тирайди. Кейин йигитни... Аммо улкан шахарнинг қай бурчидан топади уни? У қаерда-ю, шахар қаерда. Йўқ, топмай кўймайди.. Йигит кишининг номусини оёқости қилиш қанақа бўлишини кўрсатиб кўяди унга!

Шунда кутилмаганда саркаш бир ички овоз аста тебранди: «Ўлдирсанг, мардни ўлдир, умринг сабил кетмайди. Номард нима, ерда ёттан бир тезак-- уни тепиб ўтдинг нима-ю, босиб ўтдинг нима. Бу билан хеч нарса ўзгармайди». Бу Сардорнинг идроки эмасди. Қачонлар-

дир кимдандир эшитган пурмаъно ўгитнинг калбаги акс-садоси эди.

У бу овозга қулок солмокни истамади. Ўзини чалғитиш ниятида бот теваракка разм солди. Аксига ол-ғандай, барча нарсадан ҳаётнинг кудратли нафаси уфуриб турарди. Бу кудрат олдида юрагини куйдираётган интиком қандайдир бачканга туяларди. У йўлбарс овига чикиб, сугир инини пойлаётган овчилик ҳис эта бошлади ўзини. Саркаш ички овоз эса сира тинай демасди: «Иш арзисаям, улар арзимайди! Азалдан қийшиқ ўсган дарахтни кесдинг нима-ю, кесмадинг нима! Дунё деганлари шу — вафо ва хиёнат, ёвузилик ва эзгулик ўртасида сарсон яшайсан! Ящаш давомида чиникиб, тобланиб борасан! Сен бу борада, яххиси, тоғлардан улгу ол. Уларнинг бу чўнг бошлари не синоатларни кўрмаган. Лекин ҳамиша адл! Инсон қавмидансан-да, гоҳ тушкунликка берилиб, кўксингга милтиқ тирайсан, гоҳ интиком ўтида қовриласан. Тирикликнинг эса, икир-чикирларинг билан иши йўқ, ўз маромида давом этаверади...»

Ўша куни довонда узок қолиб кетди. Ўтган воқеаларни ўйламасликка тиришди. Заминнинг таскин берувчи қудратли қучини янада теран ҳис этмоқчидай корли чўққиларга, арчазорларга тикилиб ўтирди. Сўнг изига қайтди.

Кишлоққа шомга яқин кириб келди.

Уйда қўзи сўйилган экан, Абдураҳмон чавандоз уни одатдагидек хушхол қаршилади. Худди қайтишини билгандек, ортиқча сўраб-суриштирмади.

Энди билса; Абдураҳмон чавандоз унинг котилликка кодир эмаслигини сезган экан. Кон тўкиш гуноҳ, деган кейинги гурунгларидан бирида, зўр бўлсанг, сабрни ошно тут, ақидасига амал қилди. Шунга қарамай, интиком ўти анчагача юрагини куйдирашиб турган. Кейин меҳнатга берилиб, барини унугтган. Ана кетарман-мана кетарман, дея, аввалига сой бўйини обод қилди. Сўнг қаршидаги коя пойидаги ерларни ўзлаштирди. Қоянинг қуёш чикиш тарафидаги бет ҳам назаридан четда колмади. Меҳнат билан бўлиб, умрини ўтказиб кўйганини ҳам сезмай қолибди. Кейин ўйлаб кўрса, ўшанда борадиган жойининг ўзи йўқ экан. Кишлоғига қайтмасликка касам ичган. Айрим ҳамкишлоқларига ўхшаб чўлга кетишдан бирор маъни топмаган. Боз устига, бу қишлоқдан ҳеч

ким сени ҳайдайтгани йўқ. Хурмат-иззатинг жойида. «Келгинди» масаласига келсак, бу дунёда ҳамма келгинди. Келади-кетади. Дунёга устун бўлган одамни хали хеч ким кўрмаган.

Бу фикр асли Абдураҳмон чавандозники. Раҳматли дунёга кенг кўз, теран ақл билан қаради. Гаплари салмокли, гурунглари мазали эди. Дердики, аждодларимиз бу томонларга кувғин туфайли келиб қолган. Сўнг болиши бағрига тортиб, берилиб сўзламоққа тушарди. Унинг хикоясида киши кўз ўнгида куйидаги манзара жонланарди.

Кенг яйлов. Юзлаб ўтовлар тикилган дашт йилкилар уюрига тўлган. Оқшомлари қозонларда эт қайнаган. Йигитлар қатори қизлар ҳам чавандозлик сирларини билишган. Камон отиб, кураш тушишган. Шундай сурурли кунларнинг бирида кунботишдан ёв босиб келган. Сон-саноқсиз. Тенгсиз жангда енгилган даштликлар чекина-чекина мана шу тоглар бағрига етиб келган. Тоғ девордек тик, ўтмоқ машаккат бўлган. Шунда юрт кексалари Худога нола қилган. Довон бағри очилиб, улар мана шу водийга тушиб қолишган. Душман уларнинг манзилидан огоҳ бўлгунча бу ерда бир неча авлод яшаб ўтган. Охири улар яна ёв талонига учрайди. Бутун бошли кишлоқдан бир қиз ва ўғил бола омон колади. Кейинги авлод мана шу иккисидан тарқаган. Ва у хикояси ни ҳамиша мана шу тарзда якунларди: «Шунинг учун иттифок бўлинг! Баринг бир ота-онанинг зурриётларисиз! Иттифок бўлинг!»

Бу ривоят Сардорга жуда ёқарди. Демак, бу кишлоқда ҳамма келгинди. Келгиндиман деб, сиқилмасамам бўларкан. Бундан кўнгли андак ороиш топади. Барча нарса ўзига дахлдордек туюлади...

Чол бу ҳақда сўзламоқ ниятида қошида ўтирган йигитта тикилади. Тикиларкан, унинг бу кишлоқда колмаслигини сезади. Қизи минг ҳурлиқо бўлмасин, хеч бир куч йигитни бу кишлоқда олиб қололмайди. Газа тугул, бутун бошли тоғни ҳадя қилсангда, колмайди бу. Негакц, унинг ўз манзили, ўз маскани бор. Йўқ, колмайди бу!

Сардор чол бирдан хушёр тортади: нимани истаяпман ўзи мен?! Қариганда, жинни бўп колдимми, нима бало!

У косага қошиқ ураркан, йигитни ёктириб қолганини қайта хис этди. Умр бўйи мана шундай ўғилни орзу килиб келганини ўйлади.

Худо қиздан қарашибди-ю, лекин ўғилдан сикди. Иккни қизи шу қишлоқнинг бўлаги хисобланмиш паст қишлоққа тушган. Кенжасининг эса баҳти чопмади. Суксурдай күёви кўччи тагида қолди. Кенжа қизи ўр чикди. Шундан кейин бирорга кўнгил қўймади. Отанинг назарида, бу йигитга қизининг кўнгли товлангандай эди. Ё адашдимикан? Ё йигит бирор бежо ҳаракат килдими ёхуд ножӯя сўз айтдимикан? Ундей деса, қизининг ковок читғанини сезмади. Қайтамга кисинган, қимтинган, лекин ичдан яшиаб турган. Ё тасаввури алдадимикан?

Чол кўз остидан йигитга айбдорона тикилди. Йигит шўрликнинг руҳи чўккан, нима еб, нима ичаётганини сезмайдиган бир ахволда кавшанарди.

\* \* \*

Косадаги сўнгги лукмани еб бўлган Отамурод боши эгилган кўйи, лаб-лунжини суртди. Чукур хўрсиниб, аста қаддини ростлади. Теваракка ғамгин назар солди.

— Бизга энди рухсат берсангиз, — деди ғамгин оҳангда. — Турай энди.

— Чойдан ичинг, борасиз-да шу уйингизга. — Чол қувноқ сўзлашга уринди. — Коринди никлаб олсангиз, йўл юрмоқ осон кечади.

Йигит кулимсирашга тиришади. Қишлоқ томонга боқади. Тонгданоқ руҳини исканжага олган адватни тेरанроқ ҳис этмоқчидай, ҳар бир хонадонга бир-бир кўз ташлаб чиқади. Аммо жувоннинг дардида ёнаётган юраги адватни ортиқ даражада сезмайди. Агар шу тобда, кўчага чиқа кўрма, қалтак остида қоласан, дейишган тақдирдаям бирор туки килт этмасди. Дунёда ҳажр ва умидсизликдан оғир дард йўқлигини илк бор англаб етган йигитнинг юраги чилпарчин бўлган. Назарида, чол, суймаганга суйкалма, деган маънода кулимсираётгандек туюлди. Ҳадикланиб чолга бокди. Йўқ, у ҳам ўз ўйи билан банд эди.

Отамурод эзилиб ўтириш жонига теккандай, саркашона бир ҳаракат билан ўрнидан қўзгалди. Қозон бошида серрайиб турган кампирга миннатдорчилик билдири-

ган бўлиб, кераксиз юк ортилган машинаси томон юраркан, негадир, яна келаман, деди. Чол одоб юзасидан, эшигимиз ҳамиша очик, деркан, ичидан зил кетди: «Эсон-омон чикиб кета олармикансаи ҳали».

Иккиси машина томон олдинма-кейин юрган ерларида, бирдан тақа-так тўхташди.

Сой томондаги тор сўқмокдан хурмача кўтарган жувон бамисоли қуёшдай порлаб чикиб келарди. Ҳархолда йигитга шундай туюлди. Ва у бир лахза уят ва андишани унутди. Жувонга бакадай тикилиб қолди. Аммо буни уй эгалари сезмади. Уларнинг эътибори ҳам Зумрадда эди. Бундан жувон баттар қисинди, баттар қизарди. Кўзига тик тушган қуёш нуридан шапақлангандай, беихтиёр қокилди. Ўзини базўр ўнглаб, хижолатомуз жилмайди.

- Мехмон кетаяпти, қизим, — деди ота.
- Бунча йўқ бўл кетмасанг, — деди она.
- Мен ҳозир.

Қиз шундай дея ҳовли этагидаги кулба томон интилди. Ҳаракатларида қандайдир ошиғич, ҳаяжон бор эди. Буни сезган чол-кампир бир-бирларига маъноли карашди. Сўнг йигитга ўтирилишди. Уларнинг қарашларини йигит жуда кеч пайқади. Лавлагидай қизариб, ерга боқаркан, кабина эшиги тутқичини тополмай, пича ти-мирскиланди.

Жувон кулба эшигига пайдо бўлганида, чол янада сергакланди. Қизининг кўлидаги тугунга қаради. Зумрад хурмачани Абдураҳмон чавандоз авлоди учун маълум бир тимсолга эга бўлган ўша таниш белбокка тушиб чиққанди.

— Каймок, — деди у кўлидаги тугунни онасига узарткан оҳиста. — Ўзимизда йўқ экан, бўламниидан олиб келаяпман.

Жувон аста ортга чекинаркан, йигитга бир қараб қўйди. Шу бир қарашнинг ўзиданоқ Отамурод кўп нарсани англади. Ҳаяжондан ҳаприкиб, тили калимага келмай қолди.

- Кутлуғ үйдан қуруқ кетманг, болам!

Камир кўлидаги тугунни йигитга узартаркан, чолига маъноли қараб қўйди. Чолнинг зийрак нигоҳи белбоғнинг маъносини йигит англамаганини дарров пайқади. Жувоннинг ташрифи ва қарashi билангина чеклан-

ган Отамурод күлилагини шунчаки тугун деб ўйлади. Уни ўтиргичга кўйди.

— Каймок тўкилса, белбог расво бўлади, улим. — Чол шундай дея ортига ўтирилди. Аёли ва қизига қаради. Улар йигит билан тезгина хайрлашиб нарироқ кетдилар. Ота уларни нигохи билан кузатиб қоларкан, тагин йигитга юзланди.

— Белбогни белга, э, елкага ташлаб олинг, — деди. — Хурмачани оёқ остига жойлаштиринг. Оғзи маҳкамми? Ҳа, маҳкам экан. Тўкилмайди. Белбогни елкага ташланг.

Йигит хурмачани чељак ичиға жойлаштириб, белбогни елкасига ташларкан, чолга хушнуд жилмайди.

— Яна озорқ ёнғоқ ғамлаб кўйсангиз, — деди дув қизариди. — Икки-уч кун ўтказиб келамиз.

— Келамиз? — Чол бу сўровда сўзга алоҳида ургу берди.

Йигит хаяжон билан таъкидлади.

— Ҳа, келамиз!

— Кутамиз, лекин белборни елкадан ташлай қўрманг!

Афсус, йўлда йигит бу гапни пакқос унунтди. Ҳаяжондан терчиган манглайнини белбоғда суртаркан, одати бўйича уни ёнига, ўринидикқа ташлади. У шу қадар баҳтиёр эдики, қўшиқ айтиб юборишдан зўр-базўр ўзини тийиб туради.

Кишлоқдан чиқиши билан қўшикни бошлаб юборди. Ҳаётида бирон марта қўшиқ айтмаган, шунингдек, бирорта ашулани тузук-куруқ билмасди. Буни қарангки, сўз дегани ўз-ўзидан қуйилиб келаверса денг.

Аммо унинг шодлиги кишлоқдан унча узоклашмай адорлади. Муюлишда йўл чоғроқ ҳарсанглар билан тўсиб қўйилганди.

\* \* \*

Бу пайтда чол хансираганча дўнгга тирмашаётган эди. Дўнгдан муюлишгача бир қадам. Довонга тирмашадиган яккаю ягона йўл эса қишлоқ ёқалаб бориб, Бештошдан сўнг муюлишга буриларди.

Муюлишга бориш чолнинг хаёлида ҳам йўқ эди. Аммо машина ҳовлидан чиқиши билан қизи онасига, она эса чолга ялт этиб қаради.

— Муюлишгача кузатиб қўймадингизда, отаси.

Чол, белбоғ бор-ку, демоқчи бўлди-ю, сўнг бирдан хавотирга тушиб, оёғини қўлига олди. Дўнглик жуда тик эди. Аммо тоғ аҳли учун бу тиклик нима бўпти. У мисоли қоплондай бута ва харсанглар оралаб, жадал юқорилаб борарди.

\* \* \*

Машина йўлга кўндаланг ташланган харсангларга тумшук тираб тўхтаркан, наридаги арча тагида ёнбошлиб ётган беш-олти йигитлар орасидан икки нафари ўрнидан қўзғалди. Улардан бири кеча шомга яқин машинани тузатишга кўмаклашган коратўри йигит эди.

— Кўп қопкетдингиз, меҳмон? — деди у машинага яқинлашиб, кабина эшигини очаркан, совуқ илжайди.

Отамурод саволга жавоб беришдан аввал теваракка зимдан разм солди. Ўнг бет тик қоя, чап тубсиз жарлик. Тушган одам тарикдай сочилиб кетиши тайин.

Йигитлар кулимсираб туришган эса-да, авзойилари бузук, гўё қаҳрларини табассумлари остига яширишга тиришгандай, ғалати илжайишарди.

— Тушинг, меҳмон, бир майдон гаплашиб олайлик энди! — деди иккинчиси.

Ишқдан маст Отамурод хушёр тортаркан, тонгдан юраги сезган адоват ва унинг натижаси эрмини хавф ма-на шу эканини англади. Лекин негадир қўркувни хис қилмади. Агар жувондан воз кеч, десалар, яхшиси, ано-ви жардан улоқтира қолинглар дейман, деб ўйлади. Би-роқ оғзидан бутунлай бошқа гап чиқиб кетди.

— Мени ҳатто йўл назоратчиси тўхтатганда ҳам ма-шинадан тушмаганман, — деди қўрсрөк оҳангда.

— Лекин биз йўл назоратчиси эмасмиз, — деди биринчи йигит ўша сокин оҳангда. — Туша қолинг эн-ди!

— Унда қароқчи экансизлар-да, — Отамурод шундай деркан, зигирча чўчимаётганидан бот ажабланди. — Лекин менда тўрт қоп ёнғоқдан бўлак нарса йўқ.

— Ёнғоқ ўзимизда ҳам сероб, ҳатто керагидан ор-тиқча, — деди биринчи йигит ўша-ўша мулоийимлик билан. — Озгина ножӯя харакатларингизни сезгандай бўлдик. Тўхтатганимиз шундан. Гапни чўзмай, туша қолинг!

Отамурод йигитнинг исталган пайтда ғазабнок тус олиши мүмкин бўлган афтига бир муддат тикилиб тураркан, чўчимаётганидан баттар хайрати ошди. Кабинадан туша-туша деди:

— Сизга ножўя кўринган ўша ҳаракат самимий бўлса-чи?

Бироқ бу саволи жавобсиз қолди. Қоратўри йигитнинг кўзлари ўриндиқдаги белбоққа қадалганди. У бир белбоққа, бир Отамуродга тикиларкан, ишонқирамай сўради:

— Белбоғ сизникими?

— Ҳа, ҳозиргина совға қилишди.

— Ким?

— Буни билишингиз шарт эмас! — Отамурод оёқ тағига ташлаб кўйилган темир бўлагига ўғринча қараб қўяркан, йигитнинг қарашлари юмшаганини пайқаб ажабланди.

— Бундан чиқди тағин келаркансиз-да? — Йигитнинг овози бу сафар илиқлиқ касб этди.

— Худо хоҳласа, уйдагилар билан келаман! — деди Отамурод йигитнинг нигохида жилоланганд дўстона ифодадан рухланиб. — Ҳаялламай келаман! Ишқилиб, кўясизларми? Ё...

— Э, bemalol! — Йигит энди хижолатомуз жилмаркан, йўлдаги харсангларга ишора қилиб деди: — Юқоридан тош ўпирилиб тушган экан, йўлни энди тозалаймиз деб турғандик.

— Кўчки денг? — Отамурод жилмайди.

— Йўқ, кўчки ўтиб бўлди, бу шунчаки тош.

— Унда мен кета қолай.

— Олдин йўлни тозалайлик.

— Қарашайми?

— Йўға-ай, сиз меҳмонсиз ахир.

— Жар тубсиз экан лекин, — Отамурод қўйига ишора қилиб кулди.

— Ҳа, тубсиз.

— Тунда юриш хавфли экан.

— Ёмон одамга кундузи ҳам хавфли.

— Ёмонлар сирасига кирмасам керак мен?

— Нималар деяпсиз, хафа қилаяпсиз бизни.

— Хай, бизга жавобми унда?

— Шундайгина йўлни тозалаб олайлик.

Отамурод йўлдаги харсангларни четга суришга уннатган йигитлар харакатини бир зум кузатиб тураркан, сўнг ўтиргичда ётган белбоғни қўлига олди. Уни димогига олиб бориб ҳидлади. Белбоғдан қўхналик хиди, шунингдек, заиф атириши анкирди.

— Уни белга маҳкам боғлаб олинг, меҳмон, — деди коратўри йигит, кафтларини бир-бирига ишқаларкан, жилмайиб.

— Ҳа, маҳкам боғланг, — деди иккинчиси.

— Аввалроқ шундай қилиш керак эди, — деди яна биринчиси.

Отамурод белбоғни белига боғларкан, масрур жилмайди. Бунга жавобан йигитлар ҳам кулишиди. Сўнг қўл силкиб, хайрлашиб қолишиди.

\* \* \*

Худди шу аснода Сардор чол дўнгта қўтарилиб ултурганди.

У йигитларнинг йўлни тозалашларию, жилган машина кетидан қўл силкиб қолишларини жимгина кузатаркан, енгил, жуда енгил нафас олди. Кейин улар қўриб қолмасин дея, буталар орасига яширинди.

Йигитлар узун-қисқа бўлиб, кишлок томон юришаркан, улар қаторида Абдураҳмон чавандознинг невараси ҳам бор эди. Отамуродга рўпара бўлган биринчи йигит эди у.

Чол буталар панасига хотиржам жойлашиб ўтирапкан, ўзининг бу кишлокда муқим яшаб қолишига сабаб бўлган омиллардан бирини топгандай бўлди. Аммо буни сўзда ифода этиш кийин, факат хис кила билишгина мумкин эди, холос.

## TOFU TOШЛАРДА

Унинг ҳаётида беҳаловат кунлар бошланганди. Энди илгаригидек эмин-эркин юролмас, назарида ҳар бир харсанг, бута ёки арча ортидан ғаними пойлаб тургандек ўзини бежо ҳис этарди. Бундай пайтда кўзидан кўра кўпроқ димогига ишонарди. Ўша даҳшатли хидни илраши баробар бутун вужудида титроқ қўзғалиб, тезроқ кочмоқ пайида бўларди. Ўша даҳшатли хид — ин-

сон хиди эди. Кўпинча бу хид милтиқ иси билан қоришик бўларди. Қоришик хид — ажал эди. Ажал хидини пайқаган кезлари қора, намчил тумшурини юқорига кўтариб, барча айикларга хос хиёл сусткаш хатти-ҳаракатлар ила ҳавони бот-бот искар, кейин эса лапангланча орқа-олдига қарамай қочиб қоларди. Орқа-олдига қарамай деганимиз сал ёлғон бўлар, нега деганда, Пахмоқ қочиб бораётиб, ўлда дуч келган нарса — ҳарсанг, бута, арча, қисқаси, бекиниш мумкин бўлган нимаики учраса, бир зумга тўхтаб, ғаними томонга секингина мўралар ва шу созда уни бир неча бор кўришга мұяссар бўлганди.

Эгридара ҳудудида ўзи ёлғиздек, ғаними ҳам ёлғиз эди. Тошлоқсойлик Панжӣ саёқ унинг изидан тушганди. Шу дамгача уларнинг бир-бирлари билан ишлари йўқ эди. Пахмоқ ўз ерида тинчгина умргузаронлик қилганидек, Панжи саёқ ҳам тоғбегининг кўзини шамбалат қилиб, тулки ва парранда-ю даррандаларни отиш билан қаноатланиб юрарди. Айик овлаш етти ухлаб тушига кирмаганди. Умрида йирик йирткичлардан — уч-тўрт бўринигина отишга муваффақ бўлган бу одамнинг феъли ёзда шахарлик меҳмонларнинг навбатдаги ташрифидан кейин айниди.

Кишлоқ настидаги сой бўйида сўлим гўшалар нихоятда сероб эди. Айни саратонда бу ердан дам олувчиликарнинг кети узилмасди. Бундай пайтда Панжи саёқка ўхшаш такасалтангларнинг куни тугарди. Тимирскиланиб сой бўйига тушса бўлди, истаган давра уни ўзига қўшиб оларди. Панжи саёқ меҳнатга териси юпқа бўлгани билан улфатчиликни жуда койиллатарди, хизматдан сира қочмасди. Ўчоқ кавлаш дейсизми, тандир осиш дейсизми, юқоридан ўтин териб тушиш дейсизми, хуллас, бу хил юмушларни жуда кифтими келинтиради. Боз устига уста гурунгчи эди. Оғзига озгина «тегиши» билан ов ҳақида шундай бир гурунгларни бошлардики, ўтирганларнинг оғзи ланг очилиб қоларди. Даврадагиларнинг кўз ўнгига бу бирдан ўзгача тус оларди. Шунчаки бир факир эмас, балки уста овчи, ҳар йили неча-нечада бўриларнинг шўрини куритадиган моҳир мерган, неча-нечада кўчкилардан омон колган омадли инсон сифатида таассурот уйғотарди. Барча овчилардек бирга ўнни қўшиб гапиргани сайин туйқусдан шу қадар

завки тошиб кетардики, оқибатда гапирган гапига ўзи ҳам чиппа-чин ишониб қоларди. Дам олувчилар ҳам фавқулодда саҳийлашиб, ундан ичқиликни аямас, кетишаётисб эса баъзилари манзилларини ҳам ташлаб кетишарди, боринг, бормасангиз хафа бўламиз, дейишарди.

Панжи саёқ уларникига бормаганидек, уйига ҳам таклиф этмасди. Қандай қилиб таклиф этсин. Пешана-сига битгани уй бўлиб уй эмас, оғил бўлиб оғил — бир айвонли, етти боларли шунчаки бир кулба. Ёз бўйи хов-лисини супурги ўт босиб ётади. Кузга томон супурги ўтларни ўриб, улардан супурги ясайди. Ҳафсала қилса, бозорга чиқариб сотади, йўғасам, ховлининг бир четида киши ичи чириб адо бўлади. Рўзғор ишига камхაфсала ва овдан бери келмагани учун хотини ташлаб кетган. Сўққабошликка тамомила кўнинкан бўлса-да, гоҳо тўсатдан уйлангиси келиб қолади. Аммо бунинг учун аввало уйини тузатиб олиши лозим, иккинчидан, қуёш кўрмай моғорлаб кетган кўрпа-тўшагини янгилаши ке-рак. Учинчидан, хотин туширгандан кейин ис-пис чиқариш деган гаплар бор, бунинг ҳаммасига эса пул керак. Киши ичи отган тулкилари терисига битта қисир сигир келмайди. Ака-укалари, одам бўлмайди бу, дея қўл силтаб қўйганларига анча бўлган. Унинг эса одам бўлгиси келади-ю, лекин...

Панжи саёқ эркин яшашга ўрганган. Елкасида мильтик, тогма-тог изгишни хуш кўради. Унинг бу хил турмуш тарзини одамлар ҳазм қилолмагандек, ўз навбатида, у ҳам одамларнинг яшаш русумини ҳеч танига синг-диролмайди, ўзича одамларни кўркаламушга киёслайди: «Иш, рўзғор, хотин ва бола-чака... туфи-ий, шуям ти-рикчилик бўлди-ю!» Қишин-ёзин устидан пахталик тушмайди. Негаки, кечалари дуч келган ерда ётиб қолавера-ди-да. Дала-дашт, торо тош, ўнкир-чўнкир унинг учун ҳар қандай уйдан афзал. У, асосан, тулки овлашни яхши кўради, паррандаларни эса овкати учун отади. Ёздан бўлак пайт кулбасининг ёнидан ўтиб қолган одамларнинг димогини каклик шўрва ҳиди китиклайди. Агар кўнглингиз каклик шўрва тусаса, марҳамат, яримта ви-нони қўйинга тикиб, эшик қоқиб бораверинг. Панжи саёқ сиздан овқатини аямайди.

Боя айтганимиздек, ёзда унинг куни сой бўйида ўта-

ди. Дам олувчилар орасида ҳафталаб туриб кетувчилар бор. Панжи саёқ гурунги ва хизмати эвазига ҳафталаб маза қилади. Бир сафар уни норгул-норгул эркаклардан ташкил топган давра ахли ўзига тортди. Даврабоши туман марказидаги аллақандай бир каттакон идоранинг бошлиғи экан. Гап орасида кимдир бу ҳақда кистириб ўтди. Аммо Панжи саёқ учун бу нарсанинг зифирча аҳамияти йўқ эмасми, бошлиқнинг викорли чимирилиб ўтиришларига мутлақо аҳамият бермади. Одатдагидек, хизматини сидқидилдан адо этиб юраверди. Қўли ширилигини билган бошлиқ бора-бора уни ўзига яқин олди, ов ҳақидаги гурунгларини жон қулоғи билан тинглади. Тинглаб туриб, бир куни шундай деб қолди:

— Мулла Панжи, бу-у айифу коплонларгаям тишлари ўтадими ё фақат бўрининг кетидан пойлайдиларми?

Панжи саёқ ҳузур қилиб суюк кемираётган эди, жавобга ошиқмади. Суюк кемира-кемира аввалбошда бошлиқнинг семиз, оппоқ яланғоч сонларига, сўнг калта иштони устига тўкилиб турган йўғон қорнига назар солди, тоғ йўлига ўлақолса чидамаса керак бу, деб ўйлади негадир ўзининг чайирлигидан суюниб. Сўнгра унинг ўзига бир қадар ихлос билан тикилиб турганлигини кўриб, мой юки бармокларини ялай-ялай, ўта жиддий оҳангда гап қотди.

— Тишимиз ўтади, ака. Тоғда бизди тиш ўтмайдиган нарсанинг ўзи йўқ. Қўнгиллари нимани тусайди, айтаверсинлар, отиб бераверамиз. Тоғбегини ўйламанг, битимниям тутолмайди у.

Табиий, бошлиқ тоғбегини ўйламаган. Шундок қаршисида савлат тўкиб турган тоғу тошларнинг кўриклиниши унга бир қадар эриш туюлади. Мийифида илжайиб, жўшиб оқаётган сойга тикилади. Атрофнинг ниҳоятда гўзаллигини ўйлайди. Яна озгина «отиб», сувга тушишин хаёл қилади. Аммо қаршисидаги кимса жавоб кутиб кўзларини лўқ қилиб турибди. Шунда у яна максадга ўтади.

— Бизга битта қоплонми, айқми отиб берсалар, — дейди. — Полга ташлаб кўйсан дегандим. Ҳов бирда бир оғайнимникига ўтгандим. Айиқ териси шундокқина дивани тагида ётибди. Айтишига қараганда, айиқ жуни товонни китиклаб, нервга ором бераркан.

— Коплон деганимиз пишак<sup>1</sup>дан каттароқ бир жони-  
вор-да, — дейди Панжи саёк сергүштроқ ковурғани  
қўлига олиб. — Пишакди акаси десаям бўлади уни.  
Сиз, яхшиси, айувдан<sup>2</sup> колманг, ўзиям бир гектар ерни  
олади. Янгам билан устида ўйин тушсангиз ҳам бўлади.

Унинг гапи бошлиқка хуш ёқиб, улкан қорнини сил-  
китганча мириқиб кулади. Унга бошқалар қўшилади.  
Сой бўйи қаҳқаҳага тўлади.

— Оббо, сизи-ий, — дейди бошлиқ мижжаларига  
калкиган ёшни артиб. — Гапни зап оларкансиз-ку, а.  
Унда бизга битта айик отиб берасиз. Лекин ҳақиниям  
айиқдай қилиб тўлаймиз. Нима ишонмайсизми? — У  
ёнидаги йигитга им қоқади, йигит чодир яқинидаги ма-  
шинадан семизгина ҳамён кўтариб келади. У ҳамённи  
қўлига олиб, ундан бир даста пул чиқаради-да, санамай,  
унинг олдига ташлайди. — Бу аванс, — дейди, сўнг. —  
Колганини иш пишгач оласиз. Вактини айтинг, шофे-  
рим кең онкетади.

Бир даста пулни кўрган Панжи саёқнинг кўзлари  
чақнаб кетади. Ҳаёлининг бир четида ҳамиша яшаб кел-  
ган ва гоҳо-гоҳо секин қўзғалиб қўядиган ожиз бир  
илинж илкис жонланиб, кўз ўнгидан кулбасининг таъ-  
мирдан кейинги ҳолати ўтади. Тасаввури янада рангла-  
ниб, кулбасида рўзғор иши билан куйманиб юрган бир  
аёлни кўради. Ана у эрининг музлаб қолган этигини ибо  
билан тортмоқда. Қани энди ҷоғи келса. Бунга сари  
Панжи саёк хузур қилади. Қабатида қўш-қўш каклик ва  
бошқа даррандалар. Милтиғи деворга суялган. Тўнғиб  
қолган сирти уйнинг ҳароратидан терчиган. Хотини эти-  
гини ечиб бўлиб, милтиққа қўл чўзади. Панжи саёк но-  
розиланиб бош чайкайди, яроққа тегма, хотин кишининг  
ишимас бу, яхшиси, мановулардан битта шўрва яса,  
дейди. Аёли итоаткорона бош иргаб, тагига янги қавил-  
ган кўрпача ташлайди. У оёқларини печкага тоблаб, ён-  
бошлайди. О-о, қандай маза!

Унинг хаёлга ботиб колганини бошлиқ ўзича тушун-  
ди шекилли, хиёл ошиброк изоҳ беради.

— Пулдан фам еманг. Қанча десангиз тўлаймиз.  
Қачон юборай шофёримни.

<sup>1</sup>Пишак — мушук.

<sup>2</sup>Айув — айик.

Панжи саёкнинг хаёли кочиб унга қарайди. Бунда пул кўп, деб ўйлади унинг кўлидаги ҳамёнга ҳирслик билан тикилиб, бунга пул писанд эмас, йўғасам, битта сассик айувга шунча пул тўлайдими, лекин айув отиш хам осон иш эмас, кийин.

Бошлиқ сал жонсаракланиб, яна сўрайди.

— Қачон юборай одамимни?

— Кузда, — дейди Панжи саёк.

Бошлиқ узоги билан «ҳафта-ўн кун» деган жавобни кутганди. Бу гапни эштиб ҳафсаласи пир бўлади. Ўртадаги пулга ичи ачиб қарайди, мастилик курсин, дея ўзини янади. Аммо қайтиб олишга юзи чидамайди. Атрофдагилар нима дейди, деган андишага боради.

— Ҳозир отиб беролмайсизми? — дейди кейин. — Сизга чўт эмас-ку бу...

— Ҳозир туллаган пайти, — дейди Панжи саёқ олдидаги пулни баҳузур чўнтағига жойлаб. — Кузда жуни зўр бўлади. Лекин баҳтингиз бор экан. Эгридарада битта зўри бор. Жуни бир кариҷ. Паҳмок деб от қўйганимиз. Шопирни кузди ўрталарида юбораверинг.

— Битта-яримтаси отиб қўймасмикан ишқилиб?

— Отмайди, — дейди Панжи саёқ ишонч билан. — Қўриқхонада отиш ман килинган. Бизнинг йўриғимиз эса бўлак. Эгаси минг пойласин, ўғри бир дегандай... амаллаймиз-да энди, ака.

— Эркакча гап-а? — Бошлиқ унга қўлинни узатди.

— Худога шукур, эркак бўп туғилғанмиз. — Панжи саёқ олдинга эгилиб, унинг хамирдай юмшоқ кафтини тутаркан, алоҳида таъкидлайди. — Сўз бердикми бажарамиз. Бажармасак ўзимизни эркак санамаймиз, биз!

Бу гап ёз чилласининг ўрталарида бўлиб ўтганди. Паҳмок бу вактда ёз неъматларидан тўла-тўқис баҳраманд бўлиб юрарди. Ора-сира сойга эниб балиқ овларди. Балиқ овлашнинг обдон ҳадисини олганди. Асосан буримдаги қиёқзорда кўп ўралашарди. Қиёқзор сойдан айри тушган бўлиб, у ерга сув тошлар орасидан сизиб ўтарди. Чиқиш жойи торгина ўзан эди. Паҳмок овни худди ўша ердан бошларди. Аввал чўнқайиб ўтириб, илиқ сувда бемалол сузиб юрган балиқларга панжа уради. Турган гап, балиқлар патир-путир кочмокқа тушарди. Шунда унинг сабри чидамай, қиёқзор оралаб сувни бошдан-оёқ лойқатиб ташларди. Кейин эса тамомила гарангсиб қолган балиқларни битта-битта тутиб,

қирғоққа улоқтираверарди. Қорни дүмбирарадай шишиб кетгунча баликхўрлик қиласади-да, нафси конгач, сойнинг чап қирғидаги дўланазорга чикиб, ўзини офтобга тоблаб ётарди. Орада бир-икки бор сувга тушиб чиқарди.

Қискаси, айни ўша пайтда у сойнинг юкори қисмida ов қилиб юарди. Куйида эса унинг ўзини овлаш хусусида бир битимга келинганди.

Улар илк бор кузнинг ўрталарида Оқсув бўйида тўқнаш келдилар.

Оқсув деганимиз Эгридара туби оралаб оқадиган сойга келиб куйиладиган кичик ирмоқ эди. Ирмоқнинг манбаи Эгридаранинг ўрта тармоқларидан бири хисобланмиш тик жарликнинг тўридаги булоқ эди. Тик жарлик тоф бағрига уч чақиримча сукилиб кирган бўлиб, туви булоқ бошигача калин чангальзор эди. Оқсувнинг сойга келиб куйиладиган қисмини эса улкан зирк майдони ташкил этарди. Шу куни Пахмок зирк оралаб, нордон, қизил мевалардан тотиниб юарди. Кузда айклар йилнинг бошқа пайтларига нисбатан овқатга ўчроқ бўлишади. Сабаби, олди қиши. Қиши уйқусига оч қорин билан кириб бўлмайди-да.

Олдинги чап оёғига ўқ келиб текканда, у зиркнинг шифил мевали шоҳига энди интилай деб турганди. Кучли оғриқ баробарида наридаги харсанг бошида тутун кўрди. Сўнг овчининг боши кўзига чалинди. Накл килишларича, яраланган айиқ ғанимига дарҳол от қўярмиш. Аслида ҳам шундай. Аммо ҳар пайт ҳам бу ходиса юз беравермайди. Пахмок харсанг томонга бир талпинди-ю, чўлоқланганча, ғингшиб, ингиллаб қоча бошлади. Шўрлик эндинигина уч ёшга тўлган бўлиб, у қадар жасоратли эмасди. Боз устига, оғриқ шу қадар зўр эдики, чопса оғриқ босиладигандек, оёғига зўр бермокда эди. Иккинчи ўқ ёнидаги тошга келиб тегди. Бунга сари у баттар шаталоқ отди.

Ўша куни тоф ўнгиридаги коваклардан бирига бикиниб, роса бир ҳафта жароҳати билан андармон бўлди. Ялаб-юлқаб жонига ором берди. Ҳайтовур, ўқ суяигига зиён етказмаган экан, ҳафта деганда жароҳати анча битиб, ташқарига чиқди.

Яраланганда илк бор ёлғизлиги кор қилди. Онасини эслаб, узок-узок ғингшиди. Милтиқдан эса ёмон юрак олдириб кўйди.

• • •

У онасидан эрта етим қолганди. Онаси ҳам ўзига ўхшаш журъатсизроқ айиқ эди. Келбати кичикрок, кўримсизгина эди. Лекин барча оналар каби ўта меҳрибон эди. Боласини ер-кўкка ишонмагандек, сабоқ бериш борасида анча талабчан эди. Аммо сал эҳтиёткорсизроқ эди. Нега деганда, сўнгти пайтларда кўрикхонада йирик жониворлар ҳаётига қасд қилиш холлари камдан-кам содир бўларди. Тартиб бузар овчилар, асосан, майда жониворлар билан чекланарди. Кам ҳуркитилгани боис, у хийла боқибенгам эди. Айни шу нарса унинг бошига етди. Билмай заҳарланган сигир гўштини еб қўйди.

Кўрикхонада милтиқ отилар, қопқон қўйилар, лекин заҳар ишлатилмасди. Заҳарни бўрилар жонига теккан чўпонлар қўйганди. Заҳар нималигини билмаган онаси гўштдан тўйиб еди. Ўша пайтда, баҳтига, Пахмокнинг қорни тўқ эди. Онаси гўшт билан андармон вақтида арчазорда ўйнаб юрарди. Қайтиб, онасини чўзилиб ётган ҳолда кўрди. Ўлим нелигини тушунмас, югуриб келиб онасининг пинжига суқилди. Кейин устида умбалоқ ошиб ўйнади. Қулоғидан тишлаб тортқилади. Қизик, онаси фиқ этмади. Одатдагидек, улкан панжаси билан уни нари сурмади. Мик этмай ётаверди.

Шу пайт сўқмоқ бошида отлик кўринди. Одатда, онаси инсон зотидан иложи борича нари юришга ҳаракат киласарди. Бу ҳолни унинг шуурига қуишига ҳам ултурганди. Бу сафар уни танг қолдириб, онаси қимир этмади. Пахмоқ хавфдан огохлантириб, оёғидан қаттиқ тишлади. Бирок бу харакати ҳам фойда бермади — онаси пинак бузмади. Отлик эса тобора яқинлашиб келарди.

От ташвишли пишкириб, туёқ товушлари тинди. Киши от устидан дикқат билан уларни кузатди. Сўнг елкасидаги милтигини қўлига олиб, осмонга ўқ бўшатди. Ўқ овозидан Пахмоқ кўркиб кетди. Ички бир идрокка бўйсуниб, арчазорга қочди. Анча вақт бикиниб ётди. Онасининг излаб келишини кутди. Қуёш қоялар ортига бекинсаямки, онаси қидириб келмади. У хурка-хурка онаси томон жилди. У ётган ерда бир уюм гўштни кўриб анг-танг туриб қолди. Онаси қаёққа йўқолди? Бу саволга жавоб тополмагандек, олга силжишга ҳам ботинолмади. Арчазор оралаб, фингшиганча, онасини қидириб кетди.

Онасини излаб тошсупагача борди. Тошсупа кичик-рок қоянинг туртиб чиккан бурни бўлиб, чор тарафи қуюқ арчазор эди. Онаси қўпинча шу ерни маъкул кўрарди. Қорни тўқ қезлари тошсупада ором оларди. Сукунатга чўмилган даранинг бу бурчидаги тошвуш дарров қулокка чалинарди. У тунни шу ерда ўтказди. Шитирлаган ҳар бир товушни онам деб ўйлади. Тошсупа лабидан туриб пастга илҳақ-илҳақ термулди. Аммо ҳар сафар товуш эгаси бошқа бўлиб чиқаверди – гоҳ уни тўнғизлар галаси алдар, гоҳ дарахтдаги қушларнинг патир-путури чалғитар, гоҳ қайсидир жониворнинг оёғи тагидан кўчган тош умидлантирар, қискаси, турли-туман ҳидга тўла хавода онасининг таниш хидини бехуда кидирарди.

Пахмок етимликнинг ilk тунини тошсупа лабида маъюс ва эзгин бир ҳолатда ўтказди. Қуёшнинг дастлабки нурлари қаршисидаги қоя юзини ёритгач, қорни нихоятда очганини англади. Фингшиб, ингиллаб нола қилди, ўзича онасидан ўпка-гина қилди. Тонг отганидан ботирланиб, нораста овозда ўқириб-ўқириб уни йўқлади. Ҳар йўқловдан сўнг дикқат билан теваракка қулоқ тутди. Таниш шарпа кулоғига чалинавермагач, яна ва яна ўқирди. Онаси чиқиб келиши мумкин бўлган арчазорга тикилиб-тикилиб ўқирди. Охири ўқиравериш жонига тегиб, бир нуктага термулганча туриб колди.

Кун хийла ёйилгач, олифта бир тулки дикқатини тортиди. Арчазордан чиқиб келган бу жонивор искаланниб, тошсупа тагигача келди. Тошлар орасидан ниманидир топиб, иштаҳа билан чайнай бошлади. Бундан Пахмокнинг қорни баттар фўлдираб, тумшуқчасини ялади, нолакор фингшиди. Тулки чўчиб тепага қаради. Уни кўргач, бамайлихотир ўз юмушида давом этди. Сўнгратор сўқмок бўйлаб юкорига ўрлади. Пахмок кўзи билан уни тор муюлишгача кузатиб колди. Муюлишдан Эгридаранинг асосий қисми бошланади. Ундан нариёғи кичик водий, водийдан сўнг Корадара. Пахмок Корадарада икки бор бўлган. Негадир онаси у томонларни унчалик хуш кўрмас, асосан Эгридара худуди билан чекланарди. Кейинчалиқ билса, Корадарада емиш камрок экан, шу боис онаси у томонларга кам бошлаб борарди.

Тулкининг қораси ўчгач, у майда тошли сўқмоқдан пастга энди. Боя тулки ниманидир чайнаган ерга борди.

Тошлар орасига бошини сукіб искаланды. Димогида сасиганрок парранда исини туйиб, пишқирди. Пишқира-пишқира қүйига жилди. Илк бор мустақил равища емиш қидириб кетди. Емиш дегани мұл әди. Мазали томирлар истаганча топиларди. Нафси бир оз қонгач, үз майлида тентиб кетди. Онасини құмсағ, фингшиди. Оёқлари беихтиёр кечаги жойга тортди. Тезрок борса онасини топадигандай қадамини тезлатди. Аммо қалин бутазорга кирганида кутилмаганда ғанимга дуч келди. Тұсатдан унга тұнғиз ташланиб қолди. Бечорани бир туртиб нишабликдан пастға улоқтириб юборди. Биқінлари тошга урилиб, қүйига юмалаб тушаркан, оғриқдан ҳам құра дахшатдан, дахшатдан ҳам құра ожизликтан чинкириб юборди. Ахир онаси ёнида бўлганида бу хол юз бермасди-да. Онаси даврида бу каби хунук ға серзарда жониворларга неча-неча бор дуч келишган, бироқ улар ҳеч вақт ҳад қиломаган. Энди эса...

Пахмок дунёning бу хил ишларидан таажжубга болтиб, арча тагида узоқ ўтири. Танидаги оғриқ босилгач, яна секин олра жилди. Буримда яна тұнғизларга дуч келди. Бояги тұнғиз болаларини әргаштириб, сойға зниб борарди. Пахмок ularни қўриши билан ошиғич ҳолатда тош ортига бикинди. Илгари бундай эмасди, онаси қабатида тик босиб бораверарди. Тұнғиз деганлари хўрхўрлаганча ўзини четта олмасдан иложи йўқ әди.

Тўғри, бир сафар улкан тұнғиз онасига ҳамла қиласан. Чамаси, болаларини қизранганди. Аммо онаси ўта совуққонлик билан уни шундай бир туширгандики, шўрлик тұнғиз майда буталарни босиб-янчиб харсанғ остига юмалаб тушганди. Онаси эса ортиқ тирғалишини ўзига эл қўрмай, секин йўлида давом этган ва ўша куни Пахмоқни роса балиққа тўйдирганди.

Тұнғизнинг сўнгги боласи буталар ортида кўздан йўқолгач, у бикинган жойидан чиқди. Биринчи бор атрофига қўрқув ила назар ташлади. Кейин ёнверига ҳадикли аланглай-аланглай, онаси тұсатдан ғойиб бўлган кечаги жойга жилди. Кўклам тошкини ўпирган ўнгир бўйлаб юриб, ялангликка чиқди. Кечаги ерда кузгуналар галасини қўриб, жойида хайрон туриб қолди. Улар орасида онаси қўринмасди. Қаёққа кетди экан у? Енгил шабада ўша томондан яна қўланса хидни олиб келди. У енгил пишқириб, ўнгирга тушди. Зорланиб

фингшиди. Корни очганини хис этиб, онасини эммок истади. Тамшаниб-тамшаниб она сутини құмсади. Мункиб кетиб, тумшуғи билан ўнгир деворига туртилди. Оғизчаси сут ўрнига күмга тұлди.

У йиғлади, росмана фингшиб, зорланиб, хұнграб йиғлади. Нораста овозда ўқириб-ўқириб йиғлади. Асрий қоялар миқ этмади, асрий арчалар дардига малхам бўлмади. Қайтага нақ тепасида иккита тоғ бургуги пайдо бўлди. Қаровсиз, химоясиз қолган бу митти жони-ворга чоғлари келиш-кељмаслигини чамалагандай осмон бағирлаб узок айланиб учдилар. Пахмоқ арчазорга кирмагунча бошидан кетмадилар.

У ўксисб-ўксисб йиғлаганида, миқ этмаган арчалар уни бағрига олди. Ташкиғанымлар қўзидан пана қилди. Аммо арчазор қўйни ҳам ғанимларга сероб эди. Йиғлаб бораётган Пахмоқ ўзига ўқдек қадалиб турған нигохни хис этиб, бошини кўтарди. Нақ қаршисида ғазабнок силовсинни кўрди. Силовсин кўркинчли ириллаб, кет, йўқол, деди. Олдинги оёқларини олға чўзиб, жантга шайланди. Пахмоқ бир одим олдинга босса, ташланишини огоҳ этди. Пахмоқ кетига тисарилиб, йўлни чапга солди. Ҳайрати аламга алмашинди. Онаси борида булар қаерда эди? Нега энди ҳаммаси унга ҳамла истаб колишиди? Тўнғиздан еган турткиси каммиди? Нималар бўляяти ўзи? Онаси қаерда колди? Нега қидириб келмаяпти?

Пахмоқ ўша куни ғанимларидан юрак олдириб, тошсупа тепасидаги ковакка эртароқ кириб ётди. Тунни очнахор ўтказди. Тушида онасини кўрди. У тушида онасини эмди. Тонгда эса қаршисидаги қоя юзида қуёш нурини кўрди. Ички бир сезги билан онаси энди қайтиб келмаслигини идрок этди. Ковак оғзида ғамга ботиб узок ўтирди. Аммо очлик ғамдан кучли эди. У Пахмоқни ҳаракатта ундади. У ўзи сезмаган ҳолда мустақил ҳаётни бошлади. Онасидан ўрганган усул бўйича корин тўйдирмоққа тушди. Шўх айикчадан дилгир ва маъюс айикчага айланди. Бора-бора онасини унуди. Ёлғизликка кўниқди.

Бугун эса онасини бот эслади. Оғрик кор килиб, ёлғизлигини ўйлади. Фақат ҳиқиллаб йиғламади. Инграб-инграб ярасини ялади. Ғаним балосидан кутулмокни ўйлади.

• • •

Пахмоқ биқиниб ётган жойидан оқсоқланиб чиққанида күёш анча күтарилиб қолғанды. Кузнинг муздек хавосидан тани яйраб, бир муддат чүнқайиб үтириди да, теваракни синчков назардан ўтказди. Сўнг бир-бир босиб йўлга тушди. Юрғани сайин ярасидан кон сизаётганини пайқаб, таъби яна хира тортиди. Пастга, сой бўйига тушиб, оёғини сувга тикди. Муздек сувдан вужуди тийракланиб, ўзини бардам ҳис этди. Бекарор шабада қаердандир ёввойи олма хидини олиб келди. Кўп ўтмай олма хидига дўлана хиди қўшилди.

У хидга эргашди. Ўз ҳудудидаги ерларни яхши биларди. Олма хиди Бужуркоя тарафдан келарди. Дўлана кута турсин, у олмага тўймок истади. Йўл-йўлакай у-бу тотинган бўлиб, манзил томон ошиқмай жилди. Оқсоқ оёғи ҳар қадамда ўзини эслатиб борди.

Олмазорга арчазор сойлик орқали чиқиларди. Арчазордан нарёғи кафтдек тошлок яланглик эди. Олмазор тошлок ялангликнинг нариги бетидан бошланиб, Бужуркоя этагига бориб туташарди.

Пахмоқ арчалари сийрак дўнглиkkка чиқаркан, ўзи учун ўта жирканч туюлган инсон хидини сезиб, бутун тани даҳшатдан титраб кетди. Бутун вужуди кўзга айланиб, хид келаётган томонга аланглади. Нариги бетдаги сўқмоқ бошида отлиқни кўрди. Уни дарров таниди. Кўнгли андак хотиржам тортиб, арча остига бекинди. Билади, тоғбеги безиён. Шунга қарамай, у ўтиб кетмагунча яширинган жойидан чиқмади. Атрофни жиддий, шунингдек, бир қадар марок билан кузатиб ётди.

Мароқланиб дейишимизга сабаб шундаки, ҳузурланиб элашга арзигулик хотиралар унда сероб эди. Бу жойнинг тарихи ана шундай хотиралардан бири эди. Аслида онасининг мулки ҳисобланмиш бу майдонда у ўз хукмронлигини ўтган йилнинг кузида тиклаганди. Үнгача бу ер кулранг бўриларга тегишли эди. Норасталигига тортиб олишганди. Эсласа, ғазабдан ҳозир ҳам эти тиришгади.

Норасталигига ҳудуд нималигини билмасди. Корин тўйдириш ғамида боши оққан томонга тентиб кетаверарди. Бир куни олма хидини олиб Бужуркоя тарафга юрди. Олди қиши, ўзи сезмаган ҳолда корин ташвишига тушиб қолғанди. Қиши уйқусига оч корин билан кириб

бўлмаслигини табиатнинг ўзи огох этганди. Ўша огохга бўйсунган ходда харакат қиласди у. Аммо ўша куни олма насиб этмаган экан, арчазордан чиқиши билан тошлок ялангликда бўриларга дуч келди. Бир эмас, икки бўри уни олдига солиб кувлади. У чинқирганча арчазорга кочди. Пастликдаги арчазорларда яккам-дуккам учраб турадиган тоғ теракларидан бирига ўрмалаб чиқиб олди. Бўрилар терак тагида бехуда ўралашдилар, бехуда юқорига сапчидалар. Уларга яна икки ёш бўри, болалари шекилли, келиб кўшилди. Бири қўйиб, бири тепага сапчиди. Кейин ўзаро маслаҳатлашиб, қайгадир гум бўлишди. Уларнинг кораси ўчиши билан Паҳмок пастга тушди. Аммо йигирма-ўттиз одим юрмай, ўзи томон келётган хавфни пайқади. Бундай қарасаки, ҳалиги бўрилар елиб келмокда. Демак, пастга тушишини пойлашган. У янада каттиқ чинқирганча бу сафар арчага тирмашди. Ҳайтовур, баҳтига камбутокроқ арча дуч келди.

Ўша куни арча устида узоқ қолиб кетди. Бўриларга нисбатан кек ва адоват юрагида маҳкам ўрнашиб қолди. Аслида у онасининг ғанимига дуч келганди. Заҳарли гўшт айни шу бўриларга қаратилганди. Онаси уларнинг касрига ўлиб кеттанди.

Табиий, у буни билмасди. Ўзига ўтказилган алам туфайли орадан бир йил ўтиб, у бўрилардан боплаб ўч олди. Бу воқеа ҳам Бужурқоя якинида юз берди. Паҳмок билмасдан бўриларнинг ини устидан чиқиб қолди. Қаршисидан ириллаб чиқкан икки бўрини кўриб, аввалига лол туриб қолди. Бирорвга ёмонлиги йўқ одам ноҳақ ҳақоратта рўбарў келгандай, кўзларини пирпиратиб, анграйиб тураркан, бир хаёли изига қайтиб кетмоқчи ҳам бўлди. Сўнг бирдан бўриларни таниб қолди-да, ҳайрати баттар ошди. Назарида, бўрилар анча кичрайиб қолгандай эди. Ўтган йилги бўрилар анча басавлат эди. Булар эса... Бўрилардан бири узоқ ўйлатгани қўймади. Қутуриб хужумга ўтди-да, унинг сонидан гарчча тишлаб олди. Паҳмок беихтиёр кетига тисарилди. Қочмоқчи ҳам бўлди. Бироқ тўсатдан нағсонияти қўзиб, қахри жўшди. Яқинига тишини иржайтириб келиб қолган бўрилардан бирини панжаси билан уриб учирив юборди. Иккинчиси ўзини чапга олиб улгура олмади. Ўз запти билан Паҳмокнинг кучоғига келиб тушди. Шўрлик-

нинг суюклари бир сиқувдаёқ синиб адо бўлди. Пахмоқ бу билан чекланмай, унинг яғринидан тишлаб ҳам олди. Оғзида кон таъмини туюб, баттар кутурди. Рақибини, том маънода мижиғлаб ташлади. Кейин шу яқиндаги катта тош билан бўрилар инини бекитиб қўйди. Аммо фалабасидан негадир руҳланмади. Эски ғаними бўлмиш бўриларнинг бу қадар кичрайиб қолганидан ажабсиниб, улар бошида хийла вакт туриб қолди.

Пахмоқ ўзини кундан-кун улғайиб бораётганидан бехабар эди. Бир оз ҳайратдан сўнг, бўрилардан бири чўзилиб ётган арча тагига борди. Ички бир ундовга бўйсуниб, тумшуғини кўкка чўзди-да, орқа оёқларида даст туриб, арча танасиға елкасини обдон ишқалади. Одатдагидек аждодларига хос ишни қилди, яъни бу ер меники, деган белги қолдириди.

Юмушини битиргач, арчадан сал узоклаб, белгига қиялаб разм солди ва шундагина ўзининг улғайганини пайқагандай бўлди. Бу сезидан томирларига қон югурди. Ярим овозда хушнуд ўкириб, теваракка мағрур-мағрур назар солди. Кейин эса ракибларининг мурдаларига қиё ҳам боқмай олмазорни кора тортди.

Бу энди бир йил олдинги гаплар эди. Қини ичи у яна улғайди. Кучга тўлди. Шу йил баҳордан бошлаб ажиб бир диққат ва ҳафсала билан ўз худудини кенгайтиришга тушди. Энди билсаки, бир йил олдин белги қўйган бу ерлар ўз худудининг маркази экан. Онаси у ўйлагандан кўра кўпроқ ерга хукмронлик қилган экан. Буни у қаердан билди деб ўйларсиз? Гап шундаки, бу йил баҳорда Бужурқоянинг жанубий қисмидаги Кўнғир тизмаларда ҳам обдон санқиган эди. Санқиши давомида болалик хотиралари хаёлида секин-аста қайтадан жонланга борди. Тизмаларда онаси билан юрганларини эслади. Кўнғир тизмалар Эгридара каби емишга мўл бўлмаса-да, ҳархолда ўз мулки, баҳор кезлари тишига бостулик нарсалар топилиб туради. Пахмоқ қизиқсиниб, ундан наридаги ерларни – Чукуркамар тепасидаги сойликдан бошланиб, хув кунботишдаги Мудрокқоягача чўзилган Ялангоя тизмаларни ҳам айланиб чиқишига ултурганди. Ҳатто фасллар гўзали баҳор ҳам бу асрий қояларга бирор-бир кўрк беролмасди. Овчилар тилида, худо карғаган жой, деб номланмиш бу масканга Пахмоқ қайтиб оёқ босмади. Шунингдек, Кинғир тизмаларда ҳам

камдан-кам ўралашарди. У, асосан, Эгридарада ва унинг теварагидаги бошқа катта-кичик дараларда тентирарди. Бужуркоя этагидаги бу ёввойи олмазор эса унинг энг хуш кўрган жойларидан бири эди.

Тоғбеги кўздан ғойиб бўлгач, у биқинган жойидан охиста қўзғалиб олмазор томон жилди. Ерга тўкилган меваларга қаноат этмай, дуч келган олма дарахтларини силкиб қокди. Тўйиб-тўйиб мева еди. Лекин хушёрликни бир дақиқа ҳам унутмади. Нафси ором олгач, ярадор оёғи симиллаб оғришига қарамай, бир ҳафта ковакда ҳаракатсиз ётганининг ҳиссасини чиқармоқчидай, одатдагидек, тентиб кетди. Тентий-тентий кечга томон Эгридара оғзига — осмонўпар икки қоя оралиғига бориб колди. Сой бўйидаги харсанглардан бирининг пойига чўкиб, қаршисида ястаниб ётган кенг яланглик — водийни ва унинг ортидаги қўнғиртоб пастак тоғ тизмаларини синчилаб кузатишга тушди.

Пахмоқ пастак тоғ тизмаларида ҳали ҳеч бўлмаган, лекин водийда истаганча кезган. Водий кўриқхонанинг этак қисми хисобланса-да, шу яқин-атрофдаги кишлоп одамлари, асосан, тошлоқсойликлар томонидаги анчамунча ўзлаштириб олинган. Кипилар бу ерга картошкадан тортиб, қовун-тарвузгача экиб ташлашган. Водий ўртасидан окиб ўтган сойнинг қирғоклари хув адокда қорайиб турган Тошлоксой кишлопигача мевазор боғ. Боғдаги мевалар тоғдаги мевалардан тубдан фарқ қиласди. Йирик-йирик, серсув ва тотли мевалар. Кузда Пахмоқ мана шу мевалар илинжида пастга кўп энади. Аммо энган кезлари ўзини ҳеч қачон эркин хис этолмайди. Негаки, водийда истаган вақтда одам боласига рўбарў келиш мумкин-да. Шунингчун, нафси жуда ҳакалак отган дамлардагина ўғринча келиб кетади. Айниқса, водийнинг қишлоп тарафдаги қисмида жойлашган ола-була йўлтўсгич ва унинг қаватида қўнқайган чоғроқкина кулба ҳамиша юрагига кутқу солиб туради. Бу йил ёзда ғаллазор оралаб, пишиб улгурмаган кўк майсаларни бамайлихотир тушираётганида, ўша томондан милтиқ отиб ҳуркитилганди. Шул боис, уйчага нисбатан худди ғанимидек муносабатда бўлар, иложи борича у томонга яқинлашмасликка уринарди. Бирок нафс деган бало ҳар вакт ҳам уни ўз майлига кўявермасди.

Хозир ҳам димоғида турфа хил мевалар ҳидини се-зіб, у безовта ғимирлаб қолди. Шабада бу томонга эсгани сайин оғзи сув очиб, ғингшишга түшди. Кейин сой ёқалаб, беихтиёр водий томонга юрди. Кartoшкапояни кесиб ўтиб, бокқа киргачгина ўзини анча бехавотир хис этди. Инсон боласи оғзига олмайдиган тоғ олмаларига сира ўхшамаган йирик-йирик қызыши олмаларга дарров ташланмади. Аввалига теваракни диккат ила обдон күздан кечирди. Кейин бамайлихотир йүғонрок олма дарахтига яқынлашди. Уни силкитмоқ ўйида қаддини ростлаган жойида бирдан тек қотди. Сүңг хұмдай бошини эгиб, дарахт танасини исқади. У майда жониворларнинг ўзига хос «сүзлашув устун»ига дуч келганди. Тунда ташриф буюрган неки жонивор борки, бу ерда ўз белгисини қолдириб кетганди. Ҳатто қишлоқ дайди итларининг ҳам белгилари бор эди бу ерда. Пахмоқ келиб-кетувчиларнинг устидан айиқларча кулди ва қаддини тиқлаб дарахтта ўз белгисини қолдириди. Ким келиб кетганини бир билиб қўйишин!

Бахтига ўша куни ҳеч ким ҳалақит бермади. У олмага обдон түйиб, қуёш ботиб-ботмай дарага қайтди. Ўзи билган синашта коваклардан бирига кириб ётди. Кўп юрганиданми, ярадор оёри қақшаб, яна азоб бермоқда эди.

\* \* \*

Панжи саёқ ўша заҳотиёқ Пахмоқнинг изидан тушмаганига кейинчалик кўп ўқинди. Аввалбошда Пахмоқни бир ўқ билан тинчитаман деб ўйлаганди. Аммо баҳайбат жониворнинг салобати босдими, кўли қалтираб кетди. Иккинчи ўқ эса умуман хато кетди. Агар ўн дақиқача бурун юкорига ўралаб кетган тоғбегининг кайтиб келишидан ҳадиксирамаганда, ундан Пахмоқ шўрликнинг кутулиши кийин эди. Ҳайтовур, ўқ овози тоғда акс-садо бериб тинар-тинмас, юқори сўқмодан от туёкларининг дупури эшитилди. Айик қочган зирк буталари сари ғоят эҳтиёткорлик билан яқинлашиб бораётган Панжи саёқ ўзини қалин чангалаэр ичига олди. Қамчи туттган кўлинин пешонасига қўйиб, теваракка ола-зарак караётган тоғбегининг тезрок кетишини илҳақ кута бошлади. Бахтга қарши, тоғбеги кетишга ошиқмади. Отини ўтловга қўйиб, чордона куриб ўтириб олди. Овчи

шу атрофда бўлса, барибир ўзини билдиради деб умид килди.

Панжи саёқ чангальзор орасидаги тош ортида биқиниб ётаркан, бошида тоғбегининг галварслигидан кулди. У ерга чордона қуриб олгач эса, ўзининг шошқалоқлигидан куюнди. Ўз навбатида, айикнинг ўлмай колганидан суюнди. Мабодо, айикни ўлдирганида, терисини тушида кўрарди. Бугун ярадор қилдими, эрта бир кун отиб олишига ишониб, панада баҳузур ёнбошлаб ётаверди.

Тоғбеги кетгач, биқинган жойидан чиқди. Бояги жойга борди. Ерда кон изларини кўриб, аста из бўйлаб юрди. Сойгача чалғимай келди. Кон изи сой бўйида йўқолганди. Демак, айик сойни кечиб ўтган. Этик ечмай сувга кирди. Муздек сув миясига чикқанига парво килмади. Сойдан ўтиб, қирғоқ бўйлаб изғиди. Изни тополмади. Йирик жониворларни овлаб кўрмагани шу ерда панд берди. Агар оқим бўйлаб яна тўрт юз одимча юқорилаганда изни топган бўларди. Пахмоқ муздек соvuқ сув ярадор оғига хуш ёқаётганини сезиб, сув кечиб қочган, боз устига, кўз остига олган коваги хийла юқорида эди. Ковакка сой ёқалаб юрилиб, чангальзор орқали чикиларди. Пахмоқ бу ерда фавқулодда бир туйғуга бўйсунган ҳолда изини сув ёрдамида йўқотишга муяссар бўлганди.

Панжи саёқ сойдан ўтиб, Эгридара тармоқларидан бири бўлмиш Ичакдара оғзига рўбарў бўлганди. Ичакдаранинг тор ўзани қалин арчалар билан қопланган бўлиб, ваҳимали суратда корайиб турарди. У айикни ўша ерда деб гумон қилди. Назарида, Пахмоқ арчалардан бирининг остида пойлаб тургандек туюлди. Ярадор жонивордан ҳар балони кутиш мумкин. Тоғда бу хил воқеалар кўп бўлган. Хов бирда тоққа равоч тергани чиққан қизилқишлоқлик бир чол ярадор айикнинг чангалида бекордан-бекорга нобуд бўлганди. Отиб яралаган бошқа бирор, балога эса чол қолган ўшанда. Шу боис, айикни иссиғида тиичитгани маъқул. Эплаёлмадингми, бу ёғига ниҳоятда хушёр бўлмоқ лозим.

Бу ўй унинг бошига Ичакдара оғзига рўбарў бўлганда келди. Ва шунингдек, айик овлаб кўрмагани шу ерда билинди. Ичкарига киришга хайикди. Халақит бергани учун ичидаги тоғбегини боилаб сўкаркан, ўзини окла-

моқка зўр баҳона топди: «Нима кўп, худонинг куни кўп, бугун бўлмаса, эртага барибир отиб оламан. Анову кайсар ҳўқиз кеп қолмагандан, ҳозир уйда терисини тузлаб ўтирган бўлардим-а. Энди ортидан тилимни осилтириб юраверсам, у ёқда лойим қотиб қолади. Бугун лойни бир ёқли қиласман-да, эртан сахарлаб изига тушаман».

«Лойим қотиб қолади», деб бекорга ўзини оқламаганди. Кейинги пайтда кулбасини тузатмоқка тупна-тузук киришганди. Бунга аслида Зариф устанинг пичинги сабаб бўлганди.

Кун анча ташлаб, сой бўйидаги базми жамшиidlар ниҳоясига етгач, у Зариф устани йўқлаб қолди. Йўқлаб десак хато бўлади. Нега деганда, иш юзасидан йўқлаш унинг хаёлида ҳам йўқ эди. Шунчаки устанинг уйи ёнидан ўтиб кетаётганди. Қарасаки, Зариф уста дарвозаси қаватидаги қўлбола ўриндиқда мудраб ўтирибди. Шунда йўлига бир бодилик килгиси келди. Пули борлиги билан мақтаниб қўйгиси келди. Билади, устанинг оёғида боди бор, ёздан бўлак пайт иш олмайди. Шу дардинг бор экан, ёзда қаерда эдинг деб рад этишга этади-ю, лекин Панжи саёқ уйига уста олмокчи бўпти деган гап бутун қишлоққа тарқалади. Унга мана шуниси кизиқ эди.

Аммо уста каттазанг одам эди. Панжи саёқни пайқамаганга олди. Саломи ерда қолган Панжи саёқнинг дили оғриса-да, ўзини босди. Бу сафар овозини баландлатиб салом берди. Устанинг ўнг кўзи хиёл очилиб, лаблари кимирлагандай бўлди, чамаси, алик олди.

— Шу-у... бизди уйди кўлдан чиқариб берсангиз, уста, — деди Панжи саёқ мақсадга кўчиб.

Бу гапдан Зариф уста юят таажжубланди. Лекин шундаям иккинчи кўзини очмади. Чап кўзини баттар кисиб, унга бошдан-оёқ ҳайрон тикилди. Негаки, Панжи саёқ, унинг назарида, саноқда йўқ одам, нимасига ишониш уйига уста солмоқчи экан? У Панжи саёқни кузатища давом этаркан, истехзоли илжайди.

— Уста хақига битингни тўлайсанми? — деди кейин. — Ё уста насияга иш қиласи деб ўйлайсанми?

— Пул дегани бизда ачиб ётибди, уста, — деди Панжи саёқ чўнтағи устидан шапатилаб. — Исиға чидаёлмай олдингизга келганмиз... — Шундай дея у устанинг

кўркам иморатига ишора килди. — Уйимди ўзингизни-  
кидай «култирий» кип берсангиз.

Зариф уста унинг дўмпайиб турган чўнтағига ўш-  
шайиб тикиларкан, кўзини юмиб фикр килмоқча тушди.  
Пулга хирси қанча баланд бўлмасин, иш масаласида  
одам танларди. Хунарим ерда қолмаган деб, бундайроқ  
одамларникига қадам босмасди. Панжи саёкка ўхшаган-  
ларни эса одам каторида кўрмасди. Шул боис, унинг  
ташрифидан жаҳли чиқинкиради.

— Култирий уйда ўтиргилари кеп қолдими? — де-  
ди бир оз ўйловдан сўнг ҳар иккала кўзини бараварига  
очиб. — Ким қўйибди сенга култирий уйни? Яшайвер-  
майсанми ўша тезакхонангда тинчгина.

Бу хил муомалани кутмаган Панжи саёкнинг жаҳли  
чиқса-да, ўзини босди.

— Уста! — деди овози андак титраб. — Истамасан-  
гиз, истамайман денг. Лекин буйтиб тилга эрк берманг.  
Уста уруғига қирғин кемаган, сиз бўлмасангиз бошкаси-  
да. Аммо оғизга сал эгалик қилинг!

Зариф уста унинг ялинишини кутганди. Бир оз  
ялинтириб, узрини айтмоқчи эди. Панжи саёкнинг черс  
жавобидан иззат-нафси оғриб, ўтирган жойида бир теб-  
раниб олди. Кейин Панжи саёкнинг кулбаси томон имо  
килиб, янада совуқ ишшайди.

— Шуни уй деб уста солмоқчимисан ҳали? — де-  
ди. — Нимаси уй бунинг? Товуқхонам дурустрок уйинг-  
дан.

Панжи саёқ кулбаси томон ўгирилди. Шу пайтгача  
пайқамаган экан, кулбаси хақиқатан ғариб аҳволда эди.  
Эгасиз уйдай тепаликнинг бир четида шумшайиб туарар-  
ди. Кулбасига рахми келди. Қаншари ачишиб, чукур  
хўрсинди. Лекин паст кетгиси келмади.

— Демак, менсимайман денг? — деди оғирлигини  
бир оёридан иккинчисига ташлаб. — Бошқа бирор айт-  
са, хўп-хўп, бизга келганда, йўқ-йўқ экан-да, а?

Уста индамади. Ботаётган куёшга термилиб ўтира-  
верди. Унинг бу қадар беписандлигидан Панжи саёк-  
нинг қаҳри кўзиди.

— Аммо лекин энағар экансиз, уста! — деди овози  
қалтираб. — Олдингизга одам деб келувдим. Сиз эса...  
Садқан одам кетинг-э!

Зариф уста унга кўз кирида ўқрайиб қаараркан,

чўнтағидан носқоворини олди-да, кафтига мўлгина нос тўкди.

— Хунарим срда қолмаган, — деди носли кафтини оғзига яқинлаштириб. — Ким айтса югуриб боравергани. Сенам бундай ҳаддингни билиб юр-да. Суриштириб келса, қишлоқда итнинг орқа оёғича обрўйинг йўқ. Тағин уста соламан дейсан. Яхиси, иссиринг борида уйингга жўна, йўғасам, чатогингни чиқараман. Улларимни чақираман... тенгингни бериб қўйишидаи.

— Чакиринг! — деди Панжи саёқ тап тортмай. — Қани, нима каромат қўрсатишаркан! Уларда мушт бўлса, менда яроғ бор! Битта-битта отарман, кейин ҳам масини! Мени ким деб ўйлајпсиз ҳали?!

Зариф уста уни бўш-баёв деб биларди. Билгани учун ҳам тилига эрк берганди. Буни қарангки, бўш-баёв дегани жуда ботир чиқиб қолди. Андак ортиқча гап қилса, бетига чанг соладиган.

— Бор, кўп бетамиз бўлма, — деди сулҳларвар оҳангда. — Индамаса, андишанинг отини қўрқоқ қўядиган чоғинг бор. Каттанинг олдида озгина уялиш керак киши.

— Сизам оғизди бепалаки қиманг-да, уста, — Панжи саёқ бир қадар паст тушиб, унга гинали тикилди. — Тилим бор деб оғизга келганини валдирайверадими киши.

— Ана, валдирамадик. — Зариф уста кафтидаги носни тили тагига ташлади. — Бўлдими? Энди жўна! Уйингта бор!

— Хайдаманг, — Панжи саёқ ортига ўгирилган жойида изига қайрилди. — Хайдамасангиз ҳам кетаман. Лекин сиз бундан кейин оғизди размирига қараб гапи-ринг, уста. Эмасам, йиртилиб кетиши мумкин.

— Оғзимнинг размирини ўлчагунча уйингта қара-санг-чи, нодон. — Устанинг дили оғриб унга ҳўмрайиб қаради. — Тағин бирор кун устингдан босиб тушмасин.

— Қарайманам! — Панжи саёқ бот чегираиди. — Нима, кўлидан келмайди деб ўйлайсизми?

— Келса, шу пайтгача қаардинг-да, — Зариф уста аччиқ кулди. — Лой чангаллаш санғиши эмас сенга. Уйга эркак киши қарайди, аёл эмас.

— Уй қўриклаб аёл ётади, эркак эмас, — деди Панжи саёқ унга таклид килиб. — Тунда уйингиздан бир

одим нари жилмайсиз, нимангиз эркак сизни! Эркак кишининг түшаги ер, кўрпаси осмон бўлиши керак. Уйда товурам ётади-да.

- Нега унда кулбамга қараб беринг, деб келдинг?
- Буям бир хавасда.
- Ҳавас эмиш, қўлингдан келмайдики, бош уриб келдинг.
- Жудаям келади-да.
- Кўрамиз, — Зариф уста носини туфлаб ташлаб, унга жиддий ва синовчан тикилди. — Агар томингни туси ўзгарса Зариф отимни бошқа қўяман!
- Яхши! — Панжи саёқ қишлоқнинг кунчиқарида кал ростлаган қояга қўлини бигиз қилди. — Агар туси ўзгармаса, ўзимни анову чўққидан пастга ташлайман! Ташламаган номард!

Шу гапдан сўнг, у ховлисига зафт ила кириб келаркан, одатдагидек, тағин дангасалиги тутди. Чамалаб кўрса, иш дегани жуда кўп экан. Бирок, Зариф устанинг гали ҳануз юрагининг бир четини куйдириб турарди. Ҳаракат қилмаса бўлмаслигини сезиб, ўлганинг кунидан тимирскиланиб ўрок қидирди. Ўроқни топиб, ховли юзини супургидан тозалагунча коронғи тушди. Эртаси эрталаб лойхонани тўлдириб лой кориди. Бино бўлганидан бери хомсувоқдан ўзгасини кўрмаган кулба деворлари бўйлаб андава юра бошлади. Аммо уй бетини бир амаллаб сувоқдан чиқарди-ю, тағин саёклиги тутиб колди. Андавани бир ён ташлаб, тоғларга ҳасрат билан кўз солди. Шунда дафъатан сой бўйидаги ваъдаси эсига тушди. Ҳадемай терини сўраб келишади, деди баҳона топилганидан ич-ичидан қувониб, ваъдани бажармоқ лозим, йўғасам сўзда субут қолмайди. Ўша куни иш-ишда, лой-лойда қолиб, елкасига милтирини осди-да, овга жўнади. Пахмоқни тинчтиб, кейин ишни давом этти-парман деб ўзини овутган бўлди.

Тепаликка ўрлаётib эса, ортига ўгирилди. Қишлоқка разм солди. Кулбасига анча сон кирганини кўриб, яна суюнди. Суюна-суюна Пахмоқни қидириб кетди. Бахтига айик нақ рўпарасидан чиқди. Рўпарасидан чиққани учун ҳам шошиб қолди. Ва натижада... ўшанда айикнинг изини тополмай, лойим котиб қолади, деб ўзини бехуда алдаганди, қайта лойга киришга умуман хуши йўқ эди. Ўша куни кечга томон белига беш-олти каклик

ва икки қүённи осиб қишлоққа қайтганида, ховлисида ажид бир манзаранинг устидан чиқди. Ундан ҳафсаласи шир бўлиб, аллақачон қўлларини ювиб қўлтиғига уриб қўйишган оға-инилари ҳамжихат холда уйнинг ташқарисини гир айланасига сувоқдан чиқариб қўйибди. Бир дунё лойдан асар ҳам қолмабди. Бу қадар меҳр-оқибатни кўриб, унинг мижжаларига ёш қалкиди. Милтигини михга осиб, қайта бошдан лойхонага тушди. Укаси ҳамроҳлигида тизза бўйи лой қорди.

Аслида воқеа бундай бўлганди. Унинг Зариф устага борганидан бутун қишлоқ хабар топганди. Оға-инилари бошда томошабин бўлиб туришди, кани нима қиласкин бу тентак? Қарашсаки, саёқ туппа-тузук тентинмокда. Ака дарҳол укаларини ёнига чорлади, дедики, худо саёққа ақл берганга ўхшайди, бориб қарашмасак бўлмайди. Эски араз унутилиб, ҳаммаси бир ёқадан бош чиқаришди. Панжи саёқ бошлиб қўйган ишни бирпасда битириб қўйишди. Унинг қайта лойга кирганини кўриб, аканинг меҳри ийди, сувоқни ичкаридан бошламабсизда, полвон, деди. Лойингиз обдон ачисин, ака, дея маслаҳат берди иниси. Ўзиям келин тушадиган уй бўлдаяпти-да, ака, деб мақтади яна бириси. Меҳри жўшган Панжи саёқ какликлардан шўрва осди, қўёнларни қовурди. Кенжа ука арокқа чопди. Ака эса эскиган, на-миққан кўрпа-тўшакларни эшакка юклаб, ўз ҳовлисига обориб ташлади-да, хотинларни йириб буюрди: янги-ланглар!

Шўрва устида гурунг зўр бўлди. Кенжа ука китмир эди, ҳамманинг дилидаги гапни секин сиртга чикарди. «Ака, — деди шўрвага нонни бўктириб. — Эртан ичкарини сувоқдан чиқарамиз. Кейин уйингиз қизнинг бетидай чип-чиройли бўп кетади. Лекин чип-чиройли уйга чип-чиройли янгаям керак-да. Шунисини нима қиласиз энди-а?» Панжи саёқ хижолат тортиб, бош эгган бўлди. Бош эга-эга косасидаги каклик тўшини укасининг косасига солди. Ука гўшт чайнаб, қишлоқдаги эрсиз жувонларни бир-бир санаб чиқди. Акаси ҳаммасидан бир-бир айб топди. Яхши жувон топиш масаласи тугун бўлиб колди.

Бу тугунни Панжи саёқнинг ўзи ечди. Орадан икки кун ўтиб, ярадор Пахмоқни қидириб роса санғиди. Санғий-санғий тоғ ичкарисидаги Кўкбулоқ қишлоғининг

устидан чиқиб қолди. Күкбулوك дегани дүппидеккина қишилөк бўлиб, одамлари жуда хушмуомала ва меҳмондўст эди. Саёқ одам жой танламайди дегандек, Панжи саёқ бир кечада тунаш учун энг четдаги уйни қора тортиди. Йўлда булоқдан сув олаётган ёш бир жувонга дуч келди. Бегона аёлга кўз ташламок яхши эмас, дея юзини ўгириб ўтаётганида, кулогига бир сас чалингандай бўлди. Ажабланиб жувонга юзланди. Жувон салом берганини у кеч англади. Юраги ажиб бир тарзда ханриқиб, шошиб кетма-кет алик олди. Аслида юраги бејиз ҳаприқмаганди. Ўз қишилогоғида унга салом берувчилар кам эди. У бунга кўнинканди. Кутимаган бу салом унга фавкулодда қаттиқ таъсир этди. Азбаройи ховлиққанидан икки бор алик олганини пайкамади. Кейин қандайдир бир кучга бўйсуниб тўхтади. Сувингиздан ичсам майлими, деди. Жувони бошидаги рўмолини юзига тушириброқ, марҳамат, деган маънода бош ирғади: У чеълакнинг икки бикинидан тутиб, тўкиб-сошиб сув ичди. Сўнг четдаги ҳовлида ким туришини сўради. Жувоннинг майин жавобидан юраги баттар дукурлаб кетди. Ўзи овозидан, овози ўзидан чиройли экан, деб ўйлади. Унинг тайсаллаб туришини ўзича тушунган жувон ўша ёқимли овозда далда берди. «Тортинмай бораверинг, уйда одам бор».

Одам дегани чол-кампир экан. Меҳмонни хушхол кутиб олдилар. Эзмаланиб ҳол-аҳвол сўрашгунча бўлмай бояги жувон булоқдан қайтди. Куз ҳавоси илиқ бўлгани учун елиб-югуриб ҳовлидаги супага жой қилди. Жувон уни кўн кизиқтириди. Лекин у қизиқаётганини билдирамади. Ичидаги жувоннинг эрига ҳаваси келди. Кўп ўтмай жувоннинг эри кўпкарида от тагида қолиб ўлганидан огоҳ бўлиб, ўзича кўп ачинди. Аммо ичидаги хўп суюнди. Суюнганидан хафа бўлиб, одамга ўхшамай қолаяпман деб ичдан ўзини роса янди. Яниб туриб жувонни кўп кузатди. Тоғларга боккан киши бўлиб, кўз остидан кузатди, дастурхонга тикилиб, кўз кирида кузатди, пешонасини қашлаган бўлиб, бармоқлари орасидан кузатди. Эртаси эса дардини акасига айтди. Акаси эса тоғани қаватига олиб, Кўкбулоққа жўнади. У ёқдан хийла дуруст жавоб билан қайтишиди.

Шундан кейин, Панжи саёқ дунёга сифмай қолди. Паҳмокни эса пакқос унутди. Аммо «бошлиқ» унутма-

ган экан, эртаси тушдан сўнг шофёри келиб кетди. Ка-софатнинг тили аччиқкина экан, битим пайтида оғзига олган сўзини эслатиб кетди. Панжи саёқнинг ёмон аччиғи келди. Бир хафтага мухлат сўради. Шу хафта ичи отиб бермасам, одам эмасман, деди.

Бу борада иккинчи бор борган совчилар нохушрок хабар билан қайтишиди. Жувоннинг отаси «йўқ» демабди-ю, лекин, куёв бўлмиш қўринишда жуда бамаънига ўхшаса-да, хеч қаерда ишламас экан, доим ов билан андармон экан, ишламаган одамга қандай ишонарканмиз, деганга ўхшаш гап килиби. Бу гапдан сўнг акаси эртаси ўзи ишлайдиган гараждан иш топиб келди, юр мен билан, деди. Шўрлик саёқ икки ўт орасида қолди. Ишга чикай деса, вაъда бериб қўйган, айикни отиб бермай иложи йўқ. Бу ёқла эса акаси маҳкам оёқ тираб туриб олган, боз устига, жувон кечалари тушига кириб чикмоқда. Ишни кейинга сургани сари аёлнинг висолига эришмок ҳаяллайверади. Ўшандан илк дафъя Пахмокнинг изидан дарров тушмаганидан ўкинди. Ёзда сой бўйида оғзига сўз олиб қўйганига ачинди. Охири бўлмагач, вокеани акасига тушунтириди. Оғзига олган сўзини ям айтди. Шундан сўнг акасининг турки бирдан ўзгарди, отиб бер, деди қатъий йўсинда, уругимиздан лафзсизлар чикмаган, бир камимиз шу иснодга колиш эли, хотин бўлса қочмас, буниси бўлмаса, бошқаси, отиб бер-да, бундан кейин оғизга сўз олишда жуда эхтиёт бўл! Шундан бошқаси керакмас, деди Панжи саёқ акасининг қўллаб-қувватлашидан руҳланиб, шу хафта ичи айувни тинчитаману ишга чиқаман. Акаси шу ерда сал ҳаддидан ошиди, кейин милтиқни менга берасан, деди. Панжи саёқ ажабланди, нега? Овга элакишсанг, бу хотининг ҳам кетиб қолади, — деди ака. Йўқ, — деди Панжи саёқ ўта жиддий тарзда. — Хотингаям карайман, овгаям чиқаман, овсиз мен ўлиб қоламан-ку! Акаси улкан муштини унинг бурни тагида ўйнатди: Аввалам шундай дегансан? Унисини суймасдим, — деди Панжи саёқ бўш келмай, — бунисини суйиб қолдим, зўр эр бўламан бунга! Ишонмайман, — деди ака тишлари орасидан, — уйланганингдан кейин саёқлик килиб, бу хотинингдан ҳам айрилсанг, ўзим сени отиб ташлайман! Панжи саёқ этни жунжиктирас даражада совуқ оҳангда деди: — Хавотир олманг, буниси кетиб қолгудек бўлса,

ўзимни ўзим отиб ташлайман! – Сўнг кўшиб кўйди: – Зариф уста эмасман мен, сўз олиб бажармаган, отини ўзгартириш ўрнига, тиржайиб юрибди, номард!

Шу тариқа, унга бир ҳафта муҳлат бердилар. Панжи саёқ бир ҳафта тоғма-тоғ санғиди, ўлиб-тирилиб Пахмоқни кидирди. Бу пайтда Пахмоқ камарда яраси билан андармон эди. У водийдаги олмазорга чикқан куни эса Панжи саёқ уни бехудага юкоридан кидириб юрган эди. Оқшом қишлоққа қайтаётиб, ялангликда унинг изини учратиб қолди. Юраги ҳаприкиб, из бўйлаб кетди. Эгридара оғзига етмай, коронги тушди. Ортиқ юриш энди фойдасиз эди. Эрта аzonлаб келишни дилига туғиб, у қишлоққа қайтди.

\* \* \*

Тунни Пахмоқ тинч ўтказди. Корни тўқ, жароҳатининг сим-сим оғришини демаса, камарда яйраб, ҳузурланиб ётди. Тонгда эса тимирскиланиб ташқарига чиқди. Тумшуғини кўкка чўзиб, муздек ҳаводан тўйиб-тўйиб нафас олди. Димоги ёрдамида теварак-атрофни обдон ўрганди. Пастликдан эсаётган тизгинсиз ел димогига куз неъматларидан ташкари тўнфизнинг кўлансанси олиб келарди.

Куйидаги чангалзорда тўнфизларнинг · бутун бир оиласи истиқомат қиласарди. Булар Пахмоқнинг етим ва норасталигида қаттиқ ранжиттан тўнфизлар галаси эмас, бошқаси эди. Ўшанда юрагида тўнфизларга қарши кучли кек тўнғиб қолган. Пахмоқ кейинчалик уларни кўшни кичик дарага хайдаб юборганди. Чангалзордаги бу тўнфизлар оиласи билан эса иттифоқ эди. Аммо бу иттифоқлик тинчлик асосида қўлга киритилмаганди. Бунгача тўнфизлар галаси Кизилжар этагидаги бутазорда яшарди. Жанжалдан сўнг Пахмоқ томонидан бу ёқка хайдалганди.

Жанжал ҳеч кутилмаганда юз берганди. Аслида тўнғиз деганлари кўп бефаросат, кўп серзарда жонивор бўлади. Жини кўзиса тирик жон у ёқда турсин, тиккай-ган тўнкагаям ҳужум қиласеради. Саратон ўрталарида улар тұсатдан сан-манга бориб қолишибди. Пахмоққа колса-ку, бирор тинчини бузмаса, шу боис, ўзидан бўлиб бирорвга қотинмайди.

Кискаси, ўша куни у бутазор этагида мазали томирларни териб еб юрарди. Турган гап, унинг ташрифи оила бошлиғига ёқмади. Йўкол деган маънода теварагида гир айланиб, пишқириб ғашига тега бошлади. Пахмоқ парво қилмади. Бунга сари тўнғизнинг жони чиқиб, кутилмаганда унга ташланниб қолди. Сағрисига яхшигина зарба еган Пахмоқ бошда ҳанг-манг бўлди, сўнг кутуриб кетди. Оғзидаги емишини ташлаб, ўкириб юборди-да, ўнг панжасини куч билан сирмади. Чириган тўнка унинг зарбидан чирт узилиб, ҳар томонга сочилиб кетди. Ўз хужумидан руҳланган тўнғиз, кичкина кўзлари ёвузона чақнаб, яна унга ташланди. Аммо Пахмоқ бу пайтда анча эс-хушини йигиб олганди. Корнини мўлжалга олган рақибиға осонгина чап бериб, нақ яғринига қаттиқ зарба берди. Шўрлик тўнғизнинг оёклари букилиб, ёнига ағдарилиб тушибди. Пахмоқ унинг устига миниб, ҳов бирда бўриларни дабдала қилганидек, жонига чанг солмоқ истади. Бироқ нақ тумшуғи тагида пайдо бўлган бошқа бир тўнғиз бу ишга ҳалакит берди. У тагида хириллаб ётган ғанимини ташлаб унга от кўйди. Тўнғиз деганлари бамисоли ҳурккан чумчукдай чор-тарафга тўзғиб кетди. Пахмоқ бутун бутазорни титкилаб, уларни тарьқиб этди, кувиб солди. Тўнғизлар бутазорни тарк этибгина ундан кутулдилар. Шундан буён улар чангалзорда.

Пахмоқ ортиқ уларга тирғалмади. Чангалзор тепасидаги ковакни эса кейин топди. Бу хил мувакқат жойлар унда сероб эди. Кишлайдиган жойи эса Эгридаранинг Илондарага туташ қисмидаги хилват маскан эди. Гирди пакана арчалар билан қуршалган ўнгир кўздан жуда холи эди. Кишдан бўлак пайт Пахмоқ у ерга сира қадам босмасди. Мувакқат жойлари билан чекланарди.

Тепадаги ковакни топгач, бир хаёли тўнғизларни чангалзордан ҳам кувиб юбормоқчи бўлди. Кейин фавқулодда мияси ишлаб, бу ниятидан қайтди. Тўнғизлар у қадар ёқимли қўшни эмаса-да, хавф-хатардан огоҳ этишда ишончли восита эди. Безовта хўр-хўрлашиб, хавфдан боҳабар этиб туришарди.

У хозир курама хидлар орасидан ўзига керакли емиш хидини танлаб, олга босаркан, оёғида оғриқ кучайганини сезди. Азобдан оҳиста ўкириб, оёғини авайлаб кўтарганди, оғриқ тўхтагандай бўлди. Босгандада яна оғриди. У ўйга ботгандай, бошини осилтириб, бир сония

туриб қолди. Шунда эсига Эгридаранинг олис бурчидаги, Чукуркамар тўридаги иссиқ булоқ тушди. Емишдан воз кечиб, йўлни ўша томонга тортди. Иссиқ булоқка тушса, жони ором толишини ўйлаб, нолакор ғингшиб қўйди.

Иссиқ булоқка бир ярим соат деганда зўрға етиб борди. Намхуш ҳидни узокдан сезиб, пишқириб-пишқириб қўйди. Ўзга бирор жонивор қадам босмадимикан, деган ҳадикда теваракка синчков-синчков назар ташлаб борди. Булоқка яқинлашган сайин таъби хира тортиб, разаби ошиб борди. Билдики, булоқка кўпчилик келиб кетибди. Ҳатто Пахмоқ жинидан ёмон кўрадиган қизилжардаги силовсиннинг иси ҳам бурксиб турарди.

Бирдан у титраб кетди. Жойида такқа тўхтаб, ҳар тарафга олазарак қаради. Аввал ҳавони, кейин ерни бот-бот искади. Ўсик жунлари енгил титраб, яна ва яна искаланди. Сўнг андак хотиржам тортиб, секин энгашди. Ҳид эски эди. Яроқ тутган ўша ғаними ўттан куни келиб кетганга ўхшайди. Шунга қарамай, у ўзини якинлаги бута ортига олди. Атрофни обдан кўздан кечирди. Тиқ этган шарпа сезмагач, аста оёққа қалқди. Илгаригига нисбатан хийла дадил тортиб, олға жилди.

Коя остидан сизиб чиққан иссиқ сув анча беридаги охурга ўхшаш мўъжазгина кўлга қуйиларди. Ҳаво муз-дек бўлгани учунми кўл юзи буғланиб турарди. Пахмоқ сувга тушишга ошиқмади. Атрофни яна бир карра кўздан кечирди. Унга инсон ҳиди ёқмаётган эди. Аввалинди билсаки, икки оёқли маҳлуқнинг қадами шу ерга ҳам етибди. У енгил пишқириб кўлга тушди. Илик сув танига хуш ёқиб, қаттикроқ нишқирди. Бутун танасини сувга кўмиб, ҳузур қилиб ётди. Азбаройи маза килганидан кўзларини юмишни шу қадар истаса-да, юммади. Бошини сувдан чиқариб, теваракни кузатиб ётди. Илик сувдан оёғига жон кираётганини сезиб, секин-секин ғингшиди, яъни бизнинг тилда «оҳ-оҳ» деди. Аммо минг «оҳ-воҳ» килгани билан барибир кўнгли ғаш эди. Инсон ҳиди уни қаттиқ безовта килмоқда эди.

У илгари ҳам бу ерга бир неча марта келган, лекин инсон изига ҳеч дуч келмаганди. Бу сафар эса шундоқкина тумшуғи тагида, кўл бўйидаги майнин кум устидаги этик излари манаман деб турарди. У этик изларига

караб-караб күйркан, сувда узок ётолмади. Пишкира-пишкира қирғоққа чиқди. Қирғоқдан хийла наридаги ясси харсанг томон юрди.

У ясси харсанг устига ястаниб, ўзини офтобда тоблаб ётаркан, ногахон ўзини қопқонда турганини фаҳмлаб қолди. Камар уч томондан қоялар билан қуршалтан бўлиб, факат бир тарафигина очик эди. Ганими ўша томондан бемалол бикиниб келиб, уни осонгина тинчтиши мумкин эди. Бу ҳодиса ҳозир юз берадигандек Пахмоқ ошиқибрөқ камардан чиқди. Бехавотиррок жойга етиб, камарга ҳасрат ила термуларкан, чамаси, шундай деб ўйлади. «Қандай соз жой эди-я, шуниям хидини билибди, номард!»

У оқсоқланиб йўлга тушган жойида бирдан кескин ортига ўгирилди. Вужуди нафратдан ёниб, кўл бўйига жадал юриб келди-да, этик изларидан бири устига чўнқайди. Нафратининг белгиси сифатида изига телпакдай килиб тезаклади. Шундан сўнг, ўз ишидан мамнун бўлиб, оқсоқланиб кетига қайтди. Бу сафар дара ичи билан эмас, тепадан дара ёқалаб юрди. Икки дара ораглиғидаги бу чоғроққина водий кўзига энг бехавотир жой бўлиб кўринди. Ҳолбуки, бу ерда турли илон изи сўқмоқлар нихоятда сероб эди. Ҳатто онда-сонда қўй-қўзиларнинг қумалоқлари ҳам учарди. Мана бу сўқмоқдан бир соатча бурун тулки югургилаб ўтган экан. Качонлардир бўриларга емиш бўлган қўй калласи тошлар орасида думалаб ётибди. Пахмоқ бу нарсаларга эътибор бермай бораркан, кўп ўтмай димогида парранда ҳидини туйди. Парранда ҳидига сезилар-сезилмас темир иси қоришик эди. У сергакланиб илгарилади ва салдан сўнг тулкилар юришни хуш кўрадиган торгина сўқмоқда товуқ калласига дуч келди. У бояги тулки сезиб, котинмай ўтган қопқонни пайқаб, айикларча кулди. Кейин оёғи остидаги тошлардан бирини товуқ калласи томон думалатди. Майдо тошлар тагига созлаб яширилган қопқон юқорига қалкиб, «шилқ» этиб ёпилди. Пахмоқ яна кулди. Одамзодни галварс санаб, мириқиб-мириқиб кулди. Сўнг эса қопқонни қозик-позири билан суфуриб олди-да, пастга — дарага улоктириди.

Барча жониворлардек, у ҳам қопқонни жинидан ёмон кўярди. Темир иси сезилган ердан бепарво ўтиб кетолмасди, ё заарсизлантиради, ё бўлак жойга

итқитиб ташларди. Аслини олганда, Чуқуркамардаги күлни қопкон туфайли кашф этганди. Агар гапни сал узокроқдан бошлайдиган бўлсак, ўтган йили худди шу пайтда ўзини жуда доно санаса-да, нодонгина айқ эди. Нодонлиги учун қўринган қорага тумшук тикиб юарди. Қопқонга илк бор мана шу водийда дуч келганди. Сонсиз сўқмоқлардан бирига юят усталик билан қўйиб кетилган қопқонга тасодифан эмас, нодонлиги, янада аниқроғи, қизиқувчанлиги туфайли тушиб қолганди. Ўша қуни қорни тўқ эса-да, майда тош аралаш майнин қум устида ётган гўшт бўлагига панжга урмасдан ўтолмади. Аммо панжаси гўштга тегар-тегмас, қўринмас бир ёв «шилк» этиб оёғини қисиб қолса бўладими. Аввалига жуда қўрқиб кетди, сўнг ажабланди, нима бало бўлди бу? Кейин оёғини силкиб, ундан ҳалос топмоқ истади. Бироқ ёв жуда ёпишқоқ экан, қани энди қўйиб юборса. Навбатдаги каттиқ силтоворидан сўнг занжирининг нариги учига махкамланган темир қозик жойидан силжиб, ёнига тўн этиб тушди. У кутулмоқнинг эвини қилолмагач, қозикни судраб олға юрди. Бу балодан қандай кутулсам экан деб, роса боши қотди. Чуқуркамарга тушаверишдаги сўқмоқ бошига етгач, тағин қопқонга ташланиб, тишлаб тортқилашга тушди. Аммо ёв дегани балойи азим экан, шунча тишлаб тортқиласа-да, фик этмади. У нима қиларини билмай, сўқмоқ бошида узок ўйга ботиб ўтириди. Орада икки-уч бор қопқонни тошга уриб ҳам қўрди, қайдам барча харакатлари зое кетиб, бекорга урингани қолди. Ана шундай беҳуда уринишларнинг биридан сўнг, у ўнг оёғини қопкон устига қўйиб, сўл оёғини кучаниб тортишга тушди. Баҳтига ўнг оёғи тасодифан қопқон қулфи устига тушиб қолди. Залварига қулф бардош беролмай қопқон тиши очилиб кетди.

Ўшанда у қопқондан ҳалос топгачгина нотаниш ерга келиб қолганини англаб етганди. Азобланган оёғини авайлаб босиб, сўқмоқдан қуйига энаркан, намхуш нарсанинг исини сезди. Намчил тумшуғини олдинга чўзиб белги оларкан, ҳид қуйидан келаётганини пайқади. Одатдагидек, яна қизиқувчанлиги қўзиб, дара тубига тушди-да, йўлни Чуқуркамарга бурди ва кўп ўтмай юзи буғланиб турган кўл бўйига етди. Ҳид кўлдан таралмоқда эди. Ер нотаниш бўлгани учун кўл бўйида ортиқ ўралашмай, теварак-атрофни бир сира тентиди-да,

сўқмоқдан юкорига — Чуқуркамар тепасига чиқди. Кўшни бегона худудга қизиқсиниб-қизиқсиниб бокди. Ўзининг худуди Чуқуркамарда тугашини ички бир сезги билан идрок этди. Кўпинча ички сезги ҳар қандай белгидан устун келади. Пахмоқ бу атрофда огохлантирувчи бирор-бир белги қўрмаган эса-да, ундан нарига ўтиш яхши эмаслигини фаҳмлаб етганди. Шу сабаб букри арчага белги қўйиш билан кифояланиб, изига қайтиди.

Хуллас, ўша куни қопқон сабабли Чуқуркамардаги илиқ қўлни кашф этиш билан чекланиб қолмай, ўз худудининг шаркий чегарасини аниқлаб, белги қўйишга мушарраф бўлганди. Унинг бу хил белгиси, асосан, ҳамжинсларига қаратилган бўлиб, майда жониворларга ҳеч алоқаси йўқ эди. Майда жониворлардан факат қўлни кизғанарди. Аммо минг қизғанмасин, бошқа турдаги жониворлар ҳам қўлдан унумли фойдаланишар, бунга сари ҳар келганда ёмон жони чиқарди. Бора-бора у бу холга тамомила кўникли. Чуқуркамарга киргунча норозиланиб бир-икки ўкирган бўларди-ю, сўнг тинчланиб чўмилиш билан овора бўларди.

Аммо бугунги из уни зўр тахликага тушириб қўй-ди. Бу ҳашаки жониворларнинг эмас, балки ҳар нарсага қодир икки оёқли маҳлук ғанимининг изи эди. Шунингчун, қўлнинг шифобаҳш сувидан вужуди ором олган бўлса-да, рухи сира таскин топмаганди.

Қопқонни дарага улоқтиргач, Пахмоқ иккиланиб туриб қолди. Корни ўлгудек оч эди. Нафсини тезроқ кондирмок ўйида теваракка маъюс аланглади. Оч коринга нафрат унчалик ўтиришмас эканми, у ғанимини буткул унутди. Нафс эркига бўйсуниб, тумшуини қўкка чўзганча ҳавони бот-бот исқади. Ҳавода турли хил емиш хиди анкирди. Енгил эпкин водийнинг адогидан, Эгридаранинг муюлишидаги ўнгирлардан олма-ю дўлана хидларини олиб келарди. Аммо масофа анча олис эди. Пахмоқнинг эса тезроқ қорин тўйдиргиси келарди. Шунда унинг эсига Чуқуркамарнинг жанубий қисмидаги дўланазор тушди. Оралик жуда яқин. Чуқуркамар устидан ўтилса, у ёғи бир одим.

У лапанглаганча йўлни ўша томонга солди. Чуқуркамарнинг энг баланд қояси хисобланмиш дўнгликка чиқиб, ўзи бир йил бурун белги қўйиб кетган букри ар-

ча ёнига борди. Бу ердан чор-атроф кафтдагидек яққол күзга ташланиб туради. Пастидағи құл мисоли сув тұла пиёладай базур күзга чалинарди. Пахмок теваракка күпда алахсиралади. Ерга чүнқайиб, құшни худудға дикқат билан тикилиб қолди. Қаршиисида баланд коялар, арчали тизмалардан иборат нотаниш маскан сирли қолда ястаниб ётарди.

Пахмоқнинг табиатида ёвқурлик йўқ эди. Шу сабаб бегона худудға оёқ босиш истагини хис этмади. Ва шунингдек, бегона жойга тумшук суқиши яхшиликка олиб келмаслигини ҳам биларди. Макон талашиб ҳали бирор-бир айқ билан ёка бўғишимаган эса-да, ташрифи мезбонга сира хуш келмаслигини ўз табиатидан келиб чиққан ҳолда идрок этарди. Мабодо, ўз ерига бегона айқ оралагудек бўлса, ўлар-тириларига қарамай, жангга ташланишини ич-ичидан сезарди.

У бегона худудға сүқланишини бас қилиб, мақсад сари юзланди. Чуқуркамарнинг жанубий қисмидә узун сойлик бўлиб, Пахмоққа қарашли худуднинг чегара чизиги саналади. Сой бетига тирмашган қуюқ дўланазор Пахмоққа қарашли эди. Дўланазорга Чуқуркамарга кираверишдаги тик киялик юзига сапчиган сўқмок орқали ҳам чиқиш мумкин эди. Пахмоқ дўланазорга ҳамиша ўша сўқмодан чиқиб бораради. Дўланазор кун ботишда харсанг тошли ялангликка чегарадош бўлиб, ялангликдан сўнг яланғоч тизмалар бошланарди. Умуман олганда, Пахмоқ бу ерга камдан-кам келарди. Асосан, қуйидаги емишлар билан кифояланарди.

У сойлик ёқалаб дўланазорга йўл оларкан, ярим йўлга етиб-етмай, даҳшат ва ғазабдан бутун вужуди титраб кетди. Тўхтаб, ҳавони исқади. Йўқ, димоги алдамаётган эди. Дўланазорда бегона айқ юрганини аниқ хис этди. Аммо қўркув ва эҳтиёткорлик ғазабдан ҳамиша устун турганидек, Пахмоқ қанчалик кутурмасин, барибир эҳтиёткорликни маъқул кўрди. Дўланазорга писиб яқинлаша бошлади. Учли харсангга етганда, аста бошини кўтариб, олдинга мўралади. Дўланазор четида кавшаниб турган чоғроқ жуссали айқини кўрди. Агар баҳайбат айққа рўбарў келганида, ғазабини билдирилмасдан, унинг кетишини пойларди. Аммо қаршиисидаги айққа bemalol кучи етишини фахмлаб, ўкиришдан ўзини тиёлмади. Ўкириши билан бегона айқ ялт этиб

каради-да, кутылмаганда шаталоқ отиб қоча бошлади. Күп ўтмай сойликнинг у бетидаги чангальзорда кўздан гойиб бўлди. Бирдан гойиб бўлмади. Чангальзора етмай, у томонга алланечуқ гинали тарзда мўлтираб тикилдида, сўнг тифиз ўсган буталар орасига кириб кетди.

Бегона айикни урғочилигини Пахмоқ исидан билганди. Кошишида кўркувдан ташқари андак ноз борлигини пайқади. Гинали равишда мўлтираб тикилиши эса кўнглида тушунуксиз ҳисни уйғотди. Агар эвини топса, бегона айик рақиб эмас, тузуккина йўлдои бўлиши мумкинлигини табиат ато этган нозик сезги туфайли фахмлаб етди. Хийла вақт унинг таъкибли нигохини ҳис этиб турди. Бироқ у томонга боришини хаёлига келтирмади. Кўпроқ қорнининг ғамида бўлди. Нафси анча ором олгачгина, бирдан уни эслаб қолди. Бесихтиёр унинг ёнига боргиси келди. Эҳтиёткорлик билан чангальзор тарафга юрди. Бироқ, у ерда бегона айикнинг изи хам қолмаганди. Пахмоқ хид олиб, Чукуркамар дўнглигига келиб тақалган арчазоргача келди. Кўшини худудга кириш-кирмаслигини билмай, бир муддат тараддулдануб турди-да, сўнг таваккал қилиб олға юрди. Юз одимча юрмай, тик ўсган арча танасидаги огоҳлантирувчи белгига дуч келди. Белги жуда юқорида эди. Бу бояги урғочи айикники эмас, балки бутунлай ўзга айикники эканлиги кундай равшан эди. Ҳа, қандайдир улкан бир айикнинг белгиси, ўтсанг ўласан, дегандай, манаман деб турарди. Пахмоқнинг кўнглида кўркув ва рашк бараварига туғилди. Аммо кўркув яна устун келди. Улкан айикнинг чангалига тушса, чивиндай эзиб ташлашидан ҳайикиб, ноилож изига қайтди.

Кўшни худудда айклар оиласи яшашлигини, арчадаги белги ота айикқа тегишли эканини у билмасди. Билмагани учун хам улкан айик ҳукмронлик қилаётган худудда бояги пачаккина урғочи айикнинг бемалол умргузаронлик қилиб юрганидан жуда ҳайратланди. У етим ўсгани боис хамжинсларининг галалашиб яшашларини ҳеч тасаввурига сиёдирломасди. Назарида, айклар ўзи каби якка-якка яшашга маҳкум эди. Урғочи айикнинг изидан тушиб, бошқа айик белгиси устидан чиқиб қолганидан тааажжублана-таажжублана кетига бурилди. Урғочи айик улкан айикдан қочиб чикар, деган умидда дўнгда анча пойлаб ўтирди. Унга тузукроқ

разм солиб күйишни жуда-жуда хохламоқда эди. Аммо урғочи айқ қайтиб қорасини күрсатмади.

У ноилож ўрнидан қўэялди. Эгридарага тушишни истамай, водий ёқалаб йўлга тушди. Дарага олиб тушадиган сўқмоқлардан бирига яқинлашганда, ёндаги харсанглар ортидан Панжи саёқ чиқиб келди. Фаними шамолга тескари томондан келиб колгани учун Пахмоқ уни тезда найқамади. Улар бир-бирларини кўришганда, оралиқ масофа атиги эллик одимча эди. Панжи саёқ елкасидан яроғини олгунча, Пахмоқ, қочмаган номард, дея ўзини дарага урди. Биринчи ўқ сўқмоқ четидаги бута шоҳини чирт узиб юборди. Иккинчиси кулоғи остидан чийиллаб ўтди.

Пахмоқ дара тубидаги арчазор оралаб, фанимидан осонгина қочиб қутуларкан, фаними туфайли турмушидан ҳаловат кетганлигини, ҳаловати бўлмагач, кўнглида ғалати хисларни уйғотиб юборган анову бегона айқ билан қайта учраша олмаслигини ўйлади. Алами келиб, фанимини тилка-пора килиб ташлагиси келди. Аммо унинг яроғи бор эди. Ундаги яроғ ўзининг тишлари ва панжаларидан кучли ва даҳшатлироқ эканини у яхши биларди.

У ўша куни тунда коваклардан бирида ғужанак бўлиб ётаркан, фанимини эмас, шунингдек, лўқиллаб оғриётган оёғини ҳам эмас, негадир ўзига гинали назар ташлаб кетган ўша бегона айқни ўйлади.

\* \* \*

Пахмоқ қочиб қутулгач, Панжи саёқ аламидан бир ирғишилаб олди. Милтиғини тошга уриб синдиргудек бир важоҳатда кутуриб сўқинди. Кейин Пахмоқнинг изидан юрди. Дарага энаверишдаги сўқмоқ бошига етгач, таъқибдан наф йўқлигини англади.. Боз устига, шу тобда бу ишга ҳеч ҳафсаласи йўқ эди. Харсанглардан бирига ҳардамхаёл суюниб, пастга ҳасрат ила тикиларкан, қуёшга қараб вактни чамалади. Овда хаёл суришига бало бормиди, дея пича ўзини янди.

Ҳақикатда, ҳар галгидек бугун ҳам хушёр юрганида Пахмоқ ҳозир оёғи остида чўзилиб ётган бўларди. Нега деганда, вазият тўлалигича унинг фойдасига ишламоқда эди: биринчидан, улар харсанг тошли майдонда учрашдилар, иккинчидан, энг муҳими, шамол у томонга э-

мокда эди. Пахмоқ энг ишончли восита — хид илғашдан маҳрум эди. Панжи саёқ ўй сурмай, теваракка зехи солиб юрганида, ўзига қарши келаётган Пахмоқни кўрган ва бирор харсанг ортига бикиниб, уни осонгина тинчиттан бўларди. Аммо ҳамма бало шундаки, айни шу пайтда хаёли ўзида эмасди. Бутун фикри-зикрини бир соат бурун юз берган тотли учрашув банд этганди. Ўзига ширин табассум ҳадя эттан жувоннинг рухсорини хаёлидан қуволмай гарант эди. Аслида жувон билан учрашув унинг етти ухлаб тушига кирмаганди. Бари Пахмоқ туфайли юз берганди. Аввалига у Пахмоқни Эгридара бўйлаб қидирди. Кейин қўшни кичик дарага ўтди. Қайтишда Чуқуркамарга бир мўралаб, Эгридара бўйлаб кишлокқа қайтишни мўлжаллаб, Кизилбет ёқалаб юрди ва ўзи сезмаган ҳолда Кўкбулоқ кишлоги устидан чиқиб қолди. Ўша таниш ҳовлига кўзи тушгач эса, юраги тошиб, бирдан кучли ҳаяжон оғушида қолди. Туйғусини жиловлаётмай, булокдан хийла берида, кунчикишга ёнбошлаб ўсган арча ортига бекинди-да, ҳовлини кузатишга тушди. Жувон одатдагидек, ҳовли юзида куймаланиб юрар, энаси офтобрўяда жун савар, отаси молхона ортидаги гўнгтепа ёнида қўшни чол билан гурунглашиб ўтиради.

Панжи саёқ жувоннинг ҳар бир хатти-ҳаракатини на-заридан қочирмай, синчков кузатаркан, кўнглида ададсиз меҳр, шунингдек, мамнунлик ҳиссини туди: «Качон қарама, ғимир-ғимир, — деб ўйлади. — Кўл-оёғи чаққонгина экан. Бундай аёл рўзгорингни бутлайди, ямоғингни яскайди». У бир зумга, атиги бир зумга аёлни ўз уйида тасаввур этди. Тасаввуридан дили шу даражада ёришдики, аёлга бир оғиз сўз қотмасдан кетолмаслигини англади. Бироқ бу иш мушкул эди. Кишлоп урф-одати ундаги бу майлни ўзига сингдиролмасди. Устига-устак, жувонга оғиз соглан, ота-онаси қўриб колгудек бўлса, уни енгилтаклиқда айблашлари муқаррар эди. Ўтра ерда битай-битай деб турган ишни бузиб қўйиши мумкин эди. Ўз навбатида, учрашмай кетиш ҳам кўп душвор туюмокда эди.

У нима қиласини билмай, гарангсиб турганида, худонинг ўзи ишини тўғрилади. Орада булокка сувга келиб-кетган жувон, иккинчи гал бу томонга салт юрди. Ана у булокдан ҳам ўтди. Булок билан у бекинган арча

ораси олтмиш-етмиш одим. Жувон майда-чуйда буталар оралаб келаркан, эгилиб ўтин теришга тушди. Ўтин дегани бу атрофда сероб эди. Жувон ўтин тера-тера йигит бикиниб турган арча ёнигача келди. Шу орада унинг дикқатини ерда чўзилиб ётган каттакон куриган шоҳ тортди. У қучоридаги ўтинни ерга ташлаб, шоҳга яқинлашди. Уни қандай қилиб судраб кетишни чамалади. Кейин негадир фикридан қайтиб, ортига ўтирилди. Индамаса, ўтинини кўлтиклаб кетадиган.

Панжи саёқ ошиғич ҳолатда ўзини билдириди.

— Шошман! — деди дудукланиб, паст овозда. — Сизда бир оғиз галим бориди!

Табийй, жувон чўчиб тушди. Ранги кув оқариб, ёнверига аланглади. Бир хаёли, қочмоқчи ҳам бўлди.

— Кўрқманг, бу мен, — Панжи саёқ арча ортидан бўй кўрсатди. Лекин очиққа чикишга ботинмади. Назарида, гурунглашиб ўтирган чоллар шу томонга қарашаётгандек эди.

— Вой, ўлмасам! — Жувон кўксига туфлади. — Юрагимни чиқариб юбордингиз-а!

— Узр! — Панжи саёқ култ ютиниб, жувонга дикқат-ла тикилди. Буни қандай қилиб узокроқ тутиб турсам экан, деб ўйлади. Негаки, тоғ аёлларининг феъли маълум, бегона эркак қошида ортиқча эзмаланишни күш кўришмайди. Шу боис, тузукроқ баҳона кидириб топгани шу бўлди: — Кўрқитиб юбордим-а?

Аёлнинг кўзларида зоҳирланган қизикиш ифодаси ўрнини дафъатан истихола эгаллади. Йигитга унаштирилиш арафасида турганлиги тўйкусдан эсига тушиб, бошидаги кизғиши рўмолини қошигача тортди. Уялиб бурилиб кетмоқчи бўлди. Буни сезган Панжи саёқ отини тезроқ қамчилади.

— Нон... ионингиз йўқми? — деди.

Панжи саёқни аёл калбининг биларони деб бўлмасди. У тоғни билади, тошни билади, табиат билан яхши тиллашади. Аммо аёллар масаласида хеч нарсага ақли етмасди. Шунга қарамай, ҳозир у ўқни аниқ мўлжалга олганди. Шу сонияда миясидан нималар ўтмади дейсиз, аёлни яна бир зумга тутиб қолмоқ учун нималарни ўйламади дейсиз. Калласига келгани нон сўраш бўлди. Шундай десагина аёл қолиши мумкинлигини хис этди. Негаки, аёл кишининг кўнгли меҳр ва шафқатта мойил

бўлади. Кўмак сўраган кишига қайшиа қолади. Турган гап, Панжи саёқ буни билмасди, лекин алланечук идрок этганди.

Идроки алдамади. «Нон» сўзини эшитиши билан кетмок истаб турган жувон бирдан ўзгарди. Йигитта ачиниш вა ҳамдардлик кўзи билан қаради.

— Вой, ўлай, корнингиз очми? — деди. — Уйда отам бор. Юринг, овқатланиб кетасиз.

— Борардиму, — Панжи саёқ уялинқираб чеккасини қашлади. — Ҳозирча бизга... мумкин эмас-да.

— Юраверинг, — деди аёл кистаб, унинг тортиниши сабабини англамай. — Эркакли уйдан нега уяласиз?

— Сизга... оғиз солғанмиз-да, — деди Панжи саёқ ростиға кўчиб. — Борсак, бу йигитда бет йўғакан деб ўйлашади-да.

Аёл бу ёгини ўйламаган, аникрофи, бир лаҳзага унуган экан, уялли. Нима қиласини билмай бирпаст тараффудланди, сўнг, мен ҳозир, деганча, терган ўтинини кўлтиклаб, жўнаб қолди.

Кўп ўтмай у челак кўтариб қайтди. Булок бўйига етганда, аста ховли томонга разм солди. Кампир жун билан, чоллар гурунг билан андармон эди. Тепадан тушиб келган бир отлик улар ёнида тўхтади. Кўшни ховлидан ўмганини кўлидаги хассага ташлаб, яна бир чол чиқиб келди. Кулай пайт келганини сезган жувон, челягини ерга кўйди-да, унинг ичидан кизил тугун олиб, бағрига босганича арча томон шошилди. Боягина бамайлихотир юрган аёл бирор айб иш қилаётгандек, тахлика оғушида харакатланарди. Ошиққанидан уринган кавушини чўпга илинтириб, йиртиб ҳам олди. Лекин бунга эътибор бермади. Кўлидаги тугунни арча шохлари орасидан йигитта узатиб, шошилинч ортига ўгирилди.

— Ўзим... — деди йигит тўлкинланиб. — Ўзим сизга янги кавуш обераман!

Бу гапдан сўнг жувон бошда оёридаги кавушига, кейин унга қаради. Ширин жилмайди. Челагини сувга тўлдириб, пастта энаркан, яна жилмайиб караб кўйди.

Бу жилмайиш замирида кўп яхши маънолар жамланганини сезган йигитнинг юраги ёмон орзикди. Аёлни кўзи билан кузатиб қолди. Кейин чўнқайиб тугунни ечди. Иккита нон орасига яхшилаб жойлаштирилган катта бўлак яхна гўштни кўриб, аввалига шодланди, сўнг не-

гадир димоги қаттик ачишиб кетди. Тугунни авайлаб бағрига босганча, арчазор оралаб юкорилади. Бир дүнг ошиб, жилға бүйидан чиқди. Ерга чордона қуриб, та-мадди қилишга тушди. Бир маҳал чайнаётган луқмаси шўртант туюлиб ажабланди. Ва шундан сўнгтина йигла-ётганини пайқади. Кўзларидан шашқатор ёш оқмоқда эди. Бу хил ҳолат илгари унда хеч бўлмаганди. Лекин у бундан уялмади, хўрсина-хўрсина кавшанишда давом этди. Ора-сира жилғадан ховучида сув олиб ичib турди. Кўз ёши эса тинай демасди. Тинишини ўзи хам истамади. Кўз ёшлари totли туюлиб, қалби дардан фориф бўлаётган эди.

Аслида у меҳрдан йигламоқда эди. Мехр кўрмаган кўнгил озгина туртқидан жунбушга келгандек, хозир у шу холатда эди. Гапнинг сирасини айтганда, у меҳрдан йироқ эди. Болалигидан меҳрдан йироқ ўси, худо раҳмат килгур ота-онаси анчайин қаттиққўл одамлар бўлиб, тоғу тошдан бери келмас бу болани деярли эркалатмас эдилар. Уларнинг назаридаги, бу ўғил кулоқсиз эди, саёқ эди. Натижада, беармон урдилар, сўклилар, аммо болани тоғу тошлар бағридан айира олмадилар. Шу тарика тоғу тошдан сокинлигу хотиржамлик топган ўғилни тушунувчи бўлмади, қайтага «саёқ» деган тамғани пепонасига маҳкам босдилар, шунга яраша мумомала қилдилар. Бунга сари у тоққа қочди. Бир кетишида уч-тўрт кунлаб санғиди. Тўшаги тош, емиши парранда гўшти бўлди. Кўнгли бамисоли эркин шамол — нимани истаса ўпани қилди.

Ота ҳайрон — бу кимга тортди? Эна ҳайрон — бу кимга ўхшади? Уруғ суриштириб, ўтган аждодлари орасидан бу хил сиёкли одамни топмадилар. Бир-бирига ҳайрон бокишиб, тоғу тошга лаънатлар ўқидилар ва окибатда асосий масаланинг тагига етолмай ўлиб кетдилар.

Аслида ўғилни тоғу тош тортуб олмаганди, сеҳрланди. Бу сеҳр жуда жўн тарзда юз берганди. Кекса овчи Шомурод чиноқ носни танлаб чекарди. Чеккандаям каттатепалик Шайман носфурушнинг носидан бошқасини тан олмасди. Аммо бир тўйда иккисининг орасидан гап қочиб, қайтиб юз қўришмас даражасига етдилар. Шундан сўнг Шомурод чиноқ шу атрофдаги бошқа носфурушларнинг носидан бир-бир тотиб кўрди. Лекин би-

рортасини Шайман носфурушнинг носига ўхшатолмади. Урушсам, сен билан урушганман, носинг билан эмас-ку, дея ўша пайтларда энг маъкул бола хисобланмиш Панжи саёкка пул бериб, отамга дегин, дея Шайман носфурушникига зинғиллатди. Шу-шу носни унга Панжи олиб келадиган бўлди.

Шомурод овчи кўп танти эди. Беминнат дастёрги учун уни икки-уч овга олиб чиқди. Милтиқ отишни ўргатди. Бир куни эса тўсатдан кўлига милтиқ тутқазди. «Бор, жигитдай бўп сенам бир овга чиқиб кел! Тулки отсанг — менга, парранда отсанг — ўзингга». Мустақиллик кўп ажиб нарса, ўша куни ўп уч яшар бола ўзини йигит хис этди. Аммо Ялангбетда ўзини офтобга солиб ётган тулки изидан йигит эмас, бола бўлиб тушиди. Тулкининг найрангларига алданиб, узок-узоқларга улоқиб кетди. Кечга яқин тулкидан умид узиб, кишлопка қайтаркан, қиялиқдан иккита каклик уриб олди. Илк мустакил ов унга қаттиқ таъсир қилди. Илгари хеч ҳис қилмаган туйғуларни бошидан кечирди. Ярим тунда кишлопка бошиқча одам бўлиб қайтди. Тонгда овни кўмсаб уйғонди. Яна кетди. Яроғ билан илгари хеч кўрмаган ўнгирларни кезиб чиқди. Бора-бора узокдан мудрок кўринган тоғу тошлар тирик бир вужуд, унда хаёт ўзига хос тарзда қайнашини англаб етди. Кейин-кейин нафақат овни, балки тоғу тошни ҳам кўмсайдиган бўлди. Биринчи бор тулки отган кундан бошлаб эса тоққа буткул боғланди. Бу орада Шомурод чиноқ яна бир иш қилди, эски милтигини унга совфа этди. Ўша тун Панжи саёқ милтигини росмана кучиб ётди. Эртаси отона унинг тўшагини яна бўш кўришди. Кейин бу ҳол доимий одатта айланди. Сўнг-сўнг йигитчанинг гоҳо тоғда ётиб қолиши холлари ҳам юз бера бошлади. Қискаси, тахминан ўн тўрт-ўн беш ёшларида тоғу тошни тамоман ўзиники қилиб олди.

Тоғдан тоғган эркинлиги эвазига ў яқинлари меҳридан мосуво бўлди. Тоғ дея ҳатто хотинининг ҳам меҳрини козонолмади. Аёли кетиб қолгач, у оға-иниларидан балога қолди. Тергашлар жанжалга, жанжаллар аразга айланди.

Бу ерда яна бир аччик ҳакиқат бор эдики, бу ҳақда озигина тўхталмасак, Панжи саёқнинг феъли унча очилмайди. Хуллас, қайси бир доно айтиб ўтгандек, одамни

хадеб чўчқа-чўчқа деяверсанг, охир-оқибат, у хўрхўрлаб юборади. Панжи саёкнинг кисмати ҳам шунга яқин эди. У эсини танигандан бери меҳр ўрнига камсишиш кўрди, хурмат ўрнига нописандликни сезди. Натижада, бора-бора одамлардан кўигли қолди. Одамлар унга қанчалик нописандлик билан қараса ўз навбатида, у ҳам одамларга шу хил муносабатда бўлди. Одамлар ундан кулди, у эса одамлардан. Одамлардан четлашгани сари тоғлар уни маҳкамроқ бағрига олди, эркалатди, сўиди. Оқибатда, у бутунлай токқа боғланиб қолди. Инсон меҳрига ташналиқ қалбининг чукур ерида кўмилиб қолаверди. Кўкбулоқлик жувоннинг илиқ муносабати ўша ташналиқни уйғотиб юборганди. Меҳрга қондирилган ташналиқ мухаббатни туғдирганди. Бугун у ўша мухаббатнинг илк мевасини тотиганди. Тугун шунчаки тугун эмас, меҳр эди. Ундаги таом шунчаки таом эмас, мухаббат эди.

У меҳрдан йиғлаб, мухаббатдан масрурланиб, жилға бўйида узок ўтириди. Колган нонни рўмолга ўраб белига боғлади. Белига қувват ингандай бўлди. Кейин кўз ўнгидан жувоннинг меҳр тўла қарашларини ҳеч қуволмай, тўғрироғи ҳеч қувгиси келмай, йўлида давом этди. Пахмоқни ўйламади. Қачонки, унга дуч келгачгина, не мақсадда санғиб юрганлиги эсига тушди. Аммо...

Пахмоқдан умидини узгач, у водий бўйлаб кетди. Чукуркамарга мўралашдан мақсад қолмаганди. Чалкаш сўқмокларнинг биридан ошиқмай юриб бораркан, водий четидаги сийрак арчазордан какликларнинг сайрашини эшитди. Юрагидан ўқинч кетиб, қони қайта жўши. Милтиғига майда сочмали ўқ жойлаб, ўша томон юрди.

Кош корайганда, белига саккиз какликни катор териб, йўлга шай бўлди. Бироқ уйга қайтишни энди хаёлига ҳам келтирмади. Қишлоғигача икки соатлик йўл. Албатта, йўл унга писанд эмас, ҳар куни босиб ўтадиган масофанинг арзимас бир кисми. Биринчидан, эртаси Пахмоқни Чукуркамардан бошлиб қидирмокқа аҳд килди. Иккинчидан, Чукуркамар эски ошнаси Самад полвоннинг қишлоғига яқин эди. Учинчидан, қалбини гупуртираётган хис-туйгуларини ким биландир ўртоқлашгиси келарди. Бунга Самад полвон жуда боп ўртоқ эди. Мана шуларнинг бариси сўнгти дақиқада қарорини ўзгартиришга туртки бўлди.

У ошнасинг кишлоғига қоронғида кириб борди. Самаднинг аёли уй соҳиби каби очиққина эди, уни одатдагидек, хуштавозелик билан қаршилади. Кўлига сув куйиб, сочиқ тутди. Тагига тўрт қават кўрича ташлади. Аёлнинг қай бир жихатлари кўкбулоқлик жувонга ўшаб кетишлигини сезган Панжи саёқнинг димоғи ўз-ўзидан чоғ бўлди. Бизди бўлғуси хотин ҳам мана шу аёл каби эпчил ва меҳрибон чиқадиганга ўхшайди, деб ўйлади. Ошнаси келгунча чой ҳўплаб, девордаги сўзаналарни, токчадаги идишларни, қисқаси, уйга зеб бериб турган жамики нарсаларни бирма-бир, томоша қилиб ўтиреди. Диққатини, айниқса, девордаги айик териси тортди. Унинг ўнг ёнига тулки териси осиғлиқ эди. Бу нарсалар уйга унчалик ўтиришмаганини сезиб, томоқ кириб-кириб кўйди. Айик териси устига кўндаланг осилган милтиқ уни кўп қизиктириди. Бориб тутиб кўришдан ўзини зўрга-зўрга тийиб ўтиреди. Кейин аёл кишининг кўли сезилиб турган бошқа жихозларга алаҳсиди. Ошнасинг уйини беихтиёр ўз кулбасига киёслади. Ҳаётидаги илк бор шинам-саришта хонадонни қўмсади. Ошнасинг аёли ўрнида кўкбулоқлик жувонни кўйиб, чексиз-чегарасиз орзуларга берилди. Сўнг эса, ошнаси билан ярим тунгача сирли ва сехрли сухбат курди. Ичилган ароқ қулф-дилини баттар очиб, фоят усталик билан қовурилган гўштдан ўз ёрининг дидини тасаввур этди.

\* \* \*

Пахмоқ якка ўсгани учунми ёлғизлиқка жуда кўниккан эди. Боз устига, норасталигида еган турткилари уни анча серҳадик қилиб қўйганди. Натижада у ўзидан бошқаларга ишонмай улгайди. Тани-жони соғ пайтидаку ёлғизлиги сира билинмасди. Аммо жони азоб тортган кезлари, тирик жон-да, беихтиёр ҳамроҳ истаб қоларди. Зилдай оғир бошини йўлдошининг пинжига суқиб, оғриқдан шу йўсинда ором топгиси келарди.

Норасталигида тушида ўзини кўпинча онасининг пинжига кўярди. Вужуди илиқ тана ҳароратини ҳис этиб, эркаланиб ғингширди, тамшанарди, талпинарди ва бу характеристики жажжи тумшукчаси совук ўнгирнинг муздек деворларига бориб тақалмагунча давом этарди. Кейин бехос ўйғониб кетиб, ўзини тор ўнгирда кўяркан,

онасини күмсаб, бехуда гингширди, бекорга нола тортарди.

Аслида у нолимаса ҳам бўларди. Эндиликда оналини табиат бекаму кўст ўз зиммасига олганди. Ўз онасидан фарқли ўларок, табиат шундай она эдики, меҳридек, қаҳри ҳам жуда жўшқин эди. Бу она унинг насибасини бутун тоғу тошларга сочиб ташлаганидек, пишиб улғайсин, салга руҳи чўқадиган бўлмасин дея сонсаноқсиз ғанимларини йўлига кўндаланг кўйиб қўйганди. Пахмоқ улар билан талашиб-тортишиб улғайишга мажбур эди. Ҳатто чоғроққина тўнғиз ҳам унга ҳамла қила оларди. Бўриларга-ку гап йўқ, уни кўрди дегунча олдиларига солиб кувлашарди. Аммо она табиат бунинг ҳам ғамини еб қўйганди. Кошиб бекинсин дея ўнгирларни яратгандек, тирмashiшга тоғда арча-ю бошқа хил дов-дараҳтлар билан чор-атрофни тўлдириб ташлаганди. Пахмоқ жойи келса, булардан усталик билан фойдаланаради. Лекин шунчага қарамай, ёлғизлик балоси олдида кўпинча ожиз қоларди. Тани азоб тортган кезлари бу оламда ўзи танҳо қолганидек, сикилишдан юраги тарс ёрилай дерди. Боз устига, кўэ ўнгидаги жамики жонлиқ зоти ўз жуфти билан умргузаронлик қилишарди. Ҳаттоки анови бефаросат тўнғизлар ҳам ёлғиз эмасди. Куюи сойдаги қўрқок қуёnlар ҳам галалашиб яшашарди.

Катта қоя биқинидаги бургутлар ҳам ўта ҳамжиҳат эдилар. Фақат угина ёлғиз эди. Ёлғизлиги кор килган кезлари кўнглида ҳамроҳга – ҳамжинсга мойиллик кўзғаларди. Ўтган йили ўша майлга бўйсунман деб, жонидан айрилиб қолишга сал қолганди. Агар ўша воқеа юз бермаганида, у майлга итоат этиб, бирор кун ўзига ҳамроҳ топиб олиши мумкин эди. Бироқ ўша воқеадан сўнг у ўз ҳамжинсларидан қаттиқ юрак олдириб кўйди. Ҳар хил таниш-билишчиликни ёлғизликни афзал деб билди. Кейинчалик ҳамжинсларидан бирортасининг хидини илғаши билан ўша ходиса эсига тушар, нарирок, имкони борича нарирок кетишшга ҳаракат киларди. Албатта, нари кетиш дегани кошиш эмасди. У эндиликда қочмасди. Пусиб чекинарди. Юраги қаҳруғазабга тўлиб чекинарди, ҳар лаҳзада ташланишга шайдек, ер тирнаб чекинарди. Бахтига ўзга айиклар унинг худудига кўпда оралайвермасди. Худди ўзи ўзга ҳудуд

каршисида жонсарак туриб қолгандек, улар ҳам бу нотаниш ҳудудга юрак ютиб бетлайвермасди.

Ушбу воқеа юз берганида, Пахмок ҳозиргилик кучга тұлмаган, болалик билан балоғат ёши үртасидаги сарсон айқча эди. «Сарсон айқча» деганимизга сабаб шундаки, у бола бўлиб бола, катта бўлиб катта эмасди. Бир карасанг, кичик айқчадай ўйноки ва галварсрок, бир карасанг жиддий ва жаҳлдор — яқинлашсанг, ейман, ютаман дегандай, ўз майлида ҳўмрайиб юарди.

Ўша куни Пахмок ўз худудининг кунботиш қисмида ўзга айқ ҳидини фавқулодда пайқаб қолганди. Бу томонда унинг сарҳади илон изи сойлик билан якунланарди. Ундан нарига у ҳеч ўтмаганди. Қолаверса, ўтишга ҳеч қизиқмаганди. Бунга сабаб, биринчидан ўз худудида емиш керагидан мўл эди. Иккинчидан эса, айрим ҳолларни хисобга олмаганда, ўз худудини кентгайтиришга иштиёкманд ўқтам жониворлардан эмасди, борига қаноат этиб, тинчтина яшашни хуш қўрарди. Шу куни у кунботишга тасодифан бориб қолганди. Ўзга айқ ҳидини сезиб, дастлаб бутун вужуди кўркувдан қалтираб кетди. Сўнг негадир беихтиёр шодланди. Борлиқни қуршаб турган минглаб ҳидлар орасидан аниқ сезилиб турган бу ҳид жуда қадрдон туюлиб, беихтиёр ўша томонга талпинди. Сал ўтмай ялангликдаги зирк буталари оралаб юрган улкан айқини кўрди. Айқ ўзини жуда ювош туттанидан, у ортиқча хавотирланмади. Эркалантаннамо харакатлар килиб, секин-аста яқинлашиб бораверди. Бироқ ҳамжинси у кутганча қаршиламади. Пахмокқа кўзи тушиб аввалига таажжублангандай бўлди. Сўнг шундай кутурдики, Пахмоқнинг назарида тоғу тошлар титраб кетгандай туюлди. Даҳшат оғушида бир зумга гангигб қолди. Мен сенга нима қилдим, деган маънода унга мўлтиллаб тикилди. Аммо бундай қарасаки, ажал дегани улкан махлук тимсолида ўзи томон шиддат ила бостириб келмоқда. Хиёл ҳаялласа тупроқка қорадиган. У кўркувдан ура қочишига тушди. Улкан айқ уни лўқиллаганча таъкиб килиб келди. Лекин бу ёғига ўтишга негадир ҳафсала қилмади. Ҳойнахой, шу атрофда она айқ юргандир, деб ўйлаган чиқар. Акс ҳолда Пахмоқнинг шўрига шўрва тўкилиши аниқ эди.

Ана шу воқеа сабаб бўлиб, унинг ҳамжинларига нисбатан қизиқиши батамом сўнган эди. Вакти келса,

ҳамжинслари бўридай тажовузкор, силовсингдай газабкор эканлигини англади. Бахтига бу тоғларда айклар сийрак эди. Кўриқхона ташкил этилмасдан бурун уларнинг кўпчилиги бошқа ҳайвонлар қаторида кириб юборилган эди. Йўқса, катта бир ҳудудда бу тарзда эмин-эркин юролмасди. Тўғри. Баъзи пайтларда чегара бузилиши холлари бўлиб туради. Бундай пайтда Пахмоқ ғазаби қанчалик жўшмасин, тартибузар айкнинг кўзи-га кўринмасликка уринарди. Негаки, унинг ожизтоли-гини кўрган айқ биринчি галдаёқ уни ҳайдаб ёки маҳв этиб, ерига эга чиқиб олиши мумкин эди-да. Уларни мавҳумлик тутиб туради, холос. Бу бегона ҳудудда қандай айқ яшашлигини билмаганиклари учун ҳам Пахмоқнинг ерида ортиқча ўралашмай, қандай келишган бўлса, шундайлигича секин ғойиб бўлишарди. Ҳатто ўзларидан бирор-бир белги қолдиришга ҳам тиришмасди. Ер эгасининг белгиси манаман деб турган жойда белги қолдиришга камдан-кам айқ журъат этади. Ва яна шуни алоҳида таъкидлаш лозимки, Пахмоқ муштдай боши билан анчагина шум эди. Белгини бўй-бастига мослаб эмас, имкони борича юқорироқка кўярди. Унинг учун буни ҳеч кийин жойи йўқ эди. Дарахтга тирмашиб чиқарди-да, керакли жойга, бошқа айқлар каби елкаси-ни эмас, ўмганини обдон ишқаларди. Бу хил шумликини у ўз ҳудудидаги бошқа жониворларнинг сон-саноқсиз «сўзлашув устун»ларидан ўрганган эди. Пахмоқ куйидаги белгиларни писанд килмаганидек, юкоридаги белгиларга жиндек ҳайиқиброк қаарди. Юкоридаги белгилар бўрига ўхшаш иирикрок жониворларга тегишли бўларди. Белги қанчалик юқори бўлса, эгаси шунчалик маҳобатли тасаввур уйғотишини норасталигидаёқ фахм-лаб етганди. Шумлигининг боиси мана шунда эди.

Умуман олганда, Пахмоқ онасидан деярли ҳеч нарса ўрганмай қолганди. Яшаш учун зарур бўлмиш барча тажрибаларни туртиниб-суртиниб, ўзи ўзлаштириб бормоқда эди. «Сўзлашув устун»ларидан шумликини ўргангандек, кўзидан кўра кўпроқ димогига ишонмок лозимлигини ва бунинг учун елга ошна тутинмоқ кераклигини бир-икки аччиқ воқеадан сўнг ўзлаштирганди.

«Сўзлашув устун»ига келсак, жониворларнинг ахбот рулашви азалдан мавжуд. Сиз оддий, хонаки итларни ҳеч кузатганимисиз? Агар кузаттан бўлсангиз, улар

кўпроқ диккайган нарсалар, дейлик, дараҳт, бута, ҳатто ерга қоқилган қозик атрофида ўралашиб, искаланиш орқали бу ерга нималар келиб кетганини аникласа, ёзилиш билан ўзи келиб кетганидан огоҳ этади, яъни белги қўяди. Белгини жониворлар турли усулда қўяди: бири ёзилади, бири сўлагини суркаб кетади. Жониворлар белги қўйишни бирордан ўрганмайди, бу нарса уларнинг табиатида бор, факат сал қувроқлари буни ўз фойдасига нисбатан тузукроқ усулда қўллай олади. Пахмок ана шундай жониворлар жумласидан эди. Бошқа жониворларнинг назарида ҳайбатли тасаввур уйғотиш учун белгисини юкорилатиб қўяди.

У бу шумликни худуднинг кун ботиши қисмида ўша улкан айик билан учрашмасдан анча бурун ўзлаштириб олганди. Бу пайтда хамжинсларига нисбатан кўнглида зигирча адовати йўқ эди. Шунчаки хавфсираш мавжуд эди. Ушбу воқеадан кейин ўзга айиклардан бутунлай юрак олдириб қўйди. Иложи борича улардан йироқроқ юришга ҳаракат қилди. Бу йил баҳорда ўша айик худуднинг фарбий қисмида тентиганди, ер эгаси сифатида фазабдан титраса титрадики, лекин якинига йўлаётмади. Уни ҳайдаб сололмади. Ҳайтовур, бегона айик кўп ўралашмай, яна ўз ерига қайтиб кетди. Пахмок забардаст бу улкан маҳлукнинг қўлансанса ҳидини яхшилаб эслаб қолди.

Аммо кечаги учрашув кўнглида бутунлай ўзга таас-сурот уйғотди. Ҳали хеч сезмаган янги туйгуларни юзага қалқитди. Буни қарангки, ҳаётида илк бор бегона айик ундан питирлаб қочди. Иккинчидан эса, унинг турк-тароватида ҳеч бир тажовузкорлик пайқамади. Ҳайикиш, факат ҳайикиш. Бу ҳайикиш унда ғолиблик ва ўзига ишонч ҳиссини уйғотган бўлса, нозли ва маъюстоброқ термулишлари кўнглинни ийдирди. Энг муҳими, Пахмок ундан юракка кутқу солувчи эркак айик ҳидини эмас, ургочи айикларга хос майнитбронк ҳидни илғади. Бундан негадир андак қони жўшди. Бориб у билан искалангиси келди. Бироқ бегона айик бунга изн бермади. Бекинган жойидан чиқмади.

Агар муҳаббат ойи – баҳор пайти бўлганида улар ортиқча хавфсирашиб ўтирмај осонгина топишишлари мумкин эди. Бироқ муҳаббат ойигача олдинда ҳали бир қиши бор эди. Кўнгилда ошиқлик ҳиссини кўзғовчи

баҳоргача яшашлари, яшаганда ҳам табиатнинг азалий қонун-коидасига бўйсунган ҳолда, турли хавф-хатардан жонини омон сақлаган ҳолда, ҳозир эса тахминан икки ойча давом этадиган киши уйқусига тайёрланиб кириш учун корин ғамида куймаланиб яшашлари керак эди. Уйқудан кейинги юмушлари ҳам сероб эди. Оч қоринга муҳаббат ёқармиди дегандай, емиш кидириб пастга эниш ва кор тагидан тишга босгулик нарса қидириб то-пишнинг ўзи бўлмайди. Қачонки ҳаводан кишнинг заҳри ариб, кун ботишдан иликроқ шабада эсиб, конлари кўпирмагунча ўз ҳолича яшашлари даркор эди. Тоғ жониворларининг ҳар бир куни кутилмаган турли тафсилотларга тўла эканлигини ҳисобга олинадиган бўлса, муҳаббат ойигача ҳали олдинда бутун бошли бир умр ястаниб ётарди. Шунингчун, Пахмоқнинг ҳозирги интилишлари муҳаббатга даҳлдор эмасди. Уни қизиқтирган нарса урғочи айкнинг андак маъюстоб бокишилари-юювошлиги, ёлғизликнинг зохиран сокин, ботинан оғир исқанжаси эди. Бунинг устига, Пахмоқ балоғат ёшига етган эди. Одатда, айқулар уч, гоҳида тўрт яшарлигида балоғатга етади. Лекин буни кўкламгача ўзлари сезмайди. Муҳаббат фаслида эса бирдан конлари кўпириб, ҳамжинс қидириб қолишиади. Айқулар оиласи мана шу тарзда дунёга келади. Агар ўлим айирмаса, уларнинг бирлиги умрларининг охиригача давом этади. Ўз навбатида, Пахмоқнинг тажовузкорликдан ҳоли феъли, бир қадар мўминлиги урғочи айкнинг эътиборини тортмай қолмаганди. Факат носинашталик ўртада катта бир юв бўлиб турардики, бу тўсиқдан хатлашга иккиси ҳам дафъатан журъят этишолмаган эди.

Тунни чангалзордаги қулаган тоғтеракнинг тагида ўтказган Пахмоқ ярим кечага бориб оёғида яна кучли оғриқ сезди. Фингшиб оёғини яларкан, ўша бегона айқни кўмсади. Иссиқ, ёпишқок тили билан ярадор оёғини ялаб-юлқашини истади. Бошини унинг пинжига суқиб ором олишни хоҳлади. Тинимсиз азоб берадиган дард унда илгари ҳеч юз бермаган хоҳиш ва истакларни турдирмоқда эди. Айниқса, бегона айкнинг чангалзорга етиб-етмай алланечук гинали мўлтираб тикилиши кўз ўнгидан кетмай қолганди. Бу бокинида на у кутган ва кўнишкаи тажовуз, на адоварат бор эди. Бунда нимадир ваъда берувчи гинадан ўзга нарса йўқ эди. Айни шу

нарса Пахмокни ўзига ром этиб, күнглида меҳрга хошиш уйготганди.

Ўзга жониворларнинг бир-бирига нисбатан меҳрибонликларини Пахмок кўп кузатганди. Ўнг қулоғини милтиқ ўки чирт узиб юборган қоратоб тулкига урғочи тулки томонидан кўрсатилган фамхўрликни гувоҳи бўлган эди у. Ўшандаmallаранг чиройли тулки ўз жуфтининг ярасини соатлаб ялаб-юлқаган, айланиб-ўргилганди. Ўшанда у бу кадар меҳр-оқибатдан жуда ҳайратланган, сўнг негадир ғаши келиб, уларни ҳайдаб солганди. Энди эса ўшандай ҳолатни ўзи истамокда эди.

Тонгда у ўша истак оғушида ташқарига интилди. Ёш новдаларни босиб-янчиб яланг ерга чиқаркан, намчил тумшуғини кўкка чўзиб бир майдон хид олди. Сонсаноқсиз хидлар орасидан емиш хидини тез илгади. Аммо бу гал хидга эргацмади. Ички бир хошишга бўйсуниб, Чукуркамар юкорисидаги дўланазорни қора тортиб, йўлга тушди. Назарида, кечаги айикни бугун ҳам ўша ерда учратадигандек эди.

У оғриётган оёғини авайлаб босиб, бирор соатлар йўл босгандан сўнг бирдан титраб кетди. Тумшуғини кимирлатиб, ҳавони кетма-кет искади. Адашмабди. Турли хидлар орасидан ғанимининг иси яққол сезилиб турарди. Бу бало қаердан келиб қолди, деган ҳадикда атрофга олазарак назар содди. Кўрди. Панжи саёқ пастда, сой ёқалаб ошиқмай келарди.

Пахмок мушкул ахволда қолганди. Ортга кочай деса, наридаги арчазор анча олисда, ўртада кафтдек яланглик ястаниб ётарди. Ялангликка чиқиш ўлим дегани эди. Ўнг ёндаги куюқ арчазор узра баланд қоя қад рост-лаган, шунингдек, чап ёндан ҳам умид йўқ — киялик тўғри сойга тушади. Ҳар икки ҳолатда ҳам ғаними уни дарров илғайди. Бир муддат каловлашдан сўнг, у илк бор қочмай, секин ўнг ёндаги арчазорга беркинди. Ер бағирлаб ўсган арча шохлари орасига яшириниб, бутун вужуди кўзга айланганча ғанимини кузата бошлади.

Бу орада Панжи саёқ сой ёқасидаги товоатош ёнида тўхтади. Елкасидаги милтиғини тошга суюб қўйиб, ошиқмай сувга энди. Ҷўқкалади. Ҳовучида сув олиб иди. Кейин кўзларини қисиб, теваракка дикқат билан назар солди. Агар табиат инсонга жониворлардек хид билиш қобилиятини берганида, турган гап, у Пахмокни

аллақачон пайқаган бұларди. Аммо у хозир атрофға маҳлиә әди. Эрталабки қуёш нуридан фусункор тус олған тоғу тошлар бир лахзага бўлса-да, дикқатини ўғирлаган әди. Панжи саёқ, кўзи атрофда, оёқларини узатиб ўтириди. Ҳадемай тотли хидлар қаторига арzonбаҳо сигаретнинг кўланса хиди кўшилди.

Пахмоқ бекинган жойдан у бемалол кўриниб турарди. У биринчи бор инсонни милтиқдан холи кўрди. Юрагига ҳамиша кўркув солиб келган яроғ инсондан уч-тўрт одим нарида бамисоли калтакдай беозоргина суюглик турарди. Инсон деганлари усиз хеч нарса эмаслиги, унда на ўткир тирноклар, на даҳшатли тишлар борлигини, гар яроғи бўлмаса, уни бемалол маҳв этиш мумкинлигини у дафъатан пайқади. Пайқаши баробар вужудини хануз титрокқа солаётган кўркув хисси хийла чекиниб, ўрнини қизикиш эгаллади. Негаки, шу дамгача у инсонни яроғ билан яхлит тасаввур этарди-да, энди эса уларни бир-биридан холи кўриб турарди. Кўз ўнгидаги бу хил манзарадан таажжубга тушган Пахмоқ бoshини у ён-бу ён қийшайтириб, ғанимини обдан кузатди. Бора-бора вужудудидан титроқ бутунлай ариди.

Бир пайт Панжи саёқ илдам ўрнидан кўзғалиб, милтиғини кўлига олди. Пахмоқнинг кўзига у яна даҳшатли тус олди. Шўрликнинг танига тағин титроқ оралаб, ерга баттар қапицди. Бахтига Панжи саёқ унинг рўпарасидан эмас, сал куйи юриб, яланглик қаршисидан юкорига кўтарилиди. Бир оздан сўнг тошлар устидан енгил-енгил сакраб наридаги арчазорда кўздан йўқолди. Аммо Пахмоқ бикингандан чиқар-чиқмас, Панжи саёқ тўсатдан яна яланглик четида пайдо бўлди. Милтиғини ўнғай тутганча чор-атрофға аланг-жаланг қарай бошлади. У Пахмоқнинг яқиндагина ташлаган тезагига дуч келган ва уни шу атрофда эканини пайқаб қолганди.

Аллақачон жойидан жилишга улгурган Пахмоқ оёғи остидаги куриган шохни бехос босиб, ўзини билдириб кўйди. Панжи саёқ у томон илдам югуриб кела бошлиди. Ортиқ бикинишдан фойда йўклигини фаҳмлаган Пахмоқ ошиғич пастга эниб, сой бўйлаб қочишига тушди. Бирнасда ғанимини жуда ортда қолдириб кетди. Аммо ғанимининг ғоят чидамли ва саботли эканини у яхши биларди. Билгани учун ҳам уни чалғитишга уринди. Сой ёкалаб бир оз юрди-да, сўнг қарши бетдаги арча-

зорга шўнғиди. Ундан ўтиб, тағин Чукуркамарга олиб борадиган сўқмоққа тушиб кетди.

Пахмоқнинг бу харакатини дийдорлашув йўлидаги событлик деб бўлмасди. Шу тобда Чукуркамар томонларга улоқишдан бўлак иложи ҳам йўқ эди. Кўзига энг бехавотир жой ўша ёқ бўлиб кўринди. Фанимимдан илгарилаб кетдим, деган умидда йўлнинг бу ёғига унчалик ошиқмади.

У Чукуркамарга яқинлашганда, қуёш анча кўтарилиб, ҳаво исий бошлаганди. Чукуркамарга кираверишдаги ўнг кўл сўқмоқ бошига етганда бир муддат нафас ростлади. Коп-кора тумшуғини олдинга чўзиб, хид олди. Илк сезгани кўл хидига коришиқ арча хиди бўлди. Сўнгра ўлакса хидини илғади. Қаттиқ пишқириб, шабадага юз тутди-да, тағин искаланди. Бу сафар узоқдаги дўлана хидини пайқади. Оғзи сув очиб, тамшанди. Узун тили билан тумшуғини ялади. Кейин юмшоқ панжаларини ерга шарисиз босиб, сўқмоқдан юқорига ўрлади. Тепага кўтарилган сайин ўлакса хиди баттар анкӣ бошлиди. У тумшуғини кўкка чўзиб, бот искаланди. Ўлакса хиди бу сафар жуда яқиндан келди. У чапга кўз ташлаб, каттакон арча ортидаги яланглиқда ўлакса талашаётган қора қузунларни кўрди. Пишқириб яна юкориларкан, дўланазорга кирмай, сўлга бурилди. Салдан кейин қўшни худуд чегарасига етди. У ерга чўнқайиб, қўшни томонга дикқат билан кўз ташлади. Бир оздан сўнг, аста изига қайтиб, дўланазорга кирди. Мева териб ейишга киришиди. Оғзи емишга етгач, бегона айик уни ортиқ қизиқтирмай қўйди. Кўзи фақат меваларни кўрарди. Кўп ўтмай қалин қор кўрпаси остида қолиб кетадиган мазали меваларга ичи ачитгандай, айиқларга хос очкўзлик билан кавшанарди.

Нафси тўла конгач, у четга чиқди. Ётоқ истаб теваракка аланглади. Қорни тўйса, дангасалиги тутиб коларди. Шу боис, ётиб ором олмоқ ниятида қора харсангни кўзлаб олга юраркан, шу пайт bekарor ел унинг димогига кечаги айикнинг таниш хидини олиб келди. У бу хидни базёр илғади. Илғаши баробар кўнглида эрталабки ҳис қайта бош кўтарди. Қизиқсиниб, хидга қарши юрди. Кўп ўтмай қўшни худуд сарҳадидаги харсангтош ёнига етди. Дайди ел бу сафар дара ичидан эса бошлади. Қадрдон хидни йўқотган Пахмоқ ерга чўнқайиб ўти-

паркан, бирдан титраб кетди. Шабада лимогига ғанимидинг исини олиб келганди. У ишонқирамай, аввал бошини ўғирди, сүнг бутун гавдаси билан бурилиб, ҳавони қайта-қайта хидлади. Йўқ, димоги алдамаётган эди. ҳавода юракка күтқу солувчи хид баралла сезилиб турарди. У букри арча томон ошикди-да, қуйига мўралади. Бир қарашда тоғу тошда тирик жонни пайқаш кийин. Албатта, бу инсон учун. Аммо айик зоти бир кўз ташлашдаёк жуда қўп нарсани илғайди.

Шунингдек, Пахмок ҳам дара тубида бармоқдек бўлиб келаётган ғанимини узоқданоқ кўрди. Бошда енгил ғингшиди, сүнг норозиланиб охиста ўкирди. Қочишга унчалик ошиқмади. Негаки, ғанимидинг қайси томонга юриши ҳали номаълум эди. Чуқуркамарга етмай чапга бурилиб, водий тарафга юриши ҳам мумкин эди. Шунингдек, ўнгга қайрилиб, боя ўзи ўрлаган сўқмоқ орқали юриб, нақ қаршисидан ҳам чикиши мумкин эди. Агар шундай ҳол юз бергудек бўлса, у дўланазор ёқалаб ўтиб, мулкининг жанубий қисми бўйлаб юришни мўлжаллади. Шунда унинг диққатини қуидаги нимадир нойлаб турган тулки тортди. Тулкининг ўликдай қотиб туриши кизиқ туюлиб, бошини бир ён кийшайтирганча уни кузата бошлади. Бир муддатдан сўнг четдаги арчазор шитирлаб, у ердан кулранг қуён отилиб чиқди. Уни бошқа бир тулки таъқиб этиб келарди. Таъқибчи тулки ўлжасини пистирмада ётган тулки томон кувиб келарди. Шўрлик қуён сакраб-сакраб қочаркан, навбатдаги сакрашида шап этиб, пистирмадаги тулкининг чангалига тушибди. Икки тулки хашиб-паш дегунча уни бир ёклик қилди-қўйди. Пахмоқ одатда бу хил манзараларни кўп кузатганди, аммо бунисига айрича эътибор қаратди. Орада тобора яқинлашиб келаётган ғанимига кўз солиб қўйишини ҳам унутмади.

Тоғ ели тоғ табиатидек жуда бекарор бўлади. Салдан сўнг муздек шабада кўшии худуд томондан эса бошлади ва узок-узоклардан ўша бегона айик хидини олиб келди. Энди жилмоқ ниятида турган Пахмоқ бу исдан яна сергакланди. Ортига ўгирилди. Ўгирилаётгиг, ғаними томонга яна кўз ташлаб қўйди. Бу пайтда Панжи саёқ воидийга олиб чиқадиган сўқмоқдан ўтганди. Сўнгги умиди пучга чиққанини сезган Пахмоқ икки ўт орасида қолди. Секин жилиб қолай деса, кидиргани шу атрофда юриб-

ди. Кочмай деса, ғаними бу томонга олиб чиқадиган сўқмоққа тобора яқинлашмоқда... Начора жон ширин. У дўланазор ёқалаб ўтиб, жанубий тизмаларни коралаб йўлга тушди. Ҳудуднинг бу қисмини унчалик хуш кўрмасди. Яланг-яланғоч қоялардан иборат бу тизмалар жуда кўримсиз жойлар эди.

У яланғоч тизмалар бўйлаб бориб, Эгридара марказига тушмоқни мўлжаллади.

Тизмалар оралиғидаги илон изи, энсиз сўқмоқлар киррадор тошларга тўла эди. Сал эҳтиёткорлик қилинмаса, оёқни синдириб олиш ҳеч гап эмасди. Шунингчун ҳам овчилар бу ерни «оёқсиндирап» деб атайдилар. Шу боис, айқ зоти тугул, бошқа жониворлар ҳам бу масканга кўп боравермайди.

Пахмоқ дастлабки тош устига оёқ қўяркан, ярадор оёғига янада кучлирок оғриқ кирганини сезди. Фингшиди. Фингшиганча кузги офтоб нурида сўник тус олган яланғоч тизмаларга маъюс термулди. Тизмалар оралаб қочищдан маъни йўқлигини англааб, гарангсиб, бот фингшиди. У каловланиб, чор-атрофга жавдираркан, кўзи сал наридаги қўзикоринсимон чоғроқ ҳарсангта тушди. Ва беихтиёр ўша томонга жилди. Ҳарсанг атрофида бир оз тентиди-да, бояги тулкига тақлид қилиб, унинг пойига чўқди. Кейин қоматини чўзиб, яхшилаб биқиниб олди. Эрталаб арчазорда қилган қилиридан сўнг, бикинишда гап кўплигини фавқулодда фаҳмлаб етганди.

У вактида биқинган экан. Орадан кўп ўтмай дўнгда Панжи саёқ пайдо бўлди. Дўнгдан туриб, кафти манглайида, атрофни узок ва синчков кузатди. Ўзича Пахмоқ юриши мумкин бўлган ерларни тусмоллади. Яланғоч тизмалар томонга айқнинг ўтмагани аниқ. Ўтса, узокдан яққол кўзга ташланарди. Унинг эътиборини ўнг томонга чўзилган энсиз сўқмоқ торти. Сўқмоқ Пахмоқ биқинган ҳарсанг ёнидан ўтиб, дара лабидаги арчазорга сингиб кетганди. Бу сўқмоқ дара бўйлаб бориб, бир ярим чақиримдан сўнг куйига энарди. Панжи саёқ Пахмоқни арчазорда деб гумон килди. Бирпас ўйловдан сўнг сўқмоққа тушди. Ошиқиброк, шунингдек, хиёл иккиланиброк юрди.

Қадам товушлари яқинлашган сайин Пахмоқнинг жони товонига туша борди. Кўп ўтмай димогига қўланса тер хиди урилди. Бир хаёли ура кочиб қолмоқчи ҳам

бүлди. Ҳартутул ўзини босиб, харсангта баттар қапиши-ди. Үнгача ғаними жуда якин келиб қолганди. Ана у майда тошларга сирғала-сирғала харсанг ёнидан ўта бошлади. Салдан сўнг чанг бостган этиги, кейин ўзи кўринди. Пахмок унинг ортидан караб қоларкан ажиб бир ҳолдан ҳайрон бўлди. Ғаними, қўлидаги милтигини демаса, ушоқкина нарса экан. Бир сакрашда ортидан этиб, осонгина ерпарчин қилса бўларкан. Ҳайронлиги истакка алмашиниб, у ҳатто бир қўзғалиб ҳам олди. Аммо журъати етмади.

Бунгача, Панжи саёқ анча узоклашиб ултурганди. Арчазорга этиб, теваракка синчковлик билан назар солди. У ерда жон шарпасини сезмагач, арчазор ёқалаб дўнгликка қайтди. Салдан сўнг дўнглик ортида кўздан йўқолди.

Остидаги тошни ҳўллаб қўйган Пахмок ниҳоят ўрнидан қўзғалди. Бегона айиқни истаб, дўнглик сари юриши ҳатто хаёлига келтирмади. Оқсоқланганча арчазорга синтган сўқмоққа тушди-да, Эгридара марказини қоралаб олға жилди.

\* \* \*

Бу фикр Панжи саёқнинг бошига фавқулодда келди.

Бу пайтда у Эгридагага кираверишдаги Ялантепага етган. Ёлғизоёқ сўқмоқдан охиста юқорига ўрлаётган эди. Ушбу фикр хаёлига келиши билан такқа тўхтади. Кўз ўнгидан Самад дўстининг уйида кўрган айик териси ўтди. Терини бор бўйича тасавурида тўла-тўқис гавдалантиаркан, дуч келган тошга чўқди-да, тоғ бошидан пирпираб чикиб келаётган куёшга мамнун бокди. Куёшдан андоза олгандек, юзи табассумдан ёришиб кетди. «Бирдан сўрамайман, — деб ўйлади. — Бирдан сўрасам бермайди. Озгина ичгандан сўнг сўрайман. Ичса жониниям аямайди. Ичмаса хасниям бермайди. Жўра, сени тўйга айтгани келдим, дейман. Қиз томон айик терисини сўратибди дейман. У менга, ўзинг овчи бўла туриб, тери сўрашга уялмайсанми, дейди. Мен эса уни мактайман. Тоза мақтаганимдан сўнг тери тугул юрагини сугуриб беради у. Тавба, нега илгарироқ шу нарса хаёлимга келмади, а? Пахмокнинг кетидан қувгуңча Самадникига бормайманми. Уйингдаги анову терини менга бер, жўра демайманми».

У елкасидан тоғ ағдарилганини ҳис этиб, ўтирган жойида атрофга мағрур бोқди. Дўстининг уйига олиб борадиган яқин йўлни кўзи билан чамалади. Эгридара юқориси билан юриб Оқсувга, Оқсувдан эса чапга, қайрилса йўли анча қисқаришини ўйлади. Аммо овчининг қисмати қурсин, кўлингда яроғинг турса, овнинг хуружи тутмай қўймайди. Кўзи Эгридарага кираверишдаги қоялар оралиғига тушгач, овнинг хуружи тутиб, тағин фикридан қайтди. «Дара ичи билан юраман, — деб ўйлади. — Пахмоқ учраса — бахтим, шартта тинчтаман. Учрамаса, Самад жўрамнинг уйидаги терини опқайтаман. Тери райондаги анови начальникка. Хотин эса бизга. Хотинди тўшига босайлик, у ёғи кейин бир гап бўлар. Лекин ортиқ имилласак, чатоқ бўладиганга ўхшайди. Пастқишлоқлик Мели тумшуқ унга одам қўймоқчи экан. Отни қамчиламасак кўлни бурунга тикиб қолаверишимиз ҳеч гап эмас. Бугун, агар учраса, ё Пахмоқни тинчтаман, ё Самаднинг уйидаги терини опқайтаман. Лекин шу начальникка қойил қолмадим. Сассик пўстакнинг нимасига бунча қизиқади у? Ерга ташлаб қўярмиш. Ерга ташлашга эчкиникиям бўлавера-ди-ку, ахир. Фарқи нима? Майли, сўз бердикми, бажармай иложи йўқ энди. Бажармасак, эркак эмас экансан дейиши тайин. Бу гапдан кейин бош кўтариб юрмоқ қийин. Аммо-лекин шулиниям эркакча тўлайдиган. Бошқа бирор у берган шулиниг чорак қисминиям бермасди. Бундай одамга ҳар қанча килсанг арзийди. Қисқаси, бир амаллаб қутулиб олай, шундан кейин каклик отиб, тулки отиб, тинчгина юрамиз. Мужими, келинди қўлдан чиқармаслик. Бугун терини қўлга киритсак, эртан акамнинг қаватига ишга кирган бўламизда, келинди уйига совчиларни зинғиллатамиз, бу гал ишни битирмай қайтмаларинг, деймиз. Агар келин қўлдан кетса, бу дунё ҳаром, деймиз. Тўйдан кейин Мели бурун билан бир гаплашиб қўямиз. Мен оғиз солган нарсага нега тумшуқ тикиб эдинг деб, яхшилаб пўстагини кокамиз. Жовлининг тўйида еган калтакларинг эсингдан чиқдими деб, бир ғалвирдан ўтказамиз. Қасди бор-да, атай қиласанти. Бўлмасам, кар эмас, оғиз солганимизни эшитган. Юрган бир саёқ-да деб, ўзича писанд қилмаган чикар хали? Шошма, ҳали сенга бир отўйин кўрсатма-

самми! Лекин тезрок отни қамчиламасак бўлмайди, йўғасам, энағар опқўйишдан ҳам тоймайди».

Панжи саёқ чинакамига ташвишга тушиб қолганди. Агар бу қадар ташвишга тушмаганида, бу даражада ич-этини емаган, Самаднинг уйидаги тери дабдурустдан эсига тушмаган ва ҳали-хануз Пахмоқнинг изидан овора-ю сарсон юрган бўларди.

Аслида бугун тонгда, кечаги оворагарчиликдан дили қаттиқ хира тортиб, одатдагидек, Пахмоқнинг жонига қасд этмоқ ўйида уйидан чиққанди. Самаднинг уйига ўтиш хаёлида ҳам йўқ эди. Кишлоқдан чиқаётib, қўйла-рини ёйиб қайтаётган акасига дуч келганди. Акаси уни ёмон хабар билан қаршилади, дедики, бугун овингни бир амалла-да, эртан ишга чик, пастқишлоқлик Мели тумшук одам қўймокчи эмиш. Олдинги гурунгда бу гап йўқ эди. Панжи саёқ акасига меровсираб бокди. Сўровга тили бормаса-да, акасининг жиддий нигохидан, Мели тумшук ўзи танлаган аёлга оғиз солмоқчи эканини анг-лади. Аввалига бадани жунжикиб, тиззаларидан мадор кетди. Кейин вужуди ғазабдан титраб, қўзларига қон куйилди. Ўлдирман уни, деди. Ўлдирманнинг нимаси, деди акаси унинг нодонлигидан ранжиб, жувон ҳали сенга товин эмас, боши очиқ аёлга ит ҳам, бит ҳам оғиз солади-да. Йўқ, у меники, деди Панжи саёқ ўжарлик билан, фақат меники. Ака деди, агар у сеники бўлса, бугун айфингни тинчит-да, эртан қаватимга чик, индинга совчиларни қайта юборамиз, лекин билиб қўй, ишнинг бошини тутганлигинг ҳақидаги хабар совчилардан олдинроқ етиб боради...

Панжи саёқ шу ўтирганча туришга ошиқмади. Қуёш нури хуш ёқаёттандек, масрур бир ҳолатда ялпайиб ўтираверди. Нафсиламрини айтганда, унинг шошадиган жойи йўқ эди. Тери нақд. Шошиб қаёққа ҳам боради. Зора Пахмоқ учраб қолса, деган умидда дафа ичи билан юрилса-да, дўстининг уйига тушга қолмай етиб боради.

У ошиқмай чўнтагидан сигарет олди. Мириқиб туатди. Узоқ-яқиндан эшитилаётган каклик овозига қулоқ тутиб, маъносиз илжайди. Кейин хаёли яна Пахмоққа кетди. Ўзи мўмининга деб ўйлаган жониворнинг бу қадар туткич бермас чиқиб қолганидан таажжубланди. Кеча кун бўйи бекорга санғиганидан таассуфланди.

Кече тонгда Самаднинг уйидан чиқаётганида Пахмоқни учратишига аниқ ишонганди. Қидирувни Чуқуркамардан бошлаганди. Бекорга бу ерга бош сукмаганди. Биладики, Пахмок ярадор. Ярадор жониворлар Исиқбулук кўлида кўп ўралашади. У буни кўп кузатган. Ҳатто ўзи ҳам ўтган йили лат еган оёғини шу кўлда даволаган. Булоқ суви бир оз иссиқ бўлгани билан, жуда хушдаво, танингни фубордан тозалайди.

У кўл атрофини синчиклаб кўздан кечираркан, Пахмоқни уч-тўрт кун бурун келиб-кетганини пайқади. Демак, у ўзидан кейин келибди. Нафрати белгиси сифатида этик изларидан бирига боллаб тезаклаб кетибди. Панжи саёқ унинг бу килиғидан ҳаҳолаб кулди. Кулакула дара ичи бўйлаб юрди. Йўл-йўлакай қўйган қопконларини кўздан кечириб борди. Чамаси икки соатлардан сўнг сой бўйига тушиб, бир муддат нафас ростлади. Сигарет тутатиб, атрофни кўп ва хўп томоша қилиган бўлди. Сой икки юз одимлардан кейин ўнг ёндаги тик коя тубини ялаб ўтарди. Йўлни давом эттиrmок учун сой кечиб нариги қирғоққа ўтиш лозим эди. Нариги бетдаги энсиз сўқмоқ сойга энган нишаблик тепасидан ўтарди. Сўқмоқдан юкоридаги қиялик қуюқ арчазор эди. Арчазор тик қояга бориб туташганди. У ўтирган жойдан сўқмоқ кесиб ўтган тошлоқ яланглик ва унинг ортидаги арчазор бемалол кўзга ташланиб турарди. Умуман олганда дара ичидай бундай арчазорлар ниҳоятда сероб эди.

Панжи саёқ кетма-кет икки сигарет чеккач, кўлига милтигини олди-да, сой ёқалаб сал юрди. Ўтиш мумкин бўлган жой қояга яқинроқ эди. У тошлар устидан сакраб нариги қирғоққа ўтди. Нишабликдан юкорилаб тошлоқ ялангликка чиқди. Арчазорга яқинлашганда, одатига кўра, милтигини ўнғайроқ тутди. Арчазорга кириб, у янги тезакка дуч келди. Тезак жуда янги, ундан билин-билинмас ховур тарагиб турарди. Демак, Пахмок шу яқин ўртада. Аммо қайси томонга кетган? У ердаги куриган хасларга, негадир арча шохларига эътибор берди. Хаслар ҳозир ўзи келган томонга этилганди. У милтигини қия тутганча, ялангликка отилиб чиқди. Ялангликда зор кўринимас, коя тагидаги арчазордан бирор сас қулоққа чалинмасди. У атрофга аланг-жаланг караб турганида, арчазорда нимадир кирс этди. Панжи саёқ

буни. Пахмок эканлигини дарров фахмлади. Бироқ айк оқсоқ бўлса-да, жуда эпчил экан, уни бирнасда ортда колдириб кетди. Панжи саёқ уни коралаб изидан тушди.

Ўша куни Панжи саёқ уни Чукуркамар юқорисидан кидирди, кейин водийга ўтди. Қайтишда яна Эгридара бўйлаб юрди. Оқсув атрофларини хам бир сира кўздан кечирди. Аммо Пахмок ерга киргандай бутунлай ёйиб бўлганди.

Омадсизлиқдан Панжи саёкнинг ёмон қаҳри келди. Пахмокни «чўлок» деб сўқди, «маймок» деб сўқди, «илойи пустак бўлгур» деб сўқди, қўлимга тушсанг, ундоқ қиласман, бундоқ қиласман деб роса қаҳру ғазабини сочди. Кейин эса, одатдагидек, бирпасда тинчланиб, ошиқмай уйига жўнади. Ярим тунда уйига қайтаркан, ечинмаёқ қотиб қолди. Бугун тонгда яна йўлга чиқиб, акасидан юқоридаги шумхабарни эшилди.

Агар бу шумхабарни уч-тўрт кун бурун эшилганда, унчалик парво қиласман бўларди, жуда нари борса, югурганники эмас, буюрганники, буниси бўлмаса, униси-да, деб кўя қоларди. Бироқ булоқ бошидаги «нон» воқеасидан сўнг бундай деб бўлмасди. Ўша кундан буён Панжи саёқ чин маънода, ошиқ эди. Ҳаётида илк бор ошиқлик хиссини туймоқда эди. Унинг аллангали кучини сезмокда эди. Шу боис, Мели тумшуқдан қаттиқ ранжиди, кўнглида унга нисбатан ададсиз адоварат кўзгалди. Лафзга сира тўғри келмаса-да, Самад дўстининг уйидаги терини олиб келишга қарор килди. Жувондан айрилиб қолиш жуда оғирлигини англағани сайин карори қатъйлаша борди.

Лекин бу карори Эгридара бўйлаб юришига тўсқинлик килолмади. Пахмок учраса — баҳтим, учрамаса — отасининг гўрига, жўрамнинг уйидаги терини орқалаб қайтаман, дея секин ўринидан туриб, бамайлихотир йўлга тушди. Теридан кўнгли тўклиги туфайли, аввалигидек хушёр юрмади. Факат тоғбегига рўбарў келиб колмаслик ташвишида бўлди. Ҳар эсига тушганда, гудраниб, уни сўкиб борди.

Унинг тоғбеги билан сира сози чикмасди. Иккаласи гўё ит-мушук. Бироқ Панжи саёқ анойилардан эмас, у билан ади-бади айтишиб ўтирищдан кўра, кўзига кўринмай кўя қолишни маъкул кўради. Тоғбеги уни кўп пойлаган, аммо бирон марта ноқонуний иш устида кўлга ту-

широлмаган. Түй-маъракаларда учрашиб қолиша, тоғбеки адсоватини очик билдиради.

— Бирор кун боплаб қўлга туширарим бор сени, — дейди бошқалар әшитмайдиган бир тарзда. — Ўшанда қонун йўли билан яхшилаб таъзирингни бериб қўяман!

Панжи саёқ анқовсирайди.

— Мусичадай беозор, безиён одамга буйтиб зуум килишингиз нимаси, ака, — дейди кўзларини пирпирашиб. — Айбимиз товди яхши кўриш бўса, ана, эртадан бошлаб чиқмадик тоғингизга.

У меровсираган сайин тоғбегининг жони ҳалқумига келади.

— Милтиқни бер, милтиқни, — дейди ғазабини базур жиловладб.

Панжи саёқ баттар меровсирайди. Чаккасини киргизирип қашиб, қаншари остидан қарайди.

— Милтиқ уйда-ку, ака, — дейди, милтиқ шу тобда кўлида эмаслигидан ичи ачиғандай.

— Опкеб бер! — дейди тоғбеки ғижиниб. — Бўлмасам, участковойни бошлаб бораман-да, ўзим тортиб оламан!

— Ҳақкингиз йўқ-да, ака. — Панжи саёқ ошкора эрмаклаб кулади. — Биз ким — овчилар жамиятининг аъзосимиз. Милтиқ саклашга хукуки бор одамларданмиз. Давлатга ҳар йили план берамиз. Давлатнинг ўзи, Бердиёров Панжининг яроғ саклашга ҳаққи бор, деган документ бериб қўйган. Нима, сиз давлатданам зўрмисиз? Ё документдан ҳам кучингиз кўпми?

Тоғбегининг кўзларига қон қўйилади. Кўлидан келса-ю, ерга қозик қилиб қоқиб юборгудек бир важоҳатда тикилади унга.

— Ўша документни зиён-безиён жониворларни киргина деб бермаган-ку, ахир, — дейди сўнг чийиллаб.

— Олдин тутинг, кейин гапиринг, — дейди Панжи саёқ сиртига сув юқтирамай. — Мусичага озор бермайдиган одамман мен. Тухмат қилганингиз учун ўзим уйингизга участковойни бошлаб бораман.

Тоғбеки уни бирон марта тутмаган, ўйланкираб қолади. Лекин бўш келишни хаёлига келтирмайди.

— Қолконлар кимники? — дейди ғазаби баттар авжланиб, — Кўриқхонага қопқон қўйиш ман этилганини билмайсанми, нима?! Тунов куни Қизилбурунданги қоп-

қонингга кийик тушиб қопти. Яхшиям бориб қолганим, йўқса, униям жигилдонингга урардинг!

— Ё тавба, — Панжи саёқ, бу не тухмат дегандай елка учиради. — Ахир копқонга, Панжиники, деб ёзиб қўйилмаган-ку, ака. Нима қиласиз одамнинг ажинасини отлантириб!

Охир-оқибат, тоғбеги бу хил тортишишдан маъни йўқлигини англаб, паст тушади, худонинг нимаси кўп, куни кўп, дейди таҳдидли оҳангда, бирор қун кўлимга тушарсан ахир, ўшанда ийифингни чиқараман сен болани!

Тоғбеги ҳануз унинг «ийифини чиқариш» умидида юради. У эса, сира тутқич бермайди. Тоғбегининг шарпасини сезиши билан биқиниб олади. Фақат қопқонларига жуда ичи ачийди. Тоғбеги анчагина қопқонларини йўқотиб юборган. Шунингчун, Панжи саёқ доим унинг ортидан сўкиб юради. Олдида эса хеч нарсадаң ҳабари йўқ одамдай илжайиб тураверади. У илжайгани сайин тоғбегининг жони чиқади. Аммо қўлга тушмаган ўғри, ўғри эмас дегандек, нима ҳам қила оларди, шўрлик.

Панжи саёқ теваракка лоқайд кўз ташлаб, ҳали у бетда, ҳали бу бетда ўзидан дарак бериб, тинимсиз сайдраётган какликларга эътибор бермай борарди. Кайтишда, дерди маст одамдай ўзича будраниб, саккиз-тўқизингнинг унингни учирман-да, бугун бир шўрва осаман, ҳозирча эса сайдраб турларинг, кушчаларим, ҳозир отсам, жўрамдан ортмайсанлар, каклик шўрвани мендан яхши кўради у.

У беғам бир алфозда Эгридара белидаги чоғрок йўлакка рўбарў бўлди. Бу ерда сўқмок кескин баландлашиб, тик коя сиртидан ўтарди. Паст ҳам, тепалик ҳам гўё пичоқ билан кесилгандек, тик жарлик эди. Пастга караган одамнинг боши айланарди. Куйида пишқириб оқаётган сой юқоридан худди ариқчадек бўлиб кўринарди. Икки от бемалол сиғарли бу йўлакнинг энг юкори қисмидан катта-кичик харсанглар оралаб ўтиларди. Харсанглардан сўнг яна нишаблик бошланарди. Нишаблик сой ёйилиб оқадиган, икки томони тик коядан иборат хушманзара кенгликка олиб тушарди. Бир сўз билан айтганда, Эгридара ўз номи билан Эгридара эди. Бу ерда нокулай сўқмоклар ҳам, хушманзара кенгликлар ҳам истаганча топилади.

Панжи саёқ елкасидан яроғини олди-да, подачи таё-

гини белига тирагандек, уни белига кўндаланг қўйиб секин-аста баландлай бошлади. Йўл-йўлакай ярмигача намланган оғзидағи сигаретни пуфлаб пастга учирив юборди-да, сёри остидан бир нима топадигандай, ерга бокқанча йўлнинг танобини торта бошлади.

\* \* \*

Айни шу пайтда Пахмоқ йўлак тепасидаги харсанглар орасида даҳшат ва қўркувдан бамисоли баргдай титраб туарди.

У бу ерга Панжи саёдан сал бурун етиб келган, хушманзара кенглиқда ивирсиб юрган тоғбегига кўзи тушиб, олға силжишга ботинолмай турганди. Тоғбеги кетар, деган умидда, зўр сабр ва бардош ила кутмоқда эди. Бунга сари тоғбеги ошиқай демас, отини эса нарига қантариб, аллакаердан оёғига қопқон илаштириб келган улкан тоғ тулкисининг тепасида чўнқайганча, уни «кишан»дан халос этмоқни ўйлаб ўтиради. Нодон тулки эса бошида халоскори турганини сезмай, унинг узатилган қўлини ғарчча тишлаб олмоқ пайида жонхолатда у ён-бу ён талпинар, гоҳо оёғини бамисоли омбурдай сиқиб турган қопқонга ваҳшат билан оғиз солиб қўярди. Ана у эҳтиёт юзасидан чўзган қамчи дастасини жонхолатда ғажиб, тулкиларга хос ириллаганча уни силкилай бошлади. Унинг бу килиғи тоғбегига қизиқ туқолди шекилли, кулиб уни баттар қутуртирмокка тушди. Тоғ тулкиси кучли ва чиройли эди. Қопқонга орка оёғи илингани боис, ўзини химоя қилишга бемалол ҳаракатлана оларди. Ҳатто у тоғбегининг тиззасига сапчишга ҳам уриниб қўрди. Тоғбеки ўзини ортга олгани ҳамон ер тирнаб қочишга интилди. Бироқ тошлар орасига сиқи-либ қолган қопқон бунга изн бермас, боз устига, тоғбеки қўлини чўзишни қўймасди. Тулки яна ва яна ўзини химоя қилишга ўтади. Охиста ва таҳдидли ириллаб, ҳар дақиқада сапчишга шай ҳолда, тоғбегининг кўл ҳаракатларини зимдан кузатади. Ора-сирада ер тимдалаб олата-сир қочиб қолишга тиришади.

Пахмоқ бошда бу манзарани бамайлихотир кузатиб турди. Бу пайтда юрагида на қўркув, на ташвиш бор эди. Тоғбегининг кетишини кутиб, харсанглар орасида томошабин бўлиб ўтиради. Тоғбегининг кораси ўчиши ҳамон манзил томон йўл тортмоқчи эди.

У бугун ҳам Чукуркамар юқорисидаги дўланазорга қоралаганди. Нега деганда, туни билан оёғи сиркираб, кўнглида ўша ўзга жонивор меҳрига ташнилик қайта бош қўттарганди. Улкан бошини унинг илиқ пинжига суқиб, бир зумга, атиги бир зумга чукур тин олиш учун у ҳамма нарсага тайёр эди. Нотаниш айиқнинг гинали мўлтираб тикилишлари хар одимда кўз ўнгидаги қайта-қайта гавдаланиб, мисоли оҳанграбодай ўзига чорламоқда эди. Оёғидаги оғриқ эса бу истакни баттар кучайтирмоқда эди.

Кечаги таъқиб остида бетиним юришлар ўз таъсирини кўрсатмай қолмаганди. Боз устига, кеча кечга яқин, довдираб, майда тошли қиялиқдан пастга думалаб кетганди. Сал имодан куйига бамисоли селдай окувчи бу тошли қиялиқдан айқ тугул, кийик ҳам ўйланқираб юрарди. Пахмоқ тошлар оқимига кўшилиб пастга думаларкан, чукур зов бўйидаги ёлғиз арчага базур илашиб колганди. Ўшанда ярадор оёғи бўларича бўлганди.

Оёғининг бетиним қақшаб оғриши ҳам ундаги ички истакни босолмаганди. Тонгданоқ у йўл тадоригини кўрган, оч-нахор Чукуркамарни қора тортганди. Гўё ўша ерга борса, жони бутунлай ором топадигандек, ажиб бир жаҳд ила олға интиларди.

Хозирча унинг бу ҳаракатига тоғбени тўсик бўлиб турарди. У норозиланиб, секин ғингширкан, бирдан кўркиб кетди. Бурун катаклари керилиб, ҳавони бот-бот исқади. Сўнгра ел эсаёттан томонга, ортига кескин ўғирилди. Не кўз билан кўрсинки, пастдан шу тарафга қараб Панжи саёқ чиқиб келарди. Ана у йўлак бошига етиб, бир зумга тўхтади-да, елкасидан яроғини олиб белига кўндаланг қўйди. Кейин секин-аста тепага ўрлай бошлади.

Пахмоқ икки ўт орасида қолганди. Олға босай деса, тоғбени бор, ортдан эса ажал бостириб келмоқда. У бе-ихтиёр ўнг ёнига ўғирилди. Кўзи тик қоя сирти бўйлаб юқорига юргургилади. Қоя бошида арча тошни ёриб чиқкан, ундан тепада кўм-кўк осмон. Осмонда бир бургут эмин-эркин сузиб юрибди. У чап ёнга интилди. Тубсиз жаҳаннамга кўзи тушиб, юраги орқасига тортиб кетди. Куйидаги сой бамисоли илондай тўлғаниб оқарди. У харсанглар орасида у ён-бу ён талпиниб, нолакор ғингшиди. Ғингший-ғингший фанимига жавдираф боқди.

Ганими бамайлихотир келмокда эди. У титраб олға талпинди. Аммо уч-түрт одим босмай, беихтиёр түхтади. Төбебеги ҳануз тулки билан андармон эди.

У йиғлаганнамо овозда ғингшиди. Нажот кидириб, аянчли овозда ингради. Нажот эса йўқ – йўлакнинг иккни тарафи ҳам инсон зоти томонидан тақа-тақ бекитилганди.

Пахмоқ барча жониворлар каби инсон зотидан жуда қаттиқ ҳайикарди. У тоғбегими, овчими, бурнини эпла-ёлмайдиган ёш болами, барибир – жониворлар инсонни ўзига дўст деб билмайди. Иложи борича улардан узокроқ юришга ҳаракат қилишади. Шу тобда Пахмоқ инсонларга хос жиндеккина идрок этолганда эди, у таваккалига олға босган бўларди. Тоғбеги, табиий, унга тегмасди. Отини миниб, гўё уни кўрмагандай, астагина жўнаб қоларди. Бироқ буни Пахмоқ қаердан билсин. Айни пайтда эса тоғбеги кўзига ғанимидан даҳшатлирок кўринмокда эди. Негаки, у кўз ўнгида тулки шўрликнинг жонини олмоқ қасдida куймаланаради-да. Худди тулки ўзи тутиб олган сугуруни эрмаклаб ўлдиргандай, у ҳам тутқунини шу зайлда қийнамокда эди-да. Кўз ўнгидаги воқеадан шу хulosага келган Пахмоқ юрак ютиб олға босармиди. Унинг ҳарсанглар орасида жон талvasасида чир айланишдан бўлак иложи қолмаганди.

Лекин, ўз навбатида, инсон ҳам йирик жониворлардан чўчиди. Масалан, тоғбеги уларнинг жонини ҳимоя қиласди-ю, аммо ўзларидан қўрқади. У хозир тулкини бир амаллаб қопқондан бўшатаркан, тинмай сўкинарди. Нега деганда, тулки уни боллаб тишлаб олганди. Тоғбеги уч оёқлаб қочиб бораётган тулкига ортиқ эътибор бермай, билагидаги қонни юваркан қолқон қўйган шоввознинг гўрига тинмай ғишт қалар, етти пуштини қолдирмай сўкарди.

Аммо буни Пахмоқ кўрмади. Төбебегининг отига мишиб, дара ичкарисига жўнаб кетганини ҳам сезмади. Бу пайтда унинг бутун дикқат-эътибори Панжи саёққа қаратилган эди. Аввалига нажот кидириб, ҳарсанглар орасида роса изғиди. Икки бор ҳарсанг пойига биқиниб, ҳар сафар бир дақиқадан ортиққа сабри чидамай, яна бикингган жойидан отилиб чиқди. Ҳатто даҳшат оғушида тик кояга тирмашиб кўрди. Орада сакраш умидида кўйига мўралаб-мўралаб ҳам кўйди. Ҳамма ҳаракатлари

зое эканлигини сезгач, тақдирига тан бергандай, ғаними томонга ўгирилиб олди. Ғингшиганча унинг харакатларини кузата бошлади.

Панжи саёк құланса тер хидини буркситиб яқынлашган сайин Пахмокнинг юраги түйқусдан ғазаб ва нафрата тұла борди. Қизиқ, ҳозиргача бутун вужудини бамисоли баргдай титраттан күркүв қаергадир изсиз йўқолиб, унинг ўрнини мислсиз қаҳр эгаллади. Бу хил холат жониворларда энг ночор пайтда юзага келади. Ўлимни бўйнига олган жонивор уни мардона қаршилайди. То жони танини тарқ этмагунча киши ақли лол қоладиган бир даражада ғоят сабот ва бардош ила қаршилик кўрсатишда давом этади. Тоғ тулкисининг тоғбегига қилган ҳамласининг боиси ҳам мана шунда эди.

Пахмок ҳозир шу холатга кирганди. Бироқ, ғазабдан хали ақлинине йўқотмаган, йўқотмагани сабабли, ақл-идроқка эмас, шуурига бўйсуниб, охиста кетига тислантида, иккинчи харсанг ортига ўтди. Ортида яна иккита харсанг бор эди. Пахмок иккинчисини маъкул кўрди. Аввалига чўнқайди. Сўнг бор бўйича қаддини ростладида, шайланиб, харсангга қапишиброқ турди. Харсангга соғ чап оёғи билан таянди. Аммо зарб бермоқ учун уни бўшатмоқ лозим эди. У чап оёғини бўшатаркан, беихтиёр ўнг оёғига суюнди ва жароҳати оғриб, ўқириб юборишига сал қолди. Ҳартугул, вактида ўзини тия билди. Секин ғингшиб, жароҳатини яларкан, кўнглида иккинчи бир хис — қасос баш кўтарди. Қасос түғёни шуур ўрнини идрок билан тўлдирди. Бор тортган азобларининг баш гунохкори мана шу одам эканлигини, шу туфайли жони қийнокдалигини, агар бу тирик юрса, гинали нигоҳ ташлаб, юрагини англарсиз ҳис-туйфуларга тўлдирган бегона айқининг дийдорига ҳеч қачон етиша олмаслигини охир-оқибат ёрқин бир тарзда идрок эта олди.

У энди ғанимига қасоскор туйфу ила боқди. Қасос лаззати бутун вужудида ёқимли бир титрок уйғотди. Ғаними эса ҳеч нарсадан хабарсиз бир холатда биттабитта босиб келарди. Оёғи остига тикилганча, ниманидир ўйлаб, мийигида илжайиб-илжайиб келарди.

Пахмок харсангга баттар қанишди. У энди ғанимини кўрмас, қадам товушларини аниқ эшишиб турарди. Ана у биринчи харсангдан ўтди. Белига кўндаланг қўйилган милтифининг қўндори тошга тегиб ўтди. Кўндоқ товуши-

дан кейинги учинчи ё тўртинчи қадам сасидан сўнг, Пахмок харсанг ортидан шиддат-ла сирғалиб чиқди-да, ғанимининг нақ қолида пайдо бўлди. Улар ораси атиги бир одим эди. Кутилмаган бу ҳолдан Панжи саёқ, даҳшатдан кўзлари олайганча, шамдай қотиб қолганди. Лоақал кимиirlашга, овоз беришга ўзида куч топмай, мисоли бақадай қотганди.

Инсон дегани шундай дақиқаларда ожиз бир маҳлукдан фарқсиз бўлиб қолишини сўнгги лаҳзада фаҳмлаб етган Пахмок бундан ғоят ҳайратланди-да, ўша ҳайрат оғушида ғанимининг гарданига нанжаси билан боплаб бир туширди. Шўрлик Панжи саёқ ғиқ этишга улгурмай, пастга тошдай юмалаб кетди.

Бу ҳодиса дақиқанинг ўндан бир улушида бўлиб ўтган эса-да, Пахмокقا гўё йилдай чўзилди. У бошда оҳиста, кейин баланд овозда ўкириб юборди. Ўкирган кўйи аввал пастга, сўнг тўртинчи харсанг ёнига бориб, тоғбеги турган томонга каради.

У ерда тоғбегининг кораси ҳам кўринмасди.

\* \* \*

Жониворлар табиатидан келиб чиқкан ҳолда иш тутган Пахмок йўлакдан пастга қаараркан, бирдан ўзининг ҳаловат оғушида эканини сезди, ғаними ортиқ бозовта қиломаслигини хис этди. Бундан у туйкусдан шодланиб, нораста айиқчалардай ўйноклаб кетди. Ўйноклади-ю, оғрик азобидан бўкириб юборди. Ярадор оғини кўтариб, иссиқ тили билан ялаб-юлқашга тушди. Жароҳатини ялай туриб нолакор ғингшиди, ўша бегона урғочи айиқ эшлишини истагандай, чўзиб-чўзиб ғингшиди. Сўнгра кўнгли оромбахш туйгуларга тўлибтошиб, олға интилди. Бўлғуси кунлар унга ниманидир, нималарнидир ваъда бераёттандай эди.

Айни шу паллада тоғнинг бошка бир бурчидаги ўзга бир юрак ўз-ўзидан беадад фуссага тўлган эди. Кўкбулоқлик бу жувоннинг таъби аввалига хирадашди. Хиралик кўп ўтмай фуссага айланди. У юрагини аёвсиз кемирайтган фуссанинг боисини англаёлмай, теварагини гир қуршаган тоғу тошларга маъюс ва ғамгин термулиб қолди.

## ҒАНИМЛАР

Суюкли ити Диккиқулоқ ўлдириб кетилгандан сўнг, газаби кўкка ўрлаган Сарвар, итининг қотили бўлмиш Ёлдор бўрининг жонини олмоққа қатъий аҳд килди. Шу тогда ё сен турасан, ё мен, дея бор овозда хайқирди. Кейин ити жасадини иззат-икром билан тепаликка кўмди. Дўипайган «қабр» устида, теваракдагилардан уялди шекилли, кўзини ёшланмоқдан базур тийилди. Мижжалари ёшланмаса-да, йиғламоқдан бери бўлиб де-ди:

— Ит эмас, гавҳар эди! Гавҳаримдан айрдилар!

Атрофдагилар мийигида илжайиса-да, одоб юзасидан, сукут сақламоққа ҳаракат қилдилар. Шунга қарамай, кинояномуз томок қиравчилар барибир топилди. Нега деганда, итнинг ўлими тогда фожиа саналмайди. Жасади бу тарэда иззат-икром билан кўмилмайди. Эшакда бирор ўнқир-чўнкирга судраб обориб ташланади. Эти қузғулнларга ем бўлиб, суяги тупрокка коришиб кетади. Бинобарин, тогда ит қаҳат эмас, исталган хонадонга бош суқсанг, йўқ деганда, уч-тўрттаси олдингга акиллаб чиқади. Эгаси билан келиш-да, хохлаганингни танлаб олавер.

Итга аза очиш нимаси?

Бироқ Сарвар деганлари кишлоқ итларини бир чакага олмайди. Буларда факат жасад бор, фахм-фаросатдан эса зигирча йўқ, дейди. Тулкисимон Диккиқулогини эса дунёдаги барча итлардан афзал кўради. Бунда бор-йўғи забон йўқ, қолган ҳамма нарсани одамдай илрайди, одамдай фахмлайди, ишонмасангиз синааб кўринг, дейди. Аммо Диккиқулокнинг ўзига хос аъло жихатларини одамлар билишга улгурмади. Эрта тонглардан бирида у Ёлдорнинг чангалида, эгаси айтмишли, фожиали равиша нобуд бўлди.

Энг ёмони, бу ҳодиса Сарварнинг кўз ўнгидага юз берди.

Тонг фира-ширасида қўра адогидан қора кўланка сирғалиб чиққанида, Сарвар одати бўйича ховлида нафас олиш машқини бажармоқда эди. Ити қўрадан берироқдаги ялангликда искаланиб юрарди. Қора шарпани кишлоқ итларидан бири деб ўйлаган Сарвар аввалига унга эътибор бермади. Қачонки, Диккиқулоқ ўзи томон

жонҳалпида отилгачтинга, дикқат қилди. Итини таъкиб этиб келаётган кўланкани росмана бўри эканлигини англади. У бамисоли қора қуюндан бостириб келарди. Ана, у хаш-паш дегунча итини қувиб етди. Сарвар эс-хушини йифиб олгунча бўлмай, уни жонсиз жасадга айлантириб, тоғ томон аста йўртиб кета бошлади. Ҳатто ўқ овозидан сўнг ҳам харакатини ўзгартирмади.

Табиийки, Сарвар уйдан милтигини олиб чиққунча у анча олислаб кетганди. Йигит унинг ортидан бехуда югуриб, бекорга ўқ узиб, хийла ергача таъкиб этиб борди. Сўнг нафаси кисилиб, такрон ерда чўзилиб қолди.

Бу ҳодисани ўзидан бўлак фожиа сифатида қабул килувчи бўлмади. Сарвар деганлари бу қишлоқ учун бегона. Тоғ ҳавосидан дардига шифо излаб келган бир одам. Аммо у ўзини бегонаман деб тургани йўқ. Киришимли, пишиқ-пухта йигит экан. Келиши билан кишилардан бир сурув кўй-кўзи сотиб олиб, Фуччи паканани чўпонликка ёллади. Суюн чолнинг ўртсанча ўғлига атаб курдирган уйини қўра-пўраси билан ижарага олди. Ҳафтада бир машинада келиб, ҳолидан хабар олиб кетадиган ошна-офайниларининг турқ-тароватига қараганда, ўзига тўқ одам. Аммо ҳеч бетобга ўхшамайди. Кун бўйи, елкасида милтиқ, тоғма-тоғ санқииди, ё бўлмаса, бетдаги ёввойи бодомзорда соатлаб мук тушиб ўтиради.

Фуччи пакана эса унга итдай содик. Сурувга қарангдан ташқари, оқшомги куйдириш-пишириш ҳам унинг зиммасида.

— Ака шаҳарга қайтишда мениям ўзи билан олиб кетаркан, — дейди мақтаниб. — Шаҳарди жонон кизларидан бирига уйлантириб қўяман ўзим сени деяпти.

— Шу нияти бор экан, қишлоқди қизлариям тешиб чиқмасди, — дейди эшитганлар кулиб. — Ё шаҳарди кизлари бошқача бўларканми?

— Қишлоқди кизлари бизга тўғри келмайди. — Фуччи пакана «акахони» каби теваракка виқорли назар ташлашга уринади. — Энди биз, шу... шаҳарди энаси ўпмаган қизига уйланамиз-да. Шу иш пешонада бор экан-да.

— Назаримда, Товкора зарангнинг қизи кетидан тилингни осилтириб юрувдинг, нима, қўнмадими у?

— Айтдим-ку, қишлоқди қизи бизга тўғри келмайди деб. — Фуччи пакана бўш келмасликка тиришади. —

Унинг бонидан ачиган катиқ иси анкийди. Шаҳарди қизлари атира ҷумилади. Бизга шаҳарди қизи дуруст.

— Узокдаги қуйруққа интилиб, яқиндаги ўпкадан куруқ қолмагин тағин. Эшилдингми, унга Учтоддан совчилар келаётганниш.

Бирок бу гап Гуччи паканага зифирча таъсир қилмайди. Сўзловчи қолиб, тоғларга боқади, фалати тамшанди.

— Ҳар кеч ака билан маза қиласиз лекин, — дейди томдан тараша тушгандай. — Акада ароқ сероб. Оғайнилари ташлаб кетишади. Ўзи камгина ичади-ю, лекин мендан ҳеч аямайди.

— Одамга ўхшаб, уч-тўрттасини қўйнингга соб чиқмайсанми, бизам маза қимаймизми.

— Ака хафа бўлади-да.

— Билиб ўтирибдими.

— Билади. Ака ёмон синчков.

— Зўр ака топдинг-да лекин.

— Худога шукр!

— Ҳазир бўл, тағин чопонсиз қолдириб кетмасин. Шаҳарди одами айёр бўлади.

— Хафа қилаяпсиз, биродар. Ака сиз ўйлаган одам эмас.

Қишлоқ аҳлининг Сарвар ҳақида хозирча билганла-ри шу. Кўпроқ ўз майли ва ўз хаёлида юрадиган бу одам ити ўлдирилган куннинг эртаси оқшом эркаклар йигилиб ўтирадиган дўнгликка чиқиб келди. Кун бўйи Ёлдорнинг изидан санғиган шекилли, ҳорғин ва андак тажанг эди.

— Нима, тутқич бермаялтими, меҳмон? — деди Су-юн чол ҳол-аҳвол сўраган киши бўлиб. — Тутишингиз кийин уни. Эргаш бодигаям тутқич бермаган у. Ўрта ерда Эргашнинг ўзи ўлиб кетди.

Сарвар жавобга ошиқмади. Тоғларга бир муддат тикилиб туаркан, ҳорғин бир харакатла чўнтағидан бир даста пул чиқарди.

— Итимнинг хунига мана шуни тикаман! — деди идаоли, ҳам кибрли оҳангда. — Шарти шу, жасади оёғим остида бўлиши керак! Тепкилаб аламимдан чиқмокчи-ман!

Унинг қўлидаги озмунча пул эмасди, одамларнинг ғимирлаб колишини кутганди. Аммо у кутган ҳодиса юз

бермади. Давра ахли тебранмади. У, бу камми, деганча бўлмай, кимдир бу йил қиш эрта келиши мумкинлигини айтиб қолди. Бир зум сукутга толган давра бирдан жонланди. Қишининг эрта келиш-келмаслиги ҳақида ҳар ким ўз билганича башорат кила бошлади.

Сарвар сезидики, бунинг ҳаммаси шунчаки гап. Нокуляй вазиятдан қутулмоқ учун кўтарилиган «фавро». Одамлар гўё унинг борлигини унутгандай, кераксиз баҳсга берилганди. Ҳартугул Суюн чол жонига оро кирди.

— Чўкинг, меҳмон, турманг буйтиб, — деди кўзлари жавдира.

— Борай! — деди Сарвар, бу ерда мен ортиқча эканман, деган оҳангда. — Ўтириб нима қилдим, борай!

У кетмоққа улгурмади. Бир чеккада чакмонига ўрагиб, гумбаздай бўлиб ўтирган Шойим йўғон тўсатдан тилга кирди. Сарвар ҳамиша хўмрайиб юрадиган бу одамни жинидан баттар ёмон кўрарди. Шунинг учун энсаси қотиброқ унга юзланди.

— Ўлдирсангиз майли, лекин жасадини хўрлашингизга йўл қўймаймиз, — деди Шойим йўғон томонини кира-кира. — Нимага деганда, Ёлдор бизга бегона эмас, ўзимизнинг жондор. Итларга кун бермагани билан, ҳозирча мол-холимизга текканича йўқ. Пулди эса киссага солинг! Пул дегани ўзимиздаям ачиб ётиби.

— Ха, у ўзимизнинг жондор, — Суюн чол ўйиндан ўт чикмасин деган ўйда, шоша-пиша гапга аралашди. — Фуччивой сизга айтган чиқар, а?

— Ҳозирча айттанича йўқ.

— У айтмаган бўлса, биз айтамиз-да, — Шойим йўғон ўсик қоплари остидан ўқрайиб тикилди. — Ёлдорни Толмас чолнинг невараси Сафар деган бола асраб олган. Иккисиям раҳматли бўлиб кетган. Аввал бола ўлди, кейин бобой... Шундан бери Ёлдор эркинликда юрибди. Тўғриси, у биздиям роса жонимизга теккан. Итларга ҳеч кун бермайди. Шу куз ичи учта итимни бўғизлаб кетди. Бу туришда кишлоқда биттаям ит қолмаса керак. Шунинг учун уни ўлдиришга изн берамиз. Лекин хўрлашга рухсат йўқ.

— Ўлдирилгандан сўнг... — Сарвар ғаши келаёттанини яшириб ўтирганди. — Хўрланди нима-ю, хўрланмади нима, барибир эмасми?

— Аввал сиз уни ўлдиринг, — Шойим йўғон совук кулимсиради.

— Ўлдираманам!

— Агар ўлдира олмасангиз, Гуччи пакана бокиб юрган анову сурув меники.

Сарвар унинг бу гапини ҳазилга йўйиб кулмоқчи бўлди. Бироқ Шойим йўғоннинг авзойи бунга йўл қўймади.

— Назаримда, сиз... гаров ўйнамоқчисиз шекили? — деди шошиб.

— Эмасам-чи! — Шойим йўғон илжайишга тиришса-да, кўзлари кулмади. — Сиз нонни «нанна» деб юрга-нингизда, Шойим акангиз шаҳарнинг кўзиirlаридан би-ри бўлган. Вақтида ахмоқликни кўп ва хўп килганмиз. Кисқаси, гап битта, жондорни ўлдиромасангиз, сурувни ташлаб кетасиз. Акси бўлса, менинг сурувим сизники!

— Демак, эплашимга ишонмаяпсиз?

— Кўп майда гап бўлманг, укам! — Шойим йўғон аста ёнбошларкан, унга ғазабнак тикилди. — Ўйинни бошлиган сиз, мен эмас! Пул кўрсатиб бодилик қилган мен эмас, сиз! Шунинг учун гапни кўнайтирмай, харакатингизни килинг! Муддат ўн кун.

— Ўйинга биз хам қўшилсак бўладими? — деб сўра-ди кимдир.

— Йўқ! — деди Шойим йўғон қатъий йўсинда. — Ютқазса, бу йигитнинг ташлаб кетадиган нарсаси бор. Хўш, сенинг ниманг бор? Ё кари энангни тикмокчими-сан?!?

— Ҳай-ҳай, оғизга эгалик қилинглар! — Суюн чол катталарга хос босиқлик билан даврани тинчтишига уринди. — Арзимас бир жондорни деб итдай ириллашманглар! Уят бўлади-я.

— Арзийди, ака, арзийди, — Шойим йўғон тирсаги-ни ердан узиб Сарварга қошлари остидан ўқрайиб ти-килди. — Дамингиз чиқмай қолди, меҳмон? Каҳи, қўлни ташламайсизми?!

— Кўл ташлаш бўлса, кўл ташлаш-да! — паст ке-тишни истамаган Сарвар ўтирган одамларни оралаб ўтиб, унинг қошида тўхтади ва зардали бир харакатда кафтини узатди: — Ташланг!

— Узинглар!

Йигитлардан бири сакраб ўрнидан турди. Кўлини хаволатиб, туашган панжалар устига урган бўлди:

— Уздим!

Кунботиш томондан тўсатдан кўзғалган аччиқ изғирин кишиларнинг ортиқ эзмаланиб ўтиришига йўл кўймади. Аввал Суюн чол ўрнидан турди, сўнг бошқалар.

Дўнгда ёлғиз қолган Сарвар теваракка хомуш бокаркан, тўнғиллаганча, Шойим йўғоннинг гўрига фишт қалай бошлади...

\* \* \*

Бу пайтда Ёлдор кишлоқдан унча узок бўлмаган сийрак арчали дўйгликда ерга бағрини берганча, лоқайд чўзилиб ётарди. Нигоҳи тўнг эса-да, қулоқлари динг, димоги тийрак эди. Димоги илғаган хидларга қараб, теваракни тўла идрок этарди. Ланжлигига келсад, ҳамма бало қорни тўқлигидан эди. Қорни тўқ кезлари у ҳамиша тўнг тортиб қоларди. Бугун хам у Учдарарада чорроқ тўнғиз боласини қўлга туширган бўлиб, энди унинг ҳазми билан овора эди.

Ярини тукларини хурпайтириб эсаётган совук ел тоғлар бошига қор тушаётганидан дарак берарди. Бу ерларда қини эрта ва тўсатдан тушади. Даралардан куз ҳавоси ариб ултурмай, кутилмагандан қор ташлаб колади. Ковлашга улгурилмаган картошкалар, териб олинмаган мевалар қор тагида колиб, совукдан нобуд бўлади. Шунинг учун аксарият кишилар чорвани маъқул кўриб, ерга қарамайди. Шунингдек, ерга умид билан уруғ қадовчилар ҳам йўқ эмас. Чорвадорлар қишида бўрилардан азият чеккандек, улар ҳавонинг авзойига қараб, жонлари ҳалак бўлишади. Бу етмагандек, ердаги хосил етилиб-етилмай «тунги қароқчилар» — тўнғизлару, айиклар томонидан хомталаш қилина бошлайди.

Бир қарашда, дунёning бу ташвишлари билан Ёлдорнинг ҳеч иши йўқдек. Аслида эса...

Қоратепа биқинидаги олмазор туфайли тунлари унинг ҳам ҳаловати йўқ. Олмазор Суюн чолга тегишли. Кундузлари эшакда келиб, боғда тентиган бўлади-ю, шом тушмай корасини ўчиради. Тунда олмазорга қўнгир айик — Маймоқ эгалик қиласи. Ёлдор ундан олмазорни

эмас, Қоратепа этагидаги чоғроқ қабрни қизғанади. Нега деганда, калтафаҳм Маймоқ бошқа йўл қуригандай, нуқул қабрлар оралаб юради. Чоғроқ қабр ёнига етганда эса, теваракни ўрганиш учун албатта тўхтайди. Ана шунда нақ тумшуғи тагида ириллаганча Ёлдор пайдо бўлади. У ён сакраб, бу ён сакраб, Маймоқни қабр ёнидан узоқлаштиргунча тинчимайди.

Маймоқ эса ҳамиша бир ҳолдан таажжубланади. Негаки, тумшуғи тагида бамисоли иблисдай ирғишилаётган кулранг бу маҳлук бошқа ерда, яъни тоғу тошда рўпара келиб қолса, қайрилиб ҳам қарамайди. Қоратепада эса нақ бетидан олади.

Не сабабдан?

У Қоратепада ҳамиша Ёлдорга ён беради. Ахир бир неча метр нарида олма ҳиди димогингни қитиқлаб турса, қайси аҳмоқ беҳзет бир маҳлук билан пачакилашиб ўтиради. У олмазорга шўнғиркан, албатта, ортига қараб кўяди. Ёлдорни қабр ёнида чўнқайган ҳолда кўради. Аммо ҳакалак отаётган нафси ортиқча ўйларга изн бермайди.

Ёлдорга тирғалмаслигининг асосий сабабларидан яна бири шундаки, одатда, жониворлар ўзларининг қачон ҳақ, қачон ноҳақлигини жуда яхши билишади. Шунинг учун ҳам ҳамиша вазиятта қараб иш тутишади. Олмазор эса ўз мулки эмас, одам боласига тегишли бегона ҳудуд. У, қулоғи динг ҳолда, ҳар бир мевага оғиз соларкан, ўзга ҳудуддалигини, хатти-ҳаракатидаги ноҳақликни доимо ичдан хис этиб туради. Бунака пайтда ортиқча шарпа чиқармасликка уринади.

Ёлдорнинг куракда турмайдиган қиликлариға чидашининг боиси шунда.

Аммо яқинда Маймоқники ёмон тутди. Тупроқ титиб қаршисида ирғишилаётган Ёлдорга бирдан ҳамла қилиб қолди. Ёлдор базўр ўзини четга олган бўлса-да, хиёл тегиб ўтган зарбадан барибир бир юмалаб тушди. Эзиб ташлаш қасдида бостириб келган ғанимининг чангалидан бир амаллаб қутуларкан, охирги дақиқада унинг орқа сонига тиш ботиришга улгурди. Маймоқ бесўнақай, Ёлдор эса эпчил, қабр тепасида олатасир жанг бошланиб кетди. Қабр қаватидаги чириган чўплар синди, ҳар ён сочилди. Аслида буни олишув деб бўлмасди. Маймоқ ҳужум қилас, Ёлдор эса қочар, коча туриб гоҳ

унинг ёнбошида, гоҳ ортида пайдо бўлиб қоларди... Охир оқибат, бу сафар ҳам Маймоқ босиқлик қилди. Беҳуда ҳамлани тезда бас килиб, қабрдан узоклашли. Зумда олмазорга сингиб йўқолди.

Кабр ёнида дарғазаб қолган Ёлдор андак зарбанинг залворли кучини кейин хис қилди. Вужуди қақшаб, қабрлар орасида хийла вақт чўзилиб ётди.

Хозир ҳам у яғринининг сим-сим оғришита эътибор бермасликка тиришиб, қишлоққа тикилиб ётаркан, дўнгда йиғилиб ўтирган одамлар якинида искаланиб юрган малла итга кўзи тушиб, бошда оҳиста ириллаб қўйди. Сўнг, итнинг ҳаракатларини зимдан кузатаркан, юрагида ўша таниш хис-жон олмокқа ташналиқ туйғуси қайта бош кўтарганини сезди. Даҳшатли жағлари шақирлаб, беихтиёр ўрнидан туриб кетди. Аммо ит олисда, ёнида эса одамлар... У ноилож қайта жойига чўкди.

Занжирбанд этилган мурғак жонивор қишлоқ итлари томонидан эрмакка эмас, бўри зотидан бўлгани учун бешафқат таланарди. Қалин тахталардан қўполдан-қўпол ясалган ини ва жонсарак бола — Сафар жонига оро кирмаганида, у аллакачон итлар чангалида жон таслим қилган бўларди. Кизик жиҳати, итлар унга очикда ҳужум қилишар, инига эса бирортаси бош суколмасди. Бола ховлида пайдо бўлиши билан ҳаммаси тумтаракай қочарди.

Барча қишлоқ уйлари каби ховли гирди девор билан үралмагани учун ит ҳам, бит ҳам бемалол кириб келаверарди. Шалпангқулоқ итини эргаштириб юрадиган Эргаш боди ғанимларининг энг ёмони эди. Ховли эгалари йўқ пайтларида, у итини Ёлдорга гиж-гижлар, бу етмагандек, уни инидан судраб чиқариб, бикинига аёвсиз тепкиларди. Хонадон сохиблари келиб қолса, баҳонаси тайёр эди.

— Шу келди-ю, сигиримнинг сути қочди, — дерди оғзидан кўпик сачратиб. — Тезда йўқотинг буни! Эмасам, ўзим йўқотаман!

— Қанақасига? — Толмас чол ҳайрон.

— Шунакасига! — Эргаш боди янада баланддан келишга тиришади. — Сиз уйда жондор саклаганингиздан бери қишлоқдан ҳаловат кетди. Қўйларим см емай қўйди. Болалар кўчага чиколмай қолди.

Толмас чол оғир одам, аммо невараси Сафар унинг фирт тескариси эли. Қўлига тушган тошу кесак билан аввал шалшангкулок итни, сўнг эгасини сийларди. Жони оғриган Эргаш боди тутокиб кувларди. Бола кочарди. Қоча туриб, мўлжалга беҳато уради. Окибат, Эргаш боди бу хонадонни манглайи гўра холда тарк этарди. Бола ва бўриваччага нисбатан юрагида ададсиз кек сақларди. Негаки, бу ховлида одатдан ташқари ходиса юз берган, яъни хонадонда бўри сақланарди. Кўникумдан йирок ҳол эса гоҳида кишида нафрат хиссини кўзгатади. Эргаш боди мана шу туйғу етовида Ёлдорга озор беришга тиришарди. Унинг ҳимоячисини эса кўрарга кўзи йўқ эди.

— Шошма, ҳали икковингни хам ейман! — дерди мавҳум оҳангда.

Эргаш бодининг кораси ўчиши билан Сафар инга сукилиб кирап, тўрда қалтираб турган Ёлдорни силаб-сийпалар, эркалаб овутар, гоҳо эса алами келиб йиглаб хам оларди. Шу сабаблими Ёлдор унга қаттиқ меҳр кўйганди. Ёнидан бир қадам нари жилмаслигини истарди. Бирок бола бекорчи эмас, унинг ўзига яраша бир талай юмушлари бор эди. Мактаб, ўт-чўп териш, кўй-кўзиларга қарашиб, ишқилиб, уйда қадалиб ўтириши кийин эди. Ёлдор эса унинг қайтишини ҳамиша илҳақ кутарди. Овозини эшитиши билан инидан ўқдек отилиб чикар, бўйнидаги оғир занжирни шилдиратганча ирғишлар, сўнг ер бағирлар, этигини ялар ва тагин ирғишлар, хуллас, муҳаббатини тўлалигича намойиш этишга тиришарди.

Бола унинг томоғига яхши каарди. Ёлдор еганича еб, ортган емишларни ини тўрига кўмид қўярди.

Хозирда тоғда унинг ортган емишлари сакланадиган бир неча хуфия жойлари мавжуд. Шулардан бири мана шу дўнглик ортидаги ўнгир. Ўн кун бурун кўлга туширган ўлжасининг қолган-кутганини ўша ўнгирга бекитиб кўйганди. Кишлок итлари топиб, талон-тарож қилиб кетишибли. Ёвойи табиатнинг ўзгармас, шафкатсиз конун-коидаларига итлар буйсунмайди. Жониворлар томонидан қаттиқ амал қилинадиган худуд масаласига муносабатлари хам шунга яраша. Акс холда Ёлдордек бешафқат жониворнинг худудида бемалол дайдишиб, унга тегишли насибани пок-покиза тушириб кетишмасди.

Ёлдор ҳафтада икки-уч бор бутун худудини айланиб чикаркан, қишлоққа ёндош сарҳадлар итлар томонидан бузилганини сезгач, эски аламлари янгиланиб, улардан боллаб үчини оларди.

Сарварнинг ити Диккиқулоқ айни шу важдан унинг газабига дучор бўлганди.

Сарвар овга ҳамиша итини эргаштириб чиқарди. Ёлдор инсон ҳиди қатори итнинг исиниям туйркан, ғазабдан қалтираб кетарди. Тажрибадан билардики, худудни инсон қавмидан асраш қийин. Аммо манови ит нима килиб юриби унинг мулкида? Ёкимсиз ҳидини бурукситиб, роса тентибди. Тағин белгисини қўйиб кетганига ўласанми. Учдарадаги буқри арча таңасига, сойдаги кулранг харсанг сиртига, ёнбағирликдаги синик сим-ёочга пешобини сочиб кетибди. Ёлдор унинг белгиси устига ўз белгисини қўяди: «Тутсам, ўлдирман! Қорангни кўрмайин бошқа!» Эртаси эса Диккиқулоқ томонидан қолдирилган қуидаги жавобни ўқыйди: «Яхшиси, ўзинг қорангни ўчир! Бу ерга келдим ва яна кела-ман!» Ёлдор қаҳрдан оташ бўлиб ёнади. Аммо ярог тутган эгасининг олдида итга қотинишнинг ҳеч бир иложи йўқ. Натижада, у пайт пойлай бошлади ва эрта сахарларнинг бирида осонгица ниятига етди.

У дўнгликда йиғилиб ўтирган одамлар орасида ўзи ҳакида гап бўлаётгани ва жони гаровга қўйилаётганидан бехабар ҳолда теваракни жимгина кузатиб ётаркан, ички бир сезги билан Маймоқнинг шу яқин атрофда ўралашиб юрганини туйди. Маймоқ олмазорга энишдан аввал Бўрижардаги бутазорга танда қўяди. У ердан тишга босгулик мева-чева қидириб, тезроқ коронги тушишини кутади. Кип эрта келишини сезган айик зоти ҳамиша ошиқади. Қишлоқ уйкусига кетиш олдидан баданидаги ёз захирасини қўпайтирип илинжида емишга зўр беради. Бунақа пайтда юҳо нафсини тоғдаги мевалар билан қондириш мушкул, шунингчун мўл-қўл озиқа қидириб қолади. Агар анови ярамас Ёлдорнинг ғашига тегишини ҳисобга олмаса, олмазор жуда боп жой. Маймоқ ундан зигирча чўчимайди. Чўчимагани боис ҳам ҳар галги йўналишини ҳеч ўзгартирмайди. Бинобарин, бундан бўлак иложи ҳам йўқ. Негаки, одам боласига тегишли худудга доимо пусиб яқинлашмок ва сўнг теваракни обдан ўрганмоқ зарур. Ким бор, ким йўқ дегандай. У шу

ниятда қабрлар оралаб бораркан, чеккадаги чөгроқ қабр тәпасида тұхташга мажбур бұлади. Чунки тела ёқалаң үтган йүлдан нариси олмазор. Үнг панжаси қабр устида, чап панжасини хиёл олдинга чүзганича, олмазорни дикқатла күздан кечира бошлайды. Бунака пайтда барча жониворлар каби күпроқ димогига ишонади.

Күмилган үлжасини кавлаб еяёттан жониворлар ҳаракатини күп кузатған Ёлдор унинг бу қилирини ўзи-ча тушунади. Маймокни қабрга даҳл қилаяпти деб үйлайды. Қабрда эса унинг севикли одами Сафар ётибди...

У Маймок билан бўладиган тунги учрашувни ўйлаб, эзгин овозда ув тортиб юборганини сезмай қолди. Қишлоқ итлари хушёр тортиб, акиллашга тушди. Одамлар эса бу нидога эътибор ҳам беришмади.

Улар Ёлдорнинг вақт-бевакт ув тортишига кўнишиб колишганди...

\* \* \*

Дўнгда ҳануз дилгир чўзилиб ётган Ёлдор итларнинг навбатдаги аккиллапидан хушёр тортди. Кулоқларини диккайтирганча қишлоқ томон тикилди. Кўрдики, қишлоқ ўртасидаги сайхонликда бир гала ит қандайдир суворий ортидан акиллаб келмоқда. Отлик нотаниш шекилли, итлар унга қишлоқ чеккасигача илашиб келди. Сўнг номига бир-икки акиллаб, эран-қарон тарқалиша бошлади.

Итларни кўрган Ёлдорнинг кўзлари ёвузна чақнади. Безовталаниб ўткир тирноқларини ерга ботирди. Бўғиқ ириллади. Қани энди манови ярамас маҳлукларни овлок жойда учратса-ю, бўғизига тиш ботириб, обдан хуморидан чикса. У хар бир итни ўлдирганда қасоснинг totli бир хиссини түярди. Бироқ бу лаҳзага етишиш мушкул, негаки, итлар хеч қачон осонликча тутқич бермасди. Боз устига, унинг қишлоқ оралаганини сезган одамлар варанглатиб ўқ узиб коларди. Узокдан туриб «тишлайдиган» бу яроғдан Ёлдор жуда чўчириди. У яна шуни яхши билардики, бу яроғ яйдоқ жойда хавфли, тоғда эса унинг ёмонлиги кам, истаган бир бута ёки харсанг жонига оро кириши мумкин. Эплад яширина билсанг бўлди. Бунака пайтда унинг ҳид билиш сезгиси

фавқулодда очилиб, ғаними қаерда ва қанча масофада гувранаяпти, барини билиб, англаб туради. Сездирмай узоқлашишга хамиша улгуради. Бошқа жониворлар сингари ваҳимага тушмайди.

Итларга қирон келтираётган бўлса-да, қишлоқда унинг жонига қасд қилувчи кимса йўқ эди. Ҳатто Эргаш боди ҳам бошда бу ўйдан йироқ эди. Қачонки, Ёлдор шалпангкулок итини ўлдириб кетгандан сўнгтина, унинг мавжудлигини, шу атрофда ӯралашиб юрганини ҳис қилди. Итимдан кейин навбат қўйларимга келади шекилли, бу ярамас қўрамни бўшатмагунча тинчмайдиганга ўхшайди, деган хаёлга борди. Бу етмагандек, Суюн чолнинг гапи ҳаммасидан ошиб тушди: «Азоб еган жондор ўша одамдан қасдини олмасдан қўймайди. Буни ҳаётда кўп кўрганман. Шунинг учун олди-ортингизга қараб юринг». Эргаш боди нописанд кулган бўлса-да, юрагига ҳадик оралаган. Унда аввалроқ ўзим тинчита қолай уни, дея енг шимариб ишга киришган.

Аммо Ёлдорни маҳв этиш осон эмасди. Эргаш боди шохида юрса, у баргида харакатланарди. Ана шундай кунлардан бирида улар тасодифан тўқнаш келиб қолдилар. Эргаш боди бу сафар яроғсиз эди, Довонорти қишлоғини жанозага айтиб келаётганди. Фанимлар Килсўкмокнинг юқори қисмida учрашдилар. Килсўкмоқ азалдан Худо қарғаган жойлардан бири ҳисобланади. Пичоқда кесилгандек тик жарлик бетидаги бу сўқмок Довонорти қишлоғини водий билан боғлаб турувчи ягона йўл эди. Икки отлик базўр сиғарли бу йўлдан ҳали одам боласи йиқилиб ўлмаган. Унинг биринчи қурбони Эргаш боди бўлди.

Агар Эргаш боди сўқмоққа хиёл кечикибрөқ етиб келганида ёхуд унинг ўринида бошқа бир кимса бўлганида, фожия юз бермаслити аниқ эди. Негаки, ҳавода терчиган от ҳиди бурқсиб, туёқ товушлари эшитилган захотиёқ Ёлдор изига қайрилганди. Узун сўқмоқни илдам босиб ўтиб, ёнбағирлиқдаги арчазорга шўнғимоқчи эди. Уларни қоҳдан тутириб чиқсан қизғиши харсанг ажратиб турарди. Аввал ғанимининг ҳидини олдими, ё қизиқиши устун чиқдими, ҳархолда жадал куйига энаётган Ёлдор бирдан тўхтади. Бошини буриб, суворийнинг харсанг ортидан чиқиб келишини кута бошлади. Сергак тортган отини қичаб келаётган Эргаш бодига кўзи туш-

гач эса, беихтиёр ириллади. Унинг ўткир нигохи бир зумда кўп нарсани, яъни отнинг ҳуркаётгани-ю эгасининг бепарволигини, энг муҳими, эгар қошида яроқ йўклигини илғаб ултурганди. Фаними бу сафар қуролсиз эди. Шунга қарамай, у, одатига хос, лўкиллаб қочмоққа тушди. Агар Эргаш боди ўзи ва отига далда бериш учун «ҳайт!» деб кичқирмаганида, Ёлдор сўқмоқни адоқлаб, арчазорга бекинмоқчи эди.

Эргаш бодининг ҳадик тўла бу ҳайқириғи ундаги эски аламларни қўзғаб юборди. Айниқса, қуйидаги манзара бор бўйича хотирасида жонланди.

Ўша куни ҳовли кимсасиз эди.

Ёлдор ини ёнида чўзилиб ётарди. Йўлдан ўтиб бораётган Эргаш боди эшикда кулф кўргач тўхтайди. У ёнбу ён қараниб, хунук тиржаяди. Сўнг кетидан эргашиб келаётган шалингкулоқ итини Ёлдорга гиж-гижлайди. Ити ҳамлага ўтиш ўрнига унинг чотига суқилади. Бундан унинг қахри келади. Фингшиётган итини боллаб бир тепади-да, Ёлдор томон юради. Йўл-йўлакай ерда ёттан калтакни кўлига олади.

Ёлдор энди улғайган, кучга тўлган. Аввалгидек инига суқилмайди. Шум ниятда ўзига яқинлашаётган фанимига иррилаганча пешвуз чиқади. Эргаш бодига худди шу нарса керак эди. Ҳали сенми менга ириллайдиган, дея кўлидаги калтакни ишга солади. Аммо тезда калтагини олдириб кўйгач, тош қидиришга тушади. Бўйнидаги занжирни узиш даражасида тортқираб, ўзига томон интилаётган Ёлдорни тошбўрон қилишдан бирор ҳузур топмагач, наридаги қўрадан узун калтак топиб чиқади. Бу орада ҳовли ҳангоматалаб болаларга тўлади. Ёлдор улар орасидан халоскорини бехуда қидиради. Тийрак нигоҳли болани тополмагач, шалоқ сўзлар билан сўкинганча, ўзига калтак кўтарган фанимига ташланади. Орада бўйнини сириб турган занжирига ҳам оғиз солиб кўради...

Агар қўшни чол аралашмаганида, бу иш не натижади билан якунланиши номаълум эди. Қўшни чол Ёлдорни аяб эмас, Толмас чолнинг ҳурмати учунгина орага тушди. Эргаш бодини ҳовлидан ҳайдаб солди.

Эргаш боди сўкина-сўкина узоклашаркан, Ёлдорнинг юрагида ўзига нисбатан касос ўтини баттар аланглатгани ва бир кун келиб, бу ўтда ўзи куйиб адо бўли-

шидан бехабар эди. Кайтамга ўз қилмишидан ғоят мамнун эди.

Пайт топиб, жониворга тирғалишларини кейинчалик хам қўймади.

Мана энди, лўкиллаб кетиб бораётган жойида кескин ортига бурилиб, важоҳатли бир тарзда йўлига кўндаланг бўлган Ёлдорнинг қаршисида танг ахволда қолганди. Изига қайтай деса, тор сўқмоқдан отини ортга қайниш қийин. Боз устига, сакрамокқа шай турган йиртқич ҳар лаҳзада хамла қилиб қолиши мумкин. У яроғсиз чикқан ўзиниям, айни шу кунда қазоси етган қўшниси-ниям гўрига фишт қаларкан, орада тезгина тубсизликка кўз ташлаб олди. Пастга қуласа, тариқдай сочилиб кетишини ўйлади. Бирдан бир қуроли қўлидаги қамчисини маҳкам чангллади, рақибининг ҳаракатларини кузатаркан, унинг нигохига назари тушгач, юраги орқасига тортиб кетди. Ёвузона чакнаётган бу қўзларда узок ва илҳақ кутилган лаҳзага фавқулодда етишганда пайдо бўладиган шундай бир ифода мавжуд эдики, бу ҳолат ўзувларининг ўзидан кўраминг чандон даҳшатлироқ эди.

Эргаш бодининг тагидаги от кўркувдан титраб-қалтираб ортга тисариларди. Кўзлари олайиб, бурун катаклари керилиб кетганди. Туёқлари остидан кўчган тош қуйига учарди. Айни тобда рўпарасидаги йиртқичдан кўра, остидаги отнинг талвасаси хавфлироқ эди. У хар сонияда жарга қулаши мумкин эди. Худди шуни сезгандай, Ёлдор олдинга сакради. От қаттиқ кишинаганча, ўзини ортга ташлади. Юганга ёпишган эгасининг барча уринишлари бесамар кетди. Шўрлик жонивор устидаги суворийси билан жарга қулади.

Кишлоқ ахли бу фожиадан ниманидир сезгандек эсада, Ёлдорни айбловчи топилмади. Қилсўқмоқнинг бўлгани шу – вакт-бевакт курбонлик талаб қилиб туради. Хар йили бу сўқмоқдан нечталаб қўй-қўзилар йиқилиб ўлмайди дейсиз. Чўпонлар барига чидайди, юкори яйловга олиб чиқадиган бошқа йўл бўлмагач, чидамай қаёқка хам боришарди.

Ганими жарга кулагандан сўнг, Ёлдор дарҳол сўқмоқни тарқ этмади. Юз берган бу воқеадан ҳайрон бўлгандек, чўнқайган қўйи жар лабида узок туриб қолди. Сўнг ўзининг мунгли қўшигини бошлаб юборди. Тийрак қўзли болакайни қўмсаб, чўзиб-чўзиб ув тортиди.

У болакайни ўнгидә эмас, тушларида ҳам соғинарди. Яғринида унинг илиқ кафтини хис этиб, фингшиб-фингшиб кўярди ва уйғониб ўзини қўналғаларидан бирида кўярди.

Ёлдорнинг муқим ини йўқ эди. Қўнолғалари эса се-роб эди. Оёғини узатмоқ истаса, ўша қўнолғалардан би-рини танлаб, баҳузур чўзиларди. Бу унга тутқунликдан одат бўлиб қолганди. Зеро, тутқунликда инидан ишонч-лироқ жойнинг ўзи йўқ эди. У ҳам ўзга жониворлардек, қўналғаларини сир тутарди. Чўзилмокни истаса, аввали-га обдан теваракни кузатар ва сўнгтина ором учун яста-нарди. Кўзи илингандә эса, гоҳ итларга таланаётганини, гоҳ болакайнинг силаб-сийпалаётганини туш кўярди. Қисқаси, тутқунликдаги хотиралари уни мудом тинч кўймас, доимо таъқиб этгани этган эди. Болани қўмса-ган кезлари эса чўзиб ув тортар, сўнгсиз бу нидолар унинг дардли «достон»и – алам ва армонлари эди.

Ёлдор бу «достон»ни деярли ҳар тун кўйларди. У ҳануз икки сарҳад ўртасида – кишилик дунёси билан ёввойи олам ўртасида сарсону саргардон кезинарди. Қишлоқни тарқ этолмаганидек, ёввойи олам кўйнига ҳам тўла сингиб кетолмасди.

У қишлоқ итлари томонидан «кузатиб» кўйилган от-лиқни лоқайд кузатаркан, у яқинлашавергач, ўзини па-нага тортди. Бунинг учун хиёлгина чапга сурилиш билан кифояланди, яъни совук шамолда чайкалиб, елкаси-ни сийпалаётган бута новдалари орасига яхшилаб яшириниб олди. Аммо қуидаги сўқмоқ бўйлаб ҳорғин одимлаётган от барибир ҳидини сезди. Қулокларини динг қилиб, кетма-кет пишқирди. Тайсалланди ва бу қилиғи учун серзарда суворий томонидан аччиқ қамчи билан сийланди. Отнинг баданига теккан зарбани Ёлдор ўз танида хис этгандек, ёмон тиришди. Тумшуғини оёқлари орасига суқиб, инграшнамо фингшиди. Ҳайто-вур, суворийга Худо инсоф бериб, отни қамчиласни бас килди. Сўкиниш билан чекланди.

Ёлдорнинг назарида, одам боласининг турган битга-ни шу, салга қўлига эрк беради. Тутқунликда у буни кўп кузатган. Ўзининг ҳовлида сақланиши негадир кўпчиликка унча ёқмас ва шу боис, бобо ва неваранинг кайфияти тез-тез бузилиб туради. Бобо одамларнинг гап-сўзларига майллик билдиради-ю, лекин қайсар не-

варасининг кўнглидан ўтолмасди. Шундай пайтларда гирдини ёмғир ювган супа лабига маҳзун чўкиб қоларди. Аксига олгандай, худди шу лаҳзада кўра бикинида қантариғли кулбет ҳангиники тутиб қоларди. Қулоқни қоматта келтириб, ҳангашга тушарди. Оқибат, чол бор аламини ундан оларди. Халачўп билан роса саваларди.

Лекин у бирон марта ҳам Ёлдорга қотинмаган. Уни бошқалар уришган. Шунинг учунми, милтиқ овозидан ҳам кўра, калтакдан кўпроқ чўчиди. Чўчиди-ю, бироқ қайтмайди...

• • •

Милтиқни елкага осиб, эрмак учун тоғма-тоғ санқиши бошқа-ю маълум бир жониворнинг изидан тушиш бошқалигини Сарвар биринчи куниёқ англаб етганди.

Одатда, ов кишига бир олам завқ бағишлийди. Бирор ўлжани қўлга киритсанг-киритмасанг, уззукун шу туйғу измида харакатланасан. Ҳориш нелигинӣ билмайсан. Бироқ мақсад аниқлик касб этса, бу хисни ортиқ туймайсан. Жонсаракланасан, пойлайсан, юрасан, қидирасан ва ўлжант тутқич бермагани сари, фиғонинг қўкка ўрлаб, фазаб отига минасан. Ов ўзининг одатий сир-синоатини йўқотиб, ўта ёқимсиз бир юмушга айланганини сезасан.

Агар ўша куни Шойим йўрон билан гаров ўйнамаганида, Сарвар бу ишдан аллақачон воз кечган ва ҳатто ичган қасаминиям унтиб юборган бўларди. Аслида барига бодилиги айбдор. Шу феъли туфайли ҳамиша йўқ ердаги ғавғолар билан бошини оғритиб юради. Ўшандаям кутилмагандага бодилиги хуруж қилиб қолди. Пули билан мақтангиси келди. Аммо у куттган ҳодиса юз бермади. Қўлидаги пулга қайрилиб қаровчи бўлмади. Сездики, овозидаги кибр охангига ёқмади уларга. Бундан хижолат тортмади, қайтамга ич-ичидан истеҳзоли кулди. Худди бир вақтлар уйида мардикорчилик қилган талаба йигитнинг устидан кулгандай кулди.

Ўшанда талаба йигит ғалати гап қилган. «Ака, хафа бўлманг-у, шу-у, сизларда ҳайрат этишмайди. Ҳамма нарсани аниқ ўлчам ва ҳолатда кўрасизлар. Болаларингиз эртакка, ўзингиз афсонага ишонмайсиз. Аниқлик рухни ўлдиради, афсона эса руҳга чексиз парвоз бағиши-

лайди. Айни шу рух етишмайды сизда...» Сарвар ис-техзоли табассум билан чекланмаган, ўзича гап билан узиб олган: «Афсонага ишонганингдан мардикорчилик килиб юрибсан-да!» Талаба, сизга гапириш бефойда, дегандай бошини эгган, сўнг манглайнини қашлаб, янги ту-шаётган кўшиқаватли иморатга, ҳовлини кенгайтириш мақсадида чопиб ташланган дараҳтларга, иккинчи қаватга олиб чиқадиган нақшинкор зинапояга берилиб гул чизаётган кекса устага бир-бир боқаркан, ўйчан ни-гоҳини яна уй эгасига қадаган. Ачининини ёлтирмаган. Бу ҳолатдан Сарвар ҳанг-манг туриб қолган. Кизиқ, юпун бир талаба унга ачиняптими?

Нима учун?

Бироқ бу хил майда-чуйдалар устида бош қотиришга кўниммагани учун сабабини сўрамаган. Назарида, бажа-риши лозим бўлган юмушлари шу қадар кўп эдики, бирлаҳзага чалғиши мумкин эмасдек эди. Лекин дард дега-ни ёмон экан, ҳар қандай орзу ҳавасинг ва бу йўлда ти-нимсиз елиб-югуришларинг бир чақага қиммат экан. Худди шуни сезгандай, табиб чол гапнинг лўндасини айтди-кўйди.

— Жон керак бўлса, дардга безътибор қарамант, — деди ортиқ эзмаланимай. — Манови дамламани канда килмай ичиб туринг. Тоғдаги бодомзор ҳавосидан нафас олинг. Баҳор ёки ёзни кутиб турмай, ҳозироқ жўнанг! Худо хоҳласа хеч нарса кўрмагандай бўлиб кетасиз.

Дўхтирлардан унча наф кўрмаган Сарвар табиб чол-нинг айтганига кўнди. Таваккал дея тоққа келди. Кел-ганда ҳам дардманд киши сифатида эмас, яроғиу овчи или Диқкикулօқ билан келди. Келибок шуни билдики, бу ерда қўй-қўзилар жуда арzon экан. Узоқ ўйлаб тур-май, кишилардан бир талай жонлик харид килди. Ол-ғанлари чоғроққина бир сурув бўлди. Агар томогига жиндек яхши қаралса, ҳар бир жонлиги шаҳарда бирга уч ташлаб турибди-да. Мана фойда каерда!

Энди эса ўша «фойда» ҳавф остида колганди. Ёл-дорни айтилган муддатда тинчитмаса, сурувни қўш-қўллаб Шойим йўғонга топширишига тўрри келади. Агар ютса... Аммо ҳамма бало шундаки, Ёлдор деганла-ри анойи жониворлардан эмас экан. Худонинг балоси, қидирганингда йўқолиб, қидирмаганингда қаршингдан чиқиб туради, худди калака қилаётгандай.

Бу етмагандек, окшомлари Фуччи пакана ярасига туз сепгани сепган эди. Дердики, бугун уни ўтовлисойда кўрдим. Ўша куни Сарвар Тошлисойда тентиган бўла-ди. Эртаси умид билан ўтовлисойга борса, Ёлдорни бу-тунлай бошқа бир манзилда кўришганини айтишади.

У Фуччи пакана усталик билан қовурган этдан бир бўлагини оғзига соларкан, хуноби ошганиданми, иш-таҳаси йўқолганини сезади. Шишадан ўзига арок куяди.

— Эллик граммдан оширмайман дегандингиз-ку, aka, — дейди Фуччи пакана унинг бу қилиғидан ажабла-ниб.

— Негадир юрагим сикилиб кетаяпти, — дейди Сар-вар нафсини тийишга тиришиб. — Шаҳарда буни яшик-лаб ичардик.

— Шунинг учун ҳам товга даво қидириб кеп ўтириб-сиз-да...

Сарвар олдидағи ароқ тўла пиёлани истар-истамас нари суради. Фуччи пакана худди шуни кутиб турган-дай, пиёладагйни лиққа ютади. Чаниллатиб эт чайнай-ди. Бугун сурувни яхши ўтлоқда бокқанини айтиб мақтанади. Эртанги режаларини билдиради. Сарварнинг эса қулогига гап кирмайди. Унинг овқат ейишини ҳавас-ланиб кузатади. Бу темирниям ҳазм қилиб юборса ке-рак, деб ўйлайди. Сўнг хаёли яна Ёлдорга оғиб, кайфи-яти баттар тундлашади. Беихтиёр шишага қўл чўзади...

Мана шундай окшомлардан бирида Фуччи пакана Ёлдорга хиёнат қилди. Унинг айрим тунлари Коратепа-га келиб туришини оғзидан гуллаб қўйди. Атай эмас, шунчаки бефаросатлик қилди. Холбуки, кишлок ахли буни Сарвардан сир тутишганди. У эса оғзини тўлдириб сотди. Барига Сарварнинг бўри ҳақидаги айрим ҳанго-маларига ишонмаслиги сабаб бўлди. Ўзига ортиқ дара-жада бино қўйган бу одамнинг осмонга қараб қах-қах отиши Фуччи пакананинг нафсониятига тегди. Қизишиб, андак тутакиб, ўзи гувоҳ бўлган бир воқеани сўзлаб берди. Ҳар икки гапнинг бирида, биз бандалар шу жон-дорча эмасмиз, дея таъкидлаб турди.

Бола жон берган тунда Фуччи пакана Толмас чолни-кида эди. Чол уни факир ва хокисорлиги учун яхши кўрарди. Келса, иззатини киларди.

Ўша тунда Ёлдор қаттиқ безовталанади. Фингшийди, инграйди ва увлаб оламни бузади. Толмас чол ундан

йиртқични занжирдан бүшатишини сұрайди. Майли, кетса кетсин, дейди. Бирок занжирдан бүшатилган Ёлдор хеч қаёққа кетмайды. Фуччи пакана қутгандек, тун қүйніга сингиб йүколмайды. Тұғри бола ётган хонага кириб боради. Беморни тевараклаб үтирганларни лол қолдириб, боланинг бөш томонига үтиб чүнқаяди. Юзига термулганча туриб қолади.

Сахарга яқин боланинг жони узилгач, уни уйдан ҳайдаб чиқардиларми ё үзи кетдими, Фуччи пакана буни эслаәлмайды. Аммо боланинг тобути ердан құтарилиши олдидан яна ховлида пайдо бүлади. Сомонхона девори ёнида чүнқайиб, күзларидан дув-дув ёш түкади. Буни Фуччи пакана күрмаган, эшитган. У икки үйгитни қаватига олиб қабр қавлагани кетганди. Дағы маросими пайтида Ёлдорни мозор яқинида күрганни чин. Жонивор әзгин бир холатда кишиларнинг хатти-харакатларини синчковлик билан кузатиб турған.

Кишлоқ ахлининг юрагини ўртаган иккінчи ҳодисасал кейин юз берди. Тупрок йўлдан ғамғин одимлашаётган одамлар ортдан эшитилган хазин нидодан ажабланыб, хушёр тортишади. Бунақа пайтда ортга, Коратепага қайрилиб қарашиб таомилга тұғри келмаса-да, ҳамма изига ўғирилишга мажбур бүлади. Қарашсаки, янги қабр бошида Ёлгор күкка түмшук чўзганча, хазин ув тортмоқда. У шу қадар мунгли ув тортадики, юракнинг бардош бермоги қийин эди.

Одамлар орасида боши эгик бораётган Толмас чол ортиқ чидаәлмайды. Ўкраб юборади. Қоратепада Ёлдор, тупрок йўлда Толмас чол басма-бас «ув» тортмоққа тушадилар.

Ҳамма шошиб қолади.

Мижжалар ёшланади.

Толмас чолға қийин эди. Кимсасиз қолғанди у. Ёлғиз ўғлидан ёлғиз ёлғор бўлмиш невараисидан жудо бўлган чол айтиб-айтиб йиғлайди хадемай қаватингта бораман, қутгил мени, болам, болажоним, дея бўзлайди.

Ҳақиқатан у узок кутдирмади. Боланинг кирки үтиб-үтмай, бу дунёни тарқ этди.

Чол дағы қилинган куниям Ёлдор туни билан Қоратепада увлаб чиқли.

Фуччи пакана бунинг барига гувоҳ эди. Ҳаммасини била туриб, Ёлдорнинг Қоратепага келиб туришини ет-

ти ёт бегонага айтиб күйди. Сүнг эса шоша-пиша хатосини тұғрилашга уринди.

— Лекин Қоратепада үқ отмайдилар. Гунох бўлади!

Сарвар у тўлкинланиб ҳикоя қилган воқеани лоқайд әшиитди. Аммо Ёлдорнинг Қоратепага келиб туришини эътиборидан кочирмади. Фуччи пакананинг кейинги гапидан эса кутуриб бақириб юборди. Фуччи пакана хокисор, бироқ анчагина ориятли эди.

— Нимага менга бақирасиз?! — деди кўзларини чакчайтириб. — Мен сизга хизматкор эмас, укаман! Сиздан ука сифатида илтимос қиласяпман. Отманг шуни! Юраверсин ўз майлида. Тўрт-беш итни ўлдирган билан қишлоқда кучук камайиб қолармиди. Эртан Шойим йўроннинг олдига ўтаман. Гаровингдан кеч дейман! Ёлдор бизга бегона эмас дейман!

— Кечмаса-чи!

— Кечмаса, ўлдирман уни! — Фуччи пакана муштини дўлайтириб, мастона чайқалади. — Аслида у одам эмас, ёшлигига гунохни кўп қилган дейишади. Ҳозир ҳам одам боласига қайишмайди. Тўғри сўзида туради, берган ваъдасини бажаради. Шунга қарамай, барибир инсон эмас у. Қачон қараманг, қовоини осиб юради. Эртан бориб, гаровдан кеч, дейман! Кечмасанг ўлдирман дейман!

Сарвар қизлардан ҳеч омади чопмаган бу одамчанинг бехуда чиранишларидан ичидагуларкан, унинг по-пугини пасайтириш учун нозик гап қилди.

— Унда мен топган қиз ҳали-бери эрга теголмас экан-да.

— Нима деганингиз бу, ака? — Фуччи пакана хушёр тортди.

— Галингизга караганда, уйланиш ниятингиз йўққа ўхшайди.

— Э, йўқ, эртагаёқ уйланишга тайёрман, — Фуччи пакананинг овози қалтираб кетади. — Мен тенгилар учтўрт боланинг отаси бўлди! Мен юрибман итнинг орка оёғи бўлиб. Бу ёғига бир акалик қилинг. Бутун умидим сиздан, акажон! Бу дунёдан хотин қуммай ўтиб кетмайлик.

— Мен сизга тушунмай қолдим, — Сарвар ажабланган киши бўлади. — Бир уйланаман дейсиз, бир Шойим йўғонни ўлдирман дейсиз, қайси бирига ишонай?

— Уни ўлдириш менга не зарил, кайфда одам нималар демайди, ака.

— Унда бу йўлда Ёлдорни курбон қиласиз.

— Қандай килиб?

— Коратепада отиб ўлдирамиз.

— Эл нима дейди?

— Тунда бирор билиб ўтирибдими?

— Гуноҳдан кўркаман, ака!

— Мен отаман, сиз шунчаки ёнимда бўласиз.

— Тунда мозордан қўрқасизми?

— Ҳархолда...

— Мен ҳам кўрқаман!

— Ёрнинг васлига етишмоқ учун одам ҳеч нарсадан қайтмаслиги керак.

— Тўғриси, Ёлдорга ачинаяпман! — Гуччи пакана хомуш тортади. — Кейинги кунларда ёмон ачинаяпман.

— Гаровда ютқизсам, ким менга ачинади?

— Ҳалитдан юрагим увущиб кетаяпти лекин...

— Жононга етишсангиз, хаммаси эсдан чиқиб кетади.

— Қиз-қиз деб тоза жонимни оляяпсиз!

— Жон оладиган хурликода улар, — Сарвар овозига сирли тус беради. — Битта эмас, ўнта жонни тикишга арзиди.

— Шунчалик зўрми?

Сарвар бу гапга эътибор бермаган киши бўлиб, иддао килишга ўтади:

— Сиз эса Ёлдорга ачинаман дейсиз. Биз отмасак, эрта бир кун барибир бошқа бирор ўлдириб кетади.

— Шунчалик зўрми, а, ака?! — Гуччи пакана унинг гапига эътибор бермай, баттар типирчилайди.

— О-о! — Сарвар кўзларини юмиб, бошини сарак-сарак қиласиди. — Сутга чайилгандай бари. Танлаб-танлаб олаверасиз.

— Ўҳ-ҳ, ўлиб қоламан ҳозир! — Гуччи пакана қалтираб дастурхон четидаги шишани кўлига олади. — Юз грамм ичмасам, юрагим тарс ёрилиб кетади! Бари сутга чайилгандай денг?! Вой, аками-ий, сиз учун ундай жондорларнинг ўнтасини курбон қилиб юборамиз! Сизгаям қуяйми? Озгина, кўп эмас, озгина. Эрган қаватингизда бўламан. Унинг каердан кеп, қаерга кетишини яхши биламан. Доим боланинг қабри төйасига келиб кетади.

Түгри айтасиз, биз отмасак, барибир бошқа бирор үлдиди. Шунинг учун кўзни чирт юмамиз! Кўзни чирт юмиб... Кейин эса уни иззат-икром билан кўмамиз!

— Ҳа, унга аза тутамиз, — Сарвар кафти билан қаншарини қашлаган бўлиб, мийигида илжаяди.

Гуччи йакана калака бўлаётганини сезмай, бу гапни кизғин маъқуллайди. Сўнг Ёлдор ҳакидаги гурунг яна кизларга уланиб, Сарвар йигитни энтикитирувчи ёлғоняшиқ таассуротларга эрк беради. Гуччи пакана эса болишини кучоқлаб, туни билан ухлаёлмай чиқади.

\* \* \*

Маймоқнинг навбатдаги ташрифи бўлмаганида, Ёлдор бугун Қоратепага энишни хаёлига хам келтирмaganди. Нега деганда, шусиз хам ташвишлари етиб ортарди. Пешинда Яшилдараорти бўрилар галасининг хидини олганидан бери, ўзини қўярга жой тополмай колганди.

Мудом кўчиб юрувчи бу тўдани эски ғаними Бўзбўри бошқаради. Шарқдан кўзғалган изғирин олиб келган бу хидни туйган Ёлдор дастлаб таажжубланди. Кейин сергак тортади. Ҳаводаги исга қараб, гала аллақачон унга қарашли ҳудудга қадам қўйгани ва лаллайиб ўтираверса, улар янада ҳадларидан ошишлари мумкинлигини фаҳмлади. У бирдан қутуриб кетади. Тирнокларини ерга ботириб, вахшатли ириллайди. Бу билан қаноатланмай, арча танасини тимталайди: Сўнг арча тубига пешобини сочиб, шарққа интилади.

Худуд учун кураш ҳеч қачон осон кечмаган. Худуд эгаси ё ғолиб, ё мағлуб бўлиши керак. Шунингдек, учинчи йўли хам бор. Бу — хўрлик. Аммо хўрлик билан ўлим ораси ҳамиша бир одим. Ёлдор хўрлик қурбонига айланиб, ҳаётдан эрта кўз юмган жониворларни кўп кўрган. Ўзига қолса, хўрликдан ўлим минг марта афзал. Одатда, кучи танига сиғмайдиган ёвкур жониворлар доимо икки йўлдан бирини танлайди. Улар учун учинчи йўл йўқ.

У сойлардан сакраб, арчазорлардан қуюндай учиб, ҳудудининг шарқий чегараси ҳисобланмиш тор яланглика етиб келганда, ҳануз ғазабдан кутурмокда эди. Ураган қорани бурдалаш важоҳатида эди. У итлар ка-

би қаҳрга эрк бериб, бўриларга хос викор ва совукконликни бутунлай унтиб қўйганди. Бу яхшилик аломати эмасди. Негаки, ғазаб кучни киркиб, ақл-идрокка панд беради. Конли тўқнашувларда эса куч қатори, идрок ҳамиша мухим рол ўйнайди.

Бироқ бунда Ёлдорни кўпда айблаб бўлмасди.

У тутқунликда не балоларни бошидан кечирмади. Кимлар унинг ғашига тегмади. Ўтган ҳам котинган, қайтган ҳам. Окибат, у итлардек серзарда маҳлукка айланганди. Итлардан фарқли жихати, кўринган қорага ириллайвермайди. Инида тинчгина ётишни ўйларди. Бироқ уни ўз холига қўйишмасди. Эндинана баҳузур чўзилганда, бўйнидаги занжирнинг ташқарида қолган қисми шилдираб, кимдир уни тишга торта бошларди. У муроса илинжида аста ириллайди: «Тинчимга кўйсангчи!» Бунга жавобан эрмакталаб кимса баттар иршанглайди. Бўйнидаги тасма томоғини бўға бошлагач, у таҳдили ириллайди: «Чиқсан, чатоғингни чиқараман! Ғашимга тегма кўп!» Бу ифодани барча жониворлар, ҳатто энг калтафаҳм ит ҳам илғаши мумкин. Лекин одамзод ундан маънони хеч қачон тушуунмайди. Ёлдор инидан бошини чиқарипши билан ура қочишишнингина билади. Баъзилари ортиқ тирғалмай, дарров кета қолади. Айримлари эса наридан туриб тошбўрон қилишга тушади. Ёлдор тумшуғи, яғрини ва биқинига келиб тушаётган зарбдан чинакамига қутуради. Худди қопаён итлардек олға сапчиди. Бурдалаш қасдида тўлғонади.

Бу хил қотинишлар туфайли ундан бўриларга хос табиий викорга путур етганди. Итлардек жиззаки бир маҳлукка айланганди. Аммо тинч пайтларида яна аслига қайтарди. Тунлари юлдуз тўла осмонга бокқанча, хазин ва мунгли қўшигини бошлаб юборарди.

Бундай вактларда у оламни унтарди. Хаёлан тоғларда эркин чопқиллаб юрарди.

Холбуки, тоғларда эмин-эркин чопқиллаб юриш унга насиб этмаган. Кўз очиб кўргани оғзи тор, тўри кенг ўнгир бўлган. Ўнгирда ўзидан бўлак яна тўртта оға-иниси бор эди. Бари бир-биридан ўзик эди. Ёруғ оламга, яъни ташки дунёга биринчи бўлиб у интилган. Кўзлари қуёш нуридан қамашиб, бир зумга гаранг туриб қолган. Оламда хидлар кўплигини шунда англаған. Шабадада чайқалаётган бута новдасига, харсангтош устидан

йүрғалаб бораётган какликка лолу хайрон тикилиб турғанида, қаердан дир онаси пайдо бўлган. Елкасидан беозор тишлаб қоронғи инига олиб кирган. Онасининг бу харакатида у таҳлиқага ўхшаш нимадир сезган. Айрим пайтларда ота бўрида ҳам шу нарсани хис этиш мумкин эди. Бу эса унинг жимитдек юрагида ташки оламга нисбатан кизиқишини янада кучайтиради. Ҳуллас, куёшли оламни кўришга улгурган Ёлдор шу қундан эътиборан инида тинч ўтиромай қолди. Бир куни ўнгирдан анча узоклашиб кетди.

Оғзи қалин бута билан ихоталангандан ўнгир қуюқ арчазор дўнгликда жойлашганди. Дўнглик пасти тошлок сайдонлик бўлиб, сайдонликдан сўнг яна арчазор бошланарди. Арчазорда ёввойи жониворлар юришидан ҳосил бўлган чалкаш сўқмоқлар сероб эди. Ёлдор ана шундай сўқмоқлардан бирига тушиб қолиб, пилдираганча боши оққан томонга кета бошлайди. Бу камдек, у йўлда какликлардан бирига алаҳсийди. Каклик қулоқлари диккайган бу беўхшов жониворни ҳийла ергача эргаштириб бориб, бирдан учади кетади. Ёлдор анқайганча қолаверади.

У адашиб қолганини кейин сезиб, ғингшимоққа тушади. Тумшукчасини олдинга чўзиб, таниш ва қадрдан хидларни қидиради. Онасининг иликкина қучогини шу қадар кўмсадиди, юраги ториққанидан зорли овозда ингиллаб юборади. Худди шу пайт ўнгир тарафда нимадир кетма-кет қарсиллади. Сўнг ўлик сукунат чўкади. Кўркувдан ўзини арча пайига урган Ёлдор тошдек қотади. Кимиirlаса яна нимадир юз берадигандек, ҳатто кўзларини очишдан ҳайиқади. Салдан сўнг гумбурлаган овоздан эса ўтакаси ёрилиш даражасига етади. Умрида эшифтмаган бу садодан тоғлар қалдираб, арча танаси титраб кетганини сезади.

Даҳшатдан арча пайига капишган Ёлдор шу созда қанча ётди билмайди. Лекин дунёда кўркувдан ҳам кучлироқ шундай бир нарса бор элики, у хар қандай тирик жонни харакатлантирмасдан кўймасди. Бунинг оти очлик эди. У очликка тоқат қилолмай, биқинган жойидан аста чикади. Дуч келган сўқмоққа тушиб, пилдираб кета бошлайди. Бир оздан сўнг шарпани сезиб, ўзини товатош панасига олади. Бироқ шарпа — Сафар уни аллақачон пайқаб улгурганди...

Мана шу тарзда Ёлдор тоғлардан айро тушади. Одам боласининг асирига айланади. Ота-онаси ва ўнгирдаги оға-иниларининг тақдири не кечганидан бехабар қолаверади.

Аслида воқса бундай бўлганди. Ўнгирдаги жониворларни пайкаб қолган чўпонлар катта бўриларни отиб тапилаб, уяни портлатиб юборишганди. Куйидарада ўралашиб юрган геологлар бир қўзи учун улардан портлатгичларини аямаган.

Шу тариқа, эсини таниб-танимай, унинг кўргани де-ворсиз ховли, ётоғи кўпол тахталардан наридан-бери ясалган кенггина ин бўлди.

У туткунликда зохирان ўзлигини йўқотгандай эсада, ботинан аслича қолганди. Негаки, у ўз вактида тоғларга даҳшат солган кекса бўри Оқтишнинг зурриёти эди. Унга ота бўрининг куч-кудрати, зийраклиги ва ёвқур табиати мерос бўлиб ўтганди. Шунинг учун Ёлдорнинг ичиди доим бир қуюн ўйнарди. Бу қуюн уни тоғу тошларга ундар, кўнглида адоксиз ва англарсиз туйгуларни уйғотарди. Ойсиз тунлари кўкка бокиб увларкан юрагида кечаётган бу хисларни тушунолмай гарант бўларди. У кундузлари бир оз тинчланар, тунда эса бари яна қайтадан бошланарди.

У тунда бу оламга сифмай қоларди.

Ёлдор тор ялангликка итдай ғазабкор важоҳатда етиб келаркан, табиий идрок барибир устуворлик килди. Қаҳрга эрк бериб, катта хатога йўл қўйганини англаб етгандай, ҳайратли даражада осойишталик билан теваракни ўргана бошлади. Тўда бу ерда каттакон тўнғизни тинчтиб, изига қайтмай, қўшни худудга ўтиб кетганини тезда аниқлади. Ёлдор қўшни худуд эгаси Кулбет бўрини яхши танийди. Чоғрок тўдани бошқарадиган бу жониворнинг яхши одати, ўзгалар мулкига ҳадеганда сукилавермайди. Шунингдек, ўз еритга қадам кўйганларни аяб ўтирмайди. Бўзбўри тўдаси эса унинг акси, тоғ колиб, кенг даштга ҳам энишади. Доим ҳаммадан дакки еб юришади.

Ёлдор йўқолиб улгурмаган хидлар орасидан Бўзбўрининг таниш исини учратмади. Бундан чиқди, тўдани ўзга бўри бошқармокда эканда. Кўп ўтмай у бунга тўла амин бўлди. Нотаниш тўда бошлиғи кулранг харсанг сиртига ўз белгисини қолдириб кетган экан.

Белги, одатда, турлича маънони ифодалайди. Ҳудудга даъвогарлик, тажовузкорлик, нописандлик ва ҳатто мазахли белгиларгача бўлади. Белгисига қараб, жониворнинг неларга қодирлигини аниқлаш кийин. Аммо нописанд белги эгаси кўпинча ахмок, ўпкаси йўқ жонивор бўлиб чиқади. У тахминан мана шундай белги қолдиради: «Хозирча шошиб турибман, лекин албатта қайтаман!» Ҳақиқатдан у қайтади. Лекин то қайтгунча ҳудуд эгасининг қонига ташна килиб юборади.

Ёлдор харсанг сиртига боплаб ўз жавоб белгисини қолдирган бўлса-да, бундан кўнгли тариқча таскин топмади. У яхши биладики, рақиби билан қонли тўқнашув юз бермагунча, ҳаловат топиши мушкүл. Аммо ҳамма гап шундаки, у билан қачон учрашади?

Эртами ё индингами?

Балки бирор соатлардан сўнгdir?

Фолиб бўладими ё мағлуб?

Айни шу мавхумлик Ёлдорни қийнаб юборганди. У кун бўйи шунинг таъсирида юрди. Сўнг суюкли масканларидан бири, қишлоқ яқинидаги ўша сийрак арчали дўнгликда кўним топди.

Худуди кенг бўлса-да, у бўш вақтининг кўп қисмини мана шу дўнгликда ўтказарди. Қишлоқни қоралаб яшарди. Бўзбўри галасини довонортига қувиб, улкан ҳудудга аллақачон эга чиққан эса-да, ҳануз қишлоқдан узоқлашиб кетолмасди. Қишлоққа ўз мулкидек қарамаса-да, ҳадди сиғиб уни бемалол ораларди. Ораламаган тунлари кам бўларди. Ораларкан, тутқунлик даври ўтган ҳовлига албатта бош суқиб ўтарди. Эшик ва деразалари зич ёпик кимсасиз кулба теварагини узоқ айланарди. Боланинг изларини қўмсаб, ичдан нола тортарди. Бу ерда ҳамма нарса ўз ҳолича сақланган, фақат ини ўғирлаб кетилганди. Ўғрилар бир тун эшик ва деразаларни хам қўпориб кетишмоқчи бўлишган, бироқ ҳовлида Ёлдорга дуч келишиб, жуфтакни ростлашган. Қишлоқда, Ёлдор туни билан кулбани кўриқлаб чиқаркан, деган ганини тарқатишган. Бу гапга кимдир ишонди, кимдир йўқ, аммо текшириб кўрувчи бирор мард топилмади. Қишлоқ итлари эса унинг шарпасини илғаши билан ин-инларига уриб кетади. Ҳатто баъзида овоз чиқаришга ярамайди.

Ёлдорнинг қишлоқ оралашидан боҳабар кимсалар, унинг бу хил ташрифларини фавқулодда ҳодиса деб билашмайди. Уларнинг бирдан-бир билганлари, Ёлдор туткунликдан ҳалос бўлди-ю, қишлоққа ўзга бўрилар доримай қўйди. Бироқ бундан одамларни миннатдор деб бўлмасди. Улар учун Ёлдор шунчаки бир бўри ва муносабатлари ҳам шунга яраша эди: «Жондор зоти ҳеч қачон қишига эл бўлмайди, хушёр турмасанг, кўзингни ўйиб кетиши мумкин». Ёлдорнинг эса бу гаплар билан иши йўқ, ёввойи олам қонунига бўйсуниб яшарди. У ёввойи оламга ҳуркак жонивор сифатида эмас, ёвқур бир маҳлукот сифатида кириб келди. Бўзбўри унинг рафторида ўта ҳавфли бир ракибни кўради ва боллаб таъзирини бериб қўйишни истайди. Бундан сал аввал бу ҳудуднинг ҳақиқий эгаси Яассибошнинг тавбасига таянтирганди. Яассибош бу ўлкага қанжиги Оқсийна билан ҳукмронлик қиласди.

Агар Бўзбўри Оқсийнага даҳл қилмаганида, Яассибош бу тизгиниз тўдага рўбарў келиб ўтирасди. Нари борса, одатдагидек, ўзини қўрмаганга оларди. Негаки, Бўзбўри тўдаси бирор ҳудуд этагини муким тутмаган, нуқул кўчиб юради. Қишилласида даштга эниб, бу томонларда кун илиш олдидан пайдо бўларди. Баъзи йиллари эса даштни унутиб, Довонортида қишлиб қоларди. Бу энди дашт бўриларига қандай жониворнинг етакчилик қилишига боғлиқ эди. Қискаси, Бўзбўри зўрлардан «калтак еб», бундайроқларни танобини тортиб юрадиган жонивор эди. Яассибошни шунчаки талабгина қўя колмай, уни қанжигига кўшиб, торнинг жанубий қисмидаги серқишлоқ ҳудуд томонга хайдади. Бироқ унинг бу зўравонлиги Ёлдорга ўтмади. Ёлдор ҳавфли ракиблигини бирпасда намойиш этиб, бутун тўдани тирқиратиб юборди. Кейинги учрашувда эса уларни бутунлай Довонортига суриб ташлади.

Ёлдор табиатан ўта зийрак ва эҳтиёткор жонивор. Синалмаган ракиби олдида ҳеч қачон ҳаволаниб кетмайди. Айrim кезлари туйқусдан тутиб қоладиган итларга хос жizzаки феълинин ҳисобга олмаганда, қолган пайт ҳар қандай вазиятда совуқкон бўлишга тиришади. Ҳовлиқмайди. Рақибининг заиф жиҳатларини илғашга уринади. Биринчи бўлиб ҳужумга ташланмайди. Агар бунга зарурият туғилса, энг аввало тўдадаги «зўр»ларни саф-

дан чиқаришга ҳаракат қиласы. Тұдаға эса «зұр»лар унча күп бўлмайди, битта ёки иккита. «Зұр» мағлубликка юз тутиши билан, қолганлари ўз-ўзидан түзиб кетади.

У Бўзбўри тўдасини мана шу хилда пароканда қилганди.

Хозир эса бутун фикр-ўйи харсанг сиртига ўз белгисини қолдиришга журъят этган ўша нотаниш тўдабошида эди. У кун бўйи хаёлидан кетмай қолганди. Унинг Бўзбўрига нисбатан ёш ва бақувватлигини идрок этаётган бўлса-да, келбатини жонлантиrolмай гарант эди. Бунга гўё Маймоқнинг мавжудлиги ҳалакит бераёттандек эди.

Ёлдор бу томонга келаётib, Маймоқни Чукурдарадаги бутазорда ғимирлаб юрганини кўрганди. Демак, у бугун тунда яна Коратепага ўралашади. Ёлдор унинг қай тарафга йўналишига қарабоқ, мақсадини англайдиган бўлиб қолганди. Дейлик, агар Маймоқ Сувлидара ёхуд Яшилводий бўйлаб ҳаракатланса, уни фақат юкоридаги арчазорда учратиш мумкин. Белгиларини янгилаб, ҳудудини кўздан кечириш билан банд бўлади. Негаки, арчазор ўта нотинч сарҳад — Улкан айик томонидан тез-тез бузилиб туради... Кўтирибулоқ йўналиши зирк тўла Айриирмок бўйларига олиб чиққандай, Туяқоя бағри ўзининг мазали ёнғоқлари билан Маймоқнинг дикқатини тортади. Қишлоқ томон чўзилган узундан-узун, вахимали Чукурдара бўйлаб қилинган сафари эса олмазорда қорин тўйдириш билан якунланади. Чукурдара турли мевалар унчалик сероб эмас, лекин тишга босгулик бирор емиш ҳамиша топилади. Агар истаса, созтупрокли ўнгирда бир оз оёқ узатиб олиши мумкин. Колган ишларни эса тун қоронғисида бемалол эплайверади.

Ёлдор унинг бу ҳаракатини ўзича тушунади. Фақат Маймоқ аллақандай Бўзбўри эмас, хар тўқнашганда жуда хушёр бўлиш лозим. Акс ҳолда...

У Чукурдарага туташ Бўрижарда Маймоқнинг шарпасини илғаганида, тун аллақачон яримлаганди. Ёлдор аста ўрнидан қўзғалди. Хузур қилиб, узоқ керишди. Сўнг эса аста йўртиб, Коратепа томон йўлга тушди.

• • •

Ёлдор хавфли хид — инсон ва яроғ исини Қоратепа-  
га етмасдан бурун сезди. Ёзда тупроғи ўйнаб ётадиган  
Калтатепа ёқалаб бориб, Қоратепа этагидаги тошлоқда  
тұхтаркан, димоғига қалинган бу хиддан яғрин туклари  
хурпайғанча туриб қолди. Аммо изига кайтмокни хаёли-  
га ҳам келтирмади. Кайтага тошлар орасига чўзилиб  
ётиб олди. Тумшуғини олдинга чўзганча, теваракни об-  
дан ўрганишга киришди. Ва бир оздан сўнг Қоратепа-  
нинг олмазорга туташ қисмида ажал яшириллигини тӯла  
англаб етди. Милтиқ иси — ажалдан дарак. Тоғда ун-  
дан чўчимайдиган жон зотининг ўзи йўқ. Ҳатто Май-  
мокдек кучли, анчайин сурбет жонивор ҳам яроғ хидини  
илғаши билан ювош тортиб, йўргалаганча корасини ўчи-  
ради. Ҳархолда милтиқ тутган кимсадан доимо узоқрок  
юриш маъқуллигини тоғдаги барча жониворлар яхши  
билади.

Ажал ҳидининг кутилмаганда Қоратепада пайдо  
бўлиши дастлаб Ёлдорни чўчитди, сўнг таажжублантир-  
ди. Кейин эса қизиқтириб қўйди. Ахир шу пайтгача  
Қоратепада бу хидга ҳеч рўбарў келмаганди-да. Бу сир-  
нинг тагига етмоқ учун у кутишга қарор қилди. Билади-  
ки, одам боласининг бардоши узоққа чўзилмайди. Ҳаде-  
май ўзидан огоҳ этади:

У тутқунликда одамзоднинг феълини хийла ўрган-  
ганди. Уни ўзига даҳшатли ғаним деб билмасди. Лекин  
яроғнинг йўриғи бўлак. Яроғ тутган одам... Эсласа,  
хануз танаси тиришади.

Толмас чолнинг ён қўшниси Улаш бир куни унга  
дабдурустдан милтиқ ўқталиб қолди. Кайфининг зўрли-  
гидан зўрға оёқда турганлиги боис, биринчи отган ўқи  
тупрокни тўзғитиб юборди. Иккинчиси катақнинг чекка  
тахтасини учирив юборди. Учинчи ўқни узишга улгур-  
мади. Эшакда аллақаerdan келиб қолган Толмас чол  
унинг қўлидан милтиқни тортиб олди. Кулоқ чаккасига  
ўхшатиб бир тарсаки тушириди.

— Э, ичмай ўл! — деб сўкди.

— Ичаман! — деди Улаш ўш боладай ҳиқиллаб. —  
Шунингиз бор экан, ичаман ва яна ичаман!

— Бунинг сенга нима оғирлиги тушаяпти, ахмоқ?

— Тунда увлаб кайфимни қочиряпти.

Аслида эса гап бутунлай бошқа томонда эди. Ҳамиша ширакайф юрадиган бу банда бир кунмас бир кун Ёлдорга ем бўлишдан чўчирди. Унинг нимаси кўп, ичиши ва дуч келган ерда думалаб қолиши кўп. У мастиклида Ёлдорнинг ёнида чўзилиб қолишидан кўрқарди. Икки бор бўлган. Икки сафар хам қўзини очиб, бошида Ёлдорни кўрган. Йиртқичнинг нигоҳида қаҳр ва кизиқишига қоришиқ ғалати бир жиддиятни пайқаган. Кўркувдан иштонини хўллаб, ундан нари қочаркан, бўриларнинг кўз қарашлари итларникидан тубдан фарқ қилишини ўшанда билган.

У йўқ ердаги гаплар билан жониворга тирғалиб ўтирамаган. Шартта милтиққа ёпиша қолган...

Ўшанда тасодиф туфайли мукаррар бир ўлимни четлашга мусассар бўлган Ёлдор яроғ ва ўқ-дори ҳидини бир умрга эслаб қолган. Кейинчалик эса ўзининг мунгли қўшиғи билан Улашни сўнгти манзилга узатиб қўйган.

У ҳеч вақт бу қадар ҳазин куйламаганди.

Ёлдор қалин қор кечиб тўйдан қайтаётган Улашни бошда ириллаб қаршилаган. Аммо Улаш, кайфи зўрлигидан, уни пайқамаган. Чолнинг ҳовлисини кесиб ўтавула, ундан сал нарида гурсиллаб қулаган. Йиқиларкан, ўрнидан қайтиб қўзғалмаган. Гупиллаб ёғаётган қор бир зумда уни кўздан бекитган. Ана шундагина Ёлдор одатдан ташкари нимадир юз берганини ичдан хис қилган ва увлашга тушган. Бирок тунда унинг ноласига эътибор берувчи кимса топилмаган.

Эртаси тушдан сўнг Улашнинг музлаб қолган жасадини қор тагидан топғанлар, дастлаб Ёлдордан шубҳаланишган. Мурда танасида тиш изларини кўришмагачгина, совукда котиб қолганини фахмлашган. Бирок юз берган бу фожиадан бутунлай эсини йўқотган Улашнинг шаллақи хотини эрининг ўлимига Ёлдорни айбдор деб билган ва қарғаниб қишлоқни бошига кўтарган.

Бу воқеадан Ёлдорнинг андак англагани шу бўлдик, итлар кўринган қорага акиллагандай, одам боласиям йўқ-бор нарсага тирғалаверар экан. Агар эси бутун тўртбеш йигит Толмас чолнинг тарафини олмаганда, Ёлдорнинг ҳолига маймунлар йиғлаши аниқ эди. Мурда бир четда қолиб, оломон унга ҳезланган. Бунинг бошида Эр-

гаш боди турган. Қачонки, йигитлардан бири, агар халеб сакраверсангиз, Томлисойдан сигир ўғирлаганингизни ҳаммага айтаман, дея шиншигандан сўнгтина уни ўчган.

Ўша тун одамларнинг гала-ғовуридан қаттиқ юрак олдириб қўйган Ёлдор кишлоқ оралаган жинсдошларини жуда якиндан кўрган. Кутқаринглар мени, дея зорли фингшиган. Яssiбош қилт этмаган, ҳадик ва адсоватла безрайиб тураверган. Аммо урғочи бўри Оқсийна негадир анча ройиш билдирган, ҳатто берироқ келишга журъат этган. Ёлдорга, унинг бўйнидаги занжирга, қўнкайган катақка ҳайрон-ҳайрон бокқан. Агар ҳалақит беришмаганда, келиб искаланишиям мумкин эди. Бироқ тўсатдан кулба эшигини очган Толмас чол барча ишнинг белига тепган. Уларни чўчитиб юборган.

Шундан кейин, орадан анча вакт ўтиб, улар Коратоғнинг белида қайта учрашдилар. Аммо энди Ёлдор бир пайтлар зорли-зорли фингшиган чорасиз тутқун эмас, Бўзбўри галасини қувиб, улкан ҳудудга эга чиккан, янада аниқроғи, узоқ кутилган озодликдан мастирган ёвқур бир жонивор эди.

Ўша куни у ҳеч бир сабабсиз, Яssiбошни таппа босиб талаган. Ҳолбуки, Яssiбош ортиқча бирор ҳаракат килмаганди. Бор-йўқ айби, Коратоғ ёқалаб кета-кета, Бўзбўрига бой берган қадрдон ҳудуди сарҳадида бир зумга тўхтагани ва билиб-бilmай салгина ичкарилагани эди. У гуссага берилиб, Ёлдорнинг пайдо бўлганини пайкамай қолганди.

Оқсийнанинг назарида, шу куни Ёлдор кучи ва келбатига яраша иш тутмади. Яssiбошдек ўргамиёна жониворга бу даражада кутуриб ташланиш шарт эмасди. Биргина дўқнинг ўзи кифоя эди. Яssiбош ўлаколса у билан ёқалашиб ўтирмас, дарҳол қорасини ўчиради. Негаки, шусиз ҳам унинг ахволи анча ҳароб, қуймичини ялаб ўтган ўқдан қаттиқ азият чекиб юрганди.

Оқсийна арча ёнида ғўдайиб қолган Ёлдорга қарай-қарай, Яssiбошнинг ортидан лўкиллаб бораркан, бирдан уни таниб қолди. Ия, бу тутқундаги бўри-ку! Зўрликка зўракан-у, лекин жуда тезоб ва беодоб экан. Бу борада Оқсийна ҳақ эди. Ҳали-ҳануз ёввойи оламга тўла сингишиб кетолмаган Ёлдор, тез-тез қуюшқондан чикиб, «тарбиясиз» лигини бот-бот намойиш этиб турар-

ди. Акс ҳолда Бўзбўридек жиддий ракибни совуқконлик билан енга билган Ёлдордек жонивор аллақаңдай Ясси-бошни итдай талаб ўтиармиди. Бу эса унинг тутқунлик асоратларидан ҳали тўла кутула олмаганидан дарак бе-рарди.

Ёндиликда Ёлдор бу нохуш одатлардан дсярли соқит бўлган, ўтмишидан эса сабр-тоқатнигина ўзига мепрос қилиб олганди. Шунинг учун хам тошлар орасига бехузур жойлашиб, Қоратепада яширинган сирни тагига этиш илинжида эди. Бу юмушга бутун дикқатини қаратганиданми, Маймокнинг Қоратепага етиб келганини пайқамай қолди. Пайқаган вактда эса, Маймоқ тумшуғини олдинга чўзганча ҳаводан хид олаётганди. Ана, у ҳавфни дарров илғади. Бир зум ҳант-манг бўлиб тургандан сўнг, тезгина изига қайрилди-да, ортига қарамай, жадал жўнаб қолди.

Маймокнинг қораси ўчгач, Ёлдор енгил тортди. Хайрият, бугун у билан ёқалашиб юрмайдиган бўлди. У яна Қоратепа томонга ўгирилди. Бир муддатдан сўнг ҳаводаги хиднинг тебранганини сезди. Кўп ўтмай Қоратепадан тошлоқ тарафга қайрилган йўлда икки кўланкани кўрди. Йўл тошлоқни ёнлаб келиб ясси тепаликка ўрларди.

Ёлдор чекинмоқни хаёлига ҳам келтирмади. Худди бир пайтлар ини тўрига бикингандай, ерга янада маҳкам қалишди. У ўз тажрибасидан шуни яхши билардики, одам боласи хид олмайди, харакатсиз кораниям илғаши кийин. Шу боис, у ортиқча таҳликага тушмай, кўланкаларни кузатишда давом этди.

— Буйтиблар сарсон юргандан кўра, қопқон қўйган маъқул, ака, — дерди кўланкалардан бири — Фуччи пакана совуқдан тишлари такиллаб. — Кайтамга уйқудан қолдик.

— Келади дегансиз... — дерди Сарвар норози тўнғиллаб. — Қор ёғиб берса зўр бўларди-да, изидан бирпасда топардим.

— Изига тушганингиз билан... — Фуччи пакана чайналди. — Лекин ҳавода корнинг заҳри бор. Совуқни каранг! Тешиб юборай дейди.

Улар гангур-гунгур сўзлашганча Ясситена ортида кўздан фойиб бўлишди. Ёлдорни ташвишга соглан ажал хидиниям ўзлари билан бирга олиб кетишли.

У ўрнидан кўзғалишга ошиқмади. Узала тушиб ётган жойида бақувват панжаларини олдинга чўзиб, обдан ке-ришди. Сўнг илдам оёққа қалқиб, Коратепа томон йўналди. Таниш сўқмоқдан кабрлар оралаб бораркан, йўлда Маймокнинг эски тезагига дуч келиб, аста ирил-лаб қўйди.

Боланинг дўіпайган қабрига етганда, бутунлай хотиржам тортганди. Бироқ хотиржамлиги тезда таажжуб билан алмашинди. Бояги кимсалар хиди қабрнинг шундокқина биқинига ўтириб қолганди. Аччиқ изгирин уни ўчиришга улгурмаганди.

Ёлдор қабр теварагини норози айланаркан, ўша таниш еусса — айрилиқ хисси яна юрагини чулгаб олди. Инграпиб фингшиди. Бу хил фингшиши қўпинча маҳзун нолага айланаб кетарди.

Хозир ҳам шундай бўлди.

\* \* \*

— Ана келди, aka!

Эндиғина ўринга чўзилган Фуччи пакана устидаги кўрпани улоқтириб ташлаб, туриб ўтирди. Сўнг гапи тўғри чикқанидан хурсанд бўлгандай, қўшиб қўйди:

— Айтдим-ку, келади деб!  
— Балки итдир, — Сарвар ипонқирамай, дераза ортидаги қоронғиликка тикилди. — Баъзан итлар ҳам ма-на шундай овоз чиқаради.  
— Жондорнинг овозини итникидан фарқлаёлмай ўлибманми, aka!

— Аниқ шу деб ўйлайсизми?  
— Эмасамчи! — Фуччи пакана унга норозиланиб ка-раб қўяди. — У боракан, бу томонларга бошқа жондор дориёлмайди. Дориб ҳам кўрсни! Аммо-лекин ёмон вафодор чиқди бу! Қаранг, халиям боланинг дардидагуийб юрибди. Овози юракни эзади! Ўлдиришга одам-нинг қўлиям бормайди. Балки... а, aka?! Нима дейсиз?

— Айтдим-ку, анову турки совук аканг гаровдан воз кечса, унга ортиқ хусуматим йўқ, деб.  
— Йў-ўқ, у гаровдан воз кечмайди.  
— Унда қандай йўл билан бўлмасин уни тинчитиш-миз керак.  
— Шойим йўронними?  
— Уф-ф...

— Тушундим, ака, тушундим, — Фуччи пакананинг боши шалвираб тушди. — Эртан ўзим сизга қолқон топиб бераман. Узункулнинг бевасида бир талайи бор. Эридан колган. Ота томондан озгина қариндошлигимиз бор, йўқ демаса керак. Аммо-лекин сизни акам демаганимда, Ёлдорнинг яқинига йўлатмасдим. Бой бўлганимда, унинг хуенини ўзим сотиб олардим. Афсус, қўлим калта-да.

Бу гаплар Сарварга малол келса-да, қилт этмади. Негаки, Фуччи пакана керакли одам. Аразлаб кетса, қўйлари қаровсиз қолади. Қишлоқ одамларининг териси юпқалигини келган куниёқ билган. Содда кўринишса-да, гап кўтаришлари кийин. Бу ҳол Фуччи паканага ҳам бегона эмас. Шунинг учун доим яхши гапиришга тиришади, йўқ ердаги қизларни ўйлаб топади. Фуччи пакана барига ишонади. Сарвар эса ичдан қулади: «Сулувга ҳавасинг кетмай ўл, аввал ўзингга бундай қарасанг-чи!» Бироқ Фуччи паканани унчалик овсар деб бўлмайди, минг ҳаяжонга тушмасин, баъзан хижолатдан манглай кашлаб дейди:

— Бу... айтган қизларингизни бари бўйчан экан, шу... ўзимизга ўхшаган майдароғи йўқми, а, ака?

— Бор, — дейди Сарвар ишонч билан. — Турли сўрти, турли маркасидан бор. Таnlаб-танлаб олавера-сиз. Сиз факат чорвага яхши қарасангиз бўлди.

— Бундан сира ғам еманг, ака. — Фуччи пакана дағал кафтларини олдинга чўзади. — Менинг қўлла-рим баракали! Менинг қўлимда қўйларингиз тез семи-ради.

— Яшанг, укам, яшанг!

— Шаҳарга тушган кезларим, йўл бўйидаги чойхонада ўтириб, қизларни томоша қиласман. — Фуччи пакана негадир андак маъюсланади. — Кўзимни кўйдириб, ҳар қизлар ўтади, ҳали у ёққа, ҳали бу ёққа, нима еб, нима ичаётганимни ҳам билмай қоламан. Шундай пайтда мени майда қилиб тукқан энамдан ёмон хафа бўп кетаман. Туғиб нима қиласдингиз дейман... ичимда.

— Онадан хафа бўлиш яхши эмас. — Сарвар норози кош чимирган бўлади. — Бу ишда онанинг ҳеч бир айби йўқ. Иккинчидан, бўй-бастга бу ерда қарашаркан, шаҳарда бунинг унча аҳамияти йўқ. Мухими, юрак тоза бўлиши керак.

— Тоза-тоза! — Фуччи пакана ошиғич эътироф эта-ди. — Юрак топ-тоза! Лекин бизди кишлоқ одамлари-нинг юрак билан унча ишлари йўқ. Шунисига куяман мен. Тунов йили майдароқ бир қизга оғиз солдим. Нима дебди деңг?

- Нима дебди?
- Э, айтгилиги йўқ, ака.
- Айтинг-айтинг.
- Паканага теккинча, итга тегаман дебди.
- Бўшлик қипсиз-да.
- Тегмайман деса, зўрламайсиз-ку.
- Гоҳида зўрлаш ҳам керак.
- Кейин мени хели-хишти тинч қўяр...

Сарварнинг уига раҳми келади. Яхшилик килиб, бирорта қари қизга уйлантириб қўйсамми лейди. Бироқ бундан ўзига ҳеч бир наф етмаслигини ўйлаб, тезда фикридан қайтади. У нафи йўқ юмушни жинидан ёмон кўради. Фуччи пакана эса ҳозирча арzon ишчи кучи сифатида керак. Эртага уни ҳатто эслаб ҳам ўтирумайди. Ваъдалар нима, қуруқ сўз, айтилиши билан кетади ҳавога сингиб. Уни на тутиб бўлади, на бошқа килиб.

Шунга карамай, Фуччи пакананинг ўта хокисорлиги-га баъзида унинг жуда ҳаваси келади. Кўзига у муаммо-сиз одам бўлиб кўринади. У чўпчакларга ишонади, бар-ча нарсадан факат яхшилик қидиради. Ҳатто қўшниси-нинг сигири түғсаям ўзида йўқ қувонади. Сарварга эса бу хислар ёт. Кўнгли ҳамиша нимадандир дилгир. Пули кўпнинг ташвиши мўл, дея ўзини овутмокка уринса-да, чин дилдан қувона билмаслигидан гоҳида хуноб бўлиб кетади. Ўшанда негадир ҳамиша мардикор йигитни эслайди. Унинг аччик гапларидан маъно қидиради. Эсида, курдираётган иморатига ҳамманинг ҳаваси келган, ҳам-ма мактаган, факат угина пинак бузмаган, ўткинчи ҳавас куллари, дея ғудранган. Охири у мардикор йигит-ни ҳайдаб солган. Пулидан сикиб, жахлинин чиқармоқчи бўлган. Аммо у ғазабланмаган, куллардан хафа бўлиш йўқ, дея кетган-борган. Кейин эшитса, у шоир экан. Шеърларидан ўқиб, уста шўрликни қўп хуноб қилас экан.

«Кул» дея, у нимани назарда тутган, бу нарса Сарвар учун ҳануз коронғи. Буни, юпуннинг бодилиги, деб ўйладиди.

У Фуччи пакананинг хуррагига қулоқ тутиб, қорон-  
филик қўйнига тикилиб ётаркан, дилгирилик сабабини  
дарддан қидиради. Шу дарди туфайли тоғу тошлар ора-  
сида сарсон юрганию турки совуқ Шойим йўғонга дуч  
келганини ўйлади. Бу ёққа келишни маслаҳат берган та-  
биб чолнинг гўрига энди ғишт қалай бошлаганида, каса-  
ли борган сари камрок безовта килаётгани ёдига тушиб  
қолди. Буни қарангки, Ёлдор билан андармон бўлиб,  
дардиниям эсидан чиқариб юборибди. Наҳотки тузаляп-  
ти?! Агар ўртада сурув масаласи кўндалант турмагани-  
да, шу тобда ўзини қанчалик баҳтиёр ҳис этарди-я!  
Минг афсуски, сурувдан айрилиб колиш эҳтимоли, ун-  
даги бу туйғу юзига соя ташлаб турарди.

У ётган жойида безовта тўлғонди. Йўқ, сурувни бер-  
моқ, жон бермоқдан юз карра ёмон. Каңдай бўлмасин  
Ёлдорни тинчтиши лозим. Акс ҳолда бир умр куйиб  
үтади. Мол аччиғи — жон аччиғи деб бекорга айтишма-  
ган.

\* \* \*

Қўшни ҳудуд бўрилари мулкига даҳл қилганидан бе-  
ри Ёлдор тинчини йўқотганди. Бурун бутун ҳудудини  
уч-тўрт кунда бир, жуда нари борса, ҳафтада икки бор  
айланиб чикадиган жонивор Қоратепадан қайтиши би-  
лан шу юмушга униади.

У ҳудудини айланиб, зарур жойлардаги белгиларни  
янгилаб чиқаркан, қўшни тўда қайта бош сукмаганини  
сезди. Аммо бундан унинг кўнгли тинччиб қолмади. НЕ-  
ГАКИ, тўдабоши шунчаки жигига тегмоқ истаса, бу  
қилиғини такрор намойиш этарди. Тоғда бу хил ҳодиса-  
лар кўп учрайди. Айрим қитмир жониворлар ҳудуд эга-  
сининг кўзига ташланмасдан чегарани бузиб юради. Би-  
роқ кучига ишонган тўда кўпда қитмириликни ўзига эп  
кўрмайди. Демак, нописанд белги қолдиришга ҳадди  
сиққан етакчи бўри кандаидир шумликни ўйлаган.

Ёлдор Сўкиркояда узоқ туриб колди. Теваракдан  
кўз узмай, димоғига чалинган ҳар бир хидни илғашга,  
ўрганишга тиришди. Ёлғизлиги кор килгандай, негадир  
аламли ғингшиди. Якинда ўзига ройиш билдириб, ғала-  
ти кийшанглаб кетган Оқсийнани қўмсаётганини сезиб,  
бундан фоят ажабланди. Чунки бу туйғу унга ёт эди.  
Илгари ўзга жонзодни хеч ўйламаганди.

У рухида қандайдир ўзгариш юз бераётганини хис этиб, дардманد оҳангда увлаб юборди. Аммо бу йўқлов эмасди. Юраги тубидан ихтиёrsиз ҳолатда юзага қалқиётган туйгуларни идрок этмоққа ожиз қолган жоннинг фифони эди.

У Оқсийнани ўн кунча бурун яна учратганди. Мулкининг шимоли-шаркий қисмидаги Кўксув бўйларини кўздан кечираётib, яшин урган арча ёнида тўхтаганди. Кўксув жониворларнинг серқатнов жойи бўлиб, ўтган-кайтган ҳайвонлар арча танасида ўз белгиларини қолдириб кетарди. Ёлдор ўз белгисини янгилашдан аввал арча теварагини гир айланиб ҳид олар, яъни нима келиб, нима кеттанини обдон ўрганарди. У эндигина шу юмушга уннаганида қўшни ҳудуддаги зирк буталари орасидан қандайдир жониворнинг ўзига тикилиб турганини пайкади. Шамол тескари эсиб, ис олмокнинг имкони йўклигидан унинг фаши келди. Ўша томонга хушёр бокди. Кўзи илғагани Яssiбош бўлди.

Танидан дарди ариб, қайта кучга тўлган Яssiбошнинг нигохи тўла адоват бўлса-да, нимадандир ҳануз иккиланаётгани шундоққина сезилиб турарди. Чамаси бетлашишга журъяти етмаётган эди. Бироқ ҳудуд уни-ки, ортиқ сусткашлик ҳамиша ёмон оқибатларга олиб келиши мумкин. Ҳудди шуни сезгандай, у буталар орасидан чиқиб, тошлоқ майдонга келиб чўнқайди. Бу томонга фақат ўлиғимнигина босиб ўтасан дегандай, ғўдайиб туриб олди. Бу билан, яъниким, вазиятни тўғри баҳолай олмаганидан, у жиддий хатога йўл қўйган. Фанимга элдан бурун рўбарў келганди. Ҳолбуки, Ёлдор томондан хозирча ҳеч бир ортиқча хатти-харакат сезилмасди. Лекин вазият шу қадар қалтис эдики, учқундан алланга чиқиб кетиши ҳеч гап эмасди. Бунинг учун Яssiбошнинг биргина таҳди迪, ириллаши кифоя эди. Ўз навбатида, Яssiбошни ҳам кўпда айблаб бўлмасди. У ҳудуд талашишлардан шу қадар юрак олдириб қўйгандики, оқибат, қўрқкан олдин мушт кўтарар қабилида аввалроқ ўзи майдонга чиқиб қўя қолганди.

Яssiбошнинг бахтига Ёлдор уни менсимади. Виқорли бир қарааш билан чекланиб, арча танасида қолдирилган белгиларни «ўқиши»га тутинди.

Айни шу пайтда оқиш харсанг ортидан пайдо бўлган Оқсийнага Ёлдорнинг бу сокинлиги жуда ёқиб кетди. У

илтариғи жиззаки йиртқичга сира ўхшамасди. Улгайиб, янада ҳайбатли тус олибди. Ҳаракатлари шу қадар ўзиға ярашардикі, Оқсийна бир зум махлиә туриб қолди. Кейин түмшүғи билан Яссибошни турткылаб нари ҳайдай бошлади. Орада Ёлдорга киши билмас қийшанглаб караб күйди.

Оқсийнанинг қийшанглашлари Ёлдорнинг назаридан четда қолмади. Бирок бу нарса арча танаисига белги қўйишига халакит бермади. Бундан Оқсийна каттиқ оғринди. Аламидан увлаб юборай деди. Йўлига тихирлик қилиб, майдонни тарк этишга ошиқмаётган Яссибошнинг яғринидан гарчча тишлаб, уни олдига солиб ҳайдади. Бутазорга шўнгий-шўнгий бирровгина ортига ўгирилди. Ёлдор унинг кўзларида жамланган араз, нафрат ва меҳрнинг қоришиқ ифодасини кўриб, ҳайрати баттар ошди.

Агар Маймокнинг ўкириги халакит бермаганида, Ёлдор англарсиз туйгулар исканжасида қанча турарди, Худо билади. Айикнинг таҳликали бўкириши унинг хаёлини тариқдай сочиб юборди.

У сергак тортди.

Маймокнинг овози Сўқирқоя ортидаги сойликдан келарди. Ўкиригига ғазабдан кўра қўркув ва ночорлик оҳанги кучлироқ эди.

Ёлдор воқеани тез фаҳмлади ва аста ириллаб кўйди.

Шу кунларда Маймокнинг аҳволи анча чатоқ эди. Унинг ҳудудига Улкан айиқ тажовуз қилмоқда эди. Бир хафтадирки, улар мушук-сичкон ўйнашарди. Маймок заифлиги боис, ғанимига қарши чикишга журъати етмай, пўписадан нарига ўтмас, ўз навбатида, Қоялитоғлар водийсининг ҳукмдори бўлмиш Улкан айиқ бу ҳудудни тўла эгалланига унчалик ошиқмас, гўё Маймокнинг силласини куритмокқа аҳд қилгандай, ҳозирча дам-бадам пайдо бўлиш билан чекланмоқда эди.

Ёлдор ҳадик ва кизиқиши билан сойликка энаркан, кизиқ манзаранинг устидан чиқди. Улкан айиқ муюлишдаги қуюқ бутазорда бамайлихотир кавшаниб юрар, Маймок эса анча берида, ҳар лаҳзада қочмоққа шай холда, ўкириб турарди. Афтидан, унинг бўкиришлари Улкан айиқка чивин чакқанчалик таъсир этмаётган эди.

Унинг ҳаракати Ёлдорнинг ҳам ғашига тегди. У худди шу сойликда Бўзбўри билан каттиқ олишганди. Бу

вокеа эсига түшдими ё эгалик хисси устуворлик килди-ми, ириллаб юборганини ўзи ҳам сезмай колди. Тахдид-дан йирок, шунчаки қизғаниш хисси остидаги нидо эди бу. Аммо бу нарса Улкан айиққа ғалати таъсир килди. У ханг-манг бўлиб теваракка кўз солди ва кўрдики, аллақандай бир бўри Маймокнинг ёнини олиб, ириллаб турибди. Бу эса жониворлар хаётида камдан-кам учрай-диган ҳодиса эди. Худуд, одатда, ҳамжинс ҳайвонлар ўртасида талаш бўлади. Бошқа турдаги жониворлар бу мажарога аралашмайди.

Агар бу ҳол Қоялитеялар водийсида юз берганида, Улкан айиқ ғазабдан қутурган, уларга ташланган, тутса тириклайн еб-ютган бўларди. Аммо у бегона худудда, ёввойи жониворлар ичдан буйсунадиган конун — ҳақлик ва ноҳақлик туйғуси измида эди. Бир оз иккила-нишдан сўнг, ноҳақлигини сезиш туйғуси барибир устунлик килди. У ўқираётган Маймогу, ириллаётган Ёлдорга таажжубла бир-бир боқиб, ошиқмай бутазорни тарк эта бошлади. Бундан ботирланган Маймок бир неча одим илгарилади. Ундан ортиғига ботинолмади. Фанимини ўчакишириб қўйишдан кўркди.

Ёлдор эса Улкан айиқ кетиши билан тинчланди. Маймок томонга қараб қўйишниям лозим топмай, ён-бағирилик бўйлаб йўртиб кетди. Шунингдек, Маймок ҳам унга эътибор бериб ўтирумади. Нега деганда, юзага келган бу ҳодиса иттифоқлик белгиси эмасди. Ҳар қай-сиси ўзини мулк эгаси сифатида билиб, қўлларидан кел-ганча уни химоя қилишга тиришганди, холос.

Ёлдор Сарвар томонидан қўйилган биринчи копқонга Ичаксойда рўбарў келди. У хатарнинг мавжудлигини яқинлашмаёқ исидан сезганди. Бирок бу нарса олга юришга монелик қилмади. Қопқон ингичка сўқмокка ўта нўноқлик билан ўрнатилган экан. Устига озгина хас сочилган нам тупрок остидан темир, хўрак ва одам иси гунариб турарди.

У чўнқайган кўйи, хавфли майдончани обдан қўздан кечирди. Ора-орада теваракка назар солишиниам унутмади. Кейин ажал билан ўйнашгиси келгандай, қопқон тенасидан сакраб ўтди. Сўнг яна ортга санчиди. Бу қилиғи ўзига ёқандай, бирпаст қотиб турди-да, тўсатдан шартта ортига ўғирилиб, орқа панжалари қопқон устига тош ва тупрок соча бошлади. Кутгани бўлди. Тупрок ва

хасларни түзгитиб, қопқон қисқичлари қарсиллаб ёпилди. Бундан ўзи ҳам чўчиб кетди.

У қопқонга илқ бор тутқунликдан ҳалос топган қунлари дуч келтанди. Бўрикалла тизмасига туташ водийда тўнғиз боласига кўзи тушганида, ич-ичидан яйраб кетади. Тўнғиз боласи чийиллар, ҳар ён талпинар, лекин ҳеч нари кетолмасди. Бу синоатдан аввалига у ҳайрон бўлади. Сўнг тумшук ялаб, олдинга интилади. Аммо чакалакзордан чиқишига улгурмай, қарши томондан келаётган овчига назари тушади. Чакалакзорда колиб, воқеанинг давомини кузатади.

Афтини малла соқол қоплаган овчи ишни чўзиб ўтирумайди. Тутқундаги жониворни отиб ўлдиради-да. қопқонни қайта ўрнатиб кетади.

Овчи арчалар орасида қўздан ғойиб бўлгач, Ёлдор бекинган жойидан чиқади. Темир ва яна алламбалолар ҳиди муаллақ туриб қолган жойга аста яқинлашади. У чўнқайиб искаланади, ергағирлаб ётиб искаланади, у ён-бу ён юриб искаланади. Одамзоддан ҳайиқмайдиган жонивор темир исидан чўчиди. Диморини қитиклаётган хўракнинг хушбўй ҳиди ортида кандайдир хатар яшириганини сезади. Нималигини англаёлмай, боши қотади.

Агар шу тобда узоқдан эшак минган чол қўринмаганди, Ёлдорнинг копқонга тушиши аниқ эди. Хўракнинг хушбўй ҳиди бутун фикр-зикрини ўғирлаб қўйганди. Баҳтига чол келиб колиб, у тагин чакалакзорга бикинишга мажбур бўлди. Чолнинг бўшангина ити ҳидни сезиб, олдинга ўтади. Искаланиб копқонга яқинлашади ва тўсатдан вангиллаб юборади. Воқеани фаҳмлган чол сўкина-сўкина эшакдан тушади, сўкина-сўкина итни қопқондан бўшатади, сўкина-сўкина уни бир четта улоқтиради, сўнг сўкина-сўкина оқсоқ итини эргаштириб кетади.

Ёлдор ерда занжири чуваланиб ётган қопқонни келиб ҳидлади ва тилсиз бу ёвни хотирасига маҳкам михлаб олади. Темир ва хўракнинг омухта ҳиди – хатар! Кейинчалик жуда усталик билан ўрнатилган қопқонларни ҳам осонгина аниқлайдиган бўлди. Яйдок ва овлок жойларда емиш бежиз ётмаслигини ва бу ҳид ортида албатта бирор ҳавф яшириганини фаҳмлаб етди. Кўпинча, агар ҳафсала қилса, тош ва тупроқ сочиб,

қопконни заарсизлантириб кетар, баъзан эса уни четлаб ўтарди.

У навбатдаги қопқонга Қоратепа яқинида дуч келди. Бу қопқон Гуччи иакананинг кутқуси билан қўйилганди.

Ёлдорнинг Қоратепага келишига ҳануз тұла ишонмаган бўлса-да, Сарвар Гуччининг райони қайтаролмаган, қопқонлардан бирини шу ерга жойлаштирганди. Колганларини эса ўз билгича, лекин Ёлдор юрадиган сўқмокларни тусмоллаб қўйиб чикканди.

Ёлдор бу қопқонга тегмади. Уни четлаб ўтди. Олмазорда шовур сезиб, қабрлар орасидан ўша томонга мўралади. Суюн чол невараси билан олма териб юрган экан.

У Коратепада кўп хаялламай, Ялангтош орқали кунботар томон юрди. Худуднинг шимоли-ғарбий қисмидағи асосий «устун»лардан бири бўлмиш кайрағоч ёнида тўхтади. Унда қолдирилган хидларни обдан исказ үрганди. Қандайдир аҳмоқ бука дараҳт танаасига роса ишикаланибди. У бундан кўпда ранжиб турмай, белгисини янгилади-да, нари бориб чўнқайди. Тоғларга бокди. Беридаги чўккиларга хам кор тушганини кўрди.

У хаводаги кор хиди каторида, юрагида тағин ўша ғалати хисни тыйди. Ўзига араз, нафрат ва меҳр билан қараб кетган Оқсийнани яна кўмсай бошлади. Қизик, илгари бу хил туйгуларни сезмасди. Дастреб озодликдан бошқасини ўйламасди. Сўнг эркинилкдан сармаст юрди. Кейин худуд масаласи билан андармон бўлди. Агар қўшни тўданинг бебошлигини ўйламаса, кунлари бинойидек ўтмоқда эди.

Бироқ кутилмаганда, мана тушунуксиз туйгулар уни кийнокқа сола бошлади. Тотли, ўз навбатида, мавхум бу хисларнинг нелигини англашга қурби етмай, у аста келиб кайрағоч пойига чўзилди. Қуйидаги илонизи сўқмокдан кетиб бораётган эшакли чолга ҳардамхаёл тикилди. Бу бир пайтлар уни қопқонга тушишидан асраб колган ўша чол эди.

У эшаклига эргашган бўшанг итга жиддий бокаркан, илк бор юрагида таниш тажовузни хис этмади. Авваллари ит зотини қўрса, бутун вужуди интиком ўтидан ловуллайдиган жониворнинг, бу сафар, бирор туки қилт этмади. У ҳануз тушунуксиз туйгулар гирдобида эди.

Ёлдор бу ерда узок турмай, Эгрийнин коралаб йўлга тушди. Эгрийнда тўнғизларнинг катта оиласи яшарди. У аллақачон уларни кўз остига олиб қўйганди. Агар ови бароридан келмаса, Кизилкия ёқалаб Дўнгкояга ўтади. Қоя ўнгирларидан бирида ғамламаси бор.

У бир маромда йўргиб бораркан, Учбурундаги ёввойи дўланазорда Маймоқни кўрди. У мевасиз бута тагида ниманидир иштаҳа билан чайнарди. Ёлдор одатига хос, аста ириллади. Маймоқ эса унга эътибор ҳам бермади.

\* \* \*

Кўйган қопқонларидан бирор наф чиқавермагач, Сарвар чинакамига ташвишга тушиб қолди. Фуччи пакананинг қаровидан, унинг таъбири билан айтганда, йилтиллаб семира бошлаган кўйлари ортиқ уни қувонтирмай кўйди. Уларга омонат сифатида қарай бошлиди. Аслида ҳам шу. Агар Ёлдорни тинчитмаса, бир неча кундан сўнг сурув Шойим йўғоннинг ихтиёрига ўтади. Қани энди, одам ёллаш мумкин бўлса-ю бу бош оғрикдан тезроқ қутула қолса. Аммо шарт бўйича бу мумкин эмас. Шойим йўғон ҳатто қопқонга қарши чиқиб ўтирибди.

— Қопқонга келишмаганмиз, — деди бугун эрталаб. — Фирром ўйинни бас қилинг!

— Қанакасига фирром? — Сарвар йўқ ердаги бу даъводан хайрон бўлди. — Нима киламан, қандай қўлга тушираман, нима фарки бор сизга?

— Жудаям фарки бор-да! — Шойим йўғон унга тешиб юборар даражада ўқрайиб тикилди. — Жондор бўлса-да, у йигитдай бир гап! Биз уни йигит деб биламиз. Йигит билан йигитдай галлашинг! Ҳали қопқон қўясиз, ҳали аному паканани эргаштириб чиқасиз. Баридан боҳабармиз. Фирром ўйинни бас қилинг! Йўғасам ёмон хафалашиб қоламиз.

У дераза ёнида шу гапларни эслаб ўтиаркан, тунд осмонга умидвор тикилди. Қани энди, бир энликкина қор ёғиб берса-ю, Ёлдорнинг изига тушиш имконияти туғилса.

Овда из олиб, ўлжани қўлга туширишни у амалдор оғайнисидан ўрганганди. Овга ишқибозликниям шу жўрасидаюнтирган. Қиши-кировли кунларда амалдор

оғайниси вахимали хорижий машинасида гуриллаб келарди-да, уни овга олиб кетарди. Сарвар бошда овни шунчаки оворагарчилик деб ўйларди. Аммо нафи кўп тегадиган амалдор оғайнисининг гапини хеч икки қиломасди. Иккинчидан эса, ов баҳонасида яхшигина маишатга берилишарди. Амалдор мингн машинанинг юкхонасидан жондан бўлак ҳамма нарса топиларди. Бу нознеъматлар дала-даштда, корда, гулхан теварагида негадир бошқача татирди.

Амалдор жўраси, унинг ўйлашибча, пишқириб, гулдирраб, гумбурлаб яшарди. Бўйи нақ икки метр, кучи гавдасига мос, агар чинакамига истаса, ҳар қандай кўйни бир ўтиришда еб тугатадиган азamat йигит эди. Сиздан ажал ҳам ҳайикса керак, дерди баъзида Сарвар унинг келбатига ҳавасланиб бокиб. Бирок ажал деганлари қўтосдай бақувват бу йигитдан хеч ҳам ҳайикмас экан, бир ўтиришда сездирмайгина жонини олиб кўйди. Бу холдан ҳамма ҳайрон. Кимдир у деди, кимдир бу, орада девдай бир йигит ўлди-кетди.

Сарварга ундан овчилик мерос бўлиб қолди. У овчиликнинг ўзига хос сир-синоатларини тўла ўзлаштиромаган эса-да, обдон завқини тотишга улгурганди. Шундан бери у овни канда қилмайди.

Амалдор оғайниси, бу даштда қимиirlаган жон борки, бари бизники, дейишни яхши кўрарди. Улар шаҳарчанинг кунботиш томонидаги уфққа туташ сарҳадсиз чўлни яёв ва машинада қадамба-қадам кезиб чиқишиган. Овнинг ҳадисини олган жўраси кордаги изларни бехато аникларди. Изга караб ёввойи жониворнинг қачон ва қай пайтда ўтганлигини адашмай айтарди. Ўлжасининг мазали қисмини даштнинг ўзидаёк кабоб қилишга тушарди. У гоҳида овчи итларини ишга солса, гоҳида йирик жониворларни машинада қувлаб отарди. Ўлжасининг кетидан тушганда, у бутунлай ўзгаради, яъни ёввойи бир овозда бўкирар, сўкинар ва бундан фоят ҳузурланарди. Итларни эса жуда ёқтиради. Яхшиларини эринмай овга ўргатарди. Ёлдор томонидан ўлдириб қетилган Диккиқулоқ унинг энг яхши кўрган итларидан бири эди. Сарвар уни, жўрамдан эсдалик деб, ўзига олганди. Оғайнисининг ўлимидан сўнг, даштма-дашт изғишини бас қылган бўлсада, Қамишқўлга танда қўйганди. Ўрдак ови билан шуғулланарди. Ҳатто бир марта

чүлөк бүрини оттан. Аммо Ёлдор деганлари у билган ва тасаввур этгай бүриларга хеч ўхшамасди. Унинг килиқларидан ҳайратда эди. Одатда тирик бүрини кўриш ҳәр кимга ҳам насиб этавермайди. Улар имкони борича қўзга ташланмасликка уринишади. Ёлдорни эса неча бор кишлоқ яқинида, дўнгда, булоқ бўйида ва ҳатто кўраси ёнида учратди. Яроғини қўлига олгунча бўлмай, арвоҳдай кўздан йўқолади. Бироқ узоклаб ҳам кетмайди. Қоратепада бўридан ташқари, айқ изига дуч келганда, ҳаңт-манг туриб қолган. Аммо ҳайратини бирорвга айтотмаган. Негаки, кишлоқ одамлари жуда галати, улар ўз хис-туйнуларини хеч қачон ошкор этишмайди, нари борса, шунинг нимасига бунча ҳовликасан, деган оҳангда, тоғда яшаймиз-да, деб қўя қолишади.

Факат Фуччи паканагина уларга ўхшамайди. Ичидаги ташида. Соддалиги боис, кишлоқда унчалик обрўйи йўқ. Бироқ дўстта итдай содик.

— Ака, бугун милтиқни менга берсангиз, — деб қолди эрталаб даб-дурустдан. — Шойим йўронга берадиган кўйимиз йўқ! Мен унга кўй тугул, кўйнинг қумогини ҳам раво кўрмайман!

— Намунча ёмон кўрмасангиз уни.

— Мен уни ёмон кўрмайман, мен... — Фуччи пакана гапнинг у ёгини айтишга ийманади. Қизариб бош қашлайди-да, сўнг дейди: — Сурув қўлдан кетмасин дейман-да. Ахир сиз акамсиз, куяди-да одам.

— Ростдан куясизми?

— Эмасам-чи!

— Милтиқни нега сўраб қолдингиз? Ё Шойим йўронни...

— Э, йўқ, — дея Фуччи пакана унинг гапини бўлади. — Ёлдор учраса, отмоқчиман. Менга учраб туради-да у.

— Қўйларга эҳтиёт бўлинг.

— У қўйларга тегмайди деганман-ку.

— Мен уни тушунмайман.

— Уни ҳеч ким тушунмайди.

— Қани энди, бир энликкина кор ёғиб берса...

— Мен ҳам шунга илҳакман.

Сарвар шуларни эслаб, тунд осмонга, ёнбағирликдағи арчазорга дилгир тикилади. Фўлдираб сўкинади. Нега деганда, у эрталабдан бери гаранг. Ўтириб ўтиролмайди, туриб туролмайди. Яроғини кўтариб чиқишдан

эса бирор маъни йўқ. Тоғда Ёлдорни қидириш, пичан ғарамидан игна излашдек бир гап эканига аллақачон ақли етган. Шунингчун қорни интиқ кутмокда эди. Ҳаво эса юракни сикар даражада тунд, ёриб ёғмасди, очилиб очилмасди.

У дераза ёнида қанча турди, билмайди. Орада печкага ўтин ташлади. Милтигини қайта тозалади. Сўнг жойига чўкиб, Ёлдорни қаердан қидиришни ўйлай бошлиди. Кейин бирдан кўзларига ишонмай деразага ёпиши. Йўқ, кўзлари алдамаган, ташқарида қор учкунламоқда эди.

У кувончдан бақириб юборди. Худди амалдор оғайнисидек бор овозда ҳайқирди. Кейин қўлларини беўхшов саланглатганча, ўйинга тушиб кетди.

— Кунинг битди, Ёлдор! Кунгинанг битди!

\* \* \*

Ёлдор туни билан ёриб чиқкан қорни мамнун қаршилади. Корли ҳаво ичидан димланиб ётган ланжликни қувиб, ғайрат куюнини солғандек, у янада тетикланди. Кор кечиб дайдиди. Кор кечгани сари ғайрати жўшаётганини сезди.

Одатдагидек, у қишлоқдан унча узоклашиб кетмаганди. Саҳарга яқин тинган қор устида из қолдириб, қишлоққа энди. Негадир чолнинг кимсасиз кулбасига бош суккиси келди. Эшиқ ва деразаларни бир-бир исказчиқди. Ошхонага кириб чиқишниям унутмади. Бўм-бўш кўра ёнида бир зум чўнқайиб турди-да, сўнг қишлоқ итларининг юрагига кутку солиб, яна изига қайтди. Бу сафар итлар уни ортиқ қизиктирмади. У ҳануз англарсиз туйғу гирдобида эди.

У булоқ бўйига етганда, ичдан нимадир уни тоғлар томонга чорлаётганини хис этди. Нима? Кувончми ё ташвишми? Бу хил хисни илгариям икки-уч бор туйган. Ҳудудига бегоналар оралаганини аввалдан сезган ва ҳамиша ҳақ бўлиб чиқкан. Аммо бу сафарги хислар тўфонлирок эди. Бугун хаётида нимадир содир бўлиши мумкинлек эди.

У Учкизилда шумшайиб турган Маймокқа дуч келди. Кор токқа эмас, Маймоқнинг ичига ёққанди. Тана-сига ёғ захирасини тўла ғамлашга улгурмаган Маймок жуда ғамгин эди. Ҳадемай қиши уйқусига кетиши лозим

бўлган бу жонивор захиранинг камлиги ўзини не куйларга солишини яхши биларди. Одатда, очиккан жонивор муддатдан илгари уйғониб кетади. Уйғонгандан, кўкламга ҳали узок, тоғ эса қалин кор кўрпаси остида мудраётган бўлади. Оқибат, у егулик тополмай хафталаб оч юради. Уйқуга тўла қонмагани учун карахтлик қонига ташна қилиб юборади. Бирор ўнгирда гужанак тушиб олиб, панжаларини сўради. Аммо танасида ортиқча ёғ йўқ, нафси қонмай аlamнак ўкиради. Мўриларидан тутун ўрлаб турган кишлокқа умидвор бокади. Кишлокқа энса нимадир топишини ва шунингдек, жонидан айрилиб қолиши мумкинлигиниям билади. Шу боис, кишлокқа энишдан тийилиб, тоғлар оралайди. Кўклам келишини зор-интизор кутади. Нишабликларда майсалар ниш уриши билан унинг куни туға бошлайди. Бирок бунгача неча хафталаб очлик азобини бошидан кечириши керак. Бунақа пайтларда у ҳар қандай ўлаксадан тап тортмайди. Аммо тоғда ўлаксалар ҳамиша ҳам топилавермайди.

Ёлдор муюлишда пайдо бўлганида, у фоят эзгин холатда мунғайиб ўтиради. Ахир эзилмай бўладими, куни кеча кўзларини яшнатиб турган мевалардан асар йўқ, бари кор тагида қолган. Корни эса эрталабдан таталамоқда. У аламдан Ёлдорга караб аста ўкиради. Ёлдор эса унинг замзамасига эътибор ҳам бермади. Кор кечиб, киялик бўйлаб йўлда давом этди.

Ёлдорнинг қадам ранжида қилиши Маймок учун фойдадан холи бўлмади. Кимсасиз туюлган тоғда тирик жонни учратиш унинг эсига ҳаракат қилиш лозимлигини туширди. Негаки, тоғ ҳиссиз, тоғ шафкатсиз — агар ҳаракатдан эринсанг, унинг қучоғида яшашинг қийин, тирик қолишинг гумон. Ланжлик ва ҳафсаласизлик ортидан ҳамиша ўлим пойлаб туради.

У кордан эгилган буталарни силкилаб, емиш қидиришга тушди.

Хозирча корин ташвишидан холи бўлган Ёлдор эса корда из қолдириб, тобора илгариларкан, кияликда бир зум тўхтади. Чўнқайиб теваракни зимдан кузатди. Сўнг ошикмай яна йўлда давом этди.

Унинг навбатдаги кўним топган манзили Килсўқмокдан беридаги Кенг сўқмок бўлди. Бу сўқмок Довонортига олиб борадиган ягона йўлнинг бошланиш қисми

хисобланиб, Килсўқмоқдан уни арчазор қиялик ажратиб туради. У Кенгсўқмоқ деб номланса-да, аслида сийрак арчали, узун ва энлик сайҳонлик эди. Сайҳонликнинг бир ёнида нураган коя, иккинчи ёни эса қияланиб бориб, чоғроқ водийга бориб туташарди. Водийдан нариси майда тизмалар бўлиб, гўзал манзара хосил қиласди.

Ёлдор қаршисида юз очган бу манзарага — қор қўиган арчаларга, мўъжаз водийга, бир-бирига уланиб кетган тоф тизмаларига аста бокаркан, юрагини хапкиртирган ҳиснинг боисини англағандай бўлди. Муздек ҳавода кўшини тўданинг ожиз хидини илғади. Илғаси билан яғрин туклари тикрайиб, важоҳатли ириллади. Олдинги панжаларини корга ботириб, тишларини даҳшатли тарзда шақирлатди. Лекин ўтган галгидек ховлиқмади. Кайтамга вазиятни янада аниқрок ўрганишга уринди. Шамол олиб келаётган хидга караганда, тўда Килсўқмоқдан нарида харакатланмоқда. Агар улар бу томонни кўзлаган бўлса, факат мана шу йўналишидан-гина келиши мумкин. Шу тобда унинг димогига ўзга бир ҳид чалинмаганда, Ёлдор ортиқ сабр қилолмас, ўпкасини қўлтикламаса-да, ҳар холда аллақачон тўда сари юрган бўларди.

У Оқсийнанинг заиф, ўта заиф исини бирдан таниди. Тоқатсизланиб, беихтиёр фингшиб юборди. Бироқ бу ҳид димогига қандай чалинган бўлса, щундай тез йўколди. Бундан унинг юраги алланечук гупуриб кетди. Со-вук ҳавони ютақиб ҳидлади. Заиф ҳид яна ўзидан дарак бергач, у Оқсийнанинг манзилини аниқлашга харакат қилди. Қаршисидаги тоф тизмаларига, чоғроқ водийга, арчазорларга илҳақ тикилди. Оқсийнани кўришига ошиқаркан, унинг ҳамрохи Яссибош ҳақида ўйлаб ҳам кўрмади. Дарвоке, ҳавода унинг иси сезилмас, демак, Оқсийна бу томонга ёлғиз йўл тортган. Ёлдор урғочи бўрининг сўнгги учрашувдаги араз, нафрат ва меҳрга тўла ғалати карашини эсларкан, келбатига ярашмаган бир оҳангда ангиллаб юборди. Ички ҳисга буйсуниб, ўша томонга қанот чикариб учгиси келди. Бироқ бунинг сира иложи йўқлигини тезда англаб, базур ўзини босди.

У икки ўт ўртасида қолганди. Оқсийнага пешвоз юрай деса, бу ёқда ғаним тўда. Ғаним тўдага қарни борай деса, у ёқда Оқсийна. Назарида, у бери келишга ботинолмай, арчалар орасида ўзини интиқ кутаётгандек

эди. Охири, ғаним тўдага нисбатан нафрати Оксийнага бўлган интилишидан устун чиқди. У шу ерда колиб, тўдани кутишга аҳд қизди, ҳам Оксийнанинг кўз ўнгидан бўлади, ҳам ортиқча харакатлардан кутулади. Салдан сўнг, Оксийнани йўқ-бор нарсалардан қизғана бошлади. Бу энди унинг учун янги ва нотаниш туйғу эди. Нелигини ҳали тўла идрок этолмаган бўлса-да, азоби қаттиқлигини сезди. Бир жойда тик туролмай, арчани айланди, ҳарсангга бориб суйкалди. Сўнг ербағирлаб ётиб, тумшувини қорга тиқди. Кор тагидан бир нима топгандай, даҳшатли тарзда ириллади. Ўнг панжаси билан кулоини тимдалади. Кейин ўрнидан сапчиг турив, сайхонлик бўйлаб кутириб юргургиси келди.

Аммо бунга улгурмади. Қиялик бошида тўсатдан пайдо бўлган Сарвар унинг ички тўлғанишларига халал берди. Овчини кўрган Ёлдор Оксийнани унуди. Корга узала тушиб ётган ҳолида унга нохуш тикилиб қолди. Негаки, ўзи томон аллақандай тўда эмас, ҳақиқий хавф якинлашиб келмоқда эди. Ундан факат кочиб кутулмок мумкин. Бироқ у кочмади. Оралиқ масофа узок, қочишга эса бемалол улгуради.

Ана одам боласи қияликнинг ярмини босиб ўтди. Ҳадемай сайхонликка етади. Ёлдор ноилож кетмоққа тараддуланааркан, овчининг хато йўлдан келаётганини сешиб қолди.

Ярок тутган одам у қолдирган издан юрмай, йўлни қискартириш ниятида қиялик билан сайхонлик ўртасидаги дўнгликни кесиб келарди. Дўнглик четида тўпланиган кор ҳамиша кўзни алдайди. Ёввойи жоноворлар бу хил хатарни тез англайди. Аммо одам боласи бу хусусиятдан йироқ. Ана у хавфли нишабликка тобора якинлашмоқда. Куйида эса водийга туташ қияликнинг тепа кисмида ўрага ўхшаш катта чуқурлик оғиз очиб туривди. Тушган жоннинг чиқиши жуда кийин.

Кетмоқ ўйида бўлган Ёлдор қайта жойига чўкиб, овчининг хатти-харакатларини жилдий ва синовчан кузата бошлади. Ва худди у кутган ҳодиса юз берди. Кор кўчиб, одам боласи чинқирганча ўра томон шўнгиг кетди.

Ёлдор ётган жойидан турив, баҳузур чўнқайиб ўтириб олди. «Қопқон», яъни ўрага тушган одам боласига ортиқ кайрилиб ҳам қарамади. Зоро, усиз ҳам ташвиши етиб ортарди...

\* \* \*

Сарвар чап оёғи синганини кейин, кор остидан бир амаллаб чиқиб олганидан сўнг сезди. Аъзонинг синиши кизиқ бўларкан, дўмбирадай шишиб, измингга буйсунмай қўяркан.

Боша, қаттиқ қўрқкан эмасми, эс-хушини жамлаши кийин кечди. Кейин ўзига келиб, ўрасимон кенг чукурлиқда ёттанини англади. Кор зарраларидан оқарган де-ворлари хийла баланд, арқонсиз чиқишининг иложи йўқлиги аниқ эди. У ётган жойдан Ёлдор чўнкайиб ўтирган сайхонликнинг бир қисми ва нураган қоя кўзга ташланиб турарди.

Ёлдорга нигоҳи тушиши билан у бирдан милтиғини эслаб қолди. Аммо яроғи ҳеч каерда қўринмас, чамаси кор тагида қолиб кетганди. У қаддини ростлашга уринди, чап оёғи бунга изн бермай, оғриқдан инграб юборди. Йигит оғриқдан ҳам кўра, аламдан кўпроқ инграмокда эди. Нега дегандা, гаровда ютқизгани энди кундай равшан. Синган оёқ билан бир иш қилиб бўлмаганидан сўнг, не ҳасратда йифнаган қўйларини Шойим йўғонга кўшкўллаб топширишга мажбур-да.

У корни чанглаб ингради, сўкиниб ингради, ту-такиб ингради. Бу изтиробли ҳолати кўзи бот Ёлдорга тушмагунча давом этди. Ҳайбатли тарзда чўнқайиб турган йиртқичга ғазабла бокаркан, бирдан жони омонатлигини пайқаб қолди. Сурувни бир зумга унуди. Қишқировли кунларда бўриларга ем бўлган кишилар ҳақидағи ҳикоялар эсига тушиб, даҳшатдан қалтираб кетди. Бу етмагандек, милтиғини ҳам йўқотиб ўтирибди.

У ёрдам сўраб бакирмоқчи бўлди. Бироқ кимсасиз бу тоғу тошларда бакиришдан бирон наф йўқлигини англаб, ўзини тийди. Кетига силжиб, тошdevорга суянаркан, ёндан пичофини чикарди. Негадир, унинг у ёқ-бу ёғига қараб қўйди. Тигини кўздан кечирди. Ҳарнечук, пичоқ анча далда бўлди. Ёлдорга, корнингни ёраман сени, дегандай бокди. Ёлдорнинг эса у билан иши йўқ, худди ов олдидан шерикларини кутаётгандек, шимолий-шарқий томонга тикилиб қолган, бир-икки бош бурганини ҳисобга олмаганда, Сарвар тарафга кия ҳам бокмаётганди. Бундан Сарварнинг кўнглига келгани шу бўлди: «Булар мени галаланиб емокчи!» Шунда ўзи

учун копқонга айланган «ўра» деворлари жуда паст түюлди. Нигохи билан йўқолган яроғини яна қидира бошлиди. Бу ишда Фуччи паканани айбдор деб билди. Йўл олдидан ҳар хил ноҳуш гаплар килмаганида, бу фалоқат йўқ эди, дея унинг етти пуштини қолдирмай, бирбир сўкиб чиқди. Илойим, хотинсиз ўтгин, деб ич-ичидан янди.

Сарвар ўлгудек иримчи эди. Овга жўнаркан, ортига кайрилиб қарамас, аёлининг қузатишига эса сира изн бермасди. Аёл кишининг «Вақтлирок қайтинг», «Шу бугунча бормай қўя қолинг», «Хавонинг авзойи ёмонку» деганга ўхшаш гаплари овчига факат омадсизлик келтиради деб ўйларди. Шунинг учун ҳам овга ҳамиша ими-жимида жўнаб қоларди.

Бугун эса бунинг имконияти бўлмади. Ишchan бир қиёфада овга ҳозирлик қўраркан, қўрада тимирскилануб юрган Фуччи пакана кутимагандан қошида пайдо бўлди.

— Ака, негадир кўнглим нотинч, — деди энгил-бошига илашган хас-хашакларни қоқиб-сукиб. — Сизга ҳамроҳ бўлсамми дейман...

Сарвар ғазабдан додлаб юбораёзганди: «Миянг қурсин сен эшакни! Бефаросат махлук! Ов олдидан ҳам шундай дейдими киши! Э, ноҳушланган ўша кўнглинга минг лаънат! Худо фаросат улашаётганда, қайси гўрда лаллайиб юрган эдинг? Башаранг қурсин, ахмоқ! Пакана!»

Аммо тилида бутунлай бошқа сўзларни айтди.

— Сиз ишингизни килинг, укам, — деди ҳар бир сўзни тишлари орасидан ситиб. — Ишдан қолманг. Ахир қўйларга кимдир қараши керак-ку.

— Ишни кип бўлдим, ака, — деди Фуччи пакана унинг тузи ўзгариб кетганидан ажабланиб. — Бу ҳавода сурувни ташкарига ҳайдамаган маъкул. Емишини бердим, сувини бердим. Қўлим бўш энди.

— Яхиси, сиз уйда қолинг. — Сарвар уни жеркин ташлашдан базур ўзини тийди. — Бирга юрганимизни кўрса, Шойим йўғонга Худо беради. Фирромлик қиласанлар деб бошимизни қотиради сўнг.

— Укасининг қорнига унинг, гапираверади-да!

— У шунчаки гапириб қўймайди...

— Сиз кетсангиз, уйда ўтиришим қийин бўлади-да, ака. — Фуччи пакана жаҳлланди. — Тоғ хавоси билан ўйнашганларнинг ҳоли не кечганини яхши биламан. Тоғ ёмон, у билан ҳазиллашиб бўлмайди. Ўтган йили иккитасининг жасадини қор тагидан мана шу қўлларим билан ўзим кавлаб олганман. Таращадай қотиб қолицган экан. Бундай ҳавода баланд-пастни биладиган одам билан юрганингиз маъқул дейман-да.

Сарвар унинг башарасига милтиқ қўндоғи билан туширишдан зўр-базўр тийилса-да, тилини тишламоққа ўзида ортиқ куч топмади. Оғзидан кўпик сачратиб бакиришга тушиди:

— Ов олдидан шу гапларни айтишингиз шартмиди! Қанака одамсиз ўзи, а?! Иримим бор деб, сизга юз марта айтганман-ку ахир! Одам деганам шунчалик пандавоки бўладими. Э-э, одам бўлмай ўлинг!

— Кўнглим нотинчланса не қиласай, — Фуччи пакана ёш боладай қунишиб олди. — Биздан хато ўтган бўлса, кечиринг, ака.

— Э, акаламай кетинг!

— Барибир қўнглим нотинч, ака.

— Яна гапирасиз-а!

— Мана, гапирмадик, — Фуччи пакана аразлаб қўра томон кетди.

Сарвар елкасини тошдеворга тираб, Фуччи паканани чангитиб сўкишда давом этаркан, ўз навбатида, уни ўзи билан эргаштириб чикмаганидан ўкина бошлади. Бу ёғига нима қиласини билмай боши гаранг эди. Ёлдорнинг шундокқина кархисида, милтиқ ўки етар-етмас ма-софада гўддайиб туриши эса аламини қўзғамоқда эди. Кизик, у на қочди, на бекинди. Нега қочмади экан? Илгари шарпасини илғаши билан жуфтагини ростлаб қоларди-ку. Ё ночор ахволдалигини, энди қўлидан бирор иш келмаслигини фаҳмлаб етдимикан? Унда бу бўри эмас, инс-жинсларнинг биродари экан-да. Туришини қара! Бекорга турмаганлиги аниқ, шерикларини кутаяпти у. Аммо осонликча жон берадиган ахмок йўқ! Устимга сакраши билан корнига пичоқ тикаман! Тикибтикиб оламан!

Сарвар қўлидаги пичокни ҳавода сирмаб, йўқ ғанимига зарба берган бўлди. Аммо Ёлдорнинг нечун сукутдалигини, шериги қўмагига муҳтоҷ жонивор бу тарзда

жим турмай, увлаб овоз бериши лозимлиги хақида ўйлаб ҳам кўрмади. Ҳакиқий овчи эмаслиги, бу борада ҳам панд бермокда эди. У жониворлар ҳакида дёярли ҳеч нарса билмасди. Билишгаям уринмасди. Жониворларга ўлжа сифатидагина қаарди. Бу иллатни мархум амалдор жўрасидан юктирганди. Жўраси чаток эди, осмондагини отиб, ердагини қоқиб, сувдагини тутиб ейман, дерди, бу ишда менга ҳеч ким монелик қилолмайди, дея чиранарди.

Аммо унинг амали-ю важоҳатидан зигирча чўчимай, қаршилик қилувчилар ҳамиша топиларди. Шулардан бири қищдаям даштда ўтов тикиб ўтирадиган Бойбўри чол эди. Чўлда уларнинг машинаси кўриниши билан отланиб чиқарди. Йўлларига кўндаланг бўлишга тиришарди.

— Шу одамни ҳеч тушунмайман, — дерди жўраси, тўхта, дея қамчи силкиб келаётган чолни осонгина четлаб ўтаркан. — Даштни топтаб ташладинг, жондор зотининг уругини қуритдинг дея, тирғалгани тирғалган. Чўл кенг бўлса, қанақасига биз уни топташимиз мумкин, а?

Сарвар теваракка лоқайд боқаркан, ўзлари қолдирган сон-саноқсиз машина изларини кўрса-да, ўзини кўрмасликка олади. Оғайнисининг кўнгли учунгина қайсар чолни сўккан бўлади. Сирасини айтганда, чўлда итдай изғиш унга умуман ёқмайди. У пистирмада ётиб, ов килишни хуш кўради. Аммо бу хақда жўрасига чурқ этмайди. Оғайниси эса унинг акси, кенглиқда бамисоли бўрондай кутуради. Машина фиддираклари остида топталган гиёҳларга ичи ачиган одамлар устидан ошкора кулади.

. — Бугунги кунинг нақд, эртанги кунинг эса омонаят, — дейди ёлғиз қолишгач. — Анови ахмоклар эса аллақандай келажакнинг ташвишини қилишади. Эртани ўйланг эмиш, замин топталмасин деб ота-боболаримиз дуч келган ерда эмас, маълум жойда кўпкари чопганмиш. Фалати-фалати гапларни топишади-я улар. Қайси гўрлардан кавлаб топишаркан бунақа гапларни, а? Кўйиб берсанг, бутун чўлга хўжайинлик қилишмоқчи бўлишади.

У канчалик осмондан келмасин, қайсар чолдан хиёл бўлса-да хайиқади. Буни билдирамасликка тиришади.

Тиришган сайин ҳадикланиши баттар сезилади. Бундай пайтларда Сарвар уни макташга тушади.

— Бу даштнинг хўжайини улар эмас, сиз, — дейди гулханга ўтин ташлаб. — Бунинг бари кўролмасликдан.

— Шуни айтинг.

— Агар сезган бўлсангиз, улардан ер иси келади, сиздан эса ҳаётнинг хиди гуркурайди, — Сарвар тилига келган бу ташбехдан рухланиб кетади. — Сиздан ҳатто ўлим кўрқади. Бу келбатингиз билан, минг йил десам ёлғон бўлар, икки юз йил яшашингиз аник.

— Икки юз йил кўп, зерикуб ўламан, — дейди жўраси тутундан ачишган кўзларини ишқалаб, мактovдан мамнун бўлганини яширмаган ҳолда. — Зерикмаслигим учун қариганимдаям овни канда қилмаслигим кепрак. Бизга юз йилиям етиб ортади.

Сарвар унинг келбатига ҳавасланиб боқади. Икки юз йил бўлмаса-да, юз эллик йил яшаши аник бунинг, деб ўйлади. Аммо кейинчалик бу башорати нотўғри чикқанида, у довдираб қолди. Инсон ҳаёти киприқдаги кўз ёшидай омонатлигини англаб етгандай бўлди. Ажал деганлари одамзоднинг на келбатидан ҳайнқаркан, на амалидан. Лозим топган куни жонини олиб қўяркан.

Мана энди ажалнинг совук панжаси унинг ёқасида. У ё бўриларга ем бўлади, ё совуқдан тарашадай қотади. Дарвоқе, совук ҳалитдан ўз заптига олмоқда. Бу ёқда оёғи азоб бермоқда. У бўрини ўйлабди-ю, совуқни хаёлига ҳам келтирмабди. Ахир тоғда тунги совук бўридан даҳшатлироқ-ку. Оёғи синмаганида бир нави эди, «қопқон»дан чиқишига уриниб кўрарди. Айтганча, Ёлдор бир уни деб шу ўрага тушармикан? У деворларга синчков бокди. Йўқ, тушолмаса керак. Яна ким билади. Корни очган йиртқичлар ҳеч балодан тап тортмайди дейишади-ку.

У ўзи сезмаган ҳолда инграб юборди.

Ёлдор унинг овозини эшитгандай, ялт этиб қарди-ю, яна олдинги холатига қайтди. Ниманидир кутаётганилиги бутун вужудидан аник сезилиб турарди. Буни ўзича англаған Сарвар бот ингради.

Ўлимга юзма-юз келиш накадар ноҳушлигини у илк бор хис қилмоқда эди. Шу пайтгача даштда қанчадан-қанча жониворларнинг жонига зомин бўлмади. Қувлаб отди, пойлаб отди, суюниб-суюниб, кулиб-кулиб отди.

Овнинг завқини обдон тотди. Токка келиб ҳам тек турмади, касалман деб ўтирамади. Яроқ кўтариб ўрга чиқди, кирга чиқди. Кейин итимнинг хуни дея, Ёлдорнинг кетидан тушди. Сўнг эса, унинг жони эвазига қўлига тегиши мумкин бўлган сурувни дея, тиним нима, билмади. Охири етган манзили шу — ўрасимон кенг чуқурлик уни ўз бағрига олди. Инграшдан бошқасига ярамай ўтириби.

У яраланган жониворларнинг мунгли нигохларига кўп бор дуч келган. Уларнинг жон тадвасасида тўлғонишиларини кўп кузатган. Сўнг ўзича раҳм қилиб, пиҷонини ишга солган, гоҳида бир ўқ билан тинчитган. Бундай пайтларда жўраси уни мактарди. У эса мақтовдан масрур тортарди. Уста овчилардек теваракка мағрур бокарди. Шунда бутун чўл ёлғиз ўзига дахлдордек туюларди.

— Боласи, лекин семизгина экан, — дерди кейин, бундан зўр кабоб чикади, деган охандга.

— Онасининг қочиб қутулгани чин бўлсин, — дерди жўраси мамнун қах-қах отиб. — Лекин кейинги сафар албатта жонини суғуриб оламиз.

Улар жон олмокка моҳир, лекин ўша жоннинг азобланишини, уволини ҳис этмоққа ожиз эдилар. Бу тўғридаги гап-сўзлар дўстлар учун чўпчак туюларди. Чўнчагингизни бошқа бирорларга бориб айтинг, дейишарди Бойбўри чолга ўхшаганларга. Аммо қайсар чол сира бўш келмасди, шошмай турларинг, уволи тутади хали буларнинг, дерди тутокиб.

Ўртада олов, хавода кабоб хиди анқиган, нарида эса вайсаки отлик чол. Жўраси кўпда парво килмасди. Лекин Сарварнинг ичи тор эди. Осмонга кетма-кет ўқ узиб, отлик чолни ҳайдаб соларди. Сўнг ортидан сўкиб-сўкиб коларди.

Энди ўйлаб кўрса, Бойбўри чол ҳакка ўхшайди. Жўраси эрта ўлим тоғди. Ўзи эса кимсасиз тоғу тошда ажалга рўпарў келиб ўтириби. Боқицлари мунгли, кўзлари ёшли... Уйда болалари кутаяти, хотинининг фикр-хәёли унда. Ҳашаматли иморатнинг чап қаноти хали битмаган, кичик ўғли хали суннат қилинмаган. Келаси баҳорда тўй қилмоқчи эди. Қўшиси Зиёд калдан ўтказиб зиёфат бермокчи эди. Наҳотки, энди ҳаммаси сабил қолса?! Ҳаётининг интихоси бу қадар аянчли —

сүнгги күним топган мәнзили мана шу ўрасимон чукурлиқ бўлса!

У ич-ичидан хуруж қилиб келаётган йиғини босиш учун тишларини маҳкам сикди. Йиғиси инграшга коришиб, хунук бир сас қасб этди.

\* \* \*

Ёлдорнинг эса у билан мутлақо иши йўқ эди.

«Ўра»даги одам боласи сичкондек безиён, ахволи ўта хароблигини инграшиданоқ сезганди.

Одатда, зийрак жониворлар сасга қарабоқ, ҳолат ва вазиятни тез илғайдилар. Шунинг учун ҳам овлоқ жойда бўрига рўпарў келган тоғликлар овоз чикармасликка уринадилар. Нега деганда, бўри зоти овозингданоқ кимлигинг ва нималарга қодирлигингни тез фахмлади. Табиийки, бу хусусият Ёлдорга ҳам бегона эмасди. У чукурликтаги одам боласининг инграшинигина эмас, бир чақирим наридаги арча новдасидан тўкилган кор сасиниям сезиб, билиб турарди.

Хозир унинг бутун диккати шимоли-шарқий томондан бостириб келаётган ғаним тўдада эди. Ошиқмайроқ илгарилаётган галанинг жирканч хидини баралла туймоқда эди. Ўз навбатида, қаршисидаги чоғрок водий тарафдан Оқсийнанинг дарагини сезмоқда эди. Ёлдор гоҳ йўқолиб, гоҳ пайдо бўлаётган бу хидан Оқсийнанинг нозини пайқаб турарди. Бирок у безбетларча босиб келаётган тўда билан ора очди қилмай, Оқсийнага пешвоз юролмасди. Бир гап билан айтганда, худуди хавф остида турганда, кўнглига «ёр» сиғармиди.

У юз бериши муқаррар бўлган тўқнашувга жиддий хозирлик кўра бошлади.

Хавф жуда узоқ куттирмади.

Тоғда аччиқ изғирин кучайган бир паллада сайҳонликнинг нариги бошидаги харсанг ортидан беш-олти чоғли бўри, ошиқмай, бирин-кетин чиқиб келди. Тўдани Сариқтўш деган арлони бўри бошқаради. Сариқтўш у қадар жуссадор бўлмаса-да, табиатан анча чайир жонивор эди. Тезоб ва бир оз тажанглиги хатти-харакатидан сезилиб турарди.

Унинг кўзи Ёлдорга тушгач, харсангдан беридаги текис майдончага келиб чўнқайди. Шериклари уни тевараклашди.

Тұда кенгапа бошлади.

Агар галада она бүри Оқманглай бүлмаганида, кенгаш узокқа чүзилмасди. Қизиққонлик қиласынан шешілгенде Сариктүш әмас, Оқманглай босди. Құп балоларни бошидан кечирған бу кекса йирткіч каршиисида қандай жонивор турғанини яхши биларди. У Ёлдорда бир вактлар бу тоғларда дахшат солиб яшаган Оқтишнинг тимсолини күрганди. Аммо буни бошқаларга үқтириш бесфойда әди. Бүри зоти ўтмиш билан әмас, бугуни билан яшайди. Күз олдидаги нарсалар билан ҳисоблашади. Ўтмишда яшаб ўтган аллақандай Оқтиш билан уларнинг неча шуллук ишлари бор. Гүддайған манови ахмоқнинг боплаб адабини бериш керак-да, йўлларида давом этишлари керак, тамом-вассалом.

Кекса бүри яна бир нарсаны хис қилғанди. Бутун вужудидан күч ёғилиб турған Ёлдор хар қандай урғочи бүри орзулайдиган жонивор әди. Ўзидан соғлом зурриёт қолдиришни истаган она бүрилар унга беэътибор қара-ёлмасди. Аслида водий томондан якинлашаётган Оқсийнанинг дарди ҳам шу әди. Яссибош ўққа учиб ўлғандан сўнг, кўнглида аллақачон туғилған майлни амалига ошириш учун Ёлдорни истаб қолғанди. Фақат яқин келмокқа юраги чопмай, арчалар орасида сандироқлаб, ўзи-ча нозланиб юради. У Ёлдор ўзини бирнасда топиб олишини яхши биларди. Шунанда қорга ётиб эркаланмоқчи, қочган бўлиб, куйдирмоқчи әди. Аммо у кутган дақика чўзилғандан чўзилиб, Ёлдор жойидан қўзғолай демас, гўё коя пойида музлаб қолғандек әди.

Кекса она бүри Оқманглай эса Ёлдорга мойиллик истаб әмас, қандайдир ички бир меҳр билан бοқаркан, гўзал ва навқирон бу вужудга зиён етказишларини хоҳламади. Шу лахзада мураккаб, сирли, қудратли бир сезги она бүри юрагида тўлкин ура бошлаганди. У Ёлдордаги ўзига хосликни оналик туйғуси билан илғашга улгурғанди. Ёлдор каби жониворлар табиатнинг эхсони хисобланади. Бүрилар наслининг давомийлигини таъминлайдиган зурриётлар асосан мана шу хил жониворлардан тарқалади. Акс холда зот майдалашиб, хашаки-лашиб, бора-бора йўқликка юз тутиши мумкин. Қисқаси, соғлом ва кучли вужуд мудом тебранища бўлган ҳаётий мувозанатни бир маромдада тутиб туришга хизмат килади. Табиат эса бу ҳақиқатни илғай билиш

туйғусини деярли барча она бўрилар идроки ва юрагига жойлаган ва бу сезги фавқулодда ҳоллардагина юзага калқыйдй. Бироқ арлони бўрилар бу хисдан йирок, қайтамга улар «зўр»ни тезроқ гумдон этиши пайдади бўлишади ёхуд унга бир умр бўйсуниб юришади. Ҳархолда арлони бўрилар ўзидан зўррокларни учалик ёқтиришимайди. Имкон туғилини билан қарши чиқицига уринишади. Шунинг учун ҳам кўп ҳолларда жанг тақлирини ургочи бўрилар хал этади. Ортиқча ва заруратсиз зиёну шикастдан тўдани омон саклашга тиришадилар. Айрим ҳолларда бунинг акси ҳам бўлади. Бу энди она бўрининг кайфияти ва фаросати, шунингдек, тўдада тутган ўрнига боғлик.

Кекса бўрининг тўдалаги мавкеи ҳавас қиласи даражада эмасди. Бўзбўри нобуд бўлганидан сўнг парокандалик юзага келиб, тўда иккига бўлиниб кетган. Сариктўш шу кичик тўдани зўрга бошқаарди. Ёш бўрилар бўйсунишни истамагани туфайли ўртада тез-тез низо чиқиб туарарди. Сариктўш тезоб ва анчагина фаросатсиз эди. Акс ҳолда бир. вакълар Бўзбўридек кучли бўрини осонгина енгтан рақибиға нисбатан озгини андеша саклаган, тўқнашмасликнинг чорасини кидирган бўларди. У эса тезроқ Ёлдорни бир ёқлик қилиб, йўлда давом этишини ўйларди. Колганлариям шу истакда ёнарди. Ёлдорнинг викорли хезланиб туриши уларнинг ёмон фашига тегмоқда эди. Айниқса, иккита ёш бўрининг тоқат килишлари жуда кийин кечмоқда эди. Тўдабошини сусткашлиқда айблаб, ириллаб-ириллаб қўйиншмоқда эди.

Аслида тўда Ёлдор билан тўқнашгани эмас, узок, жуда узокдаги даштни қоралаб йўлга чиқишиганди. Улар бу худуд орқали ўртатоққа этиш ва сўнг Куратоғ ёқалаб бориб, Бургутқўнмас кояси бикинидаги тор сўқмокдан Ялангкирга ўтиб, адирлик оралаб даштга тушишини мўлжаллашганди. Дашт бўрилари билан юз бериши мумкин бўлган олишувларни ҳисобга олмаса, у томонларда кунлари ёмон ўтмайди.

Агар тўданинг изми Оқманглайнинг ихтиёрида бўлганида, Ёлдорнинг авзойини кўрибоқ, изига қайтган, галани Узундарага бошлаб, Чўнгтоғни қора тортарди. Бу йўналиш узок бўлса-да, хавфсиз эди. Бироқ уни тингловчи йўқ, ёш бўрилар конли жанг хуморида ти-

пирчилашарди. Бир ҳамла билан Ёлдорни маҳв этиш иштиёқида ёнишарди. Одатда, йўлда учраган ҳар қандай юв мана шу тарзда тез бартараф этилади. Ортиқча начакиланиб ўтирилмайди. Уларнинг назарида, кенга什 жуда узоқ чўзилгандай эди.

Оқманглай тўдадаги озигина мавқеидан фойдаланиб, сўнгги чорани ишга солди. Уларни рақибга қарши яккама-якка жангта чорлади. Сариқтўшининг гарданига суйкалиб, кор тўзгитиб кетма-кет ириллади, яъни, силар қўрқсаларинг ўзим майдонга тушаман, деган бўлди. Турган гап, яккама-якка жанг ҳамиша тўдабошининг зиммасига тушади. Бундан у бўйин товлаётмайди. Акс ҳолда тўда унга ортиқ буйсунмай кўяди.

Тўданинг кучига ишониб, ўзича замзама килаётган Сариқтўш кийин ахволда қолди. Ёлғиз ўзининг рақибга қарши туриши анча мушкулга ўхшайди. Вакт йўқотмай, иссиғида хужумга ўтиши зарур эди. У бошлиб берарди, шериклари эса охирига етказарди. Кўпчилик барабири кўпчилик-да. У бу усулдан ҳамиша усталик билан фойдаланиб келарди. Агар кекса она бўри ишни бузмаганида, бир ҳамладаёқ Ёлдорни йўлдан олиб ташлашган бўларди. Энди қалтис бу вазифа ёлғиз унинг зиммасига тушиб турибди. У бир зум тараддуланиб қолди. Аммо узоқ хаяллаб ҳам бўлмасди. У ёш ҳамроҳларининг ўткир ва синовчан нигоҳларини бутун вужудида ҳис этаркан, ноилож жангга хозирлик кўра бошлади.

У хўжакўрсинга жағларини кенг очиб эснади. Белини букиб узоқ керишиди. Ва сўнг вахшатли ириллаб, аста рақиби сари юра бошлади. Колган шериклари эран-каран унга эргашдилар.

\* \* \*

Сарварни уйку элита бошлади. Ёкимли бу мудрок музлаш аломати эканини у яхши биларди. Агар вақтида эс-хушини йиғиб олмаса, бу уйку мангулликка айланishi мумкин. Бунинг учун эса ҳаракат зарур.

У аввал кўлларини кимиirlатди. Сўнг танасини. Кесакка айланган чап оёғида кучли оғриқ қўзғалиб, у додлаб юборди. Жони азобланса-да, ҳар ҳолда уйқуси ариди. Лекин қачопгача? Пенонасида музлаб ўлиш бор экан, кочиб қаёққа ҳам боради? Бундан кўра анови лаъ-

натига ем бўлгани афзал эмасмиди! Ёлдор эса уни гўё  
емоқдан ор килгандай, ҳатто қайрилиб қарай демасди.  
Худди музлаб қолгандай, қилт этмасди.

Э ўйдаймай ўл!

Аслида улар аллақачон бир-бирларига кўнишиб  
бўлишганди. Ёлдор учун у йўқдек, Сарвар ҳам унга ор-  
тиқ ғаним кўзи билан қарамай қўйганди. Бошдаги хаёл-  
лар уни энди таажжубга солмоқда эди. Шу пайтгача у  
бўри деганда йирткич ва тажовузкор махлукни кўз ол-  
дига келтиради. Унинг ириллаб чуқур атрофини айла-  
нишини ва пайт пойлаб, устига сакрашини кутган эди.  
Ахир у ўз оёғи билан «қопқон»га тушганди-да. Қопқон-  
даги жониворни инсон бирпастда саранжом қилганидек,  
у Ёлдордан ҳам шуни кутганди. Ёлдор эса лоақал жойи-  
дан жилишни лозим топмади. Вахимада қолган Сарвар,  
шерикларини кутаяпти, деган ўйга борганди. Бироқ  
хануз шерикларидан дарак йўқ, ёлғиз ўзи кўқкайиб ту-  
риби.

Нимани кутаяпти ўзи бу?

Бироқ бу саволга жавоб толишга унинг ақли ожиз-  
лик қиласарди.

Сарвар ўзини зўр овчи хисобласа-да, бўрилар  
ҳакида билгандари одамлардан эшигтан турли ривоятла-  
ру афсоналар эди, холос. Эмишки, бўри оч қолса, ҳатто  
томни тешармиш, яна эмишки, агар у қасдланса, ўчини  
олмасдан қўймасмиш. Томни тешган жониворга у ётган  
чуқурга тушиш нима бўпти. Енгилгина бир сакраса  
бўлди-да.

Ўзи қасдлангани учунми, Ёлдорни ҳам қасдда юриб-  
ди деб ўйлаганди. Пичноини яланғочлаб, турли ҳаракат-  
ларни машқ қилгани шундан эди. Қайтамга, ўрта ерда  
қўлининг музлагани қолди. Охири у пичноини корга  
санчиб, кух-кухлаб, кафтларини иситишга тушди. Ора-  
да чуқурнинг нишаброқ бўлиб кўринган девори томон  
силжиб, ундан чиқиши ўйлади. Оқибат, барча уриниш-  
лари бехудалигини, ярадор оёғи билан юкорига тирма-  
шиб бўлмаслигини англааб, судралиб яна жойига қайти.  
Ёлдорни кўриб туришни истади. У ғанимининг ҳаракат-  
ларидан огох бўлиш учун эмас, ёлғизликдан кўрқди.  
Хархолда Ёлдор тирик жон, юрагига далда бериб тура-  
ди. Акс ҳолда қор босган бу тогу тошлар ўзини ютиб  
юборадигандек эди.

У бу тоғлар қаршисида ўзини күм заррасидан ҳам майда ҳис қылмокда эди. Ҳолбуки, бир неча соат бурун бу дунёга сиғмайдигандек эди. Орзу ўйлари ҳам бисёр эди. Гаровда ютқазиб күйиши ўлим билан тенгдек эди. Энди эса бунинг бариси ўз аҳамиятини йўқотган, жонидан ўзгаси кўзига кўринмасди.

Сўнгти онларда уни икки бор уйқу элитди. Теварагидан кетмай, аста айланишаётган ажал шарпаси ғоят маккорлик билан ўлим тўрини ташлашга уринаёттанини сезиб турарди. Унга ҳар гал чап бериш қийинлигини, агар шу созда миқ этмай ўтираверса, ажал осонгина ўз ниятига етишини яхши биларди. Йигитни, айни дамда у маҳрум бўлган, ҳаракатгина кутқариб қолиши мумкин эди. Бир сафар чўлда шу йўл билангина омон қолишганини у ҳануз эслайди.

Ов пайтида машиналари чўл ўртасида бузилиб қолганида, амалдор жўраси кўп ўйлаб турмай, йўл тадоригини кўра бошлаган.

— Машина-чи? — деган у жўрасига эргашишни ҳам, эргашмасликни ҳам билмай. — Машина колаверадими?

— Унга ит ҳам тегмайди, — деган жўраси. — Бу ерларга ҳафта-ўн кундаям бирор оёқ босмайди.

— Ҳарҳолда...

— Машина жондан азиз эмас-ку, биродар, — жўраси аччик ҳақиқатни айтишга жазм қилди. — Агар бу ерда қолсак, машинадангина эмас, жондан айриламиз. Машинани ёкиб ҳам бу балодан қутулишимиз қийин. Бизни факат ҳаракат қуткаради. Чўпонлар қўйнолғасига етиб олсак марра бизники. Акс ҳолда жонингиздан умид узверинг!

Улар туфланган тупук ерга тушмай яхлайдиган соvuқда йўлга тушишган. Сарвар юра-юра ғалати бир сархушликни ҳис қила бошлаган, уйқу тортаёттанини сезган. Жўрасининг хай-ҳайлалашлари ортиқ қулогига кирмай кўйган. Шунда кутилмаганда кўймичига кучли тепки келиб тушган.

— Агар яна мудрасангиз, қўндоқ билан ураман! — деган жўраси уэр сўраш ўрнига дағдаға килиб. — Ухламанг! Уйку — ўлим! Сабр қилсангиз, ҳадемай чўпонлар қўнағасига етамиз.

Жўраси милтиқ қўндори билан урмаган-у, лекин йўл бўйи яна уч бор ўхшатиб тепган. Жаҳлини кўзитиш

учун хунук сўзлар билан сўккан. Хафа бўлишга эса унинг ҳоли етмаган, тепкилар кучсиз, нордон сўзлар таъсирсиз, опиоқ қор босган чўл чексиз туюлган. Кейин эса, оғайнисидан анчагина ўпкаланиб юрган, ўшанда мени ёмон тепгансиз, деб. Жўраси музлаб ўлишнинг сирасорини яхшилаб тушунтиришга мажбур бўлган. Унинг айтгандари мана энди-аскотаяпти. Бироқ ҳаракатсиз одамга бу вақтингчалик чора эканини ҳам фахмлаб турарди. Имкони борича уйку тўрига илинмасликка тиришарди.

Ўшанда оғайнисидан ҳар тепки еганда, у ўксик ўйларга берилган. Нега мен бунга дум бўлиб юрибман ўзи, деб ўйлаган. Амалигаям, ўзигаям тупураман деган. Тупуришга курби етмаслигини сезгач эса, негадир талаба йигитни эслаган. Унинг аччиқ сўзларида қандайдир ҳақиқат мавжудлигини ҳис қилгандай бўлган. Лекин нелигини англаёлмаган. Англашга эринган. Навбатдаги тепки тушиб колмаслиги учун йўргалашга уринган. Кейин гаплашаман сен билан, дея ўзини тинчлантиришга ҳаракат қилган. Ана шунда караҳт шуури қатидан талаба йигитнинг истехзоли чехраси қалқиб чиқкан: «Бекорга чиранаяпсиз!» деган. Кутуриб сўкинмоқчи бўлганида, у кумга сингандек кўздан йўқолган. Ортидан турткилаб келаётган жўраси эса буни ўзича тушунган.

— Сўкининг, сўкинаверинг! Фақат ухламанг! — деган. — Онадан сўкинасизми, отадан сўкинасизми, мутлақ хафа бўлиш йўқ. Лекин ухламанг, илтимос!

— Сизни сўкаёттаним йўқ. — У хушёр тортишга уринади. — Сизни сўкиб ўлибманми! Ахир сиз... Сизни сўкиб бўладими!

— Йўқ, сўкинаверинг.

Тун пардаси чулгай бошлаган дашт қаъридан яна талаба йигит тиржайиб чиқади: «Айтдим-ку, бекорга чиранманг кўп деб! Сўколмайсиз! Чунки сиз одамларни табақалаштириб, шунга караб муомала қиласидиган пасткаш бир кимсасиз. Эрта бир кун бу амалдан кетса, ҳол сўрашга ярамайдиган бандасиз! Яна айтайми кимлигинизни?..» Сарвар қўлини тўлраб, уни ўзидан нари ҳайдамоқчи бўлади. Аммо елкасига келиб тушган турткидан мункиб кетади. Қаддини базўр тиклаб, каршисида тагин

совук даштни кўради. Даشتнинг узок бир бурчидаги  
липиллаётган чироқка кўзи тушади.

— Энди ўлмаймиз! — дейди ҳикиллаб.

— Ўлишингизга йўл ҳам кўймаймиз-да! — дейди  
жўраси шодон ва толғин овозда. — Ухласангиз, яна  
туртаман!

Буни карангки, совук даштда ғашига теккан талаба  
йигит бу ерда ҳам уни тинчига қўймаётган эди. Истехзо-  
ли кулимсираганча нуқул ухлашга ундарди.

— Ухланг-ухланг! Бахузур ухлайверинг!

Мудрай бошлаган Сарвар тўнғиган лабларини базўр  
қимирлатади.

— Мумкин эмас, ухласам — ўламан.

— Бу билан дунё ҳеч нарса йўқотмайди, ухлайве-  
ринг!

— Биламан, қўйнингда тошинг бор.

— Менда тош нима қиласди.

— Унда нега мени ёқтиримайсан?

— Дунёқарашингиз жуда кир-да...

— Лекин мен ҳам сени ёмон кўраман!

— Сиз ўзингиздан бўлак, ҳеч кимни яхши кўрмай-  
сиз.

— Тўғри топдинг лекин.

— Шунинг учун ҳам ухланг деяпманда.

— Тонг отсин, сен билан кейин гаплашаман!

— Сизни тонгингиз отармикан?

— Бунча тилинг заҳар-а?

— Бўларим шу.

— Таъзиингни бермасимдан, корангни ўчир!

— Сиз эса, ухланг.

— Э, йўқол!

Сарвар мункиб, уйғониб кетади.

Кўзларини очиб, дўнгда бир гала корани кўради.  
Карасаки, бир тўда бўри. Умри бино бўлиб, бунча бўри-  
ни бир ерда йиғин холда учратмаганди. Аммо юрагида  
кўркув туйғусини ҳис қилмади. Ахир тўнғиб ўлдинг ни-  
ма-ю буларга ем бўлдинг нима — бари бир гўр эмасми.  
У нарида ях қотган корга санчиб кўйилган пичоғига кўз  
кирини ташлаб кўяди. Лекин уни қўлига олишга интил-  
майди. Бошини деворга суюганча, юқорига локайд тики-  
лади.

Бир оздан сўнг дўнгдаги воқеани, яъни Ёлдор ганим тўдага қарши тии қайраб турганини секин-аста фаҳмлай бошлади. Ёлдорнинг холати жуда бежо эди. Яғрин тукларини хурпайтирганча, қоя янглиғ қотиб турарди. Ганим томон эса бу «коя»га урилиб, чилпарчин бўлишдан чўчиётгандек эди.

Охири улардан бирининг сабри тугади шекилли, тўдадан ажралиб чиқди. «Коя»га бирдан ташланмай, ириллаганча унинг атрофини айлана бошлади. «Коя» — Ёлдор, бошини бир оз бурганини демаса, килт этмай тураверди. Чамаси, унинг назари тараддулданаётган бошқа бўриларда эди. Теварагини айланаётган йиртқични унча писанд қилмаётгандек эди. Шунда Ёлдордан сал нарида чўнқайишган бўрилар сафидан яна бири олдинга интилди. Аммо у кутилмаганида иккинчи бир бўри томонидан қайириб ташланди.

Кўз ўнгига юз берәёттан бу манзара Сарварга жуда кизик туюлди. Хаяжонданми, танига кон югуриб, жиндек исигандек бўлди. Бу орада хануз ириллаб айланаётган йиртқич тўсатдан Ёлдорга ташланиб колди. Ўртада олатасир олишув бошланди. Итларнинг ўзаро талашганини кўп бор кўрган Сарварнинг Ёлдорга раҳми келди. Негаки, одатда, бегона ит бошқа итлар томонидан жамлиқда аёвсизларча таланади.

Бирок у кутган ҳодиса юз бермади. Дўнгда саф тортганча олишувни кузатаётган бўрилардан бирортаси жангга аралашмади.

Сарвар таажжубдан донг қотди ва хаёлига келгани шу бўлди: «Э, тавба! Жондорлар йигитларча уришаркан-ку!» Унинг синчков нигоҳи манглайида қашқаси бор жониворнинг харакатларини назардан қочирмади. Оқманглайли бу йиртқич жангни кузатишдан кўра, кўпроқ сафдаги бошқа бўриларга кўз-кулок бўлиб турарди. Ана, у яна бир шеригини ортга хайдади.

Бу иккиси эса корни тўзғитиб, бешафқат олишарди. Ганими зўр, Ёлдор эса ундан-да кучлироқ эканлиги тезда аёнлаша бошлади. Ганим тўсатдан ангиллаб юборди. Ёлдор навбатдаги ҳамлага ҳозирлангунча бўлмай, у думини қисганча қочиб колди. Шериклари унга эргашди.

Тўда майдонда Ёлдорни ёлғиз қолдириб, бир зумда кўздан ғойиб бўлди.

Ёлдор дүнгде бир оз чүнқайиб ўтири. Тумшугини чүзип хид олди. Қор босған водийга узоқ тикилиб қолди. Сүнг ошикмай изига қайта бошлади. «Ўра» ёнидан ўтаётганды, андак тұхтади. Сарварга шунчаки бир күз ташлаб, яна йўлида давом этди.

Бу вактта келиб Сарвар бўри зотидан умуман чўчи-май қўйганди. Ёлдор хакидаги дастлабки ўллари энди унга жуда кулгили туюлмоқда эди. Аммо унинг кул-моқка чоғи йўқ, бўрилар олишуви пайтида хаяжондан хиёл қизиган вужуди тағин совқота бошлаганди. У Ёлдорнинг ўрнида ити бўлмаганидан ўқинди. Агар Диккикулօқ тирик юрганида, уни бу ҳолга ташлаб қўйма-ган, аллақачон кишлоқдан одамларни бошлаб келган бўларди. Диккикулօқнинг котили эса унга шунчаки бир караб ўтди-кетди. Бироқ у негадир Ёлдорга нисбатан ғазаб ҳис килмади.

Юкорида музлаган корнинг қисирлаши эши билганда, тағин унинг кўзи илина бошлаганди. Ўлимга чорловчи бу уйқу шу кадар ширин эдик, ортиқ кўз очишни истамай турганида, Фуччи пакананинг овози эши билди.

— Ия, ака, нима ётиш бу?!

Сарвар кўзларини очиб, «Ўра» оғзида анграйиб, хам кувониб турган Фуччи паканани кўрди.

— Изингизни олиб келаяпман, — деди у «Ўра»га тушмоқ учун қулай жой қидириб. — Кўнглим сезгани бўлти-да. Ёмон йиқилмадингизми ишқилиб? Ҳозир ол-дингизга тушаман.

— Тушманг! — Сарвар жонланиб, қўли билан, тўхта, дегандай ишора қилди. — Туша кўрманг! Баригири фойдаси йўқ. Оёқни синдириб олганман. Аркон кепрак.

Бу гапдан сўнг Фуччи пакана чукур оғзида бир зум серрайганча туриб қолди. Негадир у ён-бу ён қаранди. Кейин сўрагани шу бўлди.

— Э, милтиқ қани?

Сарвар шу тобда кўзига ҳар қандай туғишганидан зиёда бўлиб қўринаётган йигиттга жилмайиб караш билан чекланди.

— Тушунарли, — деди Фуччи пакана ҳеч нарсани тушунмаган бўлса-да. — Ҳозир одам бошлаб келаман. Аркон ҳам олиб келаман. Эмасам, кетдим мен.

У қасир-қусур кор босғанча тезда күздан йўқолди.

Сарвар тошдеворга беҳол суюнди. Негадир йиғлагиси келди. Қувончданми ё ғамданми, ҳар холда ич-ичидан нимадир тўлқин уриб келмоқда эди.

У жилмайган кўйи йиглай бошлади.

\* \* \*

У Фуччи пакана бутун қишлоқни бошлаб кслади деб сира ўйламаганди. Қишлоқда эркак борки, деярли бари келганди.

Эпчил йигитлар арқонга осилиб, осилмай чуқурга туша бошладилар. Турган гап, Фуччи пакана ҳаммадан кўра кўпроқ жон куйдиради. Бакириб-чақириб йўл-йўриқ кўрсатишга тиришарди.

— Шунча одамни овора килишингиз шартми? — Сарвар хижолат тортгалини яширолмади. — Кишини уятга кўйдингизда.

— Э, нимаси уят бунинг! — Фуччи пакана ўқтам овозда шангиллади. — Одам одамга шундай пайтда қайишмаса, кай пайтда қайишади. Мен бировга юр демадим, овоза қилдим. Аммо лекин Ботир ака билан Султон акага юринг деганим рост. Бошқаларнинг ўзлари келишди. Элчилик-да, элчилик! Элдан айланай! И-и, оғрияптими?

— Йигитлар, эҳтиёт бўлинглар! Зокир, сен пастдан тут! Жуда имилладингда, Абдурайим! Ҳа, шундай. Барракалла! Арқонни қориндан эмас, қўлтиқ тагидан сол, шунда тортиб олиш осонроқ бўлади.

У Шойим йўғонга «ўра» оғзида рўпарў бўлди. Шойим йўғоннинг кўзларидан тўнглик ариган, бошқалар каби ҳамдардлик билан бокиб турарди. Йигитлар кўкрагини сириб турган арқонни еча бошлаганида, у Шойим йўғонга юзланди. Ҳеч бир ички изтиробсиз деди:

— Ака, сиз ютдингиз.

Аммо Шойим йўғон у кутганчалик қувонмади, иргишламади. Қарашлари бир оз тўндашди-ю, лекин ҳеч қандай ўзгариш юз бермади. Оғзидан оппоқ ховур чиқариб, муштумига йўталди. Кейин бирдан эсига тушгандай, ошиғич бир харакатла устидан қалин пўстинини

ечди-да, совуқдан калтирай бошлаган Сарварнинг елка-  
сига ташлади.

— Бир нима дегандай бўлдингизми? — деди сўнг  
хардамхаёл охангда.

- Гаров...
- Эсадан чиқаринг!
- Ахир...
- Кўп майда гап бўманг!
- Лабз...
- Сурув меникими?
- Сизники.

— Унда мен уни омон қолган жонингизга сийлов  
килдим. Каттазанглик қилмаганингизда шу балолар йўқ  
эди. Бундан сўгин давлатингиз билан мақтанманг! Агар  
жуда ошибб-тошиб кетган бўлсангиз, ярмини, ана, пака-  
нага беринг. Куймайсиз. Жонингизни омон сақлаб қол-  
ган шу-да.

Одамлар орасидан Фуччи пакананинг норози овози  
эшитилади.

- Ака, менинг отим бор!
- Узр, Фуччи ака, -- Шойим йўғон кулади. — Тил  
курфур бесуяклик қипти. Минг бор узр.
- Сизга одамни қалака килиш бўлса... — Фуччи па-  
канга тўнғиллай-тўнғиллай унинг узрини қабул қила-  
ди. — Бундан сўнг эшиitmай, қаттиқ хафа бўламан.

Кор устига ёзилган чакмонга авайлаб ётқизилган  
Сарварнинг кўзи наридаги нураган қояга тушаркан,  
унинг пойида содир бўлган бугунги воқеани эслади. На-  
зарида, Ёлдор уни бошка бўрилардан химоя қилгандек  
туюлди. Ёлдор кувиб солмаганида, улар мени тирик  
қўймасди, деган хаёлга борди. Бу ўй илгарироқ миясига  
келмаганидан ўкинди.

— Ака! — деди Шойим йўғонни ёнига имларкан,  
овози товланиб. — Шу... Ёлдорга тегмасак! Оддий жон-  
дор десам, зўр йигит экан у! Кўйинг, ўз майлида юра-  
версин!

— Бизам шу ўйдамиз, — деди Шойим йўғон нима-  
нидир англағандай. — Майли, ўз эркида юраверсин.

\* \* \*

Ўша куни оқшом Фуччи пакана янги гап топиб келди.

Бу пайтда Сарвар иссиқ хонада, печкада гуриллаб ёнаётган ўтга хаёлчан термулганча, одамларнинг ғамхўрлигидан эркаланиб ётарди. Тахтакачланган оёғи қўшини кампир қўйиб берган курси устида, қандайдир гиёҳ қўшиб дамланган чойдан майдага хўплаб, гарк терга тушганча, том маънода, эркаланиб ётарди.

— Ёлдор ўзига шерик топиб олибди, — деди Фуччи пакана эшикдан кира-кира. — Иккиси Зарангбетда кувлашиб юрибди. Менимча, топгани қанжиқ, ўзини тутиши бошқачарок...

— Яқинда сизам кувлашиб қоласиз, Фуччивой, — деди бунга жавобан Сарвар акаларга хос салмоқли оҳангда. — Етар шунча вакт эркин юрганингиз.

— Нима деганингиз бу, ака?


— Сизни уйлантитрамиз деганимиз бу.

— Э, одамни уялтирманг кўп!

Қўшини кампир лаганда овқат кўтариб кирганида, улар шовқинлашганча, режа тузишар, уларнинг кайфиятидан андоза олгандек, печкадаги ўт шўхчан чирсиллар, ташқаридаги эса тунги бўрон кўзгалганди.

У худди оч бўридай ув тортарди.

# *Хикоялар*



## **ЕТИМ ҚОЛГАН ГУЛЛАР**

Қайнок гармсел хар қутурганда, шаҳарча қуюқ түзөн ичидә қолади.

У бийдек даштнинг көк киндиғида бүй ростлаган бу шаҳарчани ер юзидан супуриб ташламоққа ахд қилгандек, түлғониб, юлқиниб, куюн уюриб эсади. Сүнг шиддати андак сусайғандек бұлади-да, тағин янгидан күч олиб, күп қаватли қызығыш гиштин үйлар-у, күкка найза-дек санчилған кувуридан куну тун күкиш-қорамтири ту-тун аримайдын корхонанинг катта-кичик, баланд-паст биноларини қайнок нафаси билан ялаб, шаҳар күчалари бүйлаб оч бўридай изғиркан, ўткинчиларнинг юзи-кўзи-га қум соғгани етмагандек, қандайдир мўъжиза билан омон қолган йўл бўйидаги яккам-дуккам дараҳтларга ёпирилади, улар вужудидаги охирги намликини сўриб олиш пайида куйиб-пишади.

Гармсел азалдан яшил рангни ёмон кўради.

Дашт сап-сарик.

Шаҳарча ҳам шу тусда.

Дараҳтлар эса яшил доғдек жуда хунук кўринади кўзига.

Яшил рангта эса, синглиси — сарин ел ўч. У кўкламда уйғониб, саратонгача даштда жавлон ураркан, борликқа баҳор нафасини уфуради. Бу пайтда қайнок гармсел кирнинг гадой топмас бирор ўнгирида бикиниб ёта-ди. Ҳаво кизиб, сарин ел олисдаги тоғлар бағридаги арчазорга чекиниш билан гармселга жон киради. Тушов узган айғирдек иргишлайди. Майсаларни қуритиб, че-чакларни қақшатиб, шундай қутурадики, унинг ўтли нафасидан яшил борлик сарғиши тус олади. Кўча бўйла-ридаги ариқчалар қуриб, ўт-ўланлар хас-хашакка айла-нади. Қисқаси, акаси — куз шамоли кўзғалгунга қадар,

у даштда танҳо ҳукмрон — яшил тусда неки бор, барини куритиб, мавҳ этмоққа уринади.

Ҳар йили шу ҳол, шу аҳвол.

Бирок бу сафар шундай бир синоат юз бердики, тонгданоқ ер-кўкка оташ пуркаб келаётган гармсел хайратдан бир лахза донг котди. Қайнок нафаси ичига уриб, бир қалқиб тушиди. Сўнг кўзларига ишонмай, айланиб-ўргилиб бокди.

Йўқ, кўзлари алдамаган.

Шаҳарчага кираверишдаги тўрт қаватли бинонинг чап қанотида, оппок ҳарир парда тутилган энг қуий дебраза тагидаги кафтдек ерда бир неча тӯп атиргул чамандай очилиб турарди.

Кил-кизил!

Шаҳарчага хос бўлмаган ҳол эди бу.

Сарин елнинг эркаси бўлмиш бу гуллар, ўзларига не бало кўз тикиб, турганидан мутлақо бехабар, тонг нурларини күшнид қаршиламоқда эди. Гармсел уларнинг бу навозишидан қах-қах уриб кулди. Қайнок нафас уфуриб кулди. Окибат, кечга томон атиргул япроқлари шалвираб тушиди.

У тантана қилди..

Аммо эртаси гулларни тийрак ҳолда кўриб, таажжубдан гармселнинг эси оғиб қолаёди. Бу жумбоқнинг тагига етмоқ ниятида, чир айланаркан, тунда ва тонгда гуллар суворилганини пайқади. Билдики, атиргуллар даштдаги ҳимоясиз чечак эмас, меҳрибони бор уларнинг.

Қайнок гармсел шундагина илк бор киши хонасига мўраламоқ истагини туйди. Оппок тўшақда пишиши ухлаётган кизчаси тепасида хаёлчан ўтирган хушрўй жувонга кўзи тушди. Негадир ғамгин эди у. Шаҳарчага бегона, гармсел илгари уни хеч учратмаган. Ётлиги — шаҳарча аҳлига хос лоқайдлик йўқ эди чехрасида. Туриш-турмушидан нафосатга мойиллиги сезилиб турарди. Ҳаётга ташна, ўз навбатида, фоят маъюс эди.

У гоҳ жувонга, гоҳ сув тўла стаканга солиб кўйилган бир дона атиргулга, гоҳ ҳарир парданинг бежирим бурмаларига, гоҳ тўшакда бегам, беташвиш ухлаётган қизалоқнинг лўши юзларига ўшишайиб тикиларкан, бирдан разабла ичкарига интилди. Аммо унинг бу ҳаракати дебраза ойналарига бехуда бош уриш билан чекланди.

Кейин беихтиёр жувоннинг хаёлига эргашди. Шу пайтгача ўзини энг тезкор деб биларди. Ахир дашт бағрини ковжиратиб, кир тўшини қақшатиб, шаҳарчани тўзонга буркаш унинг учун бир лаҳзалик иш эди-да. Буни қарангки, жувоннинг хаёли ундан учкур чиқиб қолди.

У қизчаси бошида қолган жувоннинг хаёлига эргашиб, унга зўр-базўр етишиб елди. Хаёл уни кўм-кўк водий бағридаги ям-яшил кишлопка бошлаб келди. Бироқ бу ерда унинг шанти пасайди. Негаки, бу ўлка катта синглиси – майнин шабада тасарруфида эди. Синглиси бўлиқ бошоқлар бошини сийпаб, кўм-кўк дараҳтлар япроғини ўйнаб, бу томонга йўл йўқлигини назокат ила англатди.

Кўз ўнгига ястанган ям-яшил манзарадан ториккан гармсеп синглисидан жувоннинг кимлигини сўради. Деразаси тагига гул экиб, ёмон фашига тегаётганидан нолиди.

Майнин шабада дараҳт япроқларини эркалаб, ариқ бўйидаги майсалар бошини силаб, маъюстоб бир ҳолатда қишлоқ ховлиларидан бирига имо қилди.

Гармселининг оловкор кўзлари ўткир эди. У ховлида ивирсиб юрган қандайдир бир йигитни кўрди. Унинг дидсиз ва ҳиссизлигини бир қарашдаёқ илғади. Аммо бундан бирор ёмон маъно топмади. Ахир ўз худудидаги шаҳарчада бу хил кимсалар қанча. Шу боис, синглисининг маъюс тортишидан ўзгача кулди. Фаҳмллагани шу бўлдики, жувон ўз хонадонига сифмай, кишлопидан бош олиб кетган. Унга қолса, жувон дунёнинг нариги чеккасига улоғиб кетмайдими. Неча пуллик иши бор бу билан унинг. Ёқмаётгани, дераза тагидаги атиргулларга нисбатан бўлакча меҳри эди.

Ўша атиргулларни ковжиратмаса, кўнгли сира жойига тушмаслигини бот сезган гармсеп, синглисига хайрмазурни насия этиб, шиддатла изига кайтди. Кир бетидан ялаб, яйдок даштдан супуриб олган тўзонни шаҳарча устига сочаркан, дераза тагидаги гулларга шу қадар фазаб билан ташландики, унинг бу бемисл қаҳридан дала чечаклари зумда ковжираб тушган бўларди. Атиргуллар эса пинак бузмади. Бунга сари, гармселининг жувонга нисбатан адовати орта борди. Негаки, жувоннинг қарови бўлмаганида, атиргул деганлари бир кундан ор-

тифига бардош беролмасди-да. Бундан хам ёмони, жазирама иссиқ туфайли ланжлик балосига йўлиқкан шаҳарча ахли жувондан ибрат олгудек бўлса, шахарча гулга тўлиб, бу ҳудуд ўз-ўзидан синглиси майин шабада та-сарруфига ўтиб кетиши мумкин.

Бунга эса чидаши кийин.

Гармсел ҳадик оғушида шаҳарчани бир айланиб чиқди. Йўқ, хавотирли хеч нарса илғамади. Деразала-рини қалин пардалар билан тўсиб олган шахар ахли ўша-ўша ланж ва мудрок ҳолатда эди.

Хатто итлар кимир этмас, қушлар қанот коқай демасди.

Бутун борлик жазирама иссиқ измида, ёлғиз атиргулларгина оловдай яшнаб турарди.

Кейинги тонгда даштдан кувват олиб, шаҳарчага ошиқаркан, одатдагидек, кўчаларда изғиб, бинолар сиртини ялаб-юлқали. Узун қувурдан бурқсиётган тутунни тўзонга кориштириди. Чангга беланган кўримсиз дараҳтлар юрагига вахима солиб ўтди. Қаровсиз болалар майдончасида қуюн кўтариб, бамисоли илондай эшилиб, тўлғаниб, беармон ўйнади.

Ва сўнг бирдан яна атиргулларни эслаб қолди.

Улар томон ошиқди.

Бинони ёнлаб ўтаётганида, тўртингчи кават деразала-рининг биридан ўғринча улоқтирилган чиқиндилар гармселнинг қанотига илашди. Гармсел бир юлқиниб, уларни чор-тарафга сочиб юборди. Коғоз парчалари, пиёз қобиклари хавода ўйнаб, гўшт ва балиқдан бўша-ган консерва банкалари ерда думалаб кетди.

Бу хил чиқинди итқитишлар гармселга таниш ҳолат бўлгани сабабли, у бундан ажабланиб турмади. Аммо атиргул пуштасига тўкиб кетилган ахлат уюмига таас-суфла тикилиб турган жувонга кўзи тушгач, юз берган бу воеадан ўзида йўқ қувониб кетди. Файрати жўш уриб, гулларга ёпиниганди, чиқинди уюмидан бадбўй хил таралди. Жувон оғзи-бурнини тўсганича ортга чекинди. Сўнг уйидан чепак ва супурги олиб чиқиб, чиқиндиларни супуриб-сидираркан, орада каддини тик-лаб, зич ёпиқ деразаларга бир-бир кўз ташлаб чиқди.

Жувон, буни биروف атай тўқкан, деган гумонга бор-ганди. Гармсел унинг бу ўйидан кулди. Биладики, жувонга биروفнинг қасди йўқ. Шунчаки эринчоқ кўшнила-

ридан бири наридаги тўкиндиҳонага боришга эриниб, челагини гуллар тагига ағдариб кета колган.

Пана-да, бирор кўрмайди.

Ўша кундан эътиборан, у деярли ҳар тонг жувонни атиргуллар ёнида ғамнок ҳолда учратадиган бўлди. Ва қарамасданоқ англардики, яна кимдир гул пуштасига чиқинди тўла чепагини ағдариб кетган. Атиргулларни ковжиратиб, суюкли туси, сарғиши ранг катига синг-диролмаслигига аллақачон фахми етган гармселга бу жуда кўл келди. Эндиликда у аламини жувоннинг изтиробга тўла нигохини томоша қилиш эвазига босадиган бўлди.

Жувоннинг аламнак кўзлари эса ҳар сафар қатор дезразалар бўйлаб бехуда кезинарди. Ўнлаб хонадонлардан иборат бу уйдан айблорни тоғмоқ маҳол эди. Охири у ҳайбатидан от хуркадиган қўшниларидан бирига дил ёрмокка мажбур бўлди.

Ҳозиргина муюлишдаги пастқамгина емакхонадан еб-ичиб чиқсан кимса жуда бепарво эди. У тишини кавлай-кавлай, бир гулларга, бир жувонга тикиларкан, на гулнинг бўйини сезди, на жувоннинг дардини илғади. Кайнок ҳавода нафас олмоқнинг ўзи душвор бўлиб турганида, қулогига гап киравмиди. Кимса хиссиз нигохини қайта гулларга тикаркан, қисталиб турган эмасми, туйган бирдан-бир истаги шу бўлди: «Енгиллашиб олмоққа зап пана жой экан-да лекин...» Сўнг тушга якин зиёфатга айтилганини, унгача бир зумгина мизгиб олиши лозимлигини ўйлади. Унинг бу қадар боқибекамлиги гармсел томонидан кайнок «ўпич» ила тақдирланди. Бундан бетоқатланган кимса ўзини салкин йўлакка урди.

Гармсел эса тинмай қутуришда давом этарди. Шаҳарчани тўзонга буркаб, беармон чарх уради. Борлиқ ёлғиз унинг измида эди.

Фақат атиргулларгина...

У навбатдаги тонгларнинг бирида шаҳарча чеккасида қизласини етаклаган жувонга дуч келди. Ажабланиб, шаҳарчани бир кур айланаркан, атиргуллар ноласидан, жувон шаҳарчани бутунлай тарк этётганини пайқади. Бу хил нолаларни сезмокка инсон боласи ожиз. Гармсел эса ҳар балони англарди. Жазира маисидан интрашашётган дараҳтлар охини, қақраган ариклар зорини, яшил

майсалар фарёдини, қисқаси, ҳамма нарсани англарди, фахмларди.

У тантанавор қаҳ-қаҳ урганча дастлаб жувонга ёпишди. Этагидан тортылаб, юзи-күзига кум сочиб, обдон аламини олди. Сүнг эгасиз қолган атиргуллар томон елди. Гулларни тортылаб, тагидаги чиқиндиларни чортарафга сочқылаб ўйнамоқни бошлади.

Шу пайт эшикда ахлат тўла челак кўтарган бир йигитча пайдо бўлди. У эринчоқ харакатла эшикдан берида тўхтаркан, чelагини ерга кўйиб, сигарет тутатди. Сүнг кенг майдонда бир-бирларини қувлашиб ўйнаётган майда қуюнларга, тўкиндихона теварагида ўралашаётган итларга, тошйўлакни деярли тўсиб кўйган пачоқ машинага бирин-сирин боқаркан, кир оламга кўниккан лоқайд нигоҳи гармсел исканжасида тўлғанаётган атиргулларни четлаб ўтмади. Шу орада бир зумга узилган кўзлари қайта гулларга қадаларкан, бу сафар хийла узокроқ тикилиб қолди. Четдан қараганди, у гулларга маҳлиёдек эди. Аслида эса, у гулларни эмас, пуштасига тўкиб кетилган чиқиндиларни кўриб турарди.

У наридаги тўкиндихонага ўшигайибгина қараб кўйди-да, сўнг чelагини кўтарганча, гуллар томон зиппиллади.

Қайноқ гармсел эса ҳануз тинмай қаҳ-қаҳ урар, у ҳар қаҳ-қаҳ урганда, кўқдан тўзон ёғилиб, ердан чанг кўтарилиарди...

## **КЕКСА ТУТ**

Тепки зарбидан кекса тут дарахти қаттиқ сесканди. Бу хил зарбларга кўниккан бўлса-да, бунисига чидаши хийла оғир кечди. Кекса танаси ич-ичидан зириллаб кетди. Шунга қарамай, сир бермасликка тиришди. Ички ингрюнини еллар тортылаб ўйнаётган япроқлари шовури остига кўмиб, қаддини ғоз тутишгга уринди.

Уни Ашур узуннинг тўнғич ўғли тепган эди. Йигит укаларини бошлаб томорқа адогидаги даладан қайтаркан, тутқич бермаган рақиблари Ёвқошнинг аламини кекса тутдан олган, яъни ховурини босганди. Ҳамиша шу – қўшнилар ёқалашади-ю, балога тут қолади.

Жанжал якунида мағлуб ҳам, ғолиб ҳам уни тепкилаб ўтади.

Шу бонс, у навбатдаги кутилаётган зарбалар даҳшатидан япроқлари гача қалтирамоққа тушганди. Аммо кутилган зарба бўлмади. Акаси изидан келаётган қошлари туташ, коратур йигитча тутга етиб-етмай, ортига ўгирилди. Конга тўлган кўзларини аланг-жаланг қилиб, оқшом пардасига чулганаётган даладан отасини қидирди.

Ота-Ашур узун томорқа адогидаги дўнгда ҳануз ўзига келолмай, харсиллаб ўтиради. Кизиқ устида югуришга юуриб қўйиб, энди нафасини ростлаёлмай ҳалак эди.

У ўғлиниң қараб туришидан уялди. Қўлидаги сүйилга таяниб, ўрнидан кўзғалди. Ўзини тетик кўрсатишга тиришиб, даладан Ёвқошни қидирған киши бўлди. Билади, даланинг қайси бир бурчилада бикиниб ўтирган ракиби ҳали-бери корасини кўрсатмайди. Бу томон тўла-тўқис ҳовуридан тушмагунча бекинган жойидан чикмайди. Хар сафар шу ахвол — Ёвқош осонгина кочиб кутилаверади, Ашур узуннинг алами ичидаги қолаверади. Қани энди, мана шу суйил билан бошига бошлаб бир туширса, тагига босиб, обдон пиймаласа. Бир пайтлар олдинга солиб қувлардинг, энди холинг қалай, дея юзи-кўзига аямай мушт туширса! Бирок Ёвқош деганлари кийикдан чакқон, ҳеч тутқич бермайди. Уни хатто ўғиллари қувиб етолмайди. Ё кўрккан одам эпчил келармикан? Бир вақтлар ўзи ҳам Ёвқошга тутқич бермасди. Ўғиллари тўдак эди, у кўшнисининг олдига тушиб кочиб юради. Энди эса...

Ёвқошдан қочиб юрган даврларини эслаб, Ашур узуннинг ғазаби баттар қайнайди. Қўлидаги силлик сүйилни махкам чангллаб, яна бир сидра далани кўздан кечиради. Даشتда жон асари сезилмагач, аста йўлга тушади. Катта ўғли ҳовлига етган, иккинчиси тут тагида сўппайиб, ҳануз кутиб турар, ундан кейингиси, қоқилиб тушган шекилли, анча берида оқсоқланиб бораради.

Ашур узун ўғлини мамнун қузатаркан, хунук ишшайди: «Хе, отасининг ули, бўш кемайсан!»

Отанинг дўнгдан эна бошлаганини кўрган иккинчи ўғил йўлида давом этаркан, тут ёнидан ўтаётганида, худди жин теккандек, бирдан дараҳтга ташланиб қолди. Кафтининг қирраси билан унинг ғадир-будир танасига бир неча бор зарба берди. Тутни Ёвқошнинг ўрнида киёс этиб, ўзича хуморини босган бўлди.

Кекса тут бу гал зарбдан эмас, йигитчанинг юрагидаги тўла ададсиз кек ва адоватдан қалтираб кетди. Тавба, одам боласи бу қадар ғазабу нафратни қандай қилиб кўнглига сиғдира оларкан? Юраги тарс ёрилиб кетмаганини бунинг!

Йигитчá тутдан узоклашаркан, сўқмоқда ётган муштдай кесакни ҳам тинч кўймади. Куч билан уни қўшни томорқа томонга тепиб юборди. Навбатдаги тепкисидан эса сўқмоқ бўйидаги гулхайри қок белидан чирт узилиб тушди. Йигитча бу ишидан жуда мамнун бўлди. Тепмокқа нарса қидириб, теваракка аланглади. Кўзи шудгордан наридаги бедапояда қантариғли турган Ёвқошнинг эшагига тушиб, бир хаёли уни азобламоқ истади. Бироқ шудгор кечиб юришдан эринди.

Аслида бугунги жанжал мана шу шудгор туфайли келиб чиққанди. Ёвқош буғдойдан бўшаган ерини ҳайдатаркан, ёввойи ўт илдизларини териб, сўқмоқ ёқасига уйганди. Икки томорқа ўртасидан ўтган сўқмоқ умумий хисобланса-да, бу нарса Ашур узуннинг нафсониятига тегади: «Ол! – дейди эски адовати кўнглида ғимирлаб. – Йўқот буни сримдан!» Табиий, Ёвқош ҳам бўш келмайди: «Қачондан бери сўқмоқ сенинг еринг бўп қолди?!» Иккиси ҳам эшакдан баттар қайсар эмасми, одатдагидек, муросадан кўра, тепишмоқни маъқул кўрадилар. Аммо Ашур узун кўпчилик, Ёвқош ичida ўғил туғиб бермаган хотинини лаънатлаб, тарин қочмоққа тушганди...

Кекса тутнинг ҳалиги энди оқсокланиб келаётган йигитчага қаратилганди. Бир оздан сўнг унинг ўзи билан ўзи оворалигини сезгач, хиёл енгил тортди. Холбуки жангариликда бу йигитча акаларидан сира қолишмасди. Уларга таассус қилиб, тутга кўп азоб берарди. Бу хил юмушдан энг кейинда пилдираб келаётган кенжা ўғилгина мустасно эди. У тутга осилиб ўйнамоқни хуш кўрадилар. Азалдан болаларни яхши кўрадиган тутга унинг танасига тирмацишлари жуда ёқарди.

Хозир хам у шуни жуда истамоқда эди. Негаки, ака-ларининг кек ва адсоватидан карахтланган вужудига боланинг эркаланишлари бамисоли малҳамдек татирдида. Аммо бола ҳали олисда, то у етиб келгунга қадар кекса тут йигитчалар томонидан қолдирилган адсоватли хислардан япроқларигача титраб турмоққа махкум эди.

Кекса тут барча дараҳтлар каби ўзга туйғуларга жуда сезгир эди. Танасига теккан бармоқларданоқ қўл эгасининг кайфиятини дарҳол уқиб оларди. У меҳрдан яй-парди, қаҳрдан қалтиради. Бироқ энг ёмони шунда эдикни, унинг бу ҳолатини одам боласи пайқамасди. Кишилар учун у шунчаки бир тут эди. Пилла курти учун йилда бир новдаларини чала-чулпа кесиб олишларини демаса, қолган пайт у билан бирорвнинг иши йўқ эди. Дарвоке, тут ўз меваси билан болаларни сийламоқни ёқтиради. Кесилмай қолган новдаларида ёқутдай товланувчи меваларига болаларнинг оғзи текканди, у ғалати бир туйғудан сармаст бўларди. Нечун қуёш остида яшаяпти, заминдан нечун қувват оляяпти, бу вақтда тириклик қарзини узаёттандек хис қиласи ўзини.

Кекса тут илдиз отган бу замин қадимда яйдоқ даштнинг бир қисми эди. Дашибтнинг бу бўлагига Восиқ полвон эгалик қилганида, қишлоқ ҳозиргидан юз баравар кичик, ер дегани бисёр эди. Восиқ полвон ўзини қора тортиб келган жонажон дўсти Бакир полвонга ерининг ярмини ҳадя этаркан, тут икки ер ўртасида белги бўлиб қолади.

У пайтда дўстлар эндиғина уйланишган, ягона ширин орзулари бир этак полвон ўғил кўриш эди. Бироқ бандасининг истаги эмас, худонинг буюргани бўлади дегандек, тўнгичларида полвонлик сиёғи сезилмайди. Буни пайқаган Восиқ полвоннинг қовоғи осилади. Бакир полвон уни, ундан хам кўра ўзини юпатмоқ ўйида дейди: «Суягини қотириб, қора меҳнатта солсак одам бўлишар, жўра». Восиқ полвон кенг кўксини сийпалаб, чукур хўрсинади: «Бўлар бола бошидан деганлар, дўстим. Булардан полвон чикмайди». Шунга қарамай, уларнинг умидлари катта эди, беллари тўла бола, ҳали қанча ўғил кўришади. Бироқ яна ўғил кўриш дўстларга насиб этмади. Айни қишида Бакир полвоннинг ота юрти, тоғ қишлоқларидан бирига тўйга отланишиб, йўлда қоркўчкиси остида қоладилар...

Шундай килиб, дўстлар сўнгти нафасларигача ахил қолдилар. Турган гап, улар болаларининг ҳам шундай бўлишларини исташарди. Бироқ куз оқшомларидан бирида Восик полвондан жиддий бир хато ўтганди. Одатдагидек, тўрда хирмондай бўлиб ёнбошлаб ётаркан, оғзидан шу гап чикиб кетади: «Бакир полвоннинг ери асли бизники, ошначилигим ҳурмати ҳадя эттанман мен унга...» Восик полвон бу гапни не мақсадда айтди, буниси қоронғи-ю, ҳар ҳолда овозида зигирча тайирлик йўқ эди. Аммо бу гапни пойгакрокда, кигиз устида ўйнаб ўтирган тор манглайли бола — Ашур узун қулогига қуйиб олганди. Орадан сал ўтиб, тенгқури Ёвқошга писанда қиласди: «Биласанми, силарни ерларинг асли бизники...» Ёвқош тушмагур дадилгина бола эмасми, бош бармоғини бошқа бармоқлари орасига жойлаб, унинг бурнига тақайди: «Шу гапингта мановуни ебсан!»

Тут икки ўртада дўстлик рамзи сифатида қад ростлаб турарди. Жазира мақсади кунлари полвон жўраларнинг тушги чойхўрлиги унинг кўланкаси остида кечарди. Бироқ ўғиллари бу удумни давом эттирмадилар. «Ер» дея ёвлашдилар. Аслида Ашур узунга ернинг ҳеч кераги йўқ эди. Табиатан майда ва худбинлиги боис, қачонлардир отасига тегишли бўлган ерга ўзгаларнинг эгалик килишларини ҳеч ҳаэм килолмасди. Бу борада Восик полвон адашмаганди. Полвонлик сиёғи йўқ бу йигитлар майдаликдан ташқари, жуда жоҳил эдилар. Ашур узун кенг бағирли бўлолмаганидек, Ёвқош ҳам ориятни ошна тутмади, яъни, шу ерга сен тўй, дея бошқа ерда томир отмади. Холбуки, у пайтларда ер қаҳат эмасди. «Ерни сенга берганимдан кўра ўлганим яхши», дея тирашиша давом этди.

Уларнинг илк тўқнашувлари Ашур узун ўғил кўрган юз беради: «Бола-чакамга ер керак, бўшат томорқамни», дейди у. Ёвқош одатдагидек мазахлаб, қофоз кўрсат, дейди. Ашур узун бу сафар ўзини тутолмай қолади ва унинг юзига тарсаки туширади. Шундан сўнг Ёвқошга худо беради... Унга бас келмоқнинг эвини тополмаган Ашур узун шармандаларча қочмокқа тушади. Ёвқош қувтайди. У кочади. Бу воқеа келинчакларнинг кўз ўнгига содир бўлади. Бошда улар роса ох-воҳ кўтаришади. Кейин эса бинойидек кўнишиб кетишади.

Нега деганда, эрлари хафтада бир кувлашмаса, еганлар ичига тушмайдиган даражага етадилар-да.

Одатда гиди-бидини Ашур узун бошлайди. Қўшни-сининг меҳнати эвазига гуллаб-яшнаб турган ерга қаргани сайин ичидан алами тошиб келаверади: «Отамнинг ери бу!..» Бу ёфи эса жуда тез. Жанжал хамиша Ашур узуннинг шаталоқ отиб қочиши-ю Ёвқошнинг кувлаши билан якунланади. Энг кизиги, бу масалани қонун йўли билан ҳал этмоқни бирортасиям ўйламасди. Бирок ўртадаги адоват шу қадар кучли эдикি, бир-бирларига кўзлари тушишлари ҳамон қўллари беихтиёр қичишиб кетаверарди.

Ховлида жанжал қўпиши билан кекса тут қишлоғини кунботишдан эсадиган аччиқ изғиринни хис қилгандай бўлади. Фақат бу изғирин кунботишдан эмас, ҳовлидан, янада аникроғи, икки қўшнининг вужудидан уфуради. Қишлоғи изғирининг тоқат қўлмоқ мумкин, аммо уларнинг вужудларидан уфурган кек ва адovатга бардош бермоқ душвор эди. Кекса тутнинг назарида, катталар адovат учунгина яшаётгандек туюларди. Ва шунинг учун ҳам у болаларни ёқтиарди. Катталардан эса қўркарди. Новдаларини кесишганда чидарди-да, бирок юраги ғазабга тўла кимсанинг кафти танаасига теса, даҳшатдан қалтиарди. Бу етмагандек, қўшилар қувлашгандаям, қайтишгандаям унинг тагидан ўтишарди. Қайтишаётib, албатта, уни тепиб ўтишади, тутқич бермаган фанимининг аламини ундан олишади. Шўрлик тут бу «тепки»лардан ўзига келиб улгурмай, томорқа адогида мағлуб томон пайдо бўлади-да, аста келиб, унга суюнади. Кекса тут ундаги чексиз аламни хис этиб, бечорага ичи ачиб кетади.

Бошда Ашур узун унинг раҳмини келтиарди. У Ёвқошнинг ёнида тўхтарди. Тутга елка тираб, қўшнисининг уйига қаҳр ва алам билан тикиларди. Ундан қандай килиб ўч олишни ўйларди. Шунда отаси Восик полvonнинг кучи ўзида йўклигидан ўқинарди. Мўъжиза юз бериб, отасидек кучли бўлса, у давраларга тушиблар ўтирасди. Кишлогои ори учун ўзга юрт полvonлари билан бел тутишиб ҳам юрмасди. Қиладиган бирдан-бир иши, Ёвқошни ерга босиб, кучукваччадай мижиклаш эди. У Ёвқошни шу даражада ёмон кўрардики, наздида,

ундан боплаб ўч олиш учунгина бу ёруғ оламда яшаёт-  
гандек эди: «Ярамасни тагимга босиб, бир аламимдан  
чиқмасам, армонда кетаман!» деб ўларди.

Кекса тут унинг кўнглидагини хис этиб тураркан,  
яшил япроқларини силкиб, қуёш нурининг нечоғли ча-  
рогонлиги-ю, она заминнинг қанчалик илиқлиги хақида  
шивирлаб, шунинг ўзи улкан баҳт эканлигини уқтириш-  
га бехуда уринарди. Ва ҳар сафар дилидагини бандаларга  
англатолмаганидан ичидан дарз кетиб борарди.

Бу орада Ашурнинг ўғиллари улғайиб, вазият тубдан  
ўзгарди. Энди мағлуб сифатида Ашурнинг ўрнини  
Ёвқош эгаллади. Ёвқош ота-болаларнинг олдига тушиб  
қочаркан, қайтишда худли Ашур узундек тутга сунади.  
Тер босган манглайнини унинг ғадир-будир танасиға ти-  
раб, кўзларини намлайди, ўзига ўғил бермаган худодан  
нолийди. Кекса тут тагин борликнинг улуғворлиги-ю,  
ҳавонинг мусаффолиги хусусида пичирлаб, гўзалликни  
уқтириш ила унинг кўнглига меҳр ийдирмокчи бўлади.  
Бироқ Ёвқошнинг тошкотган кўнгли меҳри илрамайди.  
Адоватга тўла юраги бу хил нарсаларни чучмал хис  
етиб туфлаб ташлаверади.

Бунақа пайтда, гоҳо кекса тутнинг томирига муз  
юргурандек бўлади. Шу созда қуриб қўя қолгиси кела-  
ди. Бироқ борлик унинг ўлмоғига кўймайди. Аламзада  
кўланка ёнидан узоқлашиши билан шохига қушлар ке-  
либ қўнади. Майин ел япроқларини тортқилаб ўйнайди.  
Шунла у офтоб нурларининг оромбахшлигини-ю, замин  
бағрининг илиқлигини қайта сезади. Енгил керишиб, те-  
варакка масъуд назар солади. Узоқдаги тутларга ел  
орқали салом йўллашни унутмаган ҳолда арғимчоқ уч-  
диган кизларни илжақ кутади. Қизлар арғимчоқ учган-  
да, у жуда-жуда яйрайди. Арғимчоқ ташланган йўғон  
шохини мастона чайқаб, қизларга қўшилиб яйрайди,  
кийқиради, яъники, япроқларини шўхчан силкилайди.

Кизларнинг арғимчоқ училари ҳовлида Ашур узун-  
нинг кораси пайдо бўлгунга қадар давом этади. Кизлар  
Ёвқошники, Ашур узунни пайкаши билан улар тутни  
ошириб тарк этишиади. Гоҳида арғимчоқни унутиб қолди-  
ришиади. Унутилган арқон Ашур узун томонидан ни-  
чоқда бўлакланиб, қўшини ерга улоктирилади.

Кекса тутни Ашур узуннинг арқонни бурдалаш пай-  
тидаги важоҳати даҳшатга солади. Бу кезда Ашур узун-

нинг вужудидан шундай бир ёвуз кувват тарападики, тут бу кувват таъсири нигина эмас, рангиниям илғайди. Корамтири туслаги бу қўланка хунук тебраниб, теваракка ёйилганда, қуёш тафти сўниқ, замин бағри ҳароратсиз туюлиб, у карахт ҳолатга киради. Янада аникроғи, худди бирор чопмоқ ниятида болта қўтариб келгандай, кўркувдан ўзини йўқотади.

Бугун Ашур узун сўкмоқдаги ёввойи илдизларни қўшини томорқага улоқтироққа тушганда, кекса тут кушлар чуғуридан маст эди. Кечки ётотка ҳозирлик кўраётган хуркак чумчуклар галасини кифтида эркалаб, уларнинг шовуридан хузур қилаётганди. Ашур узуннинг ҳаракатидан чумчуклар ҳуркиб қочгач, ёлғиз колган тут воқеанинг давомини кузатмоқка тушади. Ашур узун ёввойи илдизларни улоқтириш билан чекланиб қолмай, ҳовлисида кетмондаста йўниб ўтирган Ёвқошнинг тепасига бостириб боради. Қисқагина олишувда қўшниси-нинг кўли баланд келиб, Ашур узун ерга чўзиларкан, бўғизланган буқадай бўкириб, ўғилларини кўмакка чақиради. Ўғиллари уйдан милтиқнинг ўқидай отилиб чиқишиади. Ёвқош ер хидлаб ётган Ашур узуннинг кетига бир телиб, оёғини кўлига олади...

Кўркиб кетган кекса тут Ашур узуннинг тўнғич ўғли тепкисидан ўзига келганида, кув-кув аллақачон ниҳоясига етган, Ёвқошни кувлаб етолмаган «қўшин» паро-канда бир аҳволда изига қайтмоқда эди. У танасига қотиниб ўтаётган йигитлардан таралётган кора кувват — ададсиз кек, чексиз адовардан жонсаракланиб, теваракка аланглаганида, қуёш аллақачон пинакка кетган, уни тарк этган кушлар чуғури узокдаги дараҳтлар томонидан келар, шунингдек, қақилдоқ кизлардан хам умид йўқ. Унинг бирдан-бир умиди Ашур узуннинг кенжя ўғлидан эди. Катталарнинг жанжали туфайли юзага келган танидаги оғрикка, одатдагидек, боланинг маъсумлиги малҳам бўлини мумкин эди.

Кекса тут оқсоқланаётган акаси изидан пилдираб келётган болага илҳақ бокаркан, куни кеча уни шохлари орасига олиб эркалаганини эслади. Ёвқошнинг кизлари бир шохида аргимчок учиб, иккингчисида болакай ўйнаганди. Тут кеча жуда бахтиёр эди. У бу хил шўхчан дамларда катталарнинг жохиллигини ортиқ ўйламай кўяди. Ёшлар билан андармон бўлади. Ёнида уларнинг

узокроқ колишини истайди. Бироқ ҳовлида катталар пайдо бўлиши билан улар тумтарақай бўлиб кетадилар. Кекса тут бўш кучоғини керганича қолаверади. Факат болагина катталарнинг измига кўпда бўйсунавермайди. Тут шохлари орасига жойлашиб ўтириб оларкан, уни гоҳ от, гоҳ машина, гоҳ эса тайёрага киёс этиб, берилиб ўйнашда давом этади.

Бу орада бола ариқчадан чаққон сакраб, оксоқ акасини кувиб ўтди. Бу ёғи кўп қолмади, яна бир неча сонниядан сўнг у тутнинг бағрига сингади. Кекса тут ҳадемай юз берадиган таниш бу лаззатдан ҳузурланиб, сархуш тортаркан, кутилмаганда қаттиқ сесканди. Бола ҳудди акаларидек тутни тепганди. Кекса тут тепкидан эмас, тешкини юзага келтирган сабаб-адоватдан сесканди. Тавба, қачон ултура қолди экан? Ахир бир соатгина бурун унда беғуборликдан ўзга туйғу йўқ эди-ку. Наҳотки, катталар оғриган бу иллат шу қадар юкумли бўлса?

Кекса тут бу саволларга жавоб тополмай ант-танг тураркан, боланинг иккинчи тепкисини кўтармоққа бардош етмади ва нолакор фирчиллаганча гурсиллаб афдарилиб тушди...

## ТУНГИ МЕҲМОН

У кишлоқнинг чеккасидаги кулбада жияни билан туради. Ота-онаси ўтган йили олдинма-кейин казо қилишган. Ёлғиз қолиб, кенг ва катта ҳовли ютадигандек туюлавергач, қўшни қишлокда турувчи синглисининг қизини сўраб олганди.

Ҳар ҳолда кўнгилга таянч-да!

Синглиси соғинган кезлари қизини олиб кетади. Учтўрт кун бағрида сақлаб, ўзи айтмишли, обдон дийдорига тўйгач, ноилож яна қўйиб кетади. Келганида бир гапни таъкидлашни хеч канда қilmайди: «Тезроқ эрга тексангиз яхши бўлармиди, опа!» Қизик, ота-онаси тириклигига, у бу ҳақда сира оғиз очмасди. Яхшиям сиз борсиз, эмасам, карияларнинг аҳволи не кечарди, дерди нуқул уни алқаб. Энди эса... У гоҳида синглисининг афтига синчков тикилади, наҳотки, баҳтимни ўйлаётган бўлса?! Йўқ, унинг баҳти билан синглисининг мутлақо

иши йўқ. Ҳамма гап кизи важидан. Шунда унинг зарда-си қайнайди: «Олиб кетавер қизингни! Ёлғизликдан ўлиб қолмасман!» Синглиси дарров ҳушёр тортади. Вой, нега унака дейсиз, бахтингизни ўйлайманда, опажон, бахтингизни, дея бир дунё чучмал гапларни ка-лаштириб ташлайди. У бундан баттар ғижиниб, беихти-ёр бурчакдаги кўзгуга кўз ташлайди. Кўзгудан ўзига аламишок боқиб турган аёлнинг бўлиқ ва кўркам қомати-ни илғамайди, ҳали оқ оралашига улгурмаган қуюқ, тим қора, узун соchlарининг гўзаллигини пайқамайди, юзи-даги хунук чечак изларинигина қўради, холос. Бу рух-сори билан ўзини ҳеч ким хотинликка олмаслигини ич-ичдан қайта хис этади. Синглиси эса буни била туриб ярасига туз сепгани сепган. Кизини опасиникига ташлаб кетишга кўзи қиймаганидан уни бирор чўлоққами, кўргами тегишига жуда-жуда рози. Бироқ қани ўша чўлок ёки кўр?! Худо деб, ўша банданинг ёқасини оқар-тириб, ўчогини ёқиб ўтирмасмиди.

Кўнглидан, ини ота, сингил эса она бўлолмас экан-да, деган аламли ўй ўтаркан, кўзгуни уриб синдиригиси келади. Базўр ўзини босади. Бу қўтири дунёда кимга ни-мани исботламоқчи ўзи? Кучи кўзгу юзига рўмол таш-лаб қўйишга етади. Бироқ жияни дарров сидириб таш-лайди. Муштдек боши билан кўзгу олдида бунча ўра-лашмаса бу тирмизак!

Бугун иккичи кундирки у ёлғиз.

Одатдагидек, уйқуси келмай, анчагина тўлғаниб ёт-ди.

Кўзи эндинигина илингандан экан, бирдан ҳовлида нима-дир душурлаб қолди. Чамаси, кимдир девор ошиб туш-гандай бўлди. Ҳақиқатдан ҳам салдан сўнг дахлиз эши-ги тирмаланиб, аста ғийқиллаб очилди.

У хаёл билан бўлиб, эшикни тамбалашни унуганини эслади. Кейинги вактда анча ҳардамхаёл тортиб колга-нидан ич-ичидан ғижинди. Меровсирамай ўл, дея ўзини янишга ҳам улгурди. Сўнгра ҳамиша тунлари ёнида олиб ётадиган кўшофиз милтигини кўлига олиб, сакраб ўрнидан турди. Отасидан колган бу ярорни ҳудуд нози-рига бериб юбормаганидан илк бор чинакамига суюнди.

Кутилмаган «меҳмон» милтиққа рўпару келишини кутмаган шекилли, коронидан қўркув тўла шикаста овоз эшитилди.

— Отма... отма, Чаманой! Илойим, болагинангни күтәрай, отмагин!

Тунги чироқ нуридан хира ёритилган хона ўртасида милтиқ ўқталиб турган аёл очиқ эшикдан қоронғи дахлизга бехуда тикиларкан, овоз әгасини дабдурустдан танимади.

— Кимсиз?! — деди милтиқ милини ўша томонга түғрилаб.

— Бу мен... Қиличбекман!

— Қиличбек?! — Аёл ҳар қанча ажабланса-да, ҳолатини ўзгартирмади. — Ярим тунда нима қилиб юрибсиз бу ерда?!

— Кочдим, Чаманой, қочдим! Жохил ва нодонлар түдаси мени дўппосламоқчи эди, жонимни олиб қочдим! Ўйингга... бекингани кирдим.

— Бекингани менинг уйимдан бўлак жой қуриб қолганими?

— Ёзда уйинг ортидаги тўқайзорда жон сақлардим. — Кимса чукур хўрсинди. — Хозир хаво салкин... Тўғриси, бу гал негадир шошиб қолдим. Ана, ортимдан қувлаб келишяяпти.

Узоқдан эштилаётган қадам товушлари, дупурлаб, тобора яқинлашмоқда эди. Хозир улар уйга бостириб киришадигандек, аёлнинг юраги орқасига тортиб кетди. Тунда ёлғиз эркак билан кўришса, нима деб ўйлашади? Эртан кишлоқда қандай бош кўтариб юради? Бу кунидан ўлгани дуруст эмасми кейин!

Ҳайтовур таъкибчилар дарвоза ёнида тўхташмади, дупурлашганча тўқайзор томонга ўтиб кетишиди.

Бутун дикқат-эътибори ташкарида бўлган аёл ҳануз кўриниш беришини истамаётган дахлиздаги кимсани бир зумга унутди. Қишлоқ адоги катта йўлгача қалин тўқайзор. Тунда тўқайзордан бировни қидириб топиш пичан ғарамидан игна излашдек бир гап. Таъкибчилар ҳақиқатдан гирт нодонга ўхшайди.

Дахлиздаги кимса шивирлаб ўзидан дарак берди.

— Ана, кайтиб кетишияпти.

— Унда сиз ҳам секин чиқиб кета қолинг!

— Шу салкинда қаёққа бораман?

— Қаёққа боришингизни мен қайдан билай! — Аёлнинг жаҳли қўзиди. — Нима, мени гапга қолдириб ўлдирмоқчимисиз! Қани, жўнанг!

- Шу кеча дахлизингда тунаб қолай, Чаманой.
- Тушингизни сувга айтинг! — Аёл овозини хиёл баландлатди. — Отаман лекин!

— Отма, Чаманой!

Орага бир сония жимлик чўкди.

Бир пайт «мехмон» сўраб қолди.

— Милтифинг ўзи... ўқланганми, Чаманой?

Аёл жавоб қайтармоқни лозим топмади. Кўлидаги яроқни жонлирок тутиш билан чекланди. Қани энди, Киличбек деганлари тезроқ корасини ўчирса-ю, иссиқ ўрнига шўнгий қолса. Оқшом печка ёқилганига қарамай, хона анча совуқ эди. У ўрта эшикни куриб бераман деб, ҳануз сўзининг устидан чикмаёттан қўшни эркакни ичида янаркан, алиниг ўчини валидан олгандай, таҳдидли оҳангда деди:

— Агар чиқиб кетмасангиз, ҳозир нақ манглайингиздан отаман!

— Биламан.

— Қаердан биласиз?

— Кўлингга яроқ тутибсанми, демак, отасан-да.

— Ҳозир ҳазилнинг ўрни эмас, ака!

— Мен ҳазиллашаёттаним йўқ, — деди кимса ёруғга чиқишини хаёлига ҳам келтирмай. — Улардан калтак егандан кўра, сенинг кўлингда ўлганим яхшироқда.

— Хушомадга бало борми!

— Отанг қадрдоним, энант меҳрибоним эди, — қоронгидаги кимсанинг овози тўлқинланиб, ниманидир эслагандай бир муддат жим қолди-да, сўнг маҳзун оҳангда яна гапда давом этди: — Кўлингдан неча марталаб чой ичганман, ота-онанг тириклигида. Кимлигинги яхши биламан, Чаманой! Бугун нимагадир оёғим шу томонга тортди. Негалигини ўзим ҳам билмайман. Тўқайзордан кўра, инсон меҳрини истадим шекилли. Сенга нисбатан хаёлимда ёмон ўй йўқ. Тузингни тотганман ахир, Чаманой! Ёмон хаёлга бориб ўлибманми! Сен баҳузур ухлайвер, мен... бирпастдан сўнг чиқиб кетаман. Қаттол душмандай менга бундай тикилма, Чаманой! Кўзинг тешиб юборай деяпти!

Ота-онаси эслатилган Чаманойнинг кўзларида ёш айлана бошлади. Кўлидаги яроғини беихтиёр пастга тушираркан, кутилмаганда ўзини тутолмай йирлаб юборди. Жоним отам, жоним энам, нечун мени эрта ташлаб кет-

динглар! Сизлар тирик бўлганда, буйтиб милтиқ кучиб ётармидим! Мусичадек шу беziён одамдан ҳуркиб ўти-рармидим! Уни дахлизда тутмай, олдига бир пиёла ис-сиқкина чой қўймасмидим! Бу не кўргуликки одам бола-сига яроқ ўқталяпман!

— Йиғлама, Чаманой! — деди ҳануз кўриниш бе-ришга ботинолмаётган «мехмон» йиғламсираган овоз-да. — Ҳозир чиқиб кетаман. Совуқда котиб ёки анову жоҳилларнинг калтагидан үлсам ҳам майли! Факат сен йиғлама! Йиғласанг, кетишим кийин бўлади.

Аммо аёлнинг қулогига гап кирмасди. Ота-онасини кўмсаб йиғида давом этди. Йиғлай-йиғлай ухлаб қолди.

У тонгда хуррак овозидан уйғониб кетди. Бошда ҳайрон бўлди, сўнг қўркди. Коронги шифтга, тонг ёфду-сидан ёришган дёразага аланг-жаланг боқиши баробарида ёнидаги милтиқка қўл чўзди. Бармоқлари муздек совук ярокка теккачгина, тундаги воқеа эсига тушди. Кўнгли андак хотиржам тортиб, кўрпа остидан сирғалиб чиқди. Бўйинни чўзиб, дахлизга мўралади. Яланг шолча устида совуқдан ғужанак бўлиб ётган кимсани кўрди. Аввалига қаҳри қўзиди, сўнг раҳми келди. Кишилар турмасдан, тезроқ жўнай қолинг дея, туртқилаб уйғотмоқчи бўлган жойида, негадир фикридан қайтди. Уйғотишга қўзи киймади. Тахмондан кўрпа олиб, авайлаб устига ёпти. Кейин кундалик юмушита уннади.

Ховлида иш дегани сероб эди. Кўрадаги молларга қараш, соғишиб, тагини тозалаш каби майда-чуйда ишларнинг ўзиям унинг кўп вақтини оларди. Ота-онасининг ўлимидан сўнг иш аёлнинг ягона халоскори бўлиб қол-ганди. Кўли юмушда кезлари жудоликниям, ёлғизлики-ниям унугтади. Тунлари ҳам тек ўтирмасди. Жун титиб, ил йигиради. Кўрпа ва кўрича қавийди. Оппоқ со-чиклар четига эрмакка қашталар чатиыйди. Синглиси эса ҳайрон, ёлғиз бошингизга шунча давлат не чикора, дей-ди. Унинг очкўз нигоҳи аёлнинг гашини келтиради: «Эримни бой қилмоқчиман», дейди. Синглиси унинг мо-лу давлатини йўқ эрдан кизғанади. Илондай тўлғониб алланималар дейди. Мерос талашиб жанжал кўтаргиси келади-ю, лекин опасидан ҳайкади. Кучи ичдан номаъ-лум поччасини қарғашга етади, холос.

Аёл иш билан бўлиб, тундаги воқеани ҳам, дахлизда уйқуни ураётган кимсани ҳам унугтган экан, ўчокқа ўтин

қалаётганда бирдан эсига тушиб қолди. Шошиб уй томон юрди. Бирок дахлизда хеч ким йўқ, қалин кўрпа бир четга чиройли килиб тахлаб кўйилганди.

Аёлнинг кўнглида хижолатга ўхшаш нимадир уйғонди. Юрагинг ёрилмай, одамга ўхшаб кутиб олсанг ўлар-мидинг! Акадай бир одам эди-ку у сенга! Яқинда томингни ёпиб берган... Эсида, ўшанда Қиличбек деганлари харчанд зўрласа-да, пулга унамаган, лекин бурчакдаги каттакон кўғирчокни сўраб олганди. Аёл хайрон бўлган. Биладики, Қиличбекнинг қизи йўқ, бақироқ, жанжалкаш хотини Тўлғанойдан иккита ўғли бор. Унинг ажабланганини сезган эркак кунботишдаги шаҳар томонга ишора қилиб деган: «У ёқда менинг кизларим кўп. Буни олиб борсам, уларнинг кўзлари баҳтдан канчалик чақнаганини бир кўрсанг эди! Мен баҳтдан чакнаган кўзлар шайдосиман, Чаманой!..» Аёл бир паст-баланд иморатлари кўзга ташланиб турган шаҳарга, бир ёш боладай кўғирчоқ кучган эркакка бокаркан, ўзича ниманидир тушунгандай бўлган.

Қиличбек фирт етим. Шаҳардаги болалар уйида вояга етган. Йигит ёшига етгач, марҳум Асқат темирчига шогирд тушиб, фалакнинг гардиши билан унинг қизи Тўлғанойга уйланган. Темирчининг қизи битта, аммо ўғиллари кўп эди. Бари бир-биридан баттар жоҳил ва нодон. Жанжални пулга сотиб олишади. Бирига тексанг, ҳаммаси ёпирилиб келади. На уятни билишади, на андишани. Бу борада Тўлғаной оға-иниларидан сира колишмайди. Эрига зуғум қилишни яхши кўради. Етимлигини рўқач килиб, ҳаромидан олиб ҳаромига солади. Бу камдек, салга додлаб, aka-укаларини бошига йифади. Бу уруғнинг кўли жуда югурдак, оқибат, Қиличбекнинг кочишдан бўлак иложи қолмайди.

Чаманой оғзидан сакич тушмайдиган йўғон бу аёлни жинидан ёмон кўради. Унинг ёш боладай жонсарак эрига раҳми келади. Қани энди, кўлидан келса-ю, ундан яхшилигини аямаса. Аммо яхшилик қилиш у ўйлаганчалик осон иш эмас экан. Кеча тунда уйига кочиб кирганида, дардига малҳам бўлиш ўрнига милтиқ ўқталиб ўтирибди. Энди билса, эркақдан эмас, гап-сўздан кўрккан экан.

Бугун тунда у негадир эркакни кўмсади. Кечагидай айвонда тунашини истади. Тонгда туйган ҳиддан нафас

олиш учун дахлизга чиқди. Бироқ тонгда хонани тұлдирған әркак хидидан дарап йўқ, ачиған хамир иси анқирди, холос.

Аёл маҳзун ҳолатда хонага қайтиб киаркан, ихтиёридан ташқари бир ишга қўл урди. Даҳлизга қалин қилиб жой солди. Янги кўрса, янги болиш қўйди. Эшикни тамбалашини эса гўё унуган киши бўлди. Лекин милтигини бикинидан жилдирмади. Ахир милтиқни ундан олиб қўймоқчи бўлган худуд нозирига уни «эрим, тунги посбоним», деган-да. Демак, эр дегани хотин кишининг қаватида, бикингинасида ётиши керак. Худуд нозири яхши йигит эди, уни тушунган: «Лекин қонунни бузаяпман-да, опажон», деган. Аёл уни эркала булласи-га қоқаркан: «Оланг учун қонунни бузсанг бузибсанда, укажои, — дея аламнәк жилмайган. — Тунда мендай ёлғиз бир аёлга эрдай гапда бу! Ёмон ниятда останами хатлаган одамни нима билан чўчитаман? Шуни ўқталиб кўрқитаман-да!»

Аёл тунда зийрак ётди, алланимани кутгандай, илхақ ётди. Қани эди, хокисор нигоҳли әркак, яна бир тунгина даҳлизда тунаса, яланг шолча устида эмас, қалин тўшакда ухласа, уйини әркак хидига тўлдирса! У шуни истади. Бундан ортигини хаёлига келтирмади.

Тонгда эса боши ғовлаб, караҳт уйғонди. Даҳлиздағи тўшакни бўш кўриб, хўрлиги келди. Кўзига ёш айланди ва бу ҳолатидан ўзи ҳам ажабланди. Тентак бўла-япман шекилли, деган ўйга борди. Лекин негадир тентак бўлгиси келди. Бироқ кўрадаги улкан тарғил сигири бунга изн бермади. Мўраб овоз берди. Унга бошқа жониворлар жўр бўлди.

У кўра томон ошиқди. Яхшиям иш бор-юмуш бор деба суюнди. Шунинг билан әркакният, ўй ва истакларният унугди. Одатдагидек, ишга шўнғиди.

Бу кечада эса ўзини ёмон карғади. Кечада тундаги хоҳиши ва хаёллари буғун жуда эриш туюлиб, ўзига-ўзи тухмат қилди: «Эрсирамай, ўл, мегажин!» Бунга қаноат этмай, оппоқ, бўлик сонларини аямай чимчилаб-чимчилаб олди. Оғриқдан жони роҳат топди. Шу йўсинда истагига чек кўйган бўлди. Бу тун даҳлизга жой солмади. Эшикни очик қолдирмади. Бироқ яробини ёнига қўйиб, тўшакка чўзилган ерида яна бирдан ўрнидан сакраб туриб кетди. Ички бир тўлкинга бўйсуниб, тахмон ёнига

борди. Кўрпа қаватига кўлини тиқканча узоқ туриб қолди. Сўнг шалвираб изига қайтаркан, ерда ётган миликка кокилиб, бармоғини кайириб олди. Оғриқ миясиға тепиб, ох тортиб юборди. Бармоғини тутиб тўшак устида тўлғонаркан, истамаса-да, негадир тагин эркакни ўйлади: «У шўрлик яна қувғинга учраса, бу совук тунда қайси тешикка бошини уради?!» Аёл оғриқният унутиб, шу ўй заптида эшикка югарди. Аввал у илгакни тушириди, сўнгра тамба-тутқич орасига қистирилган йўғон ўқловни суғуриб олди. Кейин эса фикридан қайтиб қолишдан кўрқандай, энтиканча ўзини қўрпа тагига урди.

Ўраниб-чирманиб, бамисли гувалага айланди.

Аслида у айниб қолишидан эмас, истагидан уялганди.

Тонг саҳарга яқин таниш хуррак овозидан уйғониб кетди. Кулокларига ишонмади. Сўнг қалби адоксиз қувончга тўлиб, даҳлизга деярли чопиб чиқди. Титроқ бармоқлари билан деворни пайпастаб, чирокни ёқди. Кўзи қок шолча устида ёш боладай ғужанак бўлиб ётган Киличбекка тушди. Аёлга у эркак киши эмас, ташландик, ҳимоясиз бир гўдак бўлиб туюлди. Мехри жўшиб, ичи туздай ачишиб, ичкаридан кўрпа ва тўшамча кўтариб чиқди. Тўшамчани бир четга улоктириб, йигитнинг устига кўрпа ташлаб кўя қолди.

Киличбек кўрпа тагидан бошини чиқара-чиқара, уйқусираб гудранди.

— Улар мени яна уришди, Чаманой!

Аёл индамади. Худди онадек, унинг бошида чўнқаяркан, илк бор эркакнинг юзига синчков разм солди. Ўнг яноғи ва иягида калтак изларини кўриб, юраги эзилди. Кўнгли бузулиб, сассиз йиғларкан, унинг манглайига кўл юборганини сезмай қолди.

Силаб туриб йиғлади, йиғлаб туриб силади.

Йигитнинг аллақачон уйғонгани-ю, ёш боладай ҳузур килиб ётганини кейин, қачонки, эркак унинг кафтини тутиб, бармоқларини учидан ўпгандан сўнгина пайқади. Қошида ҳимоясиз собий эмас, ростмана эркак киши чўзилиб ётганини гўё шундан ксийингина англағандай бўлди. Эркакнинг бу ўпичида меҳрталаб инсоннинг миннатдорчилиги-ю тушунуксиз яна алланималар коришик эди. Аввалига аёл бундан қаттиқ уялди, сўнг ран-

жиди. Кўлини илкис тортиб оларкан, ширин ниманидир йўқотгандай, унга ёмон қаради. Ўз навбатида, Қиличбек ҳам шуни сездики, хиёлгина ошикча харакати ёқимли тушдек лаззатли онни пароканда килиши мумкин. У кўлини ошиғич кўрпа остига яшириб, аёлга мўлтираб бокди. Уэр сўрагандай фўлдиради.

— Яна нима гап? — деди аёл, ҳаддан ошманг, деган оҳангда.

— Хеч гап. — Эркак қулт ютуниб, кўрпани иягига тортиди. Кейин бу ётиши ўзига эриш туюлиб, ўрнидан турмокка чоғланди-ю, устига азза-базза кўрпа ташлаган аёл бу ишидан хафа бўладигандек туюлиб, фикридан қайтди. Айвонда ўчиб қолган кезлари ўз аёли бу хил меҳрибонликни хаёлига келтирмаслигини эслаб, ичдан ўксинди: — Хеч гап, Чаманой!

— Хеч гапга ўхшамаяпти-ку? — Аёлнинг овози мулоимлаши.

Эркак аёлнинг боши узра шифтдаги номаълум нуқтага хаёлchan термуларкан, дардчил, ғоят дардчил оҳангда деди:

— Сен ўз отангта... ҳеч адоватла бокқанмисан, Чаманой?

— Нималар деяпсиз?! — Аёлнинг ранг-кути учди. — Ҳатто кўзига тик қарамаганман!

— Менга эса худди заҳарли илондай бокишиади! — Эркак нигохини бошқа нуқтага олди. — Эрта-индин нодон тоғаларига кўшилиб, менга кўл кўтаришдан ҳам тойишмайди. Ўзимча тарбиялашга кўп уриниб кўрдим. Аммо ота деган жонивор ҳар икки гапнинг бирида лойга корилиб турганидан кейин, таъсир ва тарбиянг қумга сепилган сувдай бир гап экан. Раҳматли қайнотам, сен бизга тўғри келмайсан деганда, мен ахмок ҳафа бўлган эканман, етимлигимни назарда тутаяпти деб. Энди билсам, мен нодонни аяган экан. Мухаббатдан кўзим кўр бўлиб, жоҳил тўдага интилган эканман. Мана энди, яхшининг ёмон, ёмоннинг яхши бўлмогига гумонланган холда ўзим пиширган заҳарли ошни айланиб, ўргилиб ичиб келяпман.

Аёл унинг «дийдиё»сини ёқтиромай бошини бурди. Ўзининг бу алфозда ўтириши-ю, эркакнинг бемалол чўзилиб ётиши энди таъсир килгандай, айни унинг ўзидан қидиришга тириши.

— Ҳадеб етим болаларга нарса ташийверсангиз, албатта, хотинингизга ёкмайсиз-да, — деди.

— Қанақа нарса?! — Эркакнинг никоҳи тўсатдан оловланиб, устидан кўрпани иткитиб ташлади. — Болаларга олиб борадиганим топганимнинг бир урвоги, бир зарраси, холос. Гаш нарсада эмас, нарса нима... У ердаги болалар мени қанчалик интиқ кутишини биласанми ўзи? Агар билганингда, бунақа гапирмасдинг. Мен Жаҳон гуннидай кўш-кўш иморат солмайман, Олим чиноқдай, топганимни ўмганимга тортмайман, қайнилаrimдай хаётга басир кўнгил билан қарамайман! Кучим етганча бахти ярим норасидаларнинг кўнглини овлайман! Чунки етимлик нималигини яхши биламан. Эсимда, дарвозадан кирган нотаниш аёлни онам, эркакни эса отам бўлса керак деб, олдиларига югуриб борардим. Кўзим кўчада бўларди. Бирор кимса бошимни силаган куни мендан бахтилироқ одам йўқ эди. Шуларни биласанми ўзи?

— Йўқ, билмайман, — Аёл билмағлигидан хижолат тортади.

— Қаердан ҳам билардинг. — Эркак ўтирган жойида оғир сўлиш олади. — Отанг қошингда, онанг доим бикинингда бўлган. Мен эса на отамни биламан, на онамни! Худди осмондан тушгандайман.

— Энди улар йўқ... — Аёлнинг кўзларида ёш халқаланди.

Улар бошларини этганча жим туриб қолишиди.

Аёл энди ўрнидан кўзғалмоқчи эди, эркак хижолатомуз оҳангда деб колди:

— Чаманой, агар қаттиқ гапириб юборган бўлсан, кечиргин. Шу... сенга кичкина бир илтимосим бор эди. Бугун менга озгина қарз бериб турсанг. Кеча тундаги жанжал лайтида анову ёсумон чўнтағимда борини қоқиб олди. Сўрамасдим-а, лекин шу... ҳафта бурун болалар уйига бир қизалок келтирилган. Кўзлари оҳуникидай катта-катта, ширингина қизалок. Шўрлик уззукун дарвозадан кўз узмай ўтиради. Бугун вақтим бор, ўша қизчага бирор нима обормоқчи эдим. Агар имконим бўлганида, уни ўзимга киз қилиб олардим-у, афсуски, шу кунларда ўзим уйимга сиғмай турибман. Факат «йўқ» дема. Кўлимга пул тушиши билан карзингни қайтараман.

Аёл энди ўзига ёш боладай жавдираб қараб турган эркакни яхши кўриб қолганини дафъатан ҳис этаркан, бирдан юраги гупуриб, нафас олиши қийинлашди. Уни силаб-сийпалагиси, хеч бўлмаса, кўйлагини ювиб бергиси келди. Бу телбанамо истак шу қадар кучли эдикি, Киличбекнинг, лавлагидай кизариб, «йўқ-йўқ» дейишига қарамай, этнидаги кўйлагини сидириб олди. Яғир пахталигига ўраниб, ўзига ханг-манг тикилиб қолтан йигитта бир қараб кўйиб, ташқарига интиларкан, ошхонага етиб-етмай, кўлидаги кўйлакни диморига олиб борди. Тўйиб-тўйиб хидлади, эркак ҳидидан боши айланаб, тандир четига беҳол суюниб қолди...

Тўлғаной бақирганича дарвозани тепиб кириб келганида, кун аллақачон пешиндан оғган, аёл ҳовлида кундалик юмуш билан банд эди.

— Эримни йўлдан урайсанми, манжалаки!

Аёл негадир ундан ҳайикмади. Шунингдек, қўни-қўшнилар олдида шарманда бўлишидан ҳам чўчимади. Бир тундаёқ энг азиз одамига айланиб улгурган инсонга бехад азоблар бериб келаётган бу жувонга шу қадар ўтли нафрат ҳис қилдики, унинг башарасига эркакчишига мушит туширганини сезмай қолди.

Тўлғанойнинг тили, аёлнинг мушти зўр эди. Шаллақилиги билан қишлоқка донг чиқарган жувон Чаманойнинг зарбаларига бардош беролмай, охири ўзини кўчага урди. Кўп ўтмай оға-иниларини бошлаб келди. Уларнинг важоҳатига қараганда, Чаманойнинг тирик қолиши гумондек эди. Аммо аёл зифирча довдирамади. Пўписага узилган биринчи ўқ дарвозанинг юқори тахтасини учириб юборди. Иккинчи ўқни узишга хожат колмади. Тўда қандай келган бўлса, шундайлигича қорасини ўчирди.

Ўша кеч улар бор аламини Киличбекдан олишди.

Аёлдан қарэга олган пулга қўғирчоқ ва бир талай ширинликлар ҳарид қилиб, оҳу кўзли қизалокнинг кўнглини чоғлаб қайтган Киличбек бу сафар тезда қочишнинг эвини қилолмади. Ака-укалар уни думалатиб уришди. Шунга қарамай, у барибир бир амаллаб қочишига улгурди. Бу галги хужум Чаманой туфайли бўлгани боис, уникига кирмай, тўқайзорга бекинди. Ака-укалар обдан хумордан чикқан эмасми, уни ортиқ таъқиб қилиб ўтирумадилар.

Коронги тунда Киличбекнинг аёлдан ўзга қидирувчи бўлмади. Чаманой уни ховлиси адогидаги қалин буталар орасидан топди. Шу ердалитингизни кўнглим сезувди дея, ғамга чўмиб ўтирган йигитнинг бошини бағрига тортди.

Шу созда сўёзсиз ва сассиз узок туриб қолишиди.

— Сизга азоб берганларнинг барини отаман! — деди ниҳоят аёл тилга кириб. — Битта кўймай кираман!

— Умрингни хазон қилишга арзимайди улар, Чаманой! — деди эркак унинг қайноқ бағрида мумдек эриб. — Баъзан мениям шайтон қитиклаб қолади. Доим бир илож қилиб ўзимни босаман. Мухими, мен сени топдим, Чаманой! Бу азоблар бўлмаганида, сенга етмок кайда эди! Сени ўйласам, азобниям, оғрикларниям унумтаман!

Чаманой кафтлари орасидаги бошни бағрига маҳкам босиб, уни ортиқ сўзламоғига қўймади.

Эртаси қизи оғриб қолганини баҳона қилгани кирган сингил уйдан Чаманойни тополмади. У гўё қўшниникига бирровга чикқандек, эшик ва дарвоза кия очиқ эди. Бирок бу хонадонда нимадир рўй берганини жувоннинг кўнгли дарров сезди. Эшик-тешикка бош суқиб, кийим жавоннинг бўшлигини кўрди. Лекин қолган ҳамма нарса жой-жойида эди. У ховликиб қўрага ўтди. Моллар тугал, негадир бўш қўйилган бузоклар оналарини эмаверганиданми, корнилари дўмбирадек шишиб кетганди.

Қўрадан лолу ҳайрон чикқан жувон ховлида бақироқ Тўлғаной билан ҳудуд нозирига дуч келди. Бети-ним қарғанаётган Тўлғанойнинг гап-сўзларидан шуни англадики, тунда опаси унинг эри билан қочибми, бош олибми кетибди. Бирок бу хабардан жувон унчалик қайфурмади. У эгасиз қолган ховли-жой ва мол-холнинг ташвишига тушган, бу хакда тезрок эрига хабар етказишини ўйларди.

Худуд нозири аёлларнинг гап-сўзларига эътибор бермай, хоналарни бирма-бир синчков кўздан кечираркан, норози оҳангда тўнриллади.

— Опам тушмагур «эри»ниям ўзи билан олиб кетибди-да.

— Қанака эр?! — Тўлғаной баланд овозда бобиллаб берди. — Нега энди у шум етим унга эр бўларкан! Хали

у хотинбоз қўлимга тушсин, суюкларини битталаб синдираман!

Худуд нозири пешонасини тириштириб, ўзича минғирлаб қўйди.

— Илойим, ҳеч қачон қўлингга тушмасин!

Чамаси, Тўлғаной қўшни кампир етказган хабарни ҳали-хануз тўла идрок этмаганди. Яроғли аёлдан чўчиб, ҳудуд нозирини эргаштириб келаркан, эрини Чаманойнинг қўйнидан ёки уйининг бирор бир бурчагидан топишига имони комил эди. Ва қачонки қўзи бўш жавонга тушгачгина, не воқеа юз берганини англади. Аламидан бақириб йиғлаб юборди. Колган иккиси эса унинг дардига бутунлай бефарқ — ҳудуд нозири Қиличбекнинг бу балодан қутулганидан, сингил эса шунча молу давлат ёлғиз ўзига қолаётганидан мамнун эди.

Тўлғаной эса «қочоқ»ларнинг гўрига фишт қалаб, тобора қишлоқни бошига кўтарарди.

## ҚУЁШ ТУТИЛГАН КУН

Кишлоқда хунук гап таркалди.

Эмишки, яккабулоқлик Боборайим.gov ҳамқишлоқлари бўлмиш Собир полвоннинг қонини ичмоқ қасдида юрганимиш. У мени тупрокка қориб кетди, энди мен уни қизил қонига белайман, пичорим кайрок устида, ўчим тўш остида, деганимиш.

Собир полвон бу гапларни кенг ҳовли ўртасидаги супада ёнбошлигар кўйи, қонталаш ўнг манглайини силаб-силаб, хаёлчан бир тарзда тингладики, авзойидан не воқеа юз берганини ҳализамон ошиқмай тўкиб соладигандек эди. Бошда, яъни жўралари ҳовлига гуруллаб кириб келишганида, шу истаги йўқ эмасди. Сўнг бирдан айниди. Оғзига тикила-тикила, бирин-сирин супага жойлашаётган йигитларнинг нигоҳларида ҳамдардлигу хавотирдан кўра қизиқиши аломатлари кучлироқ эканлигини сезгач, воқеага сабаб бўлмиш қўшни қизнинг «чайнаш»ларидан ҳадикланди. Боз устига, қиз ғаним оиласдан. Бир кўрпада тепкилашиб улғайишган тоғаси Баҳромнинг қотили Ваҳобга жондек сингил... Ходисани эшитгач йигитларнинг ҳар бало деб вайсашлари турган гап.

Шу тобда Собир полвоннинг ортиқча гап-сўзларга тоби йўқ. Кўнглида кечайдан ғаройиб бир туйғудан тажжубда эди. Буни қарангки, кечагача мавжудлигини билишниям, сезишниям истамаган қиз хаёлидан кетмай қолганди. Дастреб Боборайим говнинг тунги тажовузидан чўчиб, буни шунчаки хавотирга йўйганди. Тунда ҳар эхтимолга қарши уч бор қизнинг ҳовлиси атрофини айланиб келиши шундан эди. Аммо тонгда дарвозаси олдини супуриб юрган қизни кўргач, ич-ичидан нимадир гупураётганини аниқ хис этди. Нечун у кўзига бу қадар иссик кўриняпти? Демак, кўнглида хавотирдан бўлак яна нимадир уйғонибди-да. Ахир ўртада хеч бир куч йика олмайдиган адовари савлат тўкиб турардиди. Наҳотки, у тонгда қизнинг биргина кулиб қарашибданоқ емирилиб тушган бўлса!?

Супани тўлдириб ўтирган йигитлар эса унинг ҳолижонига қўймай, тинмай саволга тутишади:

- Айт, нима бўлди ўзи?
- Нега у кутуриб юрибди?
- Нима, оғзингга талқон солганимисан?

Собир полвон эса чуқур ҳўрсиниб, сўзламокка унчалик ошиқмайди.

Кеча қиз тутзордан ўқдек отилиб чикқанида, ўртадаги адоварни ўйламаганини аниқ эслайди. Боз устига, вазият ортиқча ўйга изн бермаган. Қиз, оғажон, кутқаринг, дея аввал қичқирдими, ё кейинми, ҳарҳолда жон ҳолатда кучогига отилган ожизанинг ҳаракатидан лолу ҳайрон бўлиб турганида, кутилмагандан тутзордан Боборайим гов югурниб чиқади. Оёғида рангти униқсан кирза этик, ёқаси йиртилган, хунук башараси тимталанган. Бамисоли кутурган итдай, даҳшатли важоҳатда бостириб келади. Собир полвон бағрига сукилган қизни ўзидан четлатиб, беихтиёр Боборайим говга бет бўлади. Қиз эса чинқирганча унинг ортига бекинади. Боборайим гов ёмон сўкинади. Йигитнинг елқаси оша кўл чўзид, қизни тутмокка интилади. Ундан тер, вино, тамаки ва яна алламбалоларни иси анкирди. У лақабига яраша ҳўкиздай кучли эди. Собир полвон миқтироқ бўлса-да, ундан бакувват, ҳам ёш эди. Биринчи ҳамладаёқ Боборайимни кўтариб ерга уради.

Қок туш.

Ёзниң жазирама офтобидан дашт ёнай дейди. Тева-

ракда қимирилган бирор зоғ йўқ. Тизза бўйи тупрок йўлда бир-бирита тирмашган икки гавда-ю, ёлғиз бир гувоҳ...

— Эшитдингларми, эрта-индин қуёш тутиларкан.

Собир полвондан тузукроқ жавоб олишолмаган йигитлар аллақачон ўзаро гапга тушиб кетишганди.

— Шиша топиб, корайтириб қўйиш керак экан.

— Кора кўзойнак ҳам бўлаверади.

— Салимнинг дўконида унақасидан қомабди, барини опқўйишиби.

— Охир замон бўлади-ёв деб, чоллар қўркиб юрганиши.

— Тоза қизик бўлса керак ўзиям, а? Бор қуёш бир зумда йўқолиб колса.

— Йўқолмайди, юзи тўсилиб, кун жуда хира тортади.

Айни шу холатни Собир полвон кеча бошидан кечирганди. Кўкка ўрлаган чангдан бир одим нарини кўрмоқнинг иложи йўқ. Йиқилса-да, ўларман ҳўкиздай қайта ва қайта ташланётган Боборайим говнинг кўланкасини тўзон орасидан базур илғар, наздиди, шу созда минг йиллардан бери муштлашаётгандек эди. Тириклик маъносини йўқотган, яшашдан ягона мақсади сарғиши, қалин туман орасида харакатланаётган қора кўланкани мавҳ этишдан иборатдек туюларди. «Кўланка»нинг бу даражада кайсарлигидан тобора хайрати ошиб бораради. Аллақандай бир бало эди у. Чурқ этмай ёпишаркан, ўлдирман, дея ора-сира гулдираб қўярди. Табиий, йигит буни сезмас, сезадиган ахволда эмасди. «Кўланка»ни тезроқ бартараф этмоқдан ўзгасини ўйламасди.

Кутилмаганда «кўланка» бирдан ўйиб бўлиб колади. Йигит ёруғлик истаб, теваракка, сўнг кўкка тикилади. Куёшнинг юзи кир, куюқ чанг булути орасидан йилтиллаб аранг кўзга чалинади. Олам шу хол-шу созда коладигандек, йигитнинг юраги увишади. Кейин шуури секин-аста тиниқлашиб, не воеа содир бўлганини англай бошлайди.

Бу орада тўзон босилиб, Собир полвон ҳануз четда даҳшатдан қотиб турган қизни кўради. Тупроқ орасида ўликдай чўзилиб ётган Боборайим говни кейин илғайди. Ўлиб-нетиб қолмадимикан, деган ўйга боради. Йўқ, рақиби бирдан жонланади. Инқиллаб қаддини

тиклайди. Энгил-бошидан шовуллаб тупроқ түкилади. Негадир ўрнидан құзғалишга ошиқмайди. Ялпайиб ўтирган ерида гоҳ кизга, гоҳ йигитга қаҳрли тикиларкан, совуқ ва ўта құркінчли оханды дейди: «Бу тун иккөвингиям бүғизлайман! Авнал сени, қанжик! Кейин сени!»

Собир полвон не балога йүлиққанини энди сезгандай, оғир сұлиш олади. Тутэр ёқалаб кета бошлайди. Бирок рақибининг хирки овози тинч кетишга қўймайди, ортидан қувиб етади: «Қанжигингни тутзорга опкириб, исқаб кет! Бу ёғи жуда оз қолди, улгуролмайсан кейин! Узиям зўр нарса-да, маза қиласан лекин!»

У ортига кескин ўгириларкан, изидан келаётган қизга тўқнашиб кетади. Киз қалқиб, йигит унинг билагидан базўр тутиб колади. Киз кафтлари йигитнинг кўксида, ёлворувчан тарзда дейди: «Қўйинг, тенг бўлманг шу билан!» Йигит беихтиёр қизга тикилади. Йирик-йирик кўзларида чексиз миннатдорчилик белгиси қалқиб турган қизнинг ружори ғоят гўзал эди. Собир полвон ундан кўз узолмай тураркан, негадир яноғига тушган бир тутам сочини аста тўғрилаб қўйгиси келади. Бирок қиз ундан аввалроқ харакатланади, кафтидаги дуррасини йигитнинг қонталаш манглайига босади. Бундан бир зумга сархушланган йигит майин дуррача чеккаси ва яноклари бўйлаб сийпаланаёттанини сезади. Афтининг беҳад кирлигини ўйлади.

— Боя... — дейди ёқимли бир ҳисдан боши айланаб,— кун тутилдимикан деб ўйлабман!.. Кейин бундай қарасам, чанг-тўзон... Кулга ағнаган тайхардай, тоза юмалашибмиз-да ўзиям...

— Акаси тоғасини пичоқлаган, — наридан Боборайим говнинг хирки кулгуси эшитилади. — Синглиси эса... жиянини кучоқлаган! Зап зўр ишлар бўляйтими, а? Буйтиб турмай, тутзорга обкир! Вакт борида тўйибтўйиб искалашиб олинглар!..

Собир полвон бирдан хушёр тортиб, киздан четланади. Боборайим говнинг мазаҳли кулгиси остида йўлда давом этади. Изидан келаётган қизнинг шикаста овози қулоғини сийпаб ўтади: «Тутзорда қўйларга печак юлиб юриб эдим. Бирдан кеп, ташланиб қолди». Йигит, чатоқ бўпти, деган маънода «Хим-м» деб қўяди. Қизнинг овози би гал сал узокроқдан эшитилади: «Бетини тимталаб

қочганим... яхшиям сиз кеп қолдингиз...» Йигит ўзини эшитмаганга олади.

Улар кишлок бикинидаги айри тол ёнида жимгина хайрлашадилар.

Киз бошини эгганча кетди. Йигит толга суянганча қолди. Ораларида нимадир пайдо бўлди, нимадир йўколди. Юзага келган нарсанинг нелиги мавҳумдек, йўколгани ҳам ноаниқ эди. Собир полвоннинг юракдан туйгани, қизнинг буткул ҳимоясизлигини туйқусдан англаш бўлди.

Кизнинг акаси камоқда, янгаси болаларини олиб кетиб қолган, кенг ҳовлида ёлғиз онаси билан туради. Тарафини оладиган якин хеши йўқ. Дарвоҷе, олди-орти тўла оға-иниси бўлган тақдирдаям, Боборайим говнинг кутилмаган тажовузидан омон қолмоғи қийин. Худо урган бу банда на уятни билади, на андишани. Одамлар у билан олишавериб чарчаган, охир-оқибат, тегмасликни мъқул топганлар. Тегсанг — ё жонингга тирғалади, ё молингта. Ит бас келсин унга!

Эшикдан Раҳим пакана пилдираб кириб келганида, Собир полвон ҳануз паришон ўтиради. Йигитлар эса, одатдагидек, ош қилмоқ тараддуидида эдилар. Не баҳонада тўпланимасин, уларнинг бу хил йиғинлари ошсиз яқунланмасди. Бу одатни қишин-ёзин бўйнидан бўйинбоғ тушмайдиган Шоди пўрим русум қилганди. Хозир ҳам ҳаммани ишга солиб қўйиб, ўзи валаклаб гап сотиб ўтиради.

Раҳим пакана давраға бир қур назар соларкан, кўзи Собир полвонга тушгач, сирли кулимсиради. Сўнг «сўнгти ахборотни эшитинглар», дея супа лабига чўқди. Аммо ичи тошганиданми, яна ўрнидан туриб кетди.

— Бу ёқка келаётиб, — деди ҳамманинг диккати ўзига қаратилганини сезгач. — Дўкон ёнида Бобур сариқни кўрдим. Фирт пиён. Бу кишлоқ менга ҳаром, кетаман бошимни олиб, дейди. Нимаякан десам, суйган кизини Боборайим гов бузиб қўйибди, бу ишга жўрамиз Собир полвон шерик чикиб, гов билан тоза ёқалашибди. Хуллас, киз ўртада қўзичок, булар эса бўри бўлти. Тағин билмадим, ҳархолда гов шундай деб юрганимиш.

— Э, ҳали гаи бу ёқда экан-да, — деди Шоди пўрим шум табассумини яшиrolмай. — Айтдим, нега бу сўлжайиб ўтирибди деб.

Даврада кулги күтарили.

Собир полвоннииг ошиғич ва ғазабли эътирози умумий ғала-ғовур орасида кўмилиб кетди. Кейинги уринишлари ҳам бесамар кетгач, кучи етгани дастурхондаги пахта гулли пиёла бўлди. Бирок ўтирганлар на унинг важохатига, на бақувват ҳанжалари орасида бурдаланган пиёлага эътибор бердилар. Бобур сариқнинг устидан кулиб, қизнинг ғийбатини қилишаркан, Собир полвонни ҳам тапга қистириб ўтишарди. Бунга сари у қутурмок истар, қутурган кўйи қизнинг бокиралигини ва унга ҳеч ким даҳл қилмаганини исботлагиси келарди. Аммо тезда бу ҳаракати бекорлигини, йигитлар ишонгандек бўлишса-да, барибир ўз фикрларида қолаверишини англаб етди. Азалдан шу — ғийбату гумон бўй чўзган ерда ҳақиқат топталади.

Йигитнинг титроқ лабларидан учган аламли сўзларни қайноқ ҳаво ютиб юборди.

— Ҳа, силар ул эмас, тўлсилар!

У полвон сифатида давра юзини кўра бошлаганидан бери эркак зотини икки тоифага ажратадиган бўлган. Дердики, йигит бор — ул, йигит бор — тўл. Униніча «тўл» деганлари шунчаки зуррият, «ул», яъни «ўғил» эса эл ғами ва орида юрадиган мард йигит экан. Бу ақидани қаердан кавлаб тошгани номаълум, аммо ўзи бунга юракдан содик эди.

Хозир ҳам қизнинг кейинги такдирини ўйлаб эзилиб ўтираркан, шу пайтгача англаб етмаган бир ҳақиқатни идрок этгандай бўлди: «Тоғамнинг қотили Вахоб эмас, одамлар...» У тоғаси билан боғлик воқеани кўз олдига келтиришга уринаркан, тишлари орасидан аламли ингради: «Яна ўша тутзор...»

Тоға билан жувон тутзордан бошлишиб чикаркан, не фалокат бўлди-ю, бефаросат аёл этагини тўғрилайди, эгни — бошини қоқиб-суқади. Буни тасодифан кўриб колган қишлоқ кампирларидан бири тишсиз оғзини кийшайтириб куйидаги гапни тарқатади: «Фалончилар оқшом тутзорда ўйнашиб ётган экан. Ўз кўзим билан кўрдим. Одамларда на шарм копти, на хаё...» Шубҳагумон исканжасида колган эр -- Вахоб кўп кийналади, кўп азоб тортади. Аёлини калтаклаб, тоғанинг ёқасига ёпишади. Бунга сари қишлоқда ғийбат кўпчиғандан кўпчииди. Ва Шовруқ носоннинг тўйида айтилган бир

офиз гап барига якун ясади: «Ана, хотинингни ўйнаши келаяпти». Ҳамма қатори еб-ичиб ўтирган Вахоб бошини қўтариб, тўйхонага кириб келаётган тоғани кўради. Сўнг ён-верига аланглаб, гап эгасини қидирали. Лаблар чапиллаб, бармоқлар ёқка ботган, гўё хеч қанака гап айтилмагандай эди. У ночор бош эгаркан, товоқ ёнида ҳозиргина ўзи эт бурдалаган узун пичоқقا кўзи тушади. Негадир унга тикилиб колади. Шунда кимдир «ниқ» этиб кулади. Энди у тифга айрича назар билан карайди. Кийналган жонига факат шугина оро кирадигандек туюлади. Биргина ҳаракат билан барча изтиробларига чек қўймокни истайди. Пичоқни енги ичига яшириб, хиёл гандиралаганча ўриндан кўзгалади. Тўй эгаси билан чакчақлашиб турган тоға томон юради. Ҳамма ўзи билан ўзи овора. У тоғанинг кўксига зарб билан тиф санчгандан сўнгина нима иш килиб қўйтанини англайди. Тўй эгасининг қўлида жон бераётган тоғанинг кўзларида шу маънони ўқийди: «Нечун? Нима айбим учун?!» Унинг бирдан-бир айби тутзорда барг юлаётган аёлнинг қопини қўтаришига қўмаклашгани эди, холос...

— Лекин сен маладессан!

Собир полвон яғринига бехос тушган шапатидан чўчиб кетади. Ёнига ўгирилиб, супа лабида тиззалаб турган Раҳим паканани кўради. Қўлида арок тўла пиёла, афти бўриққан.

— Синглисини бузиб, тоғангнинг ўчини олдингми, демак, сен ҳақиқий эркаксан! — деди у яна. — Шунинг учун мановуни ичиб юбор.

Собир полвон бу нималар деб алжираяпти, деган ўйда даврадагиларга хайрон бокаркан, бошқаларнинг ҳам кўзларида шу маънони ўқигач, кўнгли шу даражада вайрон бўлдики, назарида, куёш нурсизланиб, олам зими斯顿 тортгандек туюлади. Аммо бу нарса қуйидаги гапни дангал, ўз навбатида, хотиржам оҳангда таъкидламогига монелик қилолмади.

— Тоғамни Вахоб эмас, силар, силарга ўхшаганлар ўлдирган!

Бу гапдан йигитлар, ҳатто дараҳтдаги қушлар-у ховли юзидаги товукларгача донг котиб, фир-фир эсаётган кучсиз эпкин бир зумга тингандай бўлди.

— Энди эса шўрлик бир қизнинг бошини емоқчими-санлар?! — деди ғазаби тошгандан тошиб. — Йўқ, уни

силарга едириб қўймайман! Энди эса жўна баринг!  
Йўқолларинг-е!

Йигитлар норози қўзғалишаркан, кимдир барибир тилини тиёлмади.

— Раҳмат, қандайдир бир қанжиқни биздан устун қўйганинг учун катта раҳмат!

Собир полвон зант ила улоқтирган пиёла гап эгасининг қаншарини сийпаб ўтди.

\* \* \*

— Анову ерда эркаклар муштлашаяпти!

Даштдан тезак териб қайтаётган бола етказган бу хабар гузардагиларни оёқлатмай қўймади. Кимдир ташвишда, кимдир кизиқишида, кимдир эса шунчаки томоша илинижидан даштга ошиқди. Улар орасида кеча Собир полвон томонидан ховлидан ҳайдаб чиқарилган йигитлар ҳам бор эди.

Аслида Собир полвонининг қишлоқ яқинида жанжал қўзғаш нияти йўқ эди. Боборайим билан Яккабулокнинг ўзида гаплашмоқчи эди. Жонини гаровга қўйиб бўлсада, унинг, қизга тухмат қилувдим, деган иқрорини олмокчи эди. Наздида, шу биргина гап қишлоқда тобора урчиётган турли хил миш-мишларга барҳам берадигандек эди. Бу ўй илгарироқ миясига келмаганидан ҳатто хайратда эди. Боборайим говнинг кутилмагандан ҳужум қилиб қолишидан хавотирланишга хавотирланибди-ю, бу иш ўзга бир йўсинда амалга оширилганлигини хаёлига келтирмабди.

Кечада оқшомдаёқ қиз не балога гирифтор бўлганини тўла англаб ултурганди. Қизнинг кўчасида бемақсад тентираётгандек эса-да, аслида уни истаб чиққанди. Ички бир туйфу акл-идрокдан устиворлик қилмоқда эди. Ҳаётида илк бор қизнинг кўкиш дарвозаси қўзига сирли ва иссик кўринди. Аммо дарвоза олдида узоқ ҳаяллаб бўлмасди. У олга жилди ва салдан сўнг муюлишдан сув тўла чelагини кўтариб чиқкан қизга рўпару келади. Қизнинг кўриниши шу қадар эзгин эдики, чelак эмас, бир олам фам кўтариб келаётгандек эди. Қиз сўлғин нигоҳини ердан узаркан, йигитга қўзи тушиб, юзига қизиллик югуради. Қувончга ўхшаш нимадир порлаган қўзлари қаъридан шу маъно акс этади: «Не кунларга қолдим, оғажон?!» Йигит оғир сўлиш олади. Қиз эса

нигохи ила сўзлашда давом этади: «Бундан кўра ўлганим яхшироқ эди. Ҳатто ўз тукқан энам ҳам менга гумонсираб қарайти!»

Йигит гуноҳкорона ерга тикиларкан, қўзларини олиб кочмоқдан наф йўклигини англаб, тағин бошини кўтаради. Кизнинг қайғуга тўла нигохи юрагини ўртаб юборади. Беихтиёр уни бағрига тортиб, овуттиси келади. Бироқ бунинг асло иложи йўқ эди.

Нигоҳлараро бу сўзлашув лаҳзанинг ўндан бири улушида бўлиб ўтган эса-да, йигитнинг назарида, йилга чўзилгандай туюлади. Аламини ердаги тощдан олади. Зарб билан тепилган тош кўча четидаги лойхандаққа бориб тушгач, у ердан афтини соқол босган, иркит бир кимса бош кўтарди. «Бошни тешай дедингиз-ку, полвон», дея хандақ четига суяркан, воқеани ўзича тусмollаб, хунук илжайди. Сўнг танглайини маънодор тақиллатиб, қайта лойхандакқа шўнгиди.

Собир полвон бугун тонгда Яккабулокни кора тортиб, отда йўлга тушаркан, қизнинг ҳовлисига илҳақ назар ташлаб ўтди. Ҳовли ўлик чиққан уйдай сукунатда эди.

У қишлоқ четидаги кулбага етгачкина, қизни бир зумга унутди. Отдан тушмай, бир ёнга топ ташлаган эшикни тақиллатди. Девор оша ичкарига мўралаб, ҳовлининг рафторидан кўнгли айниди. Қаровсиз ҳовли юрагидаги ғашликни баттар оширди. У ҳовли юзини қоплаган ўт-ўланларга, синган қўзларига қофоз ёпиштирилган деразага, отнинг калласидек қулф осилган эшикка, айвон устунидаги михга илиғлиқ хуржунга бир-бир разм соларкан, бу гўшада одам боласининг туришига ишонгиси келмади.

Йигитнинг қишлоқ оралаб сўраб-суриштиришлари ҳам натижа бермагач, изига қайтди ва Боборайим говга ҳеч кутилмаган ерда, — қишлоқ яқинидаги подаётокда дуч келди.

Боборайим гов, қўлтирида чоғроқ тарвуз, чамаси, адирдаги палакдан қайтаётган экан, Собир полвонни кўриб қўзлари ёвуэона чакнаб кетди. Тарвузни четга иткитиб, этиги қўнжидан пичоини чиқарди.

— Уйингга ўтмоққа эринибгина турувдим, — деди ҳамлага шайланиб. — Зап учрадинг-да! Қани, отдан туш!

Собир полвон қамчи билан даштга ишора қилди.

— Балки... сал нарига ўтармиз?

— Йўқ, шу ерда... конингни ичаман! — Боборайим гов хирқираб кулди. — Агар чўчиёттан бўлсанг, этигим учидан битта ўп, гунохингдан кечаман кўяман.

Собир полвон отдан сакраб тушди. Юган тасмасини эгар кошига илиб, отни қишлоқ сари ҳайдади. Сўнг бамайлихотир харакатла ваҳшиёна илжайиб турган рақибига рўпару бўлди.

— Агар қизга тухмат қилганингизга иқрор бўлсангиз ва буни эл олди-да айтсангиз, этигингизни эмас, кетингизни ўпаман!

— Зўрсан-у, лекин кетимни булғаш ниятим йўқ, — Боборайим гов хунук иршайди. Сўнг кулгиси зумда ўчиб, афти ўта қаҳрли тус олди: — Билсанг, Вахобда менинг қасдим бор. Қамоқдан чиқишимда каттиқ ранжитган мени, шериклари билан... Ё энангни, ё синглингни булғайман деб, қасам ичиб қўйганман. Тунов куни ниятим ушалай деганда, ҳалақит бердинг. Менга кўл кўтариб, ўз бошингга ўзинг бало орттиридинг!

— Майли, бир бошга бир ўлим, деганлар! — Собир полвон оғир бўлишга тиришди. — Аммо аканинг ўчини сингилдан олмок учун бошга рўмол ёпинмок керак! Эркаксиз, бориб ўзи билан ора очди қилсангиз бўлмайдими? Ахир сизга ҳар икки томон ҳам бир-ку.

— Ўзим ҳам шуни ўйлаб турибман, — Боборайим гов совук илжайди. — Зўр-да у ёқ. Нонинг тайин, жойинг тайин. Қишлоқда нима бор. Мана, битта хом тарвузни деб ким қаерларга бориб келаяпман. Лекин қизни...

— Лекин бу қишлоқнинг ўз эгалари бор! — Собир полвон унинг гапини чўрт кесди. — Ўлмаган улар! Қизни сенга хафа қилдириб қўймаймиз!

— «Сен»лаб қолдингми?

— «Сиз»лашга арзимайсан!

— Ахир унинг акаси тоғангни...

— Ул йигиттга бу баҳонамас...

— «Ул-ул»лаб ўларкансан-да, бу дунёда ул коптими.

— Бор экан-ки, кошингда турибман!

— Сал ҳаддингдан ошмаяпсанми?

— Борим шу!

— Қизни деб ҳатто кетимни ўпмокчимисан?

- Агар иқрорингни айтсанг!
- Айтмасам-чи?
- Тилингни кесаман!
- Тилимни кесадиган одамнинг боши иккита бўлиши керак! Сенда эса битта! Уям бўлса омонат.

- Демак, олишамиз?
- Эмасам-чи!
- Унда пичокни ташла!

Боборайим гов кулди.

- Агар ўзингни ул билсанг, эр билсанг, ташла пичокни! — Собир полвон жахл билан ер тепинди.

— О-о, жон ердан тутаркансан лекин, — Боборайим гов шундай дея қўлидаги пичокни четроққа итқитаркан, негадир тир бориб тушган ерга зимдан қараб қўйди. Сўнгра йигитнинг қўлидаги қамчига имо килди: — Қамчи...

Собир полвон қўлидаги қамчини зарда билан улоктиаркан, дарғазаб охангда сўради:

- Сўнгги марта сўрайпман, иқрорингни одамларга айтасанми-йўқми?!

Боборайим гов иркиллаб кулди.

- Айтмас экансан, дунё тугагунча олишаман сен билан!

- Дунём тугади деявёр...

Боборайим гов гапини тугатолмади. Лунжига тушган кучли зарбдан чайқалиб кетди. Корнига тушган иккичи зарбдан эса тиззалаб қолди.

- Уҳ-ҳ, мазза! — деди у оғир-оғир нафас оларкан, қаншари остидан йигитга ўқрайиб. — Яхши қўраман калтакни. Қанча кўп калтак есам, одам боласини еб-ютмокқа шунчалик иштаҳам очилади! Мана энди, сени ейман!

Улар муштлашишда давом этаркан, ўтган галги олишувдан тузуккина сабоқ чиқарган Собир полвон рақиби-ни ўзига яқинлаштирасликка уринар, бутун қаҳруғазабини муштумларига жамлаб, унинг дуч келган ерига турсиллатиб туширар ва шунингдек, ўзи ҳам бенасиб қолмаётганди. Боборайим говнинг мушти оғир, гоҳида у зўр-базўр оёқда туриб қоларди.

Бора-бора Собир полвон қандайдир ёввойи бир маҳлук билан олишаётгандек сеза бошлади ўзини. Негаки, бу даражада аёвсиз муштлашишга бандасининг бардош

бермоғи қийин эди. Кўзи ракибининг ваҳшийлашган афтидан ўзгасини кўрмайтган эса-да, кишлоказдан юргургилаб чикишаётган кимсаларни илғамай қолмади. Шунинг баробарида, офтобнинг хира тортаётганини ҳам пайкади. Бироқ бу оёқ остидан кўтарилаётган тўзон эмасди. Негаки, улар олишаётган майдон ажириқзор бўлиб, кўхна ариқ ўзанидан бошланган майсазор хув наридаги подаёток этагида тугарди. У ушоқ моллар томонидан мунтазам чимдиг турдилса-да, то кеч кузгача ўз тусини йўқотмасди.

Собир полвон эс-хушидан мосуво бир ҳолатда муштлашаркан, ажратмоққа уринганларга бегона овозда ўкирди.

— Аラлашманглар! Аралашманглар деяпман!

Боборайим гов эса ундан баттар бўкирди.

Орага суқилганлар уларнинг таҳдидидан эмас, адабиши тушган муштдан четга қочдилар.

Собир полвон шошиларди. Кишиларни аралашувидан чўчиб, ошикарди. Ҳайвоний қувватга эга бўлган Боборайим говнинг тантана қилишидан, тухмату бўхтонларини бафуржа туфлашига имкон туғилишидан қўркмокда эди. Кандай бўлмасин, унинг икрорини олишни ўйларди. Бу эса оғир, жуда оғир кечмоқда эди.

У рақибининг навбатдаги қарши зарбасига бир амаллаб чап бераркан, кўзи тўсатдан одамлар орасида рангкути ўчиб турган кизга тушиб колди. Айни шу нарса жангнинг тақдирини ҳал этди қўйди. Собир полвон бор кучини ўнг муштига жамлаб, чунонам урдики, Боборайим гов коптоқдай юмалаб, мук тушганча ҷўзилиб колди.

Йигит гандираклаганча, унинг тепасига борди.

— Икрорингни айт! — деди хиркираган овозда. — Икрорингни айт деяпман! Баландроқ айт, ҳамма эшитсин! У, кўзи ажриқ кучиб ётган рақибида бўлса-да, куннинг тобора ғуборлашаётганини сезди. Голиблик нашидасини сурәётган юраги нохуш ниманидир ҳис этди. Офтобга нима бўляяпти, деган ўйда бир зумга чалғиди. Кейин, икроримни айтаман, дея ғудранаётган Боборайим говнинг овозида истехзо, истехзодан ҳам кўра тантанага ўхшаш нимадир борлигини пайқаб, у томон хайрон бокди. Рақиби, ўнг қўли қорнида, гўё беҳад бир оғриқдан азоб тортаяпти-ю, аммо шунга қарамай, ўрни-

дан кўзгалмоққа ўзини мажбурлаётгандек харакатланаркан, тағин деди:

— Ҳозир айтаман иқроримни!

Собир полвон ичдан қувонди. Қизни ёнига чакирмоққа оғиз жуфтлади. Бироқ улгуролмади. Танига санчилган тифдан ох тортиб юборди. Боборайим говнинг тириқклар билан «безалган», терга ботган афтини жуда яқиндан кўрди. У нафратомуз илжайтганча, нималардир деркан, йигитнинг қулоғига чалингани шу бўлди.

— Мабода ўлмай қолсанг, бундан кейин ракибингни «ухлатмай» туриб, чалғий кўрма!..

Кутилмаганда юз берган бу ҳодисадан даҳшатта тушганлар бошда котиб қолишиди. Кейин кимлардир изига қарамай қочди, кимлардир йигит сари интилди...

«Оғажон!» деган чинқирик қулоқни қоматга келтирганда, Собир полвон саросимада гувранишаётган одамлар орасида, ерда чўзилиб ётарди. У овоз келган томонга бошини буришга интилди. Бироқ ёнидагилар қизни ундан тўсиб қўйганди. Шунда унинг кўзи қонталашиб кўёшга тушди.

— Кун тутилибди, — деди алаҳсираган оҳангда. — Кун тутилса, юрагим сиқилади, ёмон сиқилади...

Қиз яна чинқирди ва одамларни туртиб-суртиб, йигитнинг тепасига келди, чўккалаб, унинг бошини тиззасига олди. Кўзларидан дув-дув тўкилаётган ёш йигитнинг яноқларини юва бошлади.

Собир полвон қизга кулимсираб тикилди. Қалтираётган ўнг панжасини чўзиб, қизнинг пешанасига тушган бир тутам сочини тўғрилаб кўймоққа уринаркан, нимадир деди. Бироқ унинг овозини Боборайим говнинг бўғик бўкириклари босиб кетди, янчиб кетди.

— Яқинлашманглар! Қўлингни торт! Қонун бор! Мен фақат қонунга бўйсинаман! Яқинлаша кўрманглар! Тиламан! Тилиб ташлайман! Ух-х, бошди единг-ку, энагар!..

Дупур-дупур — кимдир қочди, кимдир қувди.

Қизга тикилиб ётган йигит унинг кўзларida шу маънioni уқиди: «Сизни яхши кўраман! Жонимдан ортиқ! Фақат... фақат ташлаб кетманг мени!» Йигит, мен ўлмайман, деган маънода охиста киприк қоқди. Қиз унинг бошини бағрига тортди.

Собир полвон димогида кизнине нафис, бокира хидини туяркан, тилида қыйидаги жумла айланди: «Мен хам сени яхши күраман!» Унинг эътирофини ҳеч ким эшитмади. Қиз буни бағрида, бутун вужудида ҳис қилди.

Айни шу лаҳзада күкдаги қүёш юзи тўла тўсилиб, олам янада хира тортган. Бу хиралик даштнинг аллақайси бурчида ҳануз йигитларга тутқич бермасликка уринаётган Боборайим говнинг ёввойи йиртқичларга монанд ғазабкор бўкиришларидан маҳзунлик, алланечук ваҳима касб этганди.

## ҚАБРТОШ

Тоғдаги оғайнилариникида ҳафта тўйлаб қайтган Эрали энаси мозорига қабртош қўйилганини эшитиб, фифони кўкка ўрлади. Ака турганда сингилнинг қабртоши ўрнатиши нимаси?! На бир оғиз сўраш бор, на олдидан ўтиш. Энди одамлар нима дейди? Ўғил бўлмай ўл-а, синглингча бўлолмабсанда демайдими. Бу шумликнинг бошида синглиси эмас, куёви турганини улар каердан хам билсин. Душман кулиб, дўст ачинадиган иш бўпти-да. Эрта-индин деб юрмай, вақтлироқ ҳаракатини қилганида, шу ғалвалар йўқ эди. Ана энди... Бир хаёли, бориб куёви билан ёқалашмоқни, тириклигига қадрига етмай-етмай, ўлганида буйтиб иззат қилишинг нимаси, дея синглисини обдон тузламоқчи бўлди. Бирок хирсадай куёви-ю бўй чўзиб қолган жиянларига кучи етмаслигини ва синглисига гап топиб беролмаслигини ўйлаб, фикридан қайтди. Манглай қашлаб бошқа чора кидиришга тушди.

Ва топди ҳам.

Эртаси эрталаб туман марказидаги сангтарошнииг устахонасига уриб борди. Қабртош буютирди. Сангтарош куюқ қошлари остидан сурату қофоздаги ёзувга караб ажабланди.

— Яқиндагина ясаб бергандим-ку бу кишиникини, оқ мармардан.

— Униси... синиб қолди, — Эрали елкаси тиришиб, ёлғонлади. — Кейин... униси менга ёқмади. Бунисини кора мармардан ясаб берасиз. Сербезак, сурати тагида тўрт қаторгина шеъриям бўлсин.

— Пулига чидайсизми? — Сингтарош узун бурнини кашлаб, унга синовчан тикилди.

— Пулидан ғам еманг!

У сангтарошнинг устахонасини тарк этаркан, енгил тин олди. Ўзини ўоят ақлли хис қилди. Бекорга уришиб-талашиб юрмай, энаси мозорига ўзи ясаттирган қабртошни ўрнатиб қўя қолади, тамом-вассалом.

Бир ичлари кўйсин!

Ўғил жонивор ўлмаганини, энасиниңг қуни күёви ва синглисига қолмаганини одамлар бир кўриб қўйсин.

У күёви билан уришли эди.

Каттазанг күёвини азалдан унчалик хушламасди. Ўзини қишлоқ бойларидан бири санаб, унча-бунча одамни оёқ учida кўрсатадиган нодон күёви бир қуни ғалати бир гап айтиб қолди. Эмишки, бу худуд бир пайтлар қайсиdir бобосининг мулки бўлган экан, у ёғи хув кўлгача, бу ёғи қиргача... Кўкламнинг илиқ ва тароватли кунларидан бири эди. Улар дўнгда давра қуриб, ебичиб ўтиришарди. Лаган тўла эт, ёнда бир талай шиша, кайфлари жуда чоф эди. Бошқалар-ку ахмок күёвнинг фудранишига кўпда ахамият беришмади-ю, лекин бу гап Эралига ёмон тегиб кетди.

— Унда биз сифинди эканмизда, — деди оғриниб.

— Шунга ўхшайди, — күёви иршайиб, хунук кекирди. — Лекин бу факт, барингни тириклигинг бобомнинг ерида ўтаяпти.

Эрали лаганга узалган қўлини тортиб оларкан, ёнбошлаб ётган ерида атрофга аламнак бокади. Ёнбағирликка сочилган қишлоққа, кенг даштга, олисдаги қирга, теварагини қамиш коплаган хув наридаги қўлга бир-бир разм соларкан, хотирасини кавлаштириб, аждодлари тарихини титкилай бошлайди. Боҳабарлиги бобосидан нарига ўтмаслигини англаб эса жиндек афсусланади. Сўнг узук-юлук эшитган ва билганлари асосида ўтмишни ўзи-ча тасаввур этиб, ширин бир эртак тўқийди. Тўқиган эртагига кўра, бу замин, ҳатто қўлдан наридаги уфққа туаш бийдек дашт ҳам катта бобосига тегишли экан. Күёвнинг манқа бобоси эса унинг қўлида оддий бир чўпон экан. Бобосининг чорваси даштга сиғмайдиган даражада кўп экан. Эрта кўклам кунларидан бирида бобосининг кўнгли нимадандир ийиб кетибди-ю, чўпону чўликларини ёнига чорлаб, ҳар бирига ўнтадан кўй

хадя этибди. Куёвининг пачоқ бобоси ана ўшанда кўйли бўлиб қолган экан. Агар суришириб келса, куёванинг кўлидаги чорва ўша ўнта қўйнинг зуррияти бўлиб чиқишиям мумкин экан...

Тўқиган эртаги жуда марокли эди. Бироқ эртак күёвига ёқмади. Андишани бир четга йиришириб қўйиб, уни, яъни ўзи каби юз қўйли бир одамни «иштонсиз» деб сўкли. Оқибат, чойи яримлаган чойнак куёванинг елкасини сийпаб ўтди. У томондан эса ароқ юки пиёла «канот қоқди». Кейин лагану тақсимчаларга навбат етди. Бирининг манглайи ёрилиб, иккинчисининг қовори кўкарди. Устихонлари аллақачон тупроққа коришиб кетган бобокалонлари рухи оёқ ости қилинди. Аждодинг нима-ю, ўзинг гўр бўлармидинг, деган гаплар бот ва бот тақрорланди.

Сўнг у, дастурхон куёвники эди, даврадан турткилаб хайдалди.

Эрали пастга эна-эна, дўнг белида бир зумга тўхтади. Кенгликка алам билан тикилди. Тўқиган эртагига ўзиям чиппа-чин ишониб, шундай дея хитоб килди:

— Бово-я, бовоожон-а! Ерингиз сифиндиларга тўлди!  
Сифиндилар оёғи остида эзилди, топталди, ситилди, адо бўлди!

Бу хил эртак тўқишига унда асос йўқ эмасди. Қай бир замонлар отаси шунга ўхшаш гаплар қилгандай бўлувди. Отаси раҳматлиям ўтмишни аниқ эмас, тусмол биларди. Бироқ яқин ўтмишни яхши эсларди. Негадир, узок йиллар улуғ шахардаги мадрасалардан бирининг тупроғини ялаб, қишлоғига мулла, макомида қайтган амакиси ҳакида кўп гапиравди. Ҳатто ўз падарини ҳам бу қадар хотирламасди. Дердикси, амаким бечора одамларни саводли килай деб кўп куйинарди, элди олди ҳисобланмиш Туроббойу Эсонбой, Гелдибойу Ирисбойлар эса гап-гаштақдан бўшамасди, эл-улуснинг холи ни ма кечаяпти, ишлари бўлмасди, хотин устига хотин олиб, маст туюдай бўкириб юрардилар. Амаким бўлса элнинг корига ярай деб, Каттатевада мактаб очди, бир уй, бир айвонли. Элда обрўйи ошиб, дўст қатори, душманлар ҳам орттирди. Ур-сур замонларда бир тунда кўлига кишан урилиб, сибир қилинди. Қайтмади у ёқдан — на ўлигини биламиз, на тиригини...

Эралини эса амаки бобосининг иқтисодий мавқеи кўйроқ қизиқтирарди. Ва бир куни дўмпайган тандирдай бўлиб, ўрнигина қолган мактабни назарда тутиб, ис-теҳзоли оҳангда сўради:

- Амакингиздан яна бирор нарса колганми ўзи?
  - Қолган. — Ота маҳзун хаёлга чўмади. — Кўп нарса қолганди. Барини обориб Қўшжарга кўмиб келганимиз. Замон чатоқ эди-да.
  - Кейин кавлаб олдиларингизми ишқилиб? — Эрали сергак тортади.
  - Йўқ.
  - Эя! — Эрали ховликиб, ўрнидан туриб кетай дейди.
  - Ҳали кавлаб олмадингизларми?!
  - Фойдаси йўқ чиқар...
  - Нега? — Эрали ҳаяжондан қалтираб кетади.
  - Тупроқка қоришиб... — Ота унга ажабланаб боқади. — Сенга нима бўлди, улим? Жойингда ўтиrol-май қолдинг.
  - Нима эди ўзи, дурмиди ё олтинмиди? — Эрали отасининг саволини жавобсиз қолдириб, баттар типирчилайди. — Айтинг, нима эди? Тилломиди, ё... Эскиларда тилло кўп бўлган дейишади. Қанча эди?
  - Қанақа тилло? — Ота унинг ахволидан кулади. — Китоб эди. Беш қопдан зиёд арабча имлодаги китоблар эди. Барининг ҳузурини ер кўрди. Чириб, тупроқка қоришиб кетган чиқар деб кейин кавлаб кўрмадик.
- Бу гапдан сўнг Эрали ўтирган жойига шилқ этиб тушди. Кўрпача устида тўнкарилиб ётган пиёла тиззасига ботиб, жони ёмон оғриди. У фудраниб сўқинди. Амаки бобоси Тўрабой-ю Ирисбойларга ўхшаш бойлардан бири бўлиб чиқмаганидан ўқинди. Сўнг юрарди-да оғзи катта айрим жўралари каби давраларда мактаниб. Мактаб очган аллақандай амаки бобосининг нимаси билан фахрланиш мумкин? Отаси гўё унинг хаёлидан ўтганини сезгандай, эна томонидан бўлмиш бадавлат боболаридан бири ҳақида сўзлай бошлайди. Бойлиги учун эмас, амакисининг тақдирига алоқадорлиги боис, тилга олади. Йккисининг бир кунда сибир килингани тўғрисида эзмаланиб гурунг беради. Сўнг андак ҳасратла кўшиб кўяди: «Амакимдан сўғин бизнинг авлодда илмга қизикувчи бўлмади. Менинг умрим чорванинг кетидан ўтди. Сен ҳам шунга рўжу кўйдинг. Амаким бечора айт-

гаңдай, бу дунёдан күр ҳолимизча ўтиб кетаяпмиз». Ота сўзланаркан, олис мозийга тусмоллаб боқади. Хира, жуда хира қиёфаларни гавдалаңтиради. Эрали эса ўша хира қиёфаларнинг биридан юкоридаги тотли эртакни тўқиди. Уни зартурни, улуғвор сиймоли, басавлат киши сифатида тасаввур этиб, аввал ботинан, сўнг зохиран унга ёэзиради:

— Бово-я! Бовожон-а! Не кунларга қолдик, а!

Агар шу пайт пастдан аёлининг чийилдоқ овози эши-тилмаганда унинг «бой бобоси» билан хаёлий бу сухбати ҳаливери тинмасди. У хушёр тортиб, қуйидаги ховлиси томон малолланиб боқади.

Аёли, бошидаги рўмоли қийшайиб қолган, жағи-жагига тегмай, ҳовли юзида ивирсиб юрар, энаси супада урчук йигирганча, унинг оғзидан чикқанини чикқандай ёқасига ёпишириш билан банд эди. Камнири тушмагур аллақачон саксонни қоралаб қолган бўлса-да, ҳануз балонинг ўқидай. Ишниям дўидиради, гапниям. Келинига ёқмагани, унинг доимо кизига илиниб туриши эди. Кампирнинг бу килифи Эралигаям ёқмайди. Аммо ботиниб бир сўз айтольмайди. Ийманади. Айтишдан наф йўқ, энаси ўзига етгунча қайсар. Эрали бошда аёллар орасига тушиб, хотинини дўппослаб ҳам кўрди. Бироқ букини гўр тузатар дегандай, сўнг барига қўл силтади. Кейин, кейин уйида жанжал қўзғалиши билан даштга чикиб кетишни одат қилди.

Ана шундай кунлардан бирида у ғалати бир ҳолатни кашф этди. Уйида юрагини ғижимлайдиган дилгирлик даштга чиқиши билан ортиқ уни безовта қилмай қўярди. Кенгликда у ўзини бир зарра ҳис этар, ташвишлари бачкана, тўқиган эртаклари кулгили туюларди. Изига қайтиши билан, қишлоққа юз одимча қолганда, таниш дилгирлик қайта бош кўтарар, тўқиган эртаклари чин, ташвишлари салмоқли аҳамият касб этарди.

У бу ҳолатни қайта ва қайта туйгач, охири икки уй наридаги кўшиниси Тожи шоирга тиш ёрди. Тиш ёришдан аввал дўкондан бир шиша ароқ олди. Гап бор деб, уни четга имлади. Кўним топган жойлари окшом чоллар чикиб ўтирадиган Яғиртепа бўлди.

Тожи шоир деганлари умрида бир сатр шеър ёзган банда эмас. Шокир узуннинг тўйида ғазал устига ғазал ўқиб, келин-куёвни кутлагани боис шу лакабни олган.

Лекин қўлидан китоб ва газета тушмайди. Кўп ўқигани учунми, гап-сўзлариям бошқачароқ, устига-устак, тилиям заҳаргина, бетинг-кўзинг деб ўтирумайди. Аммо калласини бир оз киздирмагунингча бирор саволга жўяли жавоб олишинг қийин, силар барибир менинг гапимни тушунмайсизлар, дея тўрсайиб тураверади. Биринчи пиёладан сўнг ҳам унинг ранги очилмагач, Эрали иккичи пиёланни тўлатиброқ қуяди. Газак, дея чўнтағидан кирланган курт олиб узатади. Шоир қуртга ирганиб карайди, олмайди. Қўзларини кенгликка тикиб, негадир оғир хўрсинади.

— Сиздаги бу ҳолатни фан аллакачон аниқлаган, — дейди, шуниям билмайсанми, деган иddaоли йўсинда. — Барча тирик мавжудот, шунингдек, одам боласиям био манбай, гавжум масканлар, яъни шаҳар ва қишлоқлар био майдони ҳисобланади...

Унинг бу ғалати гап-сўзларидан Эралининг тушунгани шу бўлдики, ҳар бир одамда, жумладан ўзида ҳам «био» деган ток бор экан. Бу ток одамзотнинг феълиятворига қараб «ижобий» ва «салбий» деган қувватларга бўлинаркан. Юрагининг сиқилиши ўша салбий қувватдан эмиш. Негаки, жохил ва нодон ҳамқишлоқларининг тор дунё қарашлари-ю, кундалик ғиди-бидисидан қишлоқ ёмон қувватга тўлиб тонгган эмиш...

Аммо бундан Эрали донг қотмади. Йстеҳзоли нимтабассум ила шоирни ичиди «ахмок» деб сўқди. Пул куйдириб ароқ олганига ачинди. Ахир одамда қанақасига ток бўлиши мумкин, ток дегани ана симёочлардаги симларда. Уям бир кун келса, икки кун келмайди. Агар вужудида ток бўлганида, биринчи галда боплаб куёвии қалтиратмасмиди. Япроқдек титратиб ўчини олмасмиди.

У ўзини токли одам ҳолида тасаввур этиб, энди куёвига азоб бераёттанида, учинчи пиёланни бўшатишга ултурган шоир уни туртиб қолди.

— Анову гўрсўхта куёвингизнинг кетишларига бир қаранг.

Эрали қишлоқ томон аланглаб, ёнбагирликдан тўрик отда пастга энаётган куёвини кўрди. У бошидаги ихчам суртеллагини қошигача бостириб, эгарда хаддан ташқари кеккайиб ўтиради.

— Бу нодон дала-даштда ўлақолса бу тарзда кеккай-майди, — деди шоир аччиқ кулимсираб. — Чунки даштда янтоқ ва юлғундан бўлак унга эътибор берувчи йўқда. Бунинг бор амали киши қўзи учун. Яхшиларнинг энсасини котириб, ёмонларнинг ҳасадини келтириши учун. Уларнинг бу килиғидан кишлоқ салбий қувватга тўлади. Биз эса осойишталикни даштдан қидиришга мажбур бўламиз.

— Бунинг турган-битгани шу, — деди Эрали нима деярини билмай.

— Уни ёмон кўрганингиз учун сиздан хам ёмон қувват тараляпти, — деди шоир унга қўз қирида бокиб. — Тиришиб ўтиришингиз юрагимни ғашлаяпти. Кўп тиришманг, улар аҳамият беришга арзимайди. Борликни қўз билан қамраб, юракни кенг қилинг...

Эрали шоирнинг гапларидан зерикди. Теваракни лоқайд кузата бошлади.

Ана энаси узун енги учига нимадир тутганча ёлғизоёқ сўқмоқ бўйлаб синглисининг уйи томон кетмоқда. Ортидан аёли акиллаб қолгани амиқ. Четдаги кулба эшити олдида икки овсин шангиллаб айтишмоқда. Уларнинг кунора жанжали қўшниларнинг жонига теккан шекилли, томоша қилувчи йўқ. Ҳовуз бўйидаги сайхонликда икки йигитча жўжахўроздардай чўкишмоқда. Ҳаринчи бири уларни ажратолмай ҳалак. Ўнг ёқдан бирининг акаси, сўл ёқдан эса бирининг тоғаси сайхонлик томон ошиғиб келмоқда. Уларга эрмакталаб болалар эргашган, Аслида бориб чакқан ҳам ўшалар. Агар катталардан кимдир тезрок ўртага тушмаса, азалий душман бу икки оила вакилларининг уруши ёмон тус олиши мумкин.

Бу орада шоир бекорга чакак ураётганини бирдан пайқаб қолди. Бунгача у тўртинчи пиёлани бўшатиб, боя қўлига олишниям истамаган куртни пок-покиза тушириб бўлганди. Ароқ таъсириданми, ё азбаройи жаҳли чиққаниданми, Эралини «сен»лаб янишга тушди. Этак қокиб ўрнидан турди. Пастга эна-эна, мушт ўқталиб тағин ўдағайлади.

— Кўйдан фарқинг йўқ, сен ахмокни! Тинглашни билмас экансан, нима килардинг мени овора қилиб! Э, дардинггаям, ўзингтаям сени!..

Эрали қабртош буюриб қайтган куниям Яғиртепада

тұхтади. Негадир күнгли шоирнинг гурунгини құмсади. Режаси ҳақида ким биландир жуда ўртоқлашгиси келмокда эди. Бу борада шоирдан сози йўқ. Касофатнинг тили аччиқ бўлса-да, дардингни тинглай билади. Лекин маслахат бермайди. Шуни хохлабсанми, қилавер, нима қиласан элга овоза қилиб, дейди. Айни шу гап хозир Эралига жуда-жуда керак эди. Энг муҳими, у бирорвга гуллаб қўймайди. Кейин ўйлаб-ўйлаб буни шоирдан ҳам сир тутишга қарор қилди. То қабртош тайёр бўлмагунча бу ҳақда бирорвга, ҳатто аёлигаям чурқ этмади. Ўша куни сабрсиз кутди. Ҳар оқшом дўнгга чиққанида, кунботишдаги қабристонга термулиб, маҳзун-маҳзун хаёлларга толди. Энасининг азасида яқинларининг нечоғи турланганликларини ўйлади.

Синглисини энасига нисбатан оқибатли деб бўлмасди. Акс ҳолда энасининг ўлим тұшагида ётганини била туриб, эри билан оромгоҳга кетмасди. Келин деганнинг тили узун бўлишига йўл қўймасди. Аза куни дарвозадан додлаб кирганида, Эрали номига овоз чиқариб турарди. Синглисини ёқа йиртиб йиғлашини кўргандан сўнггина кимни йўқотганини гўё туйкусдан англаб етгандай бўлди. Энди энасининг супада урчук йигириб ўтиришларини, аёли билан ади-бади айтишларини, олиб келган нарсасидан синглисига илиниб туришларини, кеч қолганда дарвоза олдида кутиб олишларини хеч қачон кўрмаслигини ўйлаб юраги увишиб кетди. Бўғзига йиги тикилди. Йигисини ичига ютишга тиришиб, теваракка кўз кирини ташларкан, ажаб бир манзарани кўрди. Ҳар галида қайнонасига ўлим тилайдиган аёли жин теккан-дай чинкириб йиғларди, қайфудан ўзини йўқотган синглисинг юзига қўшни жувонлар сув сепарди. Ҳамма йиғлаб, ҳамма бўзларди. Ёшини яшаб, ошини ошаб бўлган бир кампирга уларнинг бу қадар куйинишларига унинг ишонгиси келмади. Ва тезда кенжә ўғли ва қизидан бўлак ҳаммаси йўлига кўзёши қилаётганини фаҳмлади. Бундан хўрлиги келди, эндиликда фирт етим бўлиб қолгани таъсир этиб, ўғли билан басма-бас йиғлашга туши. Шунчаки йиғламади: «Тириклигингда қадрингга етмадим, энажон» дея сўзлар тизимини териб-териб, айтиб-айтиб йиғлади. Ўлишингни билганимда, елкагинамда кўтариб юрмасмидим, дея армон билан бўзлади. Ўша куни куёви қаватида бўкириб турган

бўлса-да, барибир уларнинг ораси илимади. Қайтамга, синглисининг, энамни янгам ўлдирди, томоғига қарамай, очдан ўлдирди, деган гапидан сўнг баттар совуди. Маслаҳатсиз қабртош кўйишлари эса дард устига чипкон бўлди. Шунинг учун хам ўзи буютирган қабртоши тезроқ битишини илҳақ кутарди.

У бу ҳақда ҳеч кимга айтмаган эса-да, шоир нимадир сезган шекилли, бир куни йўлда тўхтатди. Худли шеър ўқиётгандек, доно-доно қилиб деди:

— Биз бандалар шу қадар нодонмизки, килган ишларимиз нуқул хатолардан иборат! Биз хатоларга кўмилиб-кўмилиб яншаймиз! Бу хатолар шунчалик тотлики, азобини асал янглиғ қабул айлаб, тамшаниб-тамшаниб яшаймиз! Лаб-лунжингизни артиб олинг, «асал юқи» колибди...

У шоирни маст гумон қилди. Йўқ, шоир маст эмасди. Нимадандир изтиробда эди. Одатдагидек, нимаданлигини айтмади, ҳайф сенларга, дегандай қўл силтаб кетди борди.

Эртаси, яъни қабртош ими-жимида олиб келинган куни куёш Эралининг кўнглидек чароюн эди. У кўзи эмас, кўй сўйдирди. Қишлоқ кексаларига одам юбориб, ўзи ўғиллари билан мозорга жўнади.

Ўғиллари куёв бошлиқ жиянлари томонидан ўрнатилган қабртошини олиб ташламоққа чорланишганди, у донишмандона бир қиёфада бош чайқади.

— Тегманглар! Ўзлари қўйдими, ўзлари олишсин. Буни қаватига ўрнатинглар.

Кора мармар оқ мармардан кўра бежирим ва анча баланд эди. Четлари ҳошияли, ўртасига тўрт эмас, олти катор шеър битилган. Энасининг сиймоси каттароқ қилиб туширилганди.

Қабртошлар ўртасидаги бу тафовутдан Эрали кўп суюнди. Ўғилларидан андиша қилиб турмай, шодон фудранди.

— Мана, энажон! Керак бўлса, бундан каттароқ тошлилар кўйишга қурбимиз етади!

Ёнма-ён кўйилган тошларга муҳрланган бир хил сиймо-онаси бўлаётган бу ишлардан ажаблангандай, маъюс жилмайиб туради.

Эрали мозордан масрур қайтаркан, кўйган тошини олиб ташласин, дея ўғилларидан бирини куёвиникига

жўнатди. У томондан эса, бекорларнинг бештасини айтибди, деган нордон жавоб келди. Бу шунчаки айтилган гап эмас, балки эрта-индин қўпиши аниқ бўлган улкан жанжалнинг совуқ нафаси, даракчиси эди...

## **СУТ СОТУВЧИ БОЛА**

Болакай тонг-азонда сут тўла бидонларини кўтариб, маҳалла адогидаги кўп қаватли уйлар томон юраркан, одатдагидек, муаллимасининг газабнок афтини кўз олдига келтириб, қадамини тезлатишга уринди. Ўзига қолса-ку, юргургилаб кетарди-ю, бироқ қўлларидағи оғир юк бунга монелик қиласарди. Боз устига, минг ошиққани билан бидонлардаги сут ҳамиша ҳам тезда сотила қолавермайди. Мижозларнинг талаб ва эҳтиёжига боғлик ишбу. У овозига зўр бериб, эшикма-эшик юраркан, зинадан зинага кўтарилаверишдан ҳориган кезлари, тўғри келган зиналардан бирига чўкиб, бир зумга, атиги бир зумга тин олгиси келади.. Аммо муаллиманинг газабкор қиёфаси бунга изн бермайди: «Тагин кечикдингми? Қачонгача давом этади бу, а?!» Қачонгача давом этишини эса болакайнинг ўзи ҳам билмайди. Ҳовлисида икки сигири бор экан, бу юмуши ҳеч қачон тугамаслигини хис қиласади, холос.

Зинадан зинага кўтарилавериш жонига теккан кезлари, айниқса, муаллиманинг ўткир нигоҳларига чидамоққа бардоши ётмай колган пайтларида, болакай тинимсиз кавш қайтарувчи бу жониворларни жуда ёмон кўриб кетади. Нега деганда, унинг юмуши тонгда сут сотиш билангина чекланмайди. Дарсан сўнг аравачасини судраб, бозорга чопиши, ўзи каби болалар билан талашиб-тортишиб, озиқабоп чиқинди қолдиқларини йиғиши, ариқ бўйларидан ўт-ўланлар юлиб қайтиши лозим. Юҳо сигирлари эса тўйдим демайди, тинмай ямлашгани-ямлашган. Болакайнинг эса бошқа тенгқурлари катори ўйнагиси, дараҳтларга осилгиси, кўкка тикилиб, хаёл сургиси, расм чизиб, шўхлик килгиси келади. Аммо мудом емак талаб қиласидиган жониворлар унинг бу кўнгил хоҳишларига эрк бермайди. Негаки, очофат бу жониворлар онасининг ардоғида, отасининг эътиборида, болакай ботиниб бир сўз деёлмайди. Ичдан ёмон кўради

уларни. Нари борса, муштчалари билан, киши кўрмас, дўппослайди. Бироқ унинг зарбалари сигирларга чивин чакқанчалик таъсир этмайди.

Болакайнинг бу аҳволи билан муаллиманинг зигирча иши йўқ. Доска ёнига турғизиб қўйиб, синфдошлари кўз ўнгидаги тергагани тергаган. Болакай, боши ҳам, кўз остидан уни бошдан-оёқ кузатади. Эгнидаги бежирим либосига, оёғидаги ингичка пошнали туфлисига негадир алоҳида эътибор беради. Кўхлик, лекин совукқина бу жувонни синглиси қўлидан қўймай ўйнайдиган кўғирчоқка ўҳшатади. Шунда бирдан ўзини ҳам кўғирчоқ бўлгиси келиб кетади. Маза-да, ҳеч ким тергамайди, тонг аzonлаб кишилар эшигига сарғаймайди, бозорда болалар билан ёқалашиб юрмайди, сутчи хотинлардан, айниқса, Ойша қорадан худа-беҳуда туртки емайди.

Ойша қорани эсласа, у разабдан титраб кетади. Нега деганда, у болакайнинг ҳудудига безбетларча бостириб кирган-да. Илгари у нариги маҳаллада сут сотарди. Яқиндан бери бу томонларга ҳам суқиладиган бўлган. Қаңдай бўлмасин, даҳадан болакайнинг изини қуритсан дейди. Бироқ болакай ҳам анойилардан эмас, имкони етгунча унга қаршилик қиласи. Оқибат, улар ўртасида тез-тез жанжал чиқиб туради.

Болакай меҳрибон амакини ўшандай жанжаллардан бирида учратди. Жилмайганда қўзлари қисилиб, икки чеккасидаги майда ажинлари куёш нуридек ҳар ён тараладиган амакини эсласа, кўнгли алланечук орайиш то-либ, ич-ичидан яйраб кетади. Муаллимаси тергаса ёхуд онаси шангиллаб, отаси койиса, болакай нуқул амакини ўйлади. Эртан борсам, ҳаммасини айтиб бераман дейди. Аммо учрашган кезлари барини пакъос унугтади. Негаки, амакининг хонадони ҳар қандай дилгирликдан ҳоли, ичкарида қандайдир илиқ нур сузиб юргандек туюлади. Ёмони, амаки уни ҳеч вақт узоқ тутиб турмайди. Идиш тубидаги колган-кутган сутни елим товоққа аёдарааркан, энди югур, дарсингга кечикма, дейди. Нечундир амаки уни дарсга кечикишини сира истамайди. Болакай эса унинг хонадонини ҳамиша ҳайрон тарк этади: «Шунча сутни нима киларкин у?» Онаси бу ҳақдаги ҳикоясига эътиборсиз, отаси эса, у боғдан келса, тоғдан келади. Ўқиб, нима, шаҳар олиб берарми-

динг, дейдими-ей. Кейин мамнунлик билан қўшиб қўяди: «Мана мен, шофёр бўп, кам бўлмадим. Пул топишнинг йўлини билсанг, ҳеч қачон кам бўлмайсан. Сал бўй чўзгин, яна бир сигир обераман».

Отаси бу гапларни тўрдаги телевизорга тикилган кўйи айтади. Бегам, беташвиш, лоқайд бир тарзда сўзлайди. Она эса жуда эпчил, ота гапини тугатар-тутгатмас, бирпасда фойда-зиённи хомчўт килиб ташлайди. Фойда-зиён ҳақидаги гаплардан болакай зерикади. Оғилхонада яна бир томдек сигирнинг пайдо бўлишини ўйлаб, юраги орқасига тортиб кетади. Негаки, сут, сутга қўшилиб адоксиз ташвишлари ҳам ортади-да. Шунда у онасини Ойша қорадек орик бўлмаганидан ўкинади. Онаси орик ва чақон бўлганида, балки сутни ўзи со-тармиди. Кейин у каттакон қорнини бир ён осилтириб, ёнбошлаб ётган отасига умидвор тикилади. Йўқ, отаси озадиган эмас, озмайдими, демак, бидон кўтариб сут со-тишга ҳам чиқмайди.

Сўнг унинг кўзлари хона бўйлаб сарсон кезинади. Уйдаги буюмларнинг жойланиши ёқмай, юраги сикилади. Жавон тўла чинни идишлар, устида қандайдир қутилар. Деворни бўйлаган гилам тепасида ота-онасининг ўшлиқда ёнма-ён тушган суратлари. Суратда улар ҳозиргидек бакалоқ эмас, кўзлари ҳам бошқача боқади. Энди улар ўзга бир одамларга алмаштириб қўйилгандек. Уйдаги буюмлардек жуда зерикарли.

Амакининг уйи эса бу хил буюмлардан ҳоли, қандайдир тароватли. Бурчақдаги ихчам жавон китобларга лиқ тўла. Жавонга тақаброқ қўйилган чоғроқ диван сувяничиғида доимо орасига кўзойнак кистирилган қандайдир китоб ётган бўлади. Амаки уни ҳозиргина қўлидан қўйганлигини болакай ичдан ҳис қиласди. Эшиқдан чикиши билан тағин қўлига олишиниям билади. Деворга эса ўзини эмас, қандайдир ўкувчи болаларнинг сон-саноқсиз суратлари тартиб билан осилган. Бундан унинг ўқитувчи бўлганлиги аёнлашади.

Болакай ҳар гал амакининг ортидан тўғридаги ошхонага ўтаркан, чап ёндаги айни шу хонага хавасланиб боқади. Диванга чўкиб, бир зум нафас ростлагиси, девордаги суратларни мароқ билан томоша қилгиси, кейин чиройли терилгандек китобларни титкилаб, расмларини томоша қилгиси келади. Азалдан у китоб саҳифаларига

чизилгандарни суратларни томошпа қилишни ёқтиради. Назаридан, бу суратлар уни бошқа бир оламга чорлаёттандек туюлаверади.

Зиммасига сут сотишдек зерикарли вазифа юклатилмасдан бурун дарсликлардаги расмларга ўхшатма чизишни яхши күрарди. Ўхшатолса, ўзида йўқ суюнарди. Ўхшатолмаса, сира бўш келмас, ўхшатмагунча тинчимасди. Бора-бора унинг ўз қуёши, оппок парку булутлари, суюкли қаҳрамони — оғзини катта очиб кулиб турадиган бола, серўркач тоғлари юзага келган ва уларни қайта-қайта чизишдан болакай хеч эринмасди. Аммо оппок сут ташвиши бу ширин эрмакка чек қўйди. Отасининг ғоят салмоқлаб айтишига кўра, эс-хушли болага бу хил ишлар ярашмасмиш.

Уйларида сумкасидаги дарсликлардан ўзга китоб йўқ. Оқшомлари уйдагиларнинг тикилгани бурчакдаги телевизор. Алламахалда мудроқ отага бирдан «жон» киради: «Жойимни собер, ёмон чарчбман бугун». Она оғир гавдасини базўр кўтариб, ўрнидан кўзғаларкан, болакайнини эслаб қолади: «Ёт, эртан сахар туришинг керак!» Шу билан кун адогига етади.

Эртаси кун худди шу зайлда давом этади.

Ана шундай кунлардан бирида болакай меҳр ва қаҳрга тўла овозни эшигади.

— Болани койиман!

Ойша қоранинг қарғиниларига кўмилиб, йўлак четида «без» бўлиб турган бола, ёнига ўгирилиб, ғоят ороста кийинган амакини кўради.

— Кап-ката хотин, уялмайсизми болани қарғагани! — деди у аёлга жиддий тикилиб, сўнг билагидаги соатига бирров кўз ташлаб, юмшоқ оҳангда сўради: — Дарсга кечикмадингми, болам?

Болакай оёклари остидаги бидонларга ишора килади.

— Сотишга улгурмадим хали.

— Қанча қолди?

— Анча бор.

Амаки бир муддат ўйланиб тураркан, сўнг қатъий деди:

— Қани, мен билан юр-чи!

Болакай Ойша қоранинг юрагини куйдириб, унга эргашади.

Амаки бидонлардаги қолган сутларни каттакон идинің ағдараркан, чүнтагидан пул чиқараётіб тайинлады:

— Бундан сүнг сутинг қолса, тұғри үзимга олиб келавер.

Эринган ёхуд тонгги салқин ҳаводан жунжиккан кезлари, болакай сут бидонларини күтариб, тұғри унинг уйига бормоқ истайды. Аммо ичдан хамиша нимадир түсқинлик қиласы. Нимагалигини билолмаса-да, ҳархолда, бу иши яхши эмаслигини англаиди. Шунингчун аввалига бошқаларнинг әшигини қоқади. Күпинча бидонлари тез бүшаб, амакиникига үтишіга қожат қолмайды.

Шу кейинги түрт күн ичида бу ҳол кетма-кет такрорланиб, у амакининг уйига үтольмади. Бугун хам әшикма-әшик юриб, сут сотаркан, негадир амакини тез-тез эслаеттганидан ажабланды. Кече ва ўтган куни ҳам шундай бүлганди. Бу сафар эса чидаёлмади. Идиши бүшашини кутиб турмай, амакиникига йўл олди. Муаллиманинг зардали қиёфаси энди уни ортиқ ташвишлантирмас, биладики, амаки узок тутиб турмай, идишлардаги сутни охиригача қуйиб олади. Баҳонада амакини кўргани қолади.

У четдаги түрт қаватли ғиштин бинога етди. Йўлаклардан бирига кириб, иккинчи қаватта күтарилди. Таниш әшик ёнида тұхтаб, бир зумга нафас ростлади. Сүнг қўнғироқ тұгмасини босди. Бирок хамиша тез очиладиган әшик ортидан бу гал ҳеч бир садо эшитилмади. Болакай қўнғироқ тұгмасини қайта ва қайта босди. Кейин муштлари билан әшикни гурсиллатиб урмокка тушди.

Кўшни әшик қия очилиб, соchlари тўзғиган аёлнинг тўнг баҳараси кўринди.

— Амак йўқ, ўлган у, — деди у әшикни каттароқ очиб, халати ёқасини тўғриларкан. — Сутинг бўлса, бир банка қуйиб кет! Эя, мунча анграясан?! Нима бало, овсармисан?

Тахтадай котиб қолган болакай аёлнинг жаврашларини эшитмади. Аёл вайсай-вайсай бидондан ўзи сут қуйиб олди. Қўлига пул тутқазиб, әшикни қарсиллатиб ёпгаңдан сўнггина болакай ўзига келди. Каражт бир ҳолатда зиналарни бир-бир босиб пастга туша бошлади.

У ташқариде Ойша корага рўпара бўлди.

— Мехрибонинг йўқ энди, — деди Ойша кора истехзоли ҳиринглаб. — Сендан олган сутини қўшниларга бепул тарқатарди. Йўқ энди у. Эшикма-эшик чоригингни судраб юравер энди!

Болакайнинг мадори йўлак четидаги ўриндикқача базўр етди. Қалтироқ бармоклари билан шудринг қўнган тахталарни пайпаслаб, аста чўкаркан, елкалари титраб йиғлаб юборди.

Нариде эса сут тўла бидонларини кўтарганча Ойша кора кетиб борарди.

— Молоко! Свежий молоко!

Болакай эса ниманидир англаб, ниманидир англамай, йиғида давом этаркан, ҳеч қаёққа ошиқмас, негадир ошиқишни сира-сира истамасди....

## ДАШТДА

Эна ер муштлаб карғанади.

— Бундан кўра ўша даштда жондор еб кетса бўлмасмиди сени! Еди камгинаси тортибгина кетса бўлмасмиди! Не деган гап бу, ҳалитдан хотин кишининг этагига тирмашиб. Кимга тортдинг ўзи сен! Не деган одам бўлдик?! Не деб кишлоқда бош кўтариб юрамиз энди? Ҳали отанг келса, нима дейди? Ўлдирибгина кўяди-ку сени...

Гирди тошдан кўтарилган пастак супа лабида чимирилиб ўтирган Бердимурод, қаншари остидан энасига ҳўмрайиб боқади. Йичидан хайкирмок истайди: «Етар энди!» Бироқ нимадир ҳалақит беради. Хайкиришдан кўра, ичдан эзилмоқни маъқул топгандай, чурк этмайди. Бунга сари, энанинг фигони кўкка ўрлайди. Яккаш санайди. Ётиғи билан сўраб-суршишишни хаёлига келтирмайди. Суруштирган тақдирдаям, қайсар ўғлидан тайинли бир жавоб олиш кийинлигини яхши билади. Кеча оқшом даштдан юз-кўзини кўкартириб қайтганда ҳам бир сўз демаган, йигитчиликда, дея қўя қолган. Не гаплиги эса тонгда аён бўлди: кеча ўғли даштда нотаниш бир келинчакка ёпишган экан, хешлари келиб, ўласи килиб кетишибди.

Бердимурод жигибийрон бўлаётган энасидан кўз узиб, молларини подага кўшиш баҳонасида майдон че-

тига йигилаётган эркаклару, күча юзидаги аёлларга бокаркан, ҳовлиси тевараги девор билан үралмаганидан ўкинади. Девор яхши-да, бегона кўздан асрайди. Ундан деса, бу қишлоқда деворли ҳовлининг ўзи йўқ. Дўнг бетига бетартиб тушган қишлоқ хонадонларида не сир, не синоат бари ҳамманинг кўз ўнгиди. Яширмоқнинг ҳеч иложи йўқ.

Йигитнинг аламнак нигоҳи эркаклар орасида қўхна, нимдошгина тўнига ўраниб, бамисоли мусичадай беозоргина қунишиб турган Сувонқулга тушгачгина не гаплигини англагандай бўлди. Демак, қишлоқда миш-миш тарқатган шу. Ана энди, ҳолинг қалай, дегандай кулиб турибди. Ҳарҳолда Бердимуродга шундай туюлди.

Сувонқул хозирда кўзига жирканч кўрингандай, ёзғираётган энасининг назарида ўзи ҳам ундан кам эмаслигини фавқулодда ички бир туйфу билан хис этаркан, ўрнидан иргиб турганини сезмай колди.

— Бари ёлғон! — дея ҳайқириб юборди.

Чўчиб тушган энанинг кўзларида умид учқунланди.

— Сен бола, мени адo қиласан, — деди хикиллаб.

— Сизни адo қиласиган ҳеч бир иш қилганим йўқ! — дея чўрт кесди Бердимурод. — Кўп жаврамай, хуржунни хозирланг! Кетдим мен подага.

— Чой...

— Раҳмат, тоза чой ичгандай қилдингиз!

— Ахир мен... — Эна узун енги билан кўзёшларини суртди. — Ичим куйиб кетяпти-да, болам. Кимга ишонай?

— Ана, уларга ишонинг! — Йигит зарда ила одамлар томонга ишора қиласкан, деди: — Инсон боласига қайишганим шу бўлсин! Мента деса... ўлиб кетмайдими барি!

Бердимурод кейинги гапини қасам йўсинида қатъий таъкидларкан, юрагида улкан бир ўпирилиш юзага келганини сезди. Тугун тортган панжалари бўшашиб, қомати алланечук шалвираб тушди. Оёқларини судраб босиб, айвон томон юрди. У ердан сиртига қалин намат сирилган кўзачани олиб, челяқдан унга сув қуя бошлиди.

У қаддини ростлаганда, қир бошидан қуёш мўралай бошлаганди. Аламнак эса-да, бу манзарага бефарқ қараёлмади, маҳлиё бўлгандек бир зум туриб қолди.

Тонг нурларини у азалдан яхши күради. Айникса, ўркачли кир чўққилари алвон рангта кирганида, хаяжондағ қалтираб кетади. Бундай кезларда жисми тушунксиз ажиб бир файратта тўлиб, бутун оламни қучгиси, кутилмаган бир ишлар қилиб, ич-ичидан тошиб келаётган ўша файрат ҳиссини кондирмоқ истарди. Отаси -- Собир полвон айтмишли, бу эрлик, аникрофи, корлик туйғуси бўлиб, кейинги пайтларда у тез-тез ўша хис етогига тушиб қолмокда эди. Бироқ, кишлоқда хотинларнинг онда-сондаги жанжалини демаса, фавқулодда ходисалар сира юз бермасди. Тўйлардаги курашда эса, хозирча ўзини итнинг орқа оёғи деб биларди. Негаки, тўйларда тенгқурлари билангина курашар, корлик, яъники ўзга ерлик катта полвонларни йиқитиб, қишлоғи обрўйини сақлаб колищдек ички бир хоҳиши чўнг полвонларнинг оёқлари остида топталиб, у орзу этагидан тутганча қолаверарди.

Бироқ яқинда корликнинг гаройиб лаззатини тотмокка нихоят эришди. Эсласа, хануз хузур қиласди. Ўшанда баданидаги оғриклар ўта ёқимли туюлиб, ўзини етмиш еттинчи осмонда хис қилганди. Ёқмагани, оппок юзли қизнинг меҳрибончилиги бўлган. Қизнинг «укажон»лашидан роса энсаси қотган. Қиздан у миннатдорчилик истамаганди. Қиз эса, «укажон»лаши етмагандек, юмшоқ бармоқлари билан шишган, қизарган ёнокларини силаб-сийшаган. Шунда у ўзини бола сезган. Билаклари ингичка, бўйи пастак туюлган. Ҳолбуки, у бўйчан, пишиқ ва бақувватгина йигит эди. Ўн саккиздан эндиғина ҳатлаган бўлса-да, унда йигирма ёшли йигитнинг туси ва келбати бор эди. Чапдастлиги туфайли қизга тирғалган Бозорорти маҳалласининг безориси саналмиш Адҳам дарроздек давангир йигитни чекинишга мажбур этганди...

У сув тўла кўзачани супа лабидаги хуржун ёнига кўяркан, қашқани эгарлашни унутганини эслади. Отни эгарлаш ҳамиша унинг анчагина вактини олади. Бу юмушни бошқаларга ўхшаб ўлда-жўлда қилмасди, алохида иштиёқ билан адо этарди.

У шу юмушни бажариш ниятида от томон юаркан, кечаги воеа эсига тушиб, уни бу кадар эъзозга арзимайди деган ўйга борди. Қашқадан ёмон кўнгли қолганди. Жонивор доимо нозик пайтда панд бериб кўярди.

Сирасини айтганда, Қашқа у орзулаган от эмасди. Худи кечагидай, оппок юзли киз воқеасида ҳам уни ғоят хижолатта солганди. Адҳам даррозни қочириб, бозор четидаги саройдан Қашқани етаклаб чиқаркан, томошага йиғилғанлар күз ўнгидә отда керилиб кетмоқни ўйлаганди. Буни қарангки, одамлар ҳам худди шуни исташган экан, дастлабки лаҳзадаёк бунинг акс-садосини илғади.

- Ўзи зўр йигит экан-ку, шу минган оти бўлмабди.
- Вой, қишлоқи-ей, Адҳам даррозга бас келди-я!
- Хозир оти мункийди. Ана, айтмадим-ми...
- Эшакдан хароб экан, баҳридан кечсаям бўларкан.
- Ҳа, ўзи зўр экан-у, лекин...
- Даланинг боласида, меҳнатда пишган, чайир. Анову дарроz уч қўрга чидаёлмай, дарров тили осилиб қолди.
- Оти ўзига ярашмабди лекин.

Ўшанда Қашқа туфайли, у бозор майдонини боши эгик ҳолда тарқ этганди. Аммо ғолиб эмасми, ўзича кейин қирчангини кечирганди. Унинг беўхнов киликлари хакида ортиқ ўйламай қўйганди.

Буни қарангки, кеча у тагин панд берди.

Даштда нотаниш келинчакни кузатиб борақкан, оқшом бу иши учун унинг хешларидан боплаб калтак ейишини хаёлига ҳам келтирмаган ҳолда, алплардек эгарда мағрур ўтиради. Ёмон тили туфайли эридан насибасини олиб, қишлоғига аразлаб кетаётган келинчакнинг хадикли қарашларини сезмас, қилаётган бу ишидан масрур ҳолда бораради. Ахир йигирма одимча олдинда пилдираб кетаётган ожизага паноҳ эди-да, у бор экан, бийдек бу даштда ҳеч кимса унга дахл қилолмайди.

Бердимурод кўзларини узок-узокларга қадаб, отда гердайиб борақкан, кутилмаганда ярамас қирчанг мункиб кетса бўладими. Йигитнинг хаёли бошдан учиб, кўм-кўк майсалар устига гурсиллаб тушди. Келинчакнинг олдида ўзини шармисор хис этди. Аламидан йиғлаш дараҷасига етди. Бир ўйи, уялганидан изига кайтмоқчи ҳам бўлди. Бироқ келинчакни ёлғиз ташлаб кетишга кўзи киймади. Шунга қарамай, ноxуш бу ҳодиса кўнглидаги парвозга тўсик бўлолмади. Отига қайта ўтириб, келинчакнинг ортидан йўлга тушаркан, салдан сўнг хижолати хиёл аригандай бўлди. Назарида, ҳозирги

иши ортиқча майды-чүйдаларга ўрин бермасди. Боз устуга, табиат худди унинг қўнглидан андоза олгандек, ноят фусункор эди. Артилган шишадек тип-тиник осмонда оҳиста сузид юрган бир парча оппок булатни демаса, теварак, қўйингки, бутун борлик ям-яшил тусда эди. Бу яшиллик кунчикишдаги кир бетига сочилган подани ўз бағрига сингдириб, ҳализамон ютиб юборадигандек эди. Ўз навбатида, қаровсиз қолаётган айни шу пода йигитнинг қўнглига андак хавотир солиб турарди. Унинг йўл-йўлакай пода томонга бот-бот караб қўйиши шундан эди.

Йигит учун пода бамисоли бир кишан эди. Бу кишиндан қутилмокнинг эса ҳозирча ҳеч бир иложи йўқ. Ёз бошигача бир амаллаб чидаши, сўнг ҳозир хуржуни тубида олиб юрган дарсликларини чамадонга жойлаб, шаҳарга, ўқишга жўнамоғи лозим эди. Ҳаёлида олдинда уни улуғ ишлар кутар, бу улуғ ишларга эса факат дарсликлар орқалигина етмоғи мумкин эди. Аммо дарсликлар шу қадар бадига ургандики, зада кўнгли қутилмаган ҳодисаларни кўмсади. Қани энди, лоақал подага бўри ораласа-ю, у жонига теккан китобларни бир четта улоктириб, йиртқичларга қарши хужумга ўтса, ёки... бу ёғи энди фақат хаёл. Чексиз-чегарасиз ширин хаёллар...

Кеча бийдек даштда ёлриз ўзи кетаётган келинчакка кўзи тушганида ҳам худди шу каби тотли хаёллар оғушида кир бетида ёнбошлаб ётарди. Эгнидаги қирмизи либоси қуёш нурида ял-ял товланиб, жадал одимлаётган келинчакка аввалига локайд тикилди. Кейин у кўзлаган манзилни тусмоллагач, хушёр тортди. Жувон кора тортган кишлок узокда, оралиқда эса хавфли жарлик кўндаланг ётарди. Бундан ҳам ёмони, даштда кўзи қонга тўлган чўпон-чўликларнинг учраши эди. Ўтган ойда даштда шунга ўхшаш воқеа содир бўлиб, сурони ҳанузгача тинмаган.

Йигит келинчакни мавхум тажбувуздан қизғанади. Ўрнидан сакраб туриб, оти томон юрганини билмай қолади. Бироқ илтифотини қай тарзда ифода этишини билмай, бир зум тараффудланади. Биладики, дашт аёлларининг аксарияти ҳуркак келади, ҳаракатини ҳар хил англаши мумкин. Шунда унинг эсига болалигида кечган бир воқеа лоп этиб тушади. Туманли ҳавода энаси икки-

си эшакда күшни қишлоқдан қайтишаётганида, дала-нинг ўртасида қаршиларидан чақмоқ телпагини кошига-ча бостирган, тўнг қиёфали бир отлик чиқади. Отлик улар ёнидан индамай ўтаркан, бир оздан сўнг ортига қайтади. Оралиқда ўн беш-йигирма одимча масофа сақлаб, уларни қишлоққача кузатиб келади. Энаси алқашга улгурмай, отини шартта изига буради-да, туман орасида кўздан ғойиб бўлади.

Бердимурод келинчакнинг ортидан тушаркан, худди ўша суворидек иш тутди. Сўз котгудек бўлса, ҳаракати-нинг фараҳбахш сир-синоати йўколадигандек туюлади. Ахир туманда учраган отлик сукути боис, унинг хотира-сида ҳозиргача яшаб келади. Фақат келинчакнинг жон-саракланишигина бу ҳузурбахш лаҳзага соя ташлаб турарди. Эсида, бошда энаси ҳам нотаниш суворийдан жуда кўрқкан, сўнг мақсадини англағач, хотиржам тортган. Келинчак эса сира тинчланай демасди, аланг-жа-ланг қарагани қараган эди. Ундаги безовталикни пайкаран, йигит, хавотирланманг, сизга ҳеч ёмонлигим йўқ, жардан ўтказиб қўяману, изимга қайтаман, дегиси келди-ю, демади. Нечундир дегиси келмади. Сўнг кечга яқин уч отлик бостириб келиб, ола-тасир уриб кетишганда ҳам ўзини оқлаб ўтирмади. Очиги, отлиқлар оғиз очиргани қўйишмади, ҳали сенми, синглимизни қўрқитадиган, дея боллаб савалаб кетиши...

Бердимурод Қашқани эгарларкаň, майдонга йигилган ҳалойик ўзини зимдан кузатаётганини фахмлади. Афти калтакдан бежалган йигитни кимдир эрмак, кимдир ачиниш билан томоша қиласарди. Негаки бу каби ходисалар қишлоқда фавқулодда воеа саналиб, «каҳрамон» анчагина қишиларнинг дикқат марказида бўлади. Чуваладиган гапларни-ку қўяверасиз...

У қишиларнинг тикилишидан ғижиниб, юзини от-нинг панасига олди. Кейин саркашлиги кўзиб, қаддини ростлади ва кўзи қўй-эчкиларини олдига солиб келаётган бўйчангина қизга тушгач, сергак тортди. У қизга бе-эътибор эмасди. Қиз ҳам буни сезарди шекилли, боқишлиари бошқачароқ эди. Аммо ҳозир у жуда тажанг қиёфада эди. Молини подага кўшаркан, кўлидаги чивикни улар ортидан улоқтириб, изига қайрила-қайрила йигит томонга шундай бир қараши қиласарди, Бердимурод туйкусдан тарсаки егандай бир қалқиб тушди.

Сигирини хайдаб келган ёшгина жувоннинг қилиғиям уникидан кам бўлмади. Кўпчилик, асосан аёлларнинг нафрати ошкора юзига тепчиб турарди. Энасининг бекорга куюнмаганини теран идрок этаркан, салдан сўнг эркаклар тўдасида ҳам шу холни сезди. Даврага кейин келиб кўшилган эчкисокол амаки қўлларини пахса қилганича, ёшлиар бузулиб кетди, дея ваъзхонлик қиларди. Бу гапни бошқалар, жумладан, Сувонқул ҳам бош иргаб тасдиқларди. Бунга сари эчкисокол баттар авж қиларди: «Бу ҳалиям кам, ўлдириш керак эди буни! Менинг болам бўлганидами, нима қилишни ўзим билардим! Ҳа-да, ўша келинчакнинг ўрнига энасини кўйиб кўрсинг, опаси ёки синглисини кўйиб кўрсинг... Қалай?! Ҳалиям бўлса аяшибди. Эртан улар томонга тўйга боришимиз бор, азасига қатнашишимиз бор. Айтишмайдими, ўл-а, баринг деб...»

Эчкисокол отаси билан урушли, пайтдан фойдаланиб, бор захрини тўкиб-сочарди.

Бердимурод уларга қарамасликка тиришиб, подани даштга қўзаркан, Сувонқулга бирров кўз ташлашдан ўзини тиёлмади. У кеча жарда учратган одамга сира ўхшамас, мўмин ва беозор эди.

— Сен бола, мени зўр маишатдан бебахра қолдирдинг-да лекин!

Келинчакни жардан ўтказиб, ортига қайтган Бердимурод бехос эшитилган бу садодан чўчиб кетади. От тизгинини торта-торта, теваракка аланглайди. Бирор кора илғамагач, кулогимга чалинди шекилли, деган ўйга боради. Юрагига хавотир иниб, отини қичамоқчи бўлади. Аммо шу пайт жар тубидаги буталардан бири силкиниб, кулги овози эшитилади. От ҳуркади. Йигит қамчи дастасини махкам сиқиб, ўша томонга тикилади ва бута новдалари орасидан мўралаб турган малла башарани кўради.

— Кимсиз?

Бута новдалари қаттиқ чайқалиб, салдан сўнг унинг қаршисида Сувонқул найдо бўлади. Елкасида милтиқ, белидаги эски патронташга тулки териси осилган.

У беўхшов тиржаяркан, томоғини ғалати тиқиллатади.

— Ёмо-он ҳалакит бердингда...

Бердимурод ҳеч нарса англамай, унга бошдан-оёқ

разм солади. Афтини күнгир соқол босган бу одам ов баҳонасида доим дала-даштда санқиб юрар, гохида түртбеш ойлаб йўқолиб қолар, сўнг тўсатдан яна пайдо бўларди. Уйидаги тўртга боланинг ташвиши ёлғиз хотининг гарданида, бу эр бўлмиш қаерга йўқолади, не ишлар билан банд, буниси ёлғиз Худога аён эди.

— Аммо лекин иккимизга хам етарди, — деди Сувонқул юзидағи ифодани ўзгартирмай. — Жарда қимирлайсанми десам... Ё дўнгда ишингни битирдингми? Эпладингми ишқилиб? Ўзиям лекин зўр нарса экан! Илкиллаган қўйруққа ўхшайди! Кўкбулоқлик аёллар азалдан хушрўй бўлишади. Ўттан йили кузакда битасини Оксойда кўлга туширганман. Тезак териб юрган экан. Эримга айтаман, акамга айтаман дея Худонинг зорини қилди. Қайдам, қараб турадиган аҳмоқ борми. Айтсанг, уруғингни қуритаман, дея ишини тиндирганиман. Айтмади. Қанақа қилиб айтади. Айтса, эрсиз колади, ўзи шарманда бўлади-да. Агар халақит бермаганингда, бунисиням боплардим.

Кишлoқда мулоиймгина бўлиб юрадиган бу бандани энди кўраётгандек, Бердимурод анқайиб қолади. Сувонқул хунук илжайиб, енгил йўталади-да, буталар ортидаги дўнгга ишора қилади.

— Анову дўнгди боврида тулки пойлаб ётувдим. Карасам, тепадан бир нарса тушиб келаятти, ранг-кути ўчган. Изидан сен. Қаерда ишини тиндира қолдинг, а? Жаргача сабринг чидамабди-да. Бало экансан лекин! Ишқилиб, сасингни чиқарма, деб тайинладингми? Қандай қилиб эпладинг? Ичимни киздирмай, гапир тезроқ. Эшитиб хам маза қиласерамиз биз!

Бердимуроднинг беихтиёр сермаган камчиси унинг ўнг ёноини ялаб ўтди. Сувонқул ортига чаккон тисарилиб, ярогини кўлига олди. Йигит ўзига ўқталган милитидан эмас, Сувонқулнинг важоҳатидан қўркиб кетди. Қаршисида ўзи билган мўмин одам эмас, ҳеч балодан тап тортмайдиган ёвуз бир кимса еб қўйгудек ўқрайиб турарди.

— Нима қилиқ бу?! — Сувонқул ёмон сўкинди. — Ё қизғаняпсанми? Агар қизғанаётган бўлсанг, аҳмоқ экансан!

— Мараз! — Бердимурод шундан бўлак гап айттолмади.

Сувонқул бошини бир ён кийшайтириб, унинг афтига синчков тикилди. Сўнг кулимсиради.

— Демак, эплаёлмабсан...

— Сиз...

— Мен... — Сувонқул совук ишишайди. — Сувонқул аканг силар ўйлаган одам эмас! Асло ўйнаша қўрма мен билан! Энди эса корангни учир!

Йигит унинг эрмакловчи хиринглаши остида жарни тарк этаркан, бу учрашувдан қалби ларзага келди. Кечгача шунинг таъсирида юрди. Келинчакни хаёлан унинг чангалида тасаввур этиб, кузатиб қўйганидан минг бор мамнун бўлди.

Бу кечаги, яъни келинчакнинг хешлари билан юз берган тўқнашувгача бўлган хол эди.

Энди...

У подани кир бетига ёйиб, майсалар устига хомуш ёнбошлиркан, на қўлига китоб олди, на ширин хаёлларга толди. Назариди, қуёш ҳароратсиз, тириклик саробдек эди. Кишлокқа қайтмай, номаълум томонларга бош олиб кетмоқни истарди. Лекин қаёқка? У шу ўйда узоқдаги тоғларга бокди, тубсиз осмонга тикилди. Теварагида чуғурлашаётган тўрғайларнинг ҳаракатидан маъни топмай, қарашлари лоқайдлаша бошлади. Даشتнинг қирга тулаш қисмидаги экинзорга тушган эчкиларни тирқиратганча, узоқдан туриб ўдағайлаган қоровулнинг бақириш-чакиришларига ҳам эътибор бермади. Пинакка кетсаму, қайтиб уйғонмасам, деб ўйлади.

Йигит бийдек даشتга маъюс тикилиб, ёнбошлиб ётаркан, қўзига қандайдир қора чалингандай бўлди. Сўнг бу қора эшак минган аёлга айланди. У жарлик томон кетиб борарди.

Бердимурод чуқур хўрсиниб, нигохини пастга олди. Ўт-ўланлар орасида ғимирлаётган қурт-қумурскалар ҳаракатини кузатган бўлди. Сўнг беихтиёр яна аёл томонга қаради. Орада жар тарафга кўз ташлаб олди. Хаёлидан Сувонқулнинг истехзоли башараси лип этиб ўтаркан, бу сафар аёлга ташвишли бокди.

Аёл эса бамайлихотир кетиб борарди.

Бирор йигирма дакикалардан сўнг жарга етади. Тавба, уйида тинчгина ўтирумай, нечук даشتда тентиб юрибди бу?! Даشتда пишириб қўйибдими?

Бу ўйлар йигитнинг бўшаган вужудига қайта қувват

багицилагандай бўлди. Ўрнидай сакраб турганини ҳам сезмай қолди. Юрагида ўша таниш корлик ҳисси тағин жунбушга келиб, оти томон илдам юрди.

Отини қичаб, бирпасда аёлга етиб олди.

Аёл сўзамолгина экан, гапга тутинди.

— Хе, йўл бўлсин, улжоним?

— Сизни жардан ўтказиб қўйай, хола... холажон.

— И-и, мени бўри ермиди, болажоним. Ҳай, майли, қайтамга суйлашибгина кетамиз.

Бердимурод сўзлашмоқни истамади. Аёлдан пича ортда колиб, уни коралаб бораверди. Шунда у қуёш тафтини, борликнинг ғоят фусункорлигини қайта ҳис эта бошлади. Тагидаги оти эса, одатдагидан кўра тузукроқ йўргалаётгандек эди.

## АЛП ОНАДАН

Нормат полвон тоғаси Олим бригадни уриб, конига бўяб ташлаганмиш. Ҳозир у уйида жонталашиб ётганмиш.

Кишлокда қўпқон бу миш-мишдан одамлар кўпда таажжубланишмади. Ака-ука ёқа бўғишиб турган бу замонда тоға-жияннинг уриши нима бўпти. Бугун ёқалашган бўлса, эртан ярашишади. Ҳешлар орасида ора-сира юз бериб турадиган тентакликда бу бир. Аммо кейинги гап барчани бирдек ҳайратта солди. Нима эмишки, тоға-жиян қиз талашиб тебалашганмиш. Нормат полвоннику тушунса бўлар, ёш-ҳали уйланмаган. Бироқ Олим бригадни нима жин урди. Ота соқоли иягиға битиб, қизини узатай, ўғлини уйлантирай деб турган одам нечун ўз жигари билан қиз талашиб юрибди? Нима бўлгандаем, Нормат полвон кўп ёмон иш қилибди. Ахир ҳеч замондаям тоғага кўл кўтарадими киши. Ҳайф сенга полвон деган ном. Қилғиликни қилиб, энди қайси тўрдадир улогиб юрганмиш, кишлокқа келолмай. Кимдир уни шаҳар автобусига чиқиб кетаётганини кўрганиш, бошқа бирор ҷўлга бош олиб кетган дейди. Ҳархолда бу машмашадан сўнг кишлокда бош кўтариб юрмоқ қийин-да, кетгандир кўзи илғаган томонга.

Бироқ Нормат полвон, одамлар ўйлаганчалик, уят ва номусдан бирор ёққа бош олиб кетмаган, ғўзалари энди-

гина ниш ура бошлаган шахта пайкалининг четида, Дүнгарик ёқасида хаёлга чўмиб ўтиради. Одатда, тонг манзарасини яхши кўрадиган йигит, бу сафар теваракка бутунлай бефарқ – на чўккиси кирмизи ранг тонг шафағига бўялган кир фусункорлиги, на дала таровати кизиқтиради уни. Сиртдан сокин ва хотиржам кўринса-да, ичидা қуюн кутурарди. Азонлаб даштта келиши аслида шундан. Боз устига, энасининг таънаомуз қарашлари-ю, отасининг таассуфла бокишлирага чидамоги кийин кечди. Оқибат, қочиб келган ери шу дала бўлди. Бармоқлари орасига тушиб қолган кесакларни асабий эзғилаб, яккаш ғудранарди: «Бунга энди ортиқ чидаб бўлмайди! Аёллар-ку, майли, лекин бўй етган қизларни заҳдам, оғир юмушлардан асраромқ керак! Эмасам, полвон зоти қурийди бу қишлоқдан!»

Кеча тоға-жиян ўртасида ган кочиши шундан. Турли катта-кичик лавозимларда ишлаб, охири тўхтаган жойи бригадирлик бўлган тоға каттазангликка кўниккан эмасми, изтироб оғушида қоврулаётган жиянига баланддан қаради. Балчиқка ботиб, ариқ тозалаётган қизларни ҳайдаб юборганини эшитиб эса, қаҳри қўзили. Қаҳрини босолмай, викёрли бир ҳаракатла кўл сирмаб юборганини сезмай қолди. Кўли мўлжалга етиб-етмай, тоға ўзини ерда чалқанча тушиб ётган ҳолда кўрди. Ёмони, бу ҳодиса шийпонда валақлашиб ўтирган тўрт-беш киши кўз ўнгига юз берди.

Бор гап шу.

Табиий, тоғага кўл кўтартмок бориб турган шармандалиқ. Бироқ ҳозир Нормат полвонни бу шармандаликтан кўра, кечаги мағлубият кўпроқ азобга солмоқда эди. Курашларни кўп кўрган, аммо бу қадар уятли курашни ҳеч қачон кўрмаганди. Полвонман дея ўмганини кўтартган қизилсувлик борки, бари учтолликлардан йикилиб ўтиrsa-я. Азбаройи чидаёлмаганидан оқсоқланиб ўзи ўртага чикқанди, баковул қўймади. Акс ҳолда масхарамуз иншайиб давра айланадиган учтоллик Қосим кални тиккалай ерди, ютарди. Ишонгани Ҳайбат полвоннинг оёғи осмондан келиб тушгач эса, аламдан кафтларини юзига босмоқдан бўлак чора топмади.

Бетига тортилган бармоқлари орасидан ерда чўзилиб ётган Ҳайбат полвонни, сўнг мисоли дengиздан гувиллаётган давра ахлини кузатаркан, улар орасида аёллар

кўплигидан ажабланди. Аввал эътибор бермаган экан, қизилсувлар аёллар кураш майдонига яқин йўлашмайди. Буларда эса ҳасса таянган кампирларгача келишган. Унинг таъбири билан айтганда, кўкси қўштарвуздек бўртган, томдек-томдек киз-жувонлар курашни мароқ билан томоша килишарди.

У манглайнин аламли тирнаб, негадир уларни ўз қишлоғи аёллари билан солиштиради. Назарида, улар ўз қишлоғи аёлларидан дуркунроқ туюлди. Нотаниш бу киз-жувонларни бирма-бир кўздан кечиравкан, беихтиёр хаёлида суюклиси Ҳилолаҳон жонланди. Суюклиси, қўлида кетмон, дала ўртасида жилмайиб турарди. У қизни шундан бўлак ҳолатда тасаввур этолмасди. Ҳарбий хизматдан сўнг, тоғасининг қистови билан далага чиқаркан, қизни илк бор мана шу кўйда, яъни дала ўртасида жилмайиб турган холда учратганди. Қизнинг кўзлари сал нарида гап талашаётган дугоналарида, беозор қулимсираб турарди. Айни шу жилмайиши йигитнинг қўксига ўт ёқканди. Ҳали улар бирон марта холи учрашмаган бўлса-да, бир-бирларига бефарқ эмаслигиги иккиси ҳам сезарди. Беш кун бурун Сариктепадаги бир тўйдан оёғини қайириб қайтганда, қиз хокисор бир ҳаракатла бошидаги дуррасини ечиб берганди. Ўзига қолса, табиий меҳрибонлиги туфайли, йигитнинг оёғини ўраб-чирмаб қўйиши ҳам мумкин эди-ю, киши кўзидан иймаганди. Аммо Нормат полвонга дуррани ҳадя этилиши етарли бўлган. У бир неча кун хаяжонланиб юрди.

Аммо бу сафар хаёлида жонланган қизнинг жон олувчи табассуми негадир синиқ туюлди. Даврадаги бегона қишлоқ аёлларига вайир кўзи билан бокди: «Бизнинг аёлларни дала еб қўйган. Буларда эса дала юмуши йўқ, чорванинг орқасидан бари байталдай семириб, йилтиллаб юрибди-да!» Шундан сўнг унинг аламли нигоҳи аёллардан эркакларга кўчади. Ё дариф, сезмаганини қаранг, уларнинг эркаклари ҳам ҳамқишлоқларига нисбатан йирик ва кўркам экан. Ҳайбат полвон деганлари Қосим калнинг елкасидан келиб турарди. Ўртадаги баковул эса нак девнинг ўзи, ғоят бамайлихотирлик билан даврани бошқармоқда эди.

Кўз ўнгига юз очган бу ҳолат хотираси қатига сингиб, ўтмишга айланған бир воқеани юзага қалқитиб,

куйидаги хитобни қулоклари остида сас беришига сабаб бўлди.

Алп онадан!

Ўшандаям ва сўнг ҳам Нормат полвон бу гапга қўшилмаганди: «Бекор гал, алп отадан! Полвон полвондан бунёд бўлади. Бунга онанинг ҳеч дахли йўқ». Шунга қарамай, бу фикрдан анчагина дили ғашланиб юрган ва кейинчалик унутиб юборганди.

Мана энди, шу гап ростдай туюлмоқда эди.

У бошини илкис чайқаб, миясини аёвсиз пармалаётган бу хотирадан ҳалос топмоқни минг истамасин, елкасига тароки хуржун ташлаган жиккак, бакироқ чолнинг карнай сасидай ўткир овозини нак шуурида туди.

— Сарвар! Сарвар полвон сенмисан!

Намхуш куз кунларидан бири эди. Майдон тўла одам. Нарида темир йўл вагонлари. Кимдир ўғлини, кимдир хешини ҳарбий хизматга кузатгани чиқсан. Жиккак чол талпиниб бораётган томонда эса бошида қўкиш барра телпак, эгнида ранги униккан алача тўн, алп қоматли бир эркак хаммадан яққол ажралиб турарди. Ачом-ачомдан сўнг шу нарса маълум бўлди, Сарвар полвон деганлари маллатоб ўғилларидан бирини ҳарбийга кузатгани чиқсан экан.

Шанги чолнинг бу галги хитоби аввалгисидан баттар бўлди.

— Шу машак ҳали сенинг улингми?!

Ҳақиқатда ота-бала бир-бирига сира ўхшамас, сал нарида яна бир талайи кимтинибгина турарди. Чолнинг эндиги ҳайқирифи алам ва ҳайратта қоришик ҳолда жаранглади.

— Худо урибди-ку, агар шу машаклар сенинг улинг бўлса!

Сарвар полвон хотиржам эди. Жавобиям шунга монанд бўлди.

— Алп онадан деганлар, эшонбово, — деди мангалийни сийпалаб. — Биласиз, келинингиз ушоқ. Хушруйлигига учиб уйланаверибмиз... Булар тоға жамоасига тортганда. Умидимиз энди неваралардан, бирортаси ўхшаб қолар бизгаям. Одамларни қаратиб, буйтиблар бақираверманг-да, сизам энди!

— Рўзгор катта деб келин бечорани тиндиrmаган чи-карсан сен,— дея шанғиллашда давом этди чол.— Ўзинг

тўй-тўйлаб, мол-холларга қарашам келинга қолганда, а? Мехнат ёмон — девди чивинга айлантириб юбориши мумкин.

— Ха энди... тинмас аёлнинг қўзилариям майда бўлади-да...

Агар шу воқеа хотирасида жонланмаганида, Нормат полвон тоғасига тирғалмаслигиям мумкин эди. Яна ким билади. Ҳарҳолда кураш майдонидан тўгри далага кайтаркан, бригада қизларини балчикда кўрди. Қизлар ялангоёқ, тўпигигача лой кечиб, арик тозалашаётган экан. Улар орасида Ҳилолаҳон ҳам бор эди. Қизнинг лойга беланган оппок болдирларига кўзи тушаркан, йигитнинг юраги бу сафар ҳапкирикмади. Миясидан ўтгани шу ўй бўлди: «Буйтиблар лой кечаверса, эртан менга полвон ўғил туғиб бера олармикан бу?!» Кўклам ҳавоси алдамчи — илик, аммо ер хали зах эди.

У қаҳрланиб қизларни даладан ҳайдаб солди.

Ўшанда Сарвар полвоннинг фикрига қўшилмаган эса-да, овозидаги ички бир надомат эсида қолганди. Алли онадан, дея алоҳида бир алам билан таъкидлаганди. У пайтлар хаётнинг ўзига хос гаройиб бу фалсафаси билан Нормат полвоннинг мутлако иши йўқ, жўртоқи бир полвон сифатида курашларда қўлга киритган катта-кичик зафарларидан ўзида йўқ масрур юрарди. Негаки, унинг юки ҳали енгил, катта полвонлар зиммасидаги маъсулиятдан, яъни юрт шаъни, деган тушунчадан ҳоли эди. Аммо орадан бир неча йил ўтиб-ўтмай, бу залворли юк елкасига ортмокланганини сезмай ҳам қолди. Кунлардан бирида бундай теварагига разм солсаки, қишлоқ ахли ишонган, аникроғи, қўзига суртган полвонларидан бири ўзи бўлиб колибди. Шунда билдики, катта полвонликнинг обрўйи зўр, залвори эса беҳад оғир экан. Курашда ғолиб сифатида товоқ олиш бошка-ю, юрт полвонларининг мағлубиятидан азият чекиши бўлак экан. Курашнинг йўриги шу — енгасан, енгиласан дея ўзини овутмок истаса-да, ичдан нечундир қоникмаслик ҳиссини тия бошлиганди. Назарида, аксарият ҳамкишлоқ полвонларнинг илиги пуч, курашда узоқка боролмаслигини фаҳмлаб етгандек эди. Ва шу воқеа кутилмаганда рўй берди. Учтолликлар уларни тутдай тўкиб ташлашди. Оркаш полвон учун бундан ортиқ фожианинг ўзи йўқ. Нормат полвоннинг наздида

Қизилқишлоқ ўлди, номи ўчди унинг. Одатда бу нарса сўзда ифода этилмайди, қарашларда, нигоҳларда акс этади. Мағлуб қолиб, ҳатто ғолиб томонларнинг ичи ачий бошлайди. Ана, яғриндор бир момо, оналик хисси кўзғалди шекилли, чидаёлмай, ҳамкишлокларига бақириб берди.

— Хечқурса, биттагинанг йиқилиб бер энди!

Бу хитобни ҳеч ким англамади. Аммо Нормат полвон аниқ эшилди. Шунда билдики, ахвол жуда чаток, тутдай тўқилаётган қизилсувлукларга ҳатто рақиб томоннинг раҳми келмоқда. Бу орада сўнгти талағор Ҳайбат полвоннинг оёғи осмондан келиб тушди. Яғриндор момо бошқалардек кувониш ўрнига «ух»лаб юборди. Қизилқишлоқлик полвонлар учун улкан фожия рўй берди. Бироқ тоға билан юзма-юз келганида, бу нарса барчага бирдек фожия туюлмаслигини фаҳмлади. Йифламоқдан бери ҳолда ички изтиробларини баён этаркан, тоганинг лоақал бир туки қылт этмаганини сезди.

— Нимаякан дебман мени, — деди ғоят лоқайд оҳангда. Сўнг нимадир дейиш учунгина қўшиб қўйди: — Биздан чин полвонлар чиқмаган ва чиқмайдиям.

Нормат полвон тутаб турган эмасми, портлади.

— Аёлларни бўйтиб захга солаверсангиз, албатта, биздан полвон чиқмайди-да!

— Сенда ор бўлса, менда план бор, режа бор, — деди тоға узок-узокларга бепарво тикилиб. — Нечун энди хотинларнинг оғири сенга тушиб қолди, а? Зах кечмай, муз кечмайдими менга деса! Ишласа пулини олади-да...

Агар олисда қишлоқ томон қаторлашиб кетиб бораётган қиз-жувонларга кўзи тушиб қолмаганида, тоға ҳаливери гапдан тўхтамасди. Кучи ичига сифмаётган ахмок жиянинг пича «маъруза» ўқимоқчи эди. Аммо... Аввалига ҳайратланди. Сўнг ҳайрати разабга айланди. Нормат полвоннинг, барини ҳайдадим, ҳайдаб солдим, деган гапидан кейин, кўл сирмаб юборганини билмай қолди.

Тоға кўкка тикилиб ётаркан, танасида қўзғалган оғриқдан ҳам кўра, кутилмаганда юз берган бу ҳолдан инграб юборди. Сўнг, кет, деди, ҳозирроқ қишлоқдан корангни ўчир, кетмасанг, каматаман, деди. Назарида, жияни жавобгарликдан орқа-олдига қарамай қочиши кепрак эди. Кочиб юриш жонига тегиб, охири итдай ялиниб келиши лозим эди. Бу тоганинг синалган усули эди.

Тиз чўкиб ялиниш ҳар қандай жазодан оғир татишлиги-ни у яхши биларди.

Нормат полвон эса, кўз ўнгига кечаги кураш манзараси, қишлоқдан кетишни хаёлига ҳам келтирмас, кўтарилаётган күёшга бефарқ тикилиб ўтиради. Узокдан қизлар кўринмаганда, ҳали-бери ўрнидан қўзғаладиган эмасди. Қизларга кўзи тушгач, хушёр тортди. Улар узун-кисқа бўлиб, Толариқ томон бурилгач эса, ғудраниб сўқинганча, оёққа қалқиди. Пайкал ёқалаб ўша томон юрди.

Шийпон ёнидан ўтаётганда, кора, юм-юмалоқ бир хотинга рўбарў бўлди.

— Менга қара! — деди аёл шангиллаб. — Олим бригадни жияниман деб кўнглингга келганини қиласанми, а?! Нега кеча қизимни даштдан ҳайдаб юбординг, а?

— Зах кечмасин дедим.

— Зах кечадими-кечмайдими, сенга нима, — аёл қўлларини тўлғаб, далани бошига қутара бошлади. — Ё ўтказиб кўйган жойинг борми! Мен сенга гапиряпман, нимага индамайсан?

Нормат полвон хира пашшани ҳайдагандек, кўл силкиб, йўлида давом этди. Кутганидек, қизларни яна балчиқ ичиди кўрди. Улар орасида гуноҳкорона жавдираб турган Ҳилолаҳонни қидириб топаркан, ажаб бир шахт билан у томон юрди. Оғрикли оёғини ҳам унутиб, қизнинг қаватига сакраб тушди. Кўлидан кетмонни олди.

— Билсанг, менга илиги пуч уллар эмас, полвон болалар керак! — деди қизга қарамасликка тиришиб. — Буйтиб зах кечаверсанг, полвон туғолмайсан ҳеч!

У енгил пишкириб, балчикқа кетмонни қиялатиб солди. Теваракдагилардан кимдир ҳайратланди, кимдир пикирлаб кулди. Йигит эса алаҳсимади. Қизга айтган гапларидан хижолат чеккандай, бош кўтармай, кетмон чопишида давом этаркан, шунда қулоғига майин бир сас чалингандай бўлди.

— Оёғингиз... Оёғингиз лат еган, газак оладими деб қўркаман!

— Этиқдаман, — деди йигит кетмонга илашган балчикдан кўз узмай. — Гап шу, токи тирик эканман, сира зах кечирмайман сени!

Бу вокеа устига келган тоға, қовок очмай, бир мудат туриб қолди. Бемақсад иягини қашлади. Қамчи тутган муштимиға йүтәлди. Сұнг қизларга үшқирди.

— Чик баринг! Бу тентак билганини қылсын!

Кимдир хаяжон тұла титроқ овозда эътиroz билдирди.

— Бу киши... тентак эмас!

Нормат полвон гап әгасининг меҳрли қараашларини бутун вужуди билан теран ҳис этаркан, құлидаги кетмөннинг енгил ва ихчамлигидан завқи келгандай, янада файрат билан ишга уннади.

· Күклем ҳавоси йигитнинг күнглидан улгу олғандек, илиқ ва тароватли әди.

## БҰРОН ҚҰПГАН КҮН

Келинининг аломат феъли бор — ҳуши тоблаган күнлари, ҳе йўқ-бе йўқ, бирдан тушлик күтариб келиб колади. Сұнг эса, шу гапни иддао йўсинда такрор эта-ди: «Иккитагина сомсага қорнингиз түяди. Шу иссикда овора бўлишим шартмиди». Қайнонаси Эшқулнинг сом-сасидан емаслигини яхши билади. Билгани боис, бу гапни таъкидлашни ҳуши кўради.

Санам хола эса келинининг ғамхўрлигидан қувонма-гандек, гапидан ҳам ранжимайди. Бу вактда унинг кўзи наридаги дўконларда, аникроғи, эрқакларда бўлади.

У дўконда, қатор осилган гўшт нимталари ортида гумбаздай бўлиб ўтирган Баҳром кассобга, манглайи ти-ришиб тандир ковлаётган Эшқул сомсапазга, кир-чир столни тевараклаб карта ўйнаётган бошқаларга бир-бир бокаркан, сўнгра аста дейди:

— Ҳаммани кўзини ўйнатиб, келишинг шартмиди.

Кутубхона пешайвонига қўйилган узун ёроч ўрин-дикқа омонатгина чўккан келини иссикдан нолиркан, беспарво оҳангда тўнғиллайди.

— Қарамай, кўзлари тешилсин! Нима, уларни деб энди кўчадаям юролмайманни.

Келинининг бу гапидан оғирсениб, унга бошдан-оёқ кўз ташлайди. Жувоннинг бўлик қомати ғашини келтираётганини ҳис этиб, тағин эрқакларга юзланади. Яна ўша хол — у қараши билан Баҳром қассоб кўзларини

олиб қочади, Эшқул сомсапаз, күлида узун темир касов, кирларни томоша қилаётган бўлади. Негадир улар бу хокисоргина аёлдан ийманишади. Бирок бу ийманиш замирида масхаромуз нимадир ётганини аёл яхши англайди. Эътибор бермайди. Яккаш келини кўтариб келган тугуни ичкарига олиб кирмокни ўйлади.

Кутубхона ичи пешайвондан кўра салкинрок, қайноқ гармсел эпкинидан холи. У, одатда, китоблар терилган жавонлар орасига бир амаллаб жойлаштирилган столда тушлик килади. Шунингдек, йилнинг совуқ фаслларини хам шу хонада ўтказади. Кунлар сал илиши билан эса пешайвонга кўчиб чиқади. Ўзун ўриндикининг бир чекка-сига тўшамча ташлаб, кунини эскиган китобларни елимлаш-у муроала билан ўтказади.

Ажиди феъли — ишга вақтида келиб, вақтида кетади.

Ўриндикини эса тушдагина бир зумга тарк этади. Бирок келини тушлик кўтариб келган кунлари бу юмуш унга ўлимдан қийин туюлади. Қани энди, кулоқлари том битса-ю, ташки шовурни эшитмаса. Аммо, аксига олгандек, қайноқ эпкин қанотига илашган ўша хунукдан-хунук ишорали сас, у остона ҳатламаёқ изидан кувиб этади. Кулогига тирмашиб, миясига ўқдек қадалади. Шунда аёлнинг шуури кўзга айланиб, ташқаридаги ҳолатни аниқ кўра бошлайди: ана келини йўғон қўймичини лорсиллатиб, аста кетиб бормокда. Баҳром қассобнинг бўғиздан кўчган хунук ишорали сасдан, яъни маънодор томоқ қиришидан сергак тортган бошқа эркаклар жувонга еб қўйгудек тикилишган. Ҳар бири хаёлан уни ечинтириб, оппоқ баданини сийпалашган...

Сирасини айтганда, келинигина эмас, ўтган-қайтган барча кизу жувонлар кунда шу хил «қўрик»дан ўтмоққа мажбур. Боз устига, нарида бекат. Ўткинчиларнинг кети узилмайди.

Аслида эса, ҳаммаси мана шу бекатдан бошланган. Қир оралаб келиб, қишлоқ ёкалаб ўтадиган катта йўл бўйида бекат курилди-ю, илгари бу сайҳонликда ёлғиз бўлган кутубхона категорига Баҳром қассобнинг дўкони тушди. Бир эмас, иккита. Бирида ўзи, иккincinnисида укаси Абрај қилтириқ ўтиради. Акасининг гирт акси бўлган бу бандани аёллар билан сира иши ўқ. Кунда шунда улфатлар узатган бир пиёла, ярим пиёла ичимликни лиққа ютади-да, манглайи терлаб, мудраб ўтира-

веради. Сүнг эса Эшқул сомсапаз келди. Түрт-беш ходадан емакхона қуриб, тандир үрнатди. Бекатга ҳар автобус келиб тұхтаганда, қичкириб қўяди: «Кайноғидан бор, кеп қолинг!» Баъзан эса сомсадан бўшаган тогорасини чилдирма қилиб, чийилдоқ овозда мақтаниб қўяди: «Касбимдан ўргилай, бизди нарса кўчадаям пул бўлаверади».

У бу гапни айтаркан, ҳар сафар Санам хола томонга кўз ташлаб қўйишини канда килмайди. Нега деганда, аллақандай китобхонларни пойлаб кунини кеч қиласдиган аёлни ҳеч тушунолмайди. Ўзича унга ачинган бўлади. Баҳром қассоб эса, аёл қолиб, китобхонларга ачинади. Корин тўйғизмайдиган бу зормандага намунча ўч бўлишмаса булар. Эшқул сомсапаздан фарқли ўлароқ, у кутубхонани дўконга айлантиришни ўйлайди. Пешайвонли каттагина бино... Шу баҳонада аёлнинг қарашларидан ҳам қутулишган бўларди. У борида жувонларга тикилиш кийин. Тумшайиб, ғашга тегади. Шу боис, Баҳром қассобнинг томоқ қиришлари вазиятга қараб турланиб туради. Санам хола пешайвондалигида унинг томоқ қириши қуидаги маънони англатади: «Кўзларингга кўп эрк беравермаларинг, анову ит чайнагур қора кузғундай қўнқайиб ўтирибди». Кейин қўшиб қўяди: «Жонга тегди лекин...» Аёл йўқлигига эса унинг бу хил ишоралари бутунлай ўзгача тус олади: «Мановуни қаранглар! Мўрчамиён, бодомқовоқ... ўлдиради бу!» Ёки: «Буниси қайси палакнинг меваси бўлдиякан?! Шу бир кечалик ишвасига дўқонимни тикиб юборардим».

Азбаройи маҳлиё бўлганидан, гоҳида Баҳром қассоб ёмон қовун тушириб қўяди, яъни ичкаридан қайтиб чиқкан Санам холани сезмай қолади. Аёл зина босиб пастга тушади. Одатдаги оғриқни сезмайди. Бир ой муқаддам уни ит талаган бўлиб, зинадан тушиб-чиқишида, ўнг тиззасидаги жароҳат изи симиллаб азоб берарди. Бу гал буни сезмайди. Ошиқмай бориб, қассобга тикланади. Баҳром қассоб гўё уни энди кўраётгандек, беўхшов илжаяди: «Этдан тортайми, хола?» Санам хола индамайди. Индамагани сайин Баҳром қассоб баттар тараддулланади. Аёл унинг жундор кўксига, йўюн билакларига, гўштдор афтига бир-бир разм соларкан, кўзларида маъно йўқлигидан ажабланади. Буни яхши билсада, негадир ҳар гал таажжубланади.

У қассобни нигоҳи билан «нимта»лаб, нари ўтади. Емакхонага етиб-етмай тўхтайди. Кўзлари Эшкул сомса-пазни гангитиб, стол теварагида ўтирганларда қўним то-пади. Нечундир факат тук босган энсалару яғир ёқалар-нигина кўради. Ўтирганлар қиёфасини илғамайди, тўғриғи, илғаёлмайди. Шунда олам кир, тириклиқ чиркин туюлади. Нажот истаб, уфқка кўз ташлайди. Уфқ тупроқ рангида, осмон ҳам шу тусда. Кайнок гарм-сел борлиқни тўзонга буркамоқчилик, ўқтин-ўқтин куту-ради. Окибат, кишилик қиёфаси чангга беланган-у, улардан мана шу тук босган энсалару яғир ёқаларгина қолгандек гўё. Бундан унинг юраги баттар сиқилади ва беихтиёр тилига шу гаплар кўчади: «Худойими-ий, буларни яратиб нима қиласдинг, а?!» Дардли бу сасни ҳамма, ҳатто наридаги Эшкул сомсапаз ҳам эшитади. Бунга жавобан кимдир бармоғи учи билан чеккасини кашлайди, китоб ўқийвериб, мияси суйилиб битган бу-ни. Бошқалар буни зимдан тасдиқлайди. Тўғри-да, фсь-ли ҳеч аёлникига ўхшамайди, на қарғанади, на уриша-ди. Аёл дегани ичидагини тўка қолсаякан, нимадир деб жавоб айтсанг. Бу эса сумрайиб жонингни олади.

Санам хола таассуфли қиёфада пешайвонга қайтади. Қаншарига кўзойнагини қўндириб, қўлига сахифалари орасига сўлигандай тағиғиб беради. Райхонни қулоғига қистириб, тағин мутоалага тути-нади. Бироқ ҳарфлар чалкашиб, мияси ҳеч нарса укмайди. Ўзининг китобга термулиб ўтириши теваракда-гиларнинг истехзоли илжайишларига сабаб бўлаётгани-ни ич-ичдан хис этиб, узоқдаги мозортепага маъюс тер-мулиб қолади. Қулоқлари остидан энасининг хазин ово-зи сирғалиб ўтганини сезгандай бўлади: «Отанг ўр эди, қизим...» Санам хола эса отасини эслайлайди. Сарға-йиб кеттан кичкина суратини кўрган, холос. Суратдаги одам қайсарга ўхшамас, қарашлари катъиятли, зиёлино-ма киши. Энасининг овози қулоқларини сийпалашда да-вом этади: «Отанг ўлганда уч ойлик чақалоқ эдинг. Отангни уйинг куйгир Берди упир уриб-уриб ўлдирган. Мозорга икки қоп китоб яширгани учун қамаб олиб уришган. Топиб берасан китобларни дейишган. Отанг ўр эди, қонига белашса-да, чурқ этмаган. Хўш, нима бўлди. Бекитган китобларининг ҳузурини ер кўрди...»

Шу орада овозлар алмашиниб, шуурида қуйидаги

сўзлар жарангти сас беради: «...китоблар чиқди, чириб кетган хийли китоблар чиқди. Арабча имлода экан... Кўлга олгилиги йўқ... Бармоқ тегиши билан титилиб, тўкилиб кетади денг. Кўрқдим мен. Кулқоранинг гўрини бошқа ердан қазидим. Китобларни шундайгина жоийига кўмиб кўя қолдим...»

Жамол гўрков бу гапни узок вақт гапириб юрди. Аммо бу китобларни ким кўмгану ва қанақа китоблиги билан ҳеч ким қизиқмади. Негаки, хотиралар нихоятда эс-киган, китоблар қатори ўтмиш каърига аллақачон кўмиб юборилган. У фақат кампирнинг юрагида яшаб келарди. Кейин уни қизи Санамга мерос қолдирди. Санам хола ҳар гал мозорга термуларкан, ўзи умрида кўрмаган Берди упирнинг гўрига ғишт қаламоқ истайди. Бироқ бу борада ҳам у бошқа хотинларга ўхшаёлмайди. Андеша қиласди, ўлиб кетган одамнинг нимасини янасан. Энасининг овозида бу сафар мамнунлик сезилади: «Упирман деб тоза кутуриб кеттанди. Одил ҳукумат отиб юборди уни. Сен унда уч яшар эдинг. Қизамиқдан ана кетди-мана кетди бўлиб ётардинг. Берди упир отилибди деган куни шу йиғлабман-шу йиғлабман, ҳеч айтгилиги йўқ».

Санам хола отасини ўлдирган кимсанинг келбатини тасаввурнида тиклашга уринади. Авваллари тасаввурни катидан шопмўйлов, қоратўри кимса қалқиб чиқарди. Сўнг унинг ўрнини Бахром қассобга ўхшаш киёфа эгаллади. Қассоб Берди упирга невара. Аёл бу авлодга нисбатан адоват сезмайди. Бахром қассобнинг аёлларга беҳаёларча тикилишинигина ёмон кўради. Баъзан ўтмишда яшаб ўтган аёллар каби ёвкур, шаддот эмаслигидан ўқинади. У мунисликнинг акси бўлмиш шаддотликни жинидан ёмон кўради. Аёлга мунислик, эркакка орият ярашади, деб ўйлайди-ю, аммо гоҳо ўзининг хокисорлигидан жуда ғаши келади. Хаёлидаги ёвкур аёллардан бирига ўхшамоқ истайди ва беихтиёр ўзини бийдек даштда, от устида тасаввур этади. Қаватида ким денг, ўзи китобларда кўп ўқиган Тўмарисга ўхшаш бир киёфани кўради. Чакноқ кўзлари узокларга тикилган, коп-қора кокилларини шамол ўйнайди... Аёл унга томон талпинади. Аммо чакноқ кўз жувоннинг оти қуюндеқ учкур, уни ёлғиз қолдириб, бийдек чўл четига ҳошия тортган кирмизи ранг уфққа сингиб кетади. Аёл аламда

қолаверади. Баъзида эса уфққа сингган қора бир оздан сўнг анча бурун ўлиб кетган Ўғилой момо сиймосида қайта намоён бўлади. Момо викорли одимлар билан тикка босиб келаркан, унга норозиланиб бокади: «Аёлсан, эркакларни сал тийиб кўйсанг бўлмайдими, лаллаймай ўлгир!» Аёл унинг қаршисида ўзини гуноҳкор сезади: «Қандай қилиб, моможон?» Бироқ саволи жавобсиз қолиб, хотиралар гирдobi яна уни ўз домига тортади ва натижада, Ўғилой момонинг айрим қилиқларини энди тушуниб етаётганини англайди.

Момо дарвозаси олдига ўринидик кўйиб, ўтган-қайтганларни кузатиб ўтирадиган айрим эркакларни аяб ўтиrmасди: «Нимаси бу, — дерди, — аёлларнинг этагини, кизларнинг тўпигини томоша килиб, ё уйингдан илон чиққанми?!» Кўчада тўдалашиб, соатлаб валақлашиб ўтирадиган аёлларни ҳам назаридан қочирмасди. Ҳамма ундан ҳайикарди. Нимасидан ҳайикарди? Сири нимада эди унинг? Жиддий бош қотирилса, ўша сирнинг тагига стиши мумкиндек эди. Бироқ қассобнинг маънодор томоқ қиришлари ҳамиша хаёлини бўлади.

Бахром қассобнинг томоқ қиришидан, бекатга келиб тўхтаган автобусдан ким ва қанақа аёл тушганини қарамасданоқ илғаш мумкин...

Ҳар куни шу ҳол, шу авҳол...

Бугун ҳам у ёнида елпиниб ўтирган келинига безовта тикиларкан, қўлидаги тугунини ичкарига олиб кирмоқдан юраги безиллаб турарди.

— Ичкарига юр, салқингина, — деди ўзи кутаётган ноxуш дақиқани имкони борича ортга чўзиш умидида.

Келини, йўқ, деган маънода бош чайкаркан, кетмок учун ўрнидан қўзралди. Санам хола, кутиб тур, тугунни кўйиб чиқай, деёлмади. Шунингдек, келинини кузатиб қолишният ўйламади. Шунчалик соддами у? Сиртдан караганда шундай. Аслида эса, у тугун баҳонасида қочарди. Биладики, пешайвондан туриб қанчалик коровуллик килмасин, келинини эркакларнинг еrostи қарашларидан асрәймайди. Эркакларнинг қилиғидан но мус қилиб, қочарди. Эшикка етмай, Бахром қассобнинг бўғиздан кўчган хунук сас ортидан қувиб етади.

У тугунни стол устига қўяркан, бу сафар ичкарида кўп ўралашмади. Ошиғич изига қайтаркан, тагин ўша таниш ҳолатни кўрди. Майдонда неки эркак зоти бўлса,

барининг кўзи келинита қадалганди. Кир бағрини ялаб эсаётган қайноқ гармсел худди ўчакишгандай, жувоннинг этакларини торткилаб, унинг бутун жисми-жаҳонини кўз-кўз қилмоқда эди. Стол теварагида ўтирганлардан кимдир беихтиёр «оҳ» тортиб юборди. Унга бошқаси қўшилди. Бу энди янгилик эди. Илгари улар факат кўз билан чекланишарди. Энди нигоҳ билан «пайнаслашин»га қаноат қиломайдиган бўлиб қолишибди.

Санам холанинг бағрига ўт тулашгандек бўлди. Аввалига зина босиб, пастга тушмоқ истади. Сўнгги зинада фикридан қайтиб, нажот қидиргандек, ичкарига юрди. Тиззасини стол киррасига уриб олди. Оғриқ сезмади. Кўзларини аланг-жаланг қилиб, нимадир қидирди. Жавон тўла китоблар, девордаги адибу шоирларнинг суратларидан силжиб ўтган нигоҳи бурчакдаги печкада, аникроғи, унинг ёнидаги чоғроқ болтада тўхталди. Нима учун? Ахир хаёлида болта йўқ эди-ку. Нечун уни қўлга олмоқни истаяпти? У кўзларини тезгина болтадан олиб кочди. Шунда оқиш девор тархида Ӯғилой момонинг сиймосини кўргандай бўлди. Момонинг маҳкам қимтилган лаблари куйидаги сўзларнинг сирғалиб чиқишига монёлик қиломади: «Кўз зинокор...» Дарвоқе, момога куч берган сир шу эмасмикан? У умр бўйи шу ақидага амал қилиб, суллоҳ эркакларни кўча юзидан кувиб келмадимикан? Уни ёмон қўришарди, фийбатини қилишарди. Аммо у сира чекинмасди. Чекинмас одамдан эса, турган гап, ҳамма ҳайқади.

Санам хола кўзларини бир зумга юмди. Кулокларини кўзлари каби юммоқнинг имкони йўклигидан ўкинди. Қайтамга бутун вужуди қулокқа айланган, ташқаридан келаётган овозлар унинг ич-этини кемирмоқда эди. Ана энсасини тук босган йигитлардан бирининг, «бир кечагина...» деган гапини аниқ эшилди. Бунга жавобан Эшқул сомсапаз ҳиринглади, Баҳром қассоб салобатли томоқ кирди: «Ҳадларингдан ошманглар-ов!»

Аёл шиддатла ташқарига интиларкан, осто надан ҳатлаётсиб, қўлида болтани кўрди. Қачон олишга улгурди, буни ўйлаб турмади. У яккаш бир нарсани, бу хол ортиқ давом этиши мумкин эмаслигини ўйларди. Анчадан бери ичидагимланиб ётган алам сиртига тепкан, майдонни эркаклардан тозалаш қасдида ёнарди. Биринчи

бўлиб столдагиларни қувади, кейин Бахром қассоб билан гаплашиб қўяди. Эшқул сомсапаз ана энди ундан кўрадиганини кўради.

Ичкаридан болта кўтариб чиккан аёлни дастлаб ҳеч ким пайқамади. Ўртага эндигина қўйилган шиша болта зарбидан чил-парчин бўлгачкина, улфатлар у томон ўғирилишди ва нақ тепаларида даҳшатли киёфада турган аёлни кўрдилар. Кимдир жонхолатда болтага қўл чўзди. Улгуролмади. Болтанинг тўмток уни тук босган энсанни киялаб ўтиб, бу сафар стол четига карсиллаб урилди.

— Э, бу қутурибди-ку!

Бу хитоб ўтирганларга болта зарбидан кўра, кучлироқ таъсир қилди. Улфатлар бир зумда тумтарақай бўлишиди.

— Коҳ, тишласа ўласан!

Аёлнинг назарида, бу ғалаба эди. Аммо бундан заррача кувонмади. У аламу нафратдан оташ бўлиб ёнарди. Ҳаялламай қассобхона томонга юрди.

Бахром қассоб соchlари тўғғиган, кўзлари бежо чакнаган кўйи ўзи тарафга бостириб келаётган аёлни одам боласига ўҳшатолмади. Алвости ҳам эмас, номсиз бир бало эди у. Довдираб қолган қассоб кочмоқ лозимлигини англади. Оғир гавдасини илкис кўтариб, ортдаги эшикка интилди. Эшиқдан нариси киялик эди. У осто нада қокилиб, пастга думалаб кетди.

Санам хола буни кўрмади. Кўрадиган ахволда эмасди. У қассобни жойидан тополмагач, шуурсиз бир ҳолатда сомсаҳона сари интилди. Эшқул сомсапазни кидирди. Бирок у, балодан йироқ, дея аллақачон жуфтакни ростлаганди.

Аёл болтани кия тутганча, тандирга бориб туртилди. Аланга таптини хис этаркан, Эшқул сомсалазни йўқотмоқ учун аввало тандирни бузмоқ керак, деб ўлади. Бу ўй миясида чарх ураркан, тандирни йикитмок билан ўз мақсадига эришадигандек эди. Аммо тандир мустаҳкам, унда ўт гуриллаб ёнарди. У болтани ташлаб, тандир оғзидан чиқиб турган шоҳ-шаббаларга ёпишди. Уларни тутамлаб дуч келган томонга итқита бошлади. Итқитган ўтнинг бир қисми емакхонага бориб тушганини сезмади. Олов тили аввалига эпкин қаерлардандир суриб келган қоғоз парчаларига ёпишди. Боз устига, ўт бор жойда шамолнинг жини қутуради дегандек, даштни қуритиб-

кақшатиб эсаётган қайнок гармсөл бағридан юлқиниб чиққан чоғроқ куюн ёнаётган қофоз парчалари-ю, сочилиг-лан чүғларни оғушига тортиб, майдонда бир муддат чарх урдида, емакхона ортида күздан ғойиб бўлди. Ундан дўкон билан емакхона оралиғида тахланган шоҳшаббаларда оловли из колди.

Аёл эса буларни сезмас, гурсиллатиб тандирни чопмоқ билан банд эди. Эшкул сомсапаз тандир гирдини пишик ғиштдан кўтарган әкан, болта дами ғиштга урилиб қайтарди. Охири у толикди. Асаби баттар қайнаб, бошини кўтарди ва емакхона билан дўконга ўт тушганини кўрди. Беихтиёр қичкириб юборди:

— Вой, ёнаяпти!

Ўзига келган аёл жонхолатда олға интилди. Тезда энди кеч эканлигини англаб, қилмишидан қўрқиб кетди. Қўркуви ҳайрат билан алмашинди. Дастреб кўзларига ишонмади. Йўқ, ёнаётган дўкон ичидаги ҳақиқатдан кимнингдир боши ликиллаб турарди.

— Чиқ-ий, касофат!

Абрај қилтирик гандирақлаб ташқарига чиқаркан, оғзидан вино хидини буркситиб деди:

— Ўйғонсам, ҳаммаёқ ёнаяпти. Ўзи нима бўлди, а, хола?

Кишлоқ ахли ва қочганлар эс-хушини йигиб, майдонга ошиққанларида, дўконлар тамомила ўт ичидаги қолган, болта тутган аёл, қаватида Абрај қилтирик, гўё сехрлангандай алангага термулиб турарди.

## ҚУДУҚ

Абду чаккон топиб келган гапдан қишлоқ ахли бир қалқиб тушди. Нима эмишки, қишлоқлари тагидан улкан еrostи дарёси шовуллаб оқармишу, йигирма-ўттиз газ кавланса, бас, сув легани ўз-ўзидан шарқираб чиқаверармиш.

У бу хабарни келтирганда, қуёш уфққа ёнбошлаган, қишлоқ чеккасидаги сайҳонликка йигилишган чоллар ярмисигача ерга ботган кўхна машина рамасини эгаллашган, ёшроклар эса шундоқкина яланг ерга чордана куришганди. Пода йигиладиган наридаги майдонда ўшиланглар тўп суришар, қайнок дашт ели оёқлари ости-

дан күтарилигандын түзөнни ўтирганлар оша түфри кишлоқ томон хайдарди. Кундузги жазира маалыматтың түйиниб, эндилликта бамисоли қизиган тандирдек, ўзидан ховур тарататын томлар, тупрок күчалар бу түзөнни ўзига сингдираверганиданми, жамики нарса тупрок тусига кирган, симлари салкыган катар симеңочлар бу файзсизликни янада бүрттириб, киши дилида нохуш кайфият уйғотарди. Аммо теварак-атроф қанчалик бефайзлик касб этса, инсон түйгүси шу кадар ўтмаслашади деганларидай, давра ахли бошларига ёғилаётгандын чангга белар-водек, теваракка ҳам шу хил муносабатда эди. Улар-нинг назарида, олам шу созда яратылгану, шу йүсінде қолмоги лозим эди. Бир пайтлар қишлоқнинг корига яраб, эндилликта чолларнинг жүнгина ўриндиғига айланған юк машинаси ҳам шу кайфиятнинг курбони эди. «Полуторка» деб номланған машина бундан күп йиллар мұқаддам, серемғир күнлардан бирида йўлнинг көк ўртасыда сүнгги «нафас»ини олганча қолиб кеттанды. Қишлоқ ахли уни йўлдан четта суриси қўйиш ўрнига, даштда ер қаҳат эмас-да, айланиб ўтмокни маъқул кўрган. Вакълар ўтиши билан машина шип-шийдам қилиниб, эндилликта ундан факат «устихон» қолган. Оқшомлари чоллар мавқеига караб рамага жойлашишади. Ўриндиқ ўрни қишлоқ кайвониси Бегим оқсоқолники. Рул ўқига ўнг елкасини тираб, мисоли шохлардек керилиб ўтириб олади-да, даврадаги бир чақага қиммат гурунгларни бошқаради.

Бу хил гурунгларга тасодифан келиб күшилгандын кимса умумий ғала-ғовурда дастлаб ҳеч нарсаны англаёлмай, бир оз гангиса-да, кейин шуури тиниклашиб, кўз ўнгидаги қандайдир бир түйнинг шовқинли манзараси на-моян бўлади: гуррос-гуррос меҳмонлар, катар-катар қозонлар, яшик-яшик ичимликлар, номи достон хонанданинг хонишлари-ю, улоқдаги чавандозларнинг ҳайқириғи, отларнинг дурури — ҳаммаси қоришиб, рангтранг тусда жилва касб эта бошлайди. Ҳаёт дегани мана шу суронли манзарадан иборатдек, у түзөнли қайноқ ҳавониям, файзсиз чўлниям, чангта ботган қишлоқниям унутади. У ушбу шукухли манзарадан завқланмоқ истайди-ю, бироқ даврадаги кимсанинг эскиган, кирланган энгил-боши, хафтадирки, устара юзини кўрмаган қорайған афти бунга изн бермайди. Шунда у беихтиёр ачин-

мокқа тушади: «Тўй қиласман деб бечоранинг ийифи чиқиб кетибди-ку». Аммо буни қарангки, тириклик деганда, бирордан ортда қолмасликни тушунадиган ва буни хаётнинг асосий мезони деб биладиган күёшда куйган бу мамнун қиёфа у шўрликнинг узокрок ачинишига ям йўл қўймайди. Ачиниш таассуф билан алмашиниб, дилда ғашлик уйғотади.

Даврага келиб қўшилган Абду чаккон айни пайтда шу кайфиятда эди. Бунгача у миниб кетган мотоциклини бир четта суюб қўйиб, уст-бошини қоқиб-сукиб, ўзини тузатган ва майдонда чангтиб тўп сураётган йититчалар томонга бир-икки норози бокишигаям ултурганди. Энди у хафта бурун дабдабали тўй берган Маъруф чавандозга чимирилиб қааркан, унинг баҳтиёр ишшайишидан эмас, нодонлик ўнгиган турқидан фижинмокда эди. Ҳамиша нималарнидир бошлаб юрадиган бу тинибтинчимас йигит – Абду чакқоннинг хаётта нисбатан муносабати ҳамқишлоқлариникидан кескин фарқланар, бошқаларнинг назарида, шаҳар кўрган олифта эди у. Ҳозир ҳам ҳамма қатори ерга гуппа чўкмай, чоллар каватига жойлашаркан, қизиган темир юзини киши билмас сийпалаб қўйди. Унинг ҳар бир хатти-ҳаракатидан ички бир дид балкиб туар, киртишланган ияги, эгнидаги даштта мос кўйлаги-ю, уринган жинси шимидан бу хил турмуш тарзига зўрға кўникаётгани очик англашиларди. Аслида бундай йигитлар ҳар бир қишлоқда учрайди. Аввалига улар ўзларича нималаргадир урингантуртинган бўлишади-ю, сўнг бошқалар қатори тириклик тўзонига қоришиб кетади. Кейинчалик ҳамқишлоқлари унинг одатдан ташқари кўринган феъл-атвори устидан анча вактгача кулиб юришади.

Абду чаққоннинг томдан тараша тушган қабилида айтган хабаридан даврага сукунат чўқди. Фақат мақтоловларга кўмилиб ўтирган Маъруф чавандозгина унга ўқрайиб қараб қўйди. Бирор йигит ҳаяжонда эди, унинг норози бокишига парво қилмади. У давра якинига думалаб келган тўпни майдон сари йўлларкан, кайта жойига чўкиб, ўтирганларга бир-бир қараб чиқди.

Машина рамасидан сўнгайиб чиқиб турган рул ўқига елка тираб, савлат тўкиб ўтирган Бегим оқсоқол томок қира-қира, истехзоли илжайди.

– Нима бало, ёнғоқ-лонғоқнинг тагидан туриб кела-

япсанми дейман, — деди сўнг нописанд оҳангда. — Ер тагида дайра нима қиласди. Дайра деганлари ер юзалаб оқмайдими, а?

Абду чакқон чолнинг каттазанглигини ёқтирамай, боши билан қишлоқ томонга ишора қилди.

— Қишлоғингизда лоакал тиккайган бута йўғу, сиз ёнроқни гапирасиз-а.

Давра ахли беихтиёр қишлоқ сари юзланишди. Ҳақиқатда, қишлоқ шип-шийдам, кечки дайди елдан кенг кўччанинг тупроғи тўзғиб ётарди. Магазин эшиги ёнида Саттор дўкончи ҳавасга ўтказган ёлғиз толгина тебраниб, мужрайиб турарди. Тол деярли қуриган бўлиб, омон қолган юкори навдасидагина беш-олти япроқ кўзга чалинади. Энг қизиги, толга кўзлари тушиши билан ўтирганларнинг томоклари бирдан қақраб, шу атрофда ўралашиб юрган болалардан бирини сувга юргутирдилар. Кейин, сув келгунга қадар ва сўнг кўлтиллатиб, галма-гал сув ичиш давомида, еrostи дарёси бормийўқми, дея қизғин баҳсшлашиб олишди. Баҳсга Эшна муаллим якун ясади. Унинг фикрича, ер остида нафақат дарёлар, балки бутун-бутун кўллар мавжуд эмиш. Аммо унинг гапига кимдир ишонди, кимдир эса йўқ. Алами ичидаги қолган Маъруф чавандоз пайтдан фойдаланиб, йигитни чакиб олишга уринди.

— Шуни деб гурунгни белига тепиб ўтирибсанми ҳали! — деди ўдағайлаб. — Ўша дарянгдан нима фойда бизга, а?

— Айни шу масалада гаплашгани келдим-да, — деди Абду чакқон унинг замзамасига эътибор бермай. — Тағимиизда дарё. Хўш, ўша сувдан қай йўсинда фойдалана-миз, а?

Даврага яна жимлик чўкди. Чоллар, сиз нима дейсиз, деган маънода Бегим оқсоколга ўгирилишди. Бегим оқсокол узоқ йиллар раҳбарлик лавозимларида ишлаб, бу хил ташаббускорларнинг ховлиқишлигини кўп кўрган эмасми, биргина нордон гап билан йигитнинг унини ўчирмоқчи бўлди-ю, охирги дақиқада эндиликда эл қатори оддий одамлиги эсига тушиб, аччик лукмадан ўзини тийди, ер остидаги нарсани юзага чиқариш осон эканда сенга, дея тўнғиллаш билан чекланди.

— Нимаси қийин? — деди Абду чакқон кўзлари чакнаб. — Қудуқ каздирдимиз.

— Ким қазиб беради?

Абду чақон кенг даштга зимдан күз ташлаб, сирли кулимсиради.

— Агар ҳақини келишсак, қазиб берадиганлар бор.

Бегим оқсоқол унинг кулимсирашидан ҳадикланиб, даштта назар солди. Кўзи узокдан чанг кўтариб қайтаётган подадан ўзгасини илғамагач, тўрсиллаб деди:

— Бу гапингни бориб Холиқ раисга айт.

— Бе, — деди чоллардан бири ингичка овозда, — кўчага тош тўқтиришга ярамаган раис, сенга қудук қаздирив берармиди. Нураги мешни ули дейдилар уни, ваъда беришдан бошқасини билмайди у.

Бу гапдан сўнг давра жонланиб, раиснинг гийбати бошлианди. Бу ҳол бирор беш дақиқа давом этиб, гап Рўзикул бодининг ўқишига киролмай, катта пулнинг бошига етиб қайтган ўғли томон бурилганда, Абду чақон чидаб туролмади.

— Менга қаранг, — деди Бегим оқсоқолга юзланиб. — Ҳадеб «раис-раис» деявермай, ўзимиз сал жон койитайлик бундай. Шахсан раисга қудукнинг хеч кераги йўқ. Қишлоғи қўшувдан сув ичади. Демак, ўз кумачимизга ўзимиз кўр тортишимиз керак.

Ўтирганлар чувиллаб кетишиди.

— Э, раҳбар бўғач қибирсинда.

— Талабингни унга айт.

— Бизга қудукнинг хеч кераги йўқ, худога шукр, ҳаммамиизда ховуз бор.

— Қаздирган билан сув чиқадими-йўкми ҳали.

— Шуни айт.

Абду чақон ғала-ғовур тинишини чидам билан кутаркан, Мамадали шофёр ҳаммадан кўра кўпроқ шовкин кўтараётганини пайқади. Аввалига ажабсинди, сўнг бирдан масаланинг тагига етиб, жини куришди. Негаки, агар қудук қазилса, Мамадали шофёр ҳафталик тушумдан маҳрум бўлар, ҳеч ким унга ховузимни тўлдириб бер деб келмасди-да.

Аслини олганда, ховуз ҳам Абду чақоннинг ҳаракати туфайли юзага келганди. Шаҳардан қайтиб, биринчи қилган иши ховли бурчагидан ховуз қаздириш бўлди. Ховуз деворларини бетонлаб, устини қопқоқлаб укаларайни эшакда сув ташишдек азобдан ҳалос этганидан сўнг, бошқалар ҳам ховлисига ховуз қаздиришни удум

килишди. Окибатда, бу иши учун у «Абду чаққон» деган лақаб орттириди.

— Мамадали ака, — деди у ич-ичидан хуруж қиляётган ғазабини базур жиловлаб, — бу таклифимнинг сизга ёқмаслиги аник. Чунки сиз кундалик тушимдан ажраласиз. Бироқ шахсий манфаатни умумникидан устун қўйиш яхши эмас. Бу кадар худбин бўлманг, ака.

— Қачон мен шахсий манфаатимни устун қўйибман, а?

Сахро офтобининг қуидирувчан ҳарорати остида ўсиб-улғайган бандасининг ҳулқи бирдан юзага телчиб, Мамадали шофёр тұсатдан йигитга ташланиб қолди. Орага тушганлар уни бир амаллаб тинчтишишгач, чоллар бошларини сараклата-сараклата, севимли мавзулари — насиҳат ўқимоққа киришдилар. Насиҳатнинг бир учи кизиқ устида тоғасини пичоклаб қўйган Башир бангига бориб тақалгач, Абду чаққон тағин портлади. Аввалига у худди ўчакишгандай аллақаердан пайдо бўлиб, давра ни чир айланадиган кичкина қуюннинг тинишини кутиб турди-да, сўнг бор овозда бақириб берди.

— Хўш, кудук қаздиранизми-йўқми?!

Даврага яна жимлик чўкиб, ўтирганлар юзларини чангдан паналай-паналай, бармоқлари орасидан йигитга тикилишди.

— Қачонгача қуюнга ем бўламиз, а?!

Абду чаққон шу гапни айта-айта, иргиб ўрнидан турида, қизишиб гапира кетди. У сўзларкан, ўтирганларнинг кўз ўнгидаги манзара жонлана бошлади: бошда ер тубидан қайнаб чиқсан бир тегирмон сувдан ариқлар тўлиб-тошди, кейин сувсизликдан янтоқ босиб ётган томорқаларда ишкомлар қад ростлади, полиз экинлари учун чиройли-чиройли жўяклар тортилди. Томорқалар тўридан мевали дарахтлар ўрин олди. Уларнинг бир қисми кўча ёқаларига ҳам чиқиб кетди. Натижада, яшил тусга кирган қишлоқдан гармсеп чўчийдиган, бетизгин қуюнлар ариқ бўйларида кўкка бўй чўзган тераклар сафидан нарига ўтолмай, чўл бағрига жуфтак ростлайдиган бўлди. Буни қарангки, орадан уни йиллар ўтиб, ўша тераклар кишилар корига яраб қолди. Иморат солмоқчимисан, марҳамат, бир бошдан кесиб томга босавер.

Тераклар борасидаги гап давра ахлига жуда ёкиб тушди. Лоқайд нигохлар жонланиб, чанг босган идрокларда нимадир ғимирлаб қолди. Кучаниб, тиришиб эътиroz билдиrmоққа тушган Мамадали шофёр ошкора турткиланиб, йигитнинг кейинги гапи қизғин қаршиланди-ю, эндиги мавзу ёғоч қахатлиги туфайли иморат солмоқ ишлари йилдан-йилга оғирлашиб бораётгани хусусида борди. Кимдир, акасидан калтак еган боладай манқаланиб, етти дона ёғочни отасининг баҳосида харид қилганидан шикоятланди-ю, гап дегани айни қиём пайтида кутурадиган қуюндан гупуриб кетди. Агар Абду чаққон бетоқат ер тепинмаганида, қудук масаласи бутунлай унутилиб, бу мавзу то пода келгунга қадар чайналиши мумкин эди. Аммо йигит тағин халақит берди.

— Ўртага ташлаймизми? — деди у чўлнинг узоқ ичкарисига жонсарак боқаркан, бармокларини бир-бирига ишкалаб. — Бориб қудукчилар билан гаплашаверайми?

Бегим оқсоқол қаватидаги чолнинг ҳассасини қўлига олиб, ҳардамхаёл ер чукиларкан, сўради.

— Ҳай, қаердан қаздирмоқчисан?

— Буни сизлар ҳал қиласизлар.

Бегим оқсоқол ердан кўз узиб, йигитга сергак боқди. Абду чаққон инъом этадиган нарсани бошқа бирор илиб кетадигандек, андак ховлиқиш билан деди:

— Қишлоқнинг кок ўртаси... ховлим ёнидан қаздирмиз.

Бу гап кўнгиллар тубида мудраб ётган худбинлик туйғусини уйғотиб юборди. Даврада ғала-ювур қўпти. Ҳатто шилпик кўзларини сузиб гап-сўзларга қотинмай, уйқусираф ўтирган Холдор чолга ҳам жон кирди. Куртдек бошини бежо чайқаб, ажиб бир тарзда бифилламоққа тушдики, бу хил оҳангни инсон боласидан чиқишига кишининг ишонгиси келмасди. Бироқ уни тинглайдиган қулокнинг ўзи йўқ эди. Қудук ўрнини талашувчилар шу қадар жазавага тушиб тортишишардики, ким гапирайти-ю, ким тингляяти — ажрим этмок душвор эди. Тўп кетидан югуриб келган болакай бу талотўпдан эси чиқиб, коптогини қўлтиқлаганча ура қочиб қолди.

Гурунг бошидан бери Бегим оқсоқолга лутф килиб ўтирган Нортожи чол унинг қўлидан ҳассасини юлқиб олди-да, бўғиқ овозда ўдағайлаб қолди.

— Раислигингизда ҳамма нарсанинг сархилини еб, ширин томоқликка ўрганиб қолгансизда, а?! Энди кудукка ҳам эга чикмокчимисиз? Инсоф борми сизда ўзи? Гап шу, агар қудук сизда қазиладиган бўлса, ўша кудукка ўт қўйиб юборганим бўлсин!

— Кудук ёнмайди, гарант! — Бегим оқсокол унинг нодонлигидан ранжиб, кудукнинг ёнмаслигини жонжади билан исбот этмоқка тиришади. — Чўпмидики, ёнса у. Ер-сувнинг ёнганини хеч кўрганмисан? Э, соколинг серкилламай, ўл!

Кечки ҳароратдан ҳансираётган замин ўз бағрида яширинган обиҳаёт илинжида, кишилардан кўмак истаб, уларнинг фазабдан бўғриккан юзларини майнин шабадаси ила сийпаламоққа тушди. Бироқ давра ахли хануз бир қарорга келолмай, шу қадар қутуриб бакиришмоқда эди-ки, шабада тугул, хурлиқонинг жон ато этувчи илик кафтиниям сезмайдиган даражада эдилар. Охир-оқибат, бу ҳил жазавадан бирор натижа чиқишига кўзи етмади шекилли, замин туйқусдан қаҳрланиб, сахро кўксини жизғанак килиб юрган қайноқ гармселини қишлоқ томон йўллади. Қайноқ ел болалар копток тепаётган майдонда қуюн ҳосил қилиб, ўтирганлар устига шиддатла ташланди-да, уларни бошдан-оёқ chanгга белаб ташлади. Бироқ давра ахли бунга парвоям қилишмади. Бегим оқсокол оғзига тўлган тупроқни туфлай-туфлай, тағин баҳсда давом этди. Маъруф чавандоз эса ўнг каватида ўтирган улфатини бўралатиб сўкарди. Хидир чол ортиқ даражада овозига зўр берганиданми, ё бўғзига чангтиқилдими, кўкарганча кув-кув йўталар, ориқ, чангак бармоқлари Эшна муаллимнинг енгига котиб қолганди. Эшна муаллим бўлса, унинг боши узра кимгадир ўшиқиаркан, ора-сира енгини тортиб-тортиб қўяр, аммо чол панжасини бўшатса, жони чиқиб кетадигандек, қўйворишини хаёлига ҳам келтирмасди.

Бандаларга чоғи етмаган қуюн аламидан ёлғиз толга ташланди. Уни силкиб, майиштириб, сўнгги япроклари ни юлқиб олди. Кейин Тўра полвоннинг девори ёқалаб бориб, болалар копток суроётган майдонни кесиб ўтди-да, чўл қўйнига сингиб кетди.

Абду чаққон қуюн изидан қараб коларкан, кўзи даштнинг узоқ буржида тиккайган қудук казувчиларнинг «вишқа»сига тушиб, тажангланиб қичкирди.

— Бориб нима дей? — деди ўша томонга ишора қилиб. — Бугун улар ишини битириб, эртан кетишади. Кейин түя сүйиб чакирсангизда келишмайди.

— Хонадон бошига қанчадан тушаркан? — деди охири кимдир хүшёргортиб.

Абду чаккон түловни айтганди, давра бирдан тинчланди. Газабдан буришган-тиришган чөхралар асил ҳолига қайтиб, бир-бирларига жонсарак бокишаркан, чоллар, сиз нима дейсиз, дея тағин Бегим оқсоқолга юзланишиди. Бирок Абду чаккон уни гапиртиргани қўймади.

— Кудукни мана шу ердан қаздирамиз, — деди ер тепиниб. — Бу ердан тўрт томонга сув бир текис оқади. Агар бир тўхтамга келмасангизлар, кудуксиз қоласизлар.

— Якинда тўйдан чиққан одаммиз, кўп эмасмикан? — деди Маъруф чавандоз нимдош кўйлаги ичига кўл сукиб, кўкрагини қирт-қирт каширкан.

— Тўйга этаклаб тўккандан кўра, бу ишга бир чимдим сарфласангиз нима бўити.

— Тўй энди... обрўй-да.

— Бу эса, ҳаёт! — Абду чакконнинг ғазаби қайнаб кетди. — Качонгача сувга ташна яшаймиз?! Ахир умр бўйи чангта коришиб яшаймиз деб қасам ичмаганмиз-ку.

— Майли, сен айтганча бўлақолсин. — Бегим оқсоқол илгариги обрўйини тиклаш умидида ён босишга мажбур бўлди. — Бориб, кишлоқ аҳли рози деявер. Айтган пулингни эртан эрталаб йифиб берамиз.

Бу орада пода кишлоққа яқинлашиб, ўтирганлар бирин-сирин оёққа қалқидилар. Сўнгра пода кетидан уй-уйларига тарқалдилар. Еrostи дарёси ҳақидаги хабар хонадонларга улар билан кириб борди...

Бу вактда Абду чаккон кудукчилар даврасида, ер қаъридан пишкириб чиқаётган сув бўйида, тўкин дастурхон атрофида ўтиради. Кўшни хўжалик раҳбари кудук шарофатига йигитларга куюқ зиёфат бермоқда эди.

Эртаси эрталаб Абду чаккон сайхонликка мотоциклини елдириб келганида, одамлар деярли йигилган. Бегим оқсоқол одатдаги жойида негадир хомуштоб ўтиради.

Абду чакқон унинг авзойига эътибор бермай, белидаги кизғиши чорсини ерга ёзаркан, чўнтағидан бир даста пул чикарди-да, уни чорси устига намойишкорона ташлади. Сўнг ўзи сал ортга чекиниб турди.

Маъруф чавандознинг ўнг қўли чўнтағига ёпишиб қолгандай, нимагадир чикиши жуда кийин бўлди. Охири бир ён қийшайиб, аста олға босди-да, ички бир зўрикиши билан кафтидаги пулни чорси устига итқитди. Кейин шалвираган қоматини тиклаб, теваракка мағрур бокди. Шу боқишида кетига тисарилиб, Абду чақконга бақамти келиб турди. Мақтов кутиб, йигитга бир-икки караб қўйди. Ундан олқиши эшишмагач, секин тўнғиллади: «Ун-пун олай деб танани сотувдим-а...»

Даврадан учинчи одам — Эшна муаллим имиллаб чиққанида, Бегим оқсоқол бирдан тилга кирди.

— Кечча уллар билан маслаҳатлашдим... — деди димоғли оҳангда. — Гап шу, қудук эшигим ёнидан қазилмас экан, бир тийин бериш йўқ. Ҳовлим дўнгсалда, бу ердан бир чаксаям сув ичолмайман.

— Қудукнинг менгаям кераги йўқ, — дея уни кувватлади Жалил бақирок, дўппайтан чўнтағини кафти билан паналаб. — Сен айтган ўша боғ-роғсиз ҳам қуни миз бинойидек ўтаяпти. Ана, бозор тўла мева, егим келса пулимга сотиб оламан.

Уларнинг тайсаллаши пул чиқаришга қийналаётганларга зўр баҳона бўлди. Сизларга керак эмас экан, бизга не даркор, дея тўрт-беш киши шу заҳотиёқ изига бурилиб кетди. Қолганлар эса, нима, сизнинг шоҳингиз борми, дея Бегим оқсоқолга тирғалишди. Бу энди кечаги самараисиз баҳснинг давоми эди.

Мамадали шофёр эса, одамларнинг айнишидан ўзида йўқ қувониб, юргуғилаб дўқондан икки шиша арок кўтариб чиқди. Шишани кўрган уч-тўрт улфат қудукни ҳам, баҳсни ҳам унутиб, девор соясига бориб ўтиришиди. Нортожи чол Бегим оқсоқолнинг қайсарагидан ўпкаланниб, ҳассасини дўқиллатганча кишлок сари йўналди. Унга қолганлар «дум» бўлди.

Абду чакқон, бир оёғи машина рамаси устида, ёлғиз ва маъюс туриб қолди. Аллақаердан пайдо бўлган енгил куюн унинг атрофини чир айланиб, чорсида қолган пулни чор-тарафга учирив, юзига тупроқ сочиб ўтди. Эрталабдан залтига ола бошлаган ҳавонинг қайнок ҳарорати-

ни у ўз вужудида хис этаркан, бўм-бўш кўчаларга, чанг-га беланган кулбаларга, дўкон эшиги ёнидаги қурий бошлаган толга, Мамадали шофёрнинг қувончига шерик бўлаётган улфатларнинг бўғриққан афтларига, пода йигиладиган майдонга бир-бир назар соларкан, кўзи узокда ортидан қуюқ чанг кўтариб бораётган машиналар карвонига тушди. Олдинда «вишка»ли машина чайқалиб борар, изидан қолганлари эргашганди. Кудукчилар йигитни субутсизга чиқариб, ўзга манзилга йўл тортган-дилар.

Йигит машиналар карвонига ҳасрат билан бокаркан, чанг-тўзонлар салтанатида минг йиллардан бери яшаб келаётгандек ва ҳадемай жисми ўша тўзонга қоришиб, қўзга чалинмас зарралардан бирига айланиб кетадигандек хис этди ўзини.

Эрталабки сукунатни эса улфатларнинг шовқинигина бузар, уларнинг бу қадар қувонишининг боиси шунда эдики, Мамадали шофёр ҳар бирининг ҳовузига текинга сув қўйиб беришга ваъда берганди.

## ҚИЗЧА

Ёмғир шивалаб турган куз оқшомларидан бирида бир энлик қалин тахтадан пишик-пухта курилган итнинг мўъжазгина ини қизалоққа жуда файзли кўриниб кетди. Ҳовлида муздек ёмғир остида дийдираганча, ичкаридан эшитилаётган шовқин-суронга кўркув ила қулоқ тутаркан, ички бир шуур етовида инга яқинлашганини билмай қолди. Ит емак умидида индан бошини чиқарди. Тумшук ялаб, фингшинди. Қизчанинг қўли бўшлигини пайқагач, ин оғзидағи халқобни ҳидлаб, бот фингшиди.

Шу пайт эшик шарақлаб очилди-да, ичкаридан улоқтирилган пиёла ҳовли юзига тушиб, чил-чил бўлди. Жонивор кўрқиб, бошини ичкарига олди. Қизалоқ бе-ихтиёр инга талпинди. Илондай биланглаб, итнинг қаватига кирди. Кутимаган бу ташрифдан ит аввалига хайрон бўлди. Сўнг бир ён четланди. Кейин «мехмон» кутишга одатланмагани боис, ташқарига интилди. Халқобни кечиб, нарига ўтди-да, изиги қайрилди. Бошини бир ён қийшайтириб, ичкарига ажабсиниб назар солди. Қизалоқни яхши кўрса-да, тўсатдан инига эга

чикиб қолишидан ҳайратда эди. Ҳайратини ғингшиш орқали ифода этаркан, негадир яна халқобни исқаб кўйди. Сўнг бўйнидаги занжир стар масофага бориб чўнкайди. Бўятларга, коронги тунд осмонга, ёруғ тушиб турган деразаларга бир-бир назар соларкан, ёмғирга тоқат қилолмай, тағин изига қайтди. Олдинги бир оёғи халқоб четида, иккинчиси эса сал кўтарилган бўйича ичкарига мўралади. Ингирашнома овоз чиқарди. Киздан жавоб бўлмагач, эгаси ҳайдаган итдай, халқобдан нарида мўнғайланча туриб қолди.

Кизалоқ бурчакка сурилиб, намиққан намат устида гужанак бўлиб ўтиаркан, бутун фикри-зикри ичкарида эди. Овозларнинг паст-баландлигига қараб, уйдаги жараённи ҳис этиб турарди. Агар овоз шу тарзда сокинлашаверса, ҳадемай жанжал ниҳоясига етади. Отаси катта уйдаги каравотга ўзини гуппа ташлаб, уйни қалдиратганча хуррак отмокқа тушади. Катта уй совук, унда ўт ёқилмайди. Отасининг устига кўрпа ташлаш онасининг хаёлига келмайди. Бу юмушни қизча адо этади. Эрталаб ота уйғонаркан, буни онасининг иши деб ўйлади. Гамхўрлигидан меҳри ийиб, шишинки афтига хижолат инади. Оёқларини полга осилтирганча, бир нуктага тикилиб, хийла вакт ҳаёлга ботиб ўтиради. Бу пайтда қизалоқ ё дераза тагида, ё бурчакдаги жавон ёнида турган бўлади.

Ниҳоят, отаси уни пайқайди. Хира кўзлари йилтилаб, хирқироқ овозда сўрайди: «Устимни ким ёпди?» Кизча ёлғонлайди: «Онам». Илгарилари мақтov эшитиш умидида, мен, дерди. Отаси унга миннатдор қараб кўйса-да, қовоғи осилиб кетарди. Айвонга чиқа-чиқа, қизингча бўмабсан-да, дерди. Агар онаси терс ганирса, тамом — уйда жанжал қайта кўпарди. Аммо, онам, деса, отасининг кўзлари бошқача ёнади. Кўрпани оҳиста бир четга суриб, қизчага кўпда әътибор бермай, ташқарига йўналади. Остонада гуноҳкорона йўталади. Айвонда укасини овқатлантираётган онасининг қовоғи осилади. Қизча эса онасининг жилмайшини, жилмаймаса-да, шунга ўхшаш бирор ҳаракат қилишини жуда жуда истайди. Агар шундай қилса, отаси укасининг иягини қитиқлаган бўлиб, онасининг елкасига қўл юборади. Уйда тинчлик қайта қарор топади. Афсус, онаси кўп ҳолларда бундай қилмайди. Қовоқ осиб, кош чимиради.

Кошик тутган күли зардали ҳаракатланади. Сулх истаб турган отағишиниң нари кетади.

Ота ташқаридан қайтиб кирганида, қизалоқ энди ошхонада каттакон чинни чойнакка ғамгин термилиб турган бўлади. Чойнакни кўтаришга чори келмаслигидан ўкинади. Негаки, кейинги воқеалар мана шу чойнакка боғлик. Онаси чойнакка чой дамлаб, отасининг олдига дўқ этиб кўяди. Бу нарса отасига ёқмай, секинрек, дейди. Онасининг тўнғиллаши унивидан-да зардалироқ бўлади. Оқибатда... Қизалоқнинг юраги сиқилиб, ховлига тушади. Офтобрўяда чирқиллашиб юрган чумчукларга кўшилиб, узок-узокларга учиб кеттиси келади. Узок-узокларга деганда, қизалоқ ховли адогидаги дарахтзор ортини тушунади. Негаки, чумчуклар доим ўша томонга парвоз қилиб, кўм-кўк осмон қўйнига сингиб кетади-да. Қизик, у томонда нималар бор экан? Қизнинг тасаввурода жонланиши лозим бўлган афсонавий манзара ниҳоясига етмай, жанжал тугайди, у яна ва яна чалғииди. Энди унинг тезрок үлғайиси, отасига чойни ўзи дамлаб бергиси ва шунинг баробарида холасининг боплаб адабини бериб қўйиси келади.

Холаси тутаётган ўтни пуфлаб ёндиришга жуда уста хотин. Келасолиб гапни шикоятдан бошлайди. Кеча тунда қаери оғригани-ю, қандай дорилар ичганини гапира туриб, бирдан фийбатга тушиб кетади. Холасининг гапларини тингларкан, қиёзчанинг назаридан ховлисидан ташқаридан ёмон олам, ёмон одамларгина мавжуддек туюлади. Кичкина юракчаси сирқираб, дунё кўзига қоронғи тортади. Кўрпача устида ўзича қийкириб ётган укасига номаълум кучлар тажовуз қилиб коладигандек, у томон силжийди. Аста устига эгилиб, уни бағрига тортмоқка уринади. Укаси қикирлаб, унинг соchlарига ёпишади. Қизча укаси билан андармон бўлиб, гуссаниям, ўша номаълум хавфниям унутади. Олам кўзига ча-роғон тортиб, холасининг гаплари кўнглида ортиқ кўркинч туғдирмай қўяди. Қалин лаблардан тинимсиз сачраётган тупук зарраларини қўради-ю, гапларни эшитмайди.

— Тек ўтир! Ҳий-й, отангга ўхшамай ўл!

У бу гапдан чўчиб тушади. Ўгирилиб қарайди. Опасингилларнинг овози бир-бирига ўхшашлигидан, уларнинг қай бири ўшқирганини билолмай, гоҳ унисига, гоҳ

бунисига жавдиаркан, одобли қиз бўлишга тиришади. Этагини тўғрилаб, қўлларини ўнг тиззаси устига кўйиб ўтиради. Бу хилда ўтириш қизча учун жони азоб. Унга колса, укасини қитиқлаб ўйнаса, кўрпача устида ўмбалоқ ошса. Аммо холанинг ташрифи туфайли юзага келган уйдаги асабий холат бунга изн бермайди. Қизча ионлож девордаги буюмларга алаҳсийди. Бирор муддатдан сўнг, у тикилган буюм қатидан отасининг иштонсиз холати қалкиб чикади-да, қизча ҳайратланиб аёлларга қарайди.

— Сенга уйлангунча кийишга тузукроқ иштониям йўқ бир гадойвачча эди-да у, — дея ўша-ўша шанғи овозда гапда давом этарди хола. — Энди баданига жир битиб, одамни писанд килмай кўйди. Таги паст-да. Таги паст бўлмаса, яхшиликларимни унутармиди. Ҳали шошмай турсин, захарли зулуклигимни кўрсатиб қўяман мен унга! Таги паст иштонсиз! Тунов куни почангта, худојимнинг ёруғ кунига шукур килмайдиган ношукур бандасилар, деганмиш. Ана, поччанг турдиллатиб иморат устига иморат соляпти. У киши теша тутиб нима каромат кўрсатаяпти? Тагин уста эмиш. Каттиқроқ тургин у ярамасга. Жиловини бўш қўйсанг, нималарни истамайди у кишим... Иштонсиз!

Кизалоқ отасининг иштонсиз холатини тўла тасаввур этишга улгурмай, холаси унинг шаънига шундай бир сифатларни қалаштириб ташлайдики, оқибатда, қизчанинг мурғак тасаввур дунёси зиркираб, кўз ўнгидаги отаси маймундан хунук, илондай захарли бир қиёфа касб этади. У секин ҳовлига қочиб чиқади. Ини ёнида сокин мудраб ётган итга ҳаваси келиб қарайди. Унга айтиб, холасини тишлатмоқ истайди. Ит унинг аврашларига гўё қулок тутгандай бўлади-ю, аммо тугун тутган хола эшикдан чиқиши билан инига уриб кетади. Қизчанинг алами келиб, унинг тумшуғига тепади: «Э, ўл, кўрқоқ!»

Холаси тезда кета қолмайди. Ичкарида тугамаган гурунг итнинг ини ёнида давом этади. Бу хол дарвоза олдидаги тагин такрорланади.

Шундай пайтлар қизча ит бўлиб туғилмаганидан ўкиниб кетади. Агар эврилишга чоғи келганидами, холасининг тирсиллаган семиз қўймичидан тишлаб-тортқилаб, уни ҳовлига кайта доритмай кўярди. У ити ёнида қолиб, дарвоза олдидаги ҳануз лаби-лабига тегмай

бидирлаётган холасига адоватла боқаркан, негадир кўзи унинг семиз қўймичинигина кўради. Нафсиlamрини айтганда, ундан тепароққа бўйи ҳам етмасди.

Ин деворига орқасини тираб, намиккан наматда жунжикиб ўтирган қизалок ичкаридаги овознинг кучайишидан жанжал ҳали-бери тугамаслигини фаҳмлади. Қоронғида ёлғиз ўтиргиси келмай итни ёнига чакирди. Аммо шусиз ҳам тор уйчасини баттар танг килган «мехмон»-нинг кутилмаган ташрифидан хануз ажабланиб турган жонивор хушсизгина ғингшиб кўя қолди. Кейин ҳалқобдан нарида ноилож чўнқайди.

Аслида ит ҳам қизалок каби безовта эди. Ёруғ деразалар ортидан келаётган шовқин яхшиликдан дарак бермаслигини сезиб, жанжал кучайганда, кулоқ чимириб, чўзик ва дардчил оҳангда ғингшир, овоз пасайиши билан эса тинчланиб, деразаларга умидвор тикилар, емак илинжида тумшуғини ялаб-юлқарди. Унинг бу ҳолати шовқининг янги тўлқинигача давом этар ва орада уйчаси томон қараб-қараб кўйишни ҳам унутмасди.

Кизча узалиб, итнинг занжиридан тутди. Аммо хирсадай жонивор қилт этмади. Қизалок ўзича ўпқаланиб, занжирини итқитди-да, кафтларини ёнига суртди. Сўнг жойига сурилиб, тиззаларини қучиб ўтирапкан, тагин жанжалга жонсарак кулоқ тутди. Жанжалнинг боришига қараб, ичкаридаги манзарани тасаввур этди. Чамаси, отаси катта хона эшигига етолмай, ўртада ғўддайиб туриб қолган. Кетишига онасининг тинимсиз жавраши монелик кильмоқда. Онаси атиги бир зумга чакагини ўчирса бўлди, отаси катта хонага киришга улгуради. Шу билан жанжал ҳам якун топиб, онаси қолган аламини қозон-товоғидан олади.

Афсус, онаси тинчишни хаёлига ҳам келтирмасди. Дам-бадам, нега ичасиз, деб чинқиради-да, аммо сўровига жавоб ҳам кутмай жаврашда давом этарди. Аслини олганда, жанжалга отасининг ичиши сабаб эмас, одатдагидек, шунчаки бир баҳона у. Бу галги машмашага онасининг «туғилган кун»и туртки бўлганди. Ўша куни эр аёлига дурустрок совға килиш у ёқда турсин, туғилган кунни буткул унутиб, уйга ярим тунда кайтади. Бу хил тадбирга айрича эътибор берадиган она ўзини жуда хўрланган ҳис этади. Хола эса бунга таҳқир тусини беради: «Нима бало, ердан чиқсанмисан, тузукрок совға-

гаям арзитмабди сени». Ота учун «туғилған күн»лар ахамиятсиз нарса әди. Бироқ бу хил йиғинларни кутиб яшайдиган, тирикликининг мазмунини мана шу каби ма-росимлардагина құрадиган опа-сингилнинг құнглида из-затталаблик жүш уриб, учқун алансага айланади. Ана шундан буён отанинг жойи яна бўлак. Аммо она бунга-ям чидамайди: «Афтини кўрсам, елкам тиришади. Эр нималигиниям эсимдан чиқариб қўйдим...» Шусиз ҳам куёвини жинидан ёмон қўрадиган опанинг афти бужмаяди: «Уф-ф, қипик ҳиди анкиб турган шу сассик така-нинг нимасини кўмсайсан? Қўявер, бир тавбасига таян-син. Фуддайишни ким қўйибди унга. Агар отам ёнига кирмаганда, юарди чоллеворида. Асли булар уруғи билан пасть, яхшиликни билмайди».

Ушбу гаплар орасидан биргина иборани илғаб қол-ган қизалоқ отасидан хафа бўлиб кетади. Назарида, ота-си онасини биргина кучиши билан кундалик жанжал ту-гайдигандек туюлади. Отасининг тиззаларига суйкалиб, онамни кучокланг, дегиси келади. Лекин ийманади. Тунлари отаси ўрнига ўзи онасини кучмоққа интилади. Бундай вактда онаси уни ё кучоғига тортади, ё тинч ёт, деб жеркиб беради.

Қизалоқ ичкаридаги жанжалнинг тинчишини бехуда кутаркан, қовоклари оғирлашиб, бошини деворга сужди. Киприклари чаплашишга улгурмай, бирдан ёмғир ку-чайиб, у чўчиб тушди. Уйча томини беаёв савалаётган ёмғир овозига бирпас қулоқ тутиб, ташкарига қўз солди. Дераза ёруғи тушиб турган халқоб юзи қайнар, ит эса занжирини судраб, шингиллаганча нари-бери бориб ке-ларди. Охири бўлмади шекилли, жонивор инга бош сукди. Унинг қайноқ нафасини нақ юзида ҳис қилган қизалоқ итнинг бўйинбоғидан тутиб, ичкарига тортди. Шусиз ҳам бошқа иложи колмаган жонивор унинг қава-тига сукилди. Хўрак истаб, қизчанинг қўлларини ялади. Сўнг силкиниб, уни бошдан-оёқ шалоббо қилди.

Ит қаватига киргач, анчагина хотиржамланган қиза-лоқ жанжал овозига ортиқ эътибор бермай қўйди. Энди у итнинг пинжига кириб, исинмокни ўйларди. Аммо унинг максадини тушунмаган ва умрида бу хил юмушни адо этмаган жониворнинг жойланиши кийин бўлди. Фимиirlайвериб, қизчанинг жонига тегиб кетди. Охири, бир амаллаб чўзилгач, қизчанинг эркига қўйиб берди.

Ит улкан эди, кизалоқ унинг пинжига бемалол жойлаши. Бощда одам боласининг бу қилиғи итга эриш туюлиб, бу нимаси, дегандек инграшиб ғингшиди. Сўнг бандасининг ўзидан паноҳ исташи ёқиб тушди шекилли, шингиллашни бас қилди, хатто қизчанинг муздек ёноқларини бир-икки ялаб ҳам кўйди. Худди қизча билан умр бўйи бир катакда яшаб келаётгандек, тезда унга кўнишиб ҳам қолди. Ташқарида эса тинимсиз ёмғир кўярди.

Үйдаги жанжал анча кеч тугади. Бу пайтда ёмғир тиниб, ҳовли сахнида лайдо бўлган катта ҳалқоб юзида сўнгти томчилар доирачалар ясар, нам ҳавода тутун иси анкирди. Қизча эса жанжал босилганидан бехабар, итнинг пинжига ширин тушлар кўриб ётарди. Жонивор бўлса, қимирлашдан ҳайиқиб, кизалоқнинг юзидан кўз узмаган кўйи, дам-бадам унинг юзи ва қўлинин астагина ялаб-ялаб кўярди.

Үйдагилар қизчанинг йўқлигини хийла кеч пайқашди. Жанжал бошланиши билан секин жилиб қолишидан бохабар она аввал уни хоналардан кидирди. Сўнг ҳовлига ошиқди. Қизча ҳеч қаерда йўк эди. У ҳовлиқиб эрининг бошига борди. Энди кўзи илинай деб турган эр унинг хабаридан учиб турди. Ёв қувгандай хоналарга бир-бир бош сукиб чиқди. Кейин ҳовлига тушди-да, шалп-шулп ҳалқоб кечиб, омборхона томонга чопди. Қайтаётиб, итнинг ини ёнида каловланиб турган аёлига дуч келди. Энди у ўн дақиқа бурунги жizzаки ва урушқоқ аёлга сира ўхшамас, тўсатдан бошига тушган бу фалокатдан факат эри фориғ эта оладигандек, умид кўзи билан жавдиради. Аслида, кимнинг қанақалиги бахтсизликнинг алдамчи шабадасиданоқ аён бўлади деганларидек, аёл бутунлай саросимада қолган, тўқлик ва нодонликнинг нуқси урмиш кўзларидаги кибрҳаво ўрнини бандасининг ожизона талвасаси эгаллаган, нафаси бўғзига тикилиб, нукул икки гапни такрорларди.

— Энди нима килдик, а? Қаерда бўлиши мумкин, а?

Эр довдирааб кўчага югурди. Ҳадемай тун суқунатини дарвозаларга урилаётган мушт зарбининг тарақ-турики тилкалай бошлади.

Қизча ҳеч қаерда йўк эди. Ҳовли қўни-қўшнига тўлди. Кимдир ҳалқобда ялангоёқ қилтиллаб турган

онанинг кавушини олиб келиб берди. Бошқа бирор отанинг елкасига түнини ташлади.

Бу вақтда тор инда ўзи истаган осойишталиктин топған қизалок тұполондан бекарар тинчгина ухлаб ётарди. Фақат иттина безовта эди. Қизалоқни бағридан тортиб олишларини пайқаб, нотинчланса-да, лекин уни құзғаб юборищдан чүчиб, кимирламасликка уринарди. У ғужанак бүлиб ётган қизалоқнинг муздек ёноғини иссик тили билан охиста яларкан, инга қизиқсинаи мұралаган кимсанинг шарласини сезиб, ғазабкор ириллади. Бирок кимса қызчани илғашга улгурғанди.

— Эя, мана бу ерда экан!

Турғанлар ин томонга ёпирилишди. Ит тағин ириллади. Қимдир унинг занжиридан тортди. Жонивор ноилож ташқарига сирғалиб чиқаркан, ғазаби тошиб, одамларға ташланди. Аммо әгасининг тепкисига бардош беролмай, ғингшиғанча ин ёнбошига чекинди. Шовқиндан уйғониб кетган қизалоқ индан ўрмалаб чиқди-да, шуурсиз бир ҳолатда бориб, итнинг бүйнідан қучишига уринди.

Қызчани итдан ажратиб, уйға олиб киришди. Тұнғиб қолған оёқ-құлларини ишқалай бошлашди. Қизалоқ гох тепасидаги одамларға, гох баланд шифттә жавдирағ бөқаркан, беихтиёр хархаша қыммоққа түшди.

— Итимга кетаман! Итимга...

Куракдек кафтлари билан қизалоқнинг оғини үқалаётган ота бу гапдан бир қалқиб түшди. Үйдагиларнинг узлуксиз ғашаваси туфайли кераксиз бир буюмдек назардан четда қолған қизалоқнинг тирик вужудлигини, дилгирликдан ўзи каби беҳад азоб тортишини, ўзи ҳавас ва иштиек билан барпо этган күркем уйидан күра итнинг торгина иинин маъқул күриши бориб турған фожия эканини фавқулодда англаған, беихтиёр сал наридаги хотинига құз қирини ташлади. Аёли тамомила асил ҳолига қайтишга улгурған, бояғи ташвиш туфайли аллақаेрга изсиз іўқолған кибр-ҳаво, тажанглик қўзлағига қайта иниб, «юрагим чикиб кетди-я, юрагим», дея қўшни хотинга гап маъқуллаш билан овора эди.

Ота қўзларини қызчага тикаркан, унинг бу дилгир шароитда яшашга маҳкумлигидан ичи ачишиб кетди. Бу мұхитни тузатмокқа ўзини ожиз сезаркан, гохи пайтлари кипиқ ва тахта бўлакларига тўла ишхонаси қўзига

файзли күриниб, уйга қайтмоқни мутлақо истамай қолған вақтлари күп бўлишилигини эслаб, бошини гунохкорона эгди.

Ташқариде эса, ит занжирини нари-бери судраб, аламли фингширкан, салдан сўнг унинг шингиллаши кисқа-қисқа акиллашга айланганди. Ота ўйлагандек, у очликдан эмас, бутунлай ўзга бир туйғудан безовта эди.

## ЭНАТЕПА

Узоқдан тепалик кўринганда, Шодиқул ҳаяжондан қалтираб кетди. Йўл халтасини ерга ташлаб, ўнг кафти манглайида, тепалик томон тикилиб қолди. Хаттоки тепаликка ўрлаган таниш ва қадрдон сўқмоқният кўргандай бўлди. Бу тасаввурида эди. Йигит турган ердан тепаликнинг тарҳигина кўзга ташланар, у олисдаги сиёҳранг уфқнинг гардишига синтиб, сўник бир манзара касб этгандики, бунда юракнинг энтишишига сабаб бўлмиш ҳеч нарса йўқ эди. Аммо бу манзара Шодиқулга ўзга бир йўсинда таъсир этиб, бамисоли зимистон тунда ёлқинланган шуъладек уни ўзига чорламокда эди.

Йигит шу кетишда аввало тепалик пойида ястанган қишлоққа кириб бормоги, неча йилдирки кўрмаган хешлари билан дийдорлашмоғи лозим эди. Бироқ у сира ошиқай демас, ошикканда, катта йўл қолиб, буғдойпоя оралаб юрмаган, қишлоққа оқшомлатиб кириб бормоқни ўйламаган бўларди.

Шодиқул табиатан ҳийла одамови, боз устига, ҳарбий хизматдан эмас, қамоқдан қайтмоқда. Шу боис, ҳамқишлоқларига дабдурустдан рўбарў бўлмоққа унча хоҳиши йўқ эди.

У уфққа оккан қуёш нуридан зарғалдок тусга кирган буғдойпоя оралаб бораркан, хар гал тепаликка кўзи тушганида, ички бир ҳаяжондан энтикиб-энтикиб кўяр, ўтган саодатли кунларининг тимсоли бўлмиш тепаликка етиш онларини атай чўзарди. Унинг бу характеристи бўйнига тавқилаънат сифатида осилган бир неча йиллик муддатни кун санаб ўтказган одамниги сира ўхшамасди. Ахир озодликка чиқкан куниёқ ёлғизоёқ сўқмоқдан тепаликка кўтарилимоқни ва ери кучмоқни орзу қилмаганиди? Бу истак ғалатироқ туюлса-да, унда юрт

соғинчи, сирли ўтмиш ёди мужассам эди. Кўнгилли ва кўнгилсиз хотиralар илдизи тепаликка шу қадар чирмашиб кетгандики, ҳар гал тепаликни эслаганида, қалбида англарсиз бир туғён жўш урар ва ўша туғён гирдобидан ҳокисоргина бир йигитнинг сиймоси аста қалкиб чиқарди. Бу йигит ҳашоратларнинг чир-чирига тўла ойдин тунларни тепаликда ўтказмоқни хуш кўради.

Тўлин ой нуридан сирли ва фусункор тус оладиган борлиқ хамиша йигитни шу қадар ҳаяжонга солардики, тоҳида телбаларча ҳайқиргиси, ҳайкирганда ҳам дала-даштни тўлдирап даражада бакиргиси келарди. Кумушранг ой нури унга ғалати таъсири этиб, ичида димланиб ётган туйфуларини жунбишга келтирап ва оқибатда, ҳар сафар юраги қатида ёввойи бир жазавани хис этарди. Бироқ жазава қанчалик бетизгин бўлмасин, барибир у ҳайқирмасди. Сехрли бу сукунатни эрта оқшомданок уй-уиларига тикилиб оладиган ҳамқишлоқларидан кизғанарди. Уларнинг ғимирлаб қолишидан ҳадикланарди. Ойдин тунлари ёнида ўзга бир кимсаннинг бўлишини истамасди.

Аммо бир кеч у бу таомилни бузди. Тепаликка ёлғиз кўтарилемади. Кутимаганда сўқмоқ бошида қизнинг жохил акасига дуч келди. Ака ўларча бадфеъл эди. Қизни бир ён улоктириб, кутурган букадай йигитга ташланди. Йигит ўзида зигирча гуноҳ хис этмас, бирдан-бир айби – ўзини кутқуга солгувчи сирли манзарани суйганига кўрсатмоқчи эди, холос. Бироқ буни шу тобда нодон акага англатиб бўлармиди. Йигит унинг қўлидаги совук йилтиллаган тифни жуда кеч пайқади. Пайқаши биробар жонҳолатда унинг яроғ тутган қўлига ёпишди. Қисқагина талатўпнинг натижаси ўлароқ aka ўз яроғидан ўзи яраланди. Шодиёр эса озодликдан мөсуво бўлди.

Худди шу қундан эътиборан унинг орзулари ҳам банди қилинган, рухи эса кишанланганди. Ой нурига йўғрилган сўқмоқнинг нариги бошини у келажакнинг сирли туманлари оғушида кўради. Туман қаърига синггани сайин, у ўз бағрини оча боргандек, келажак йигит учун сир-синоатга тўладек эди. Аммо ҳеч кутимаганда у «орзу сўқмоғи»дан юлкуб олиниб, тиканли симлар ортига, рухсиз олам гирдобига улоктирилди. Бу ерда орзу ўта жўндеқ, меҳрнинг кўзи қаттиқ, жаҳолатнинг қўли узун эди. Бунда дил эркалатилмас, сирли тасавурлар

бўлса жуда кулгили туюларди. Ўшанда Шодиёр тепаликка боғлиқ ўтган кунлари накадар осудалигини, тепалик одамзодга хос турли кусурлару гумроҳликдан холи масканлигини илк бора чукур ҳис этганди. Тепаликдан бошланиши лозим бўлган «келажакнинг сирли сўклиғи» руҳсиз дунёнинг метин деворига бориб урилгач эса, унинг орзулари жўнгина мақсадга эврилди: «Кутулиб чиқсан, — дея ният қилди у, — тепа боврига бир иморат соламанда, қолган умримни ўша ерда тинчгина ўтказман...»

Эрксизлик унинг қалбida дала-даштта нисбатан қаттиқ меҳр уйғотгандек, тепаликни муқаддас бир гўшага айлантириди. Ойдин тунларни у тушларида кўриб чиқадиган бўлди. Озодликка етишиш учун гоҳо хўрликларга чидаш берди. Мана энди юраги ҳаприкканча тепалик томон бормоқда.

Шодикул азбаройи хаяжонланганидан беихтиёр қадамини теззлатганини анча кеч пайқади. Бу кетища куёш ботмай қишлоққа етиши тайин эди. Аввал тепаликда бўлиб, кейин одамлар кўзига кўринмоқчи эди.

У оёғи остидаги каттакон кесакка чўкиб, сигарет тутатди. Тутун пуфлаб тепалик томонга соғинч билан тикилди. Тикилди-ю, бирдан «Э!» деб юборди. Кейин сакраб ўриидан турди. Кўзларига ишонмади: «Бўлиши мумкин эмас!» Кўлига халтасини ола солиб, жадал йўлга тушди. Қишлоққа яқинлашган сари тепаликнинг кемтик қисми тобора яққолрок намоён бўла борди. Ҳақиқатда, тепаликнинг кунботиш томони гўё ўпирилиб тушгандай йўқ эди.

Қишлоққа етгач, тепаликнинг ўша қисмida чанг буруқсиётганини пайқади. Тепалик томон чўзилган тупрок йўл қишлоқ ёқалаб ўтарди. У девор бошларидан мўравлаб турган хотин-халажларни ҳайрон қолдириб, оёғини кўлига олди. Унинг бу ҳолати ота ёки онасининг азасига кечиккан бандасиникига жуда ўхшаб кетарди.

Шодикул қишлоқдан узилиб, очик майдонга чиқаркан, даҳшатли манзара кошида тахтадай котиб қолди. Не кўз билан кўрсинки, чангга ботган чоғроққина бир экскаватор тепалик бағрини ўпирив, кавушидаги сарғиштоб тупрокни қатор турган ағдарма машиналарга юкларди. Берироқда бир тўп ҳамкишлоқлари томошабин бўлиб туришарди. Пода қайтгунча эрмак-да.

Экскаватор тепаликнингини эмас, тепаликка кўшиб унинг соғинчи-ю орзусини, осуда кунлари-ю ойдин тунлар хотирасини хам ўпирмокда, янчмокда эди.

У жонқолатда беихтиёр бўкириб юборди.

— Тўхта-а!

Кейин кўлидаги халтасини бир четга улоқтириб, олға югурди. Томошаталаб ҳамқишлоқлари даврасини ёриб ўтиб, экскаватор хартуми тагида пайдо бўлди.

— Тўхта, ярамас!

Хайқириғи мотор шовқини остига кўмилиб кетган бўлса-да, важохатидан машина эгаси не гаплигини тушунди ва ошигич ишни тўхтатди. Кабинадан бошини чиқарди.

— Нима дейсан?

Бунга жавобан Шодиқул кабина зинасига сакраб чиқди-да, унинг ёқасидан тутди. Пастга тортқилади. Иккиси юмшоқ тупроқ устига думалаб тушиши.

Нима қип кўйдинг, зангар! — Шодиқул гуваладек мушти билан унинг тўзон ўтирган баркашдек афтига боплаб тушириди. — Тевани обсан-ку лаънати!

Одамлар орага тушганча экскаваторчи — кўшини қишлоқлик Барот семиз каторасига бир неча мушт еб олди. Мўмингина бу одамнинг ўзини ҳимоя қила билмаслигиям, ерда аянчли ҳолатда типирчилаб ётишиям Шодиқулни тўхтатолмади. Кишилар аралашмаганида, алам ва жаҳл устида бечорани бир ёқлик қилиб қўйиши хам хеч гап эмасди.

— Кўйворинглар! — дея ҳануз жазавага тушиб кичкирарди у. — Кўлини синдираман мен уни! Тевани тагига бостираман! Ўлдираман!

Барот семиз базур ўрнидан кўзгаларкан, лунжини сурган кафтида конни кўриб, хўрлиги келди. Йиғлаб юборди.

— Менда нима айб? — деди сўнг ўзини ёлгиз, яккаланган хис этиб. — Простой бир рабочий бўсам, ким нима буюрса шуни қиласманда.

— Ким буюрди? — Шодиқул олдинга юлқинди. — Қайси ярамас буюрди сенга?

— Раис.

Шодиқул раиснинг ети пуштини колдирмай чангитиб сўкаркан, тепаликнинг ўпирилган кисмига ҳар гал кўзи тушганида, томоғига нимадир келиб тақалар ва охир-оқибат, бу нарса йиги бўлиб ташқарига отилди.

Икки бирдай кап-катта эркак, бири мұқадdas нарса-  
сидан айрилганидан, бири эса хүрланганидан йиғларди.  
Одамлар лол, нима деб юпатишни ҳеч ким билмасди..

— Ахир буни мен неча йиллаб соғынды! — деди  
Шодиқул ёнокларини юваётган қув ёшлардан заррача  
хижолат тортмай. — Ебсан-ку тевани! Бүғизлабсан-ку!  
Нега керак бўлиб колди бу силарга, а?

Барот семиз эса ўз дардида ўртанаради.

— Яккаладинг-га, — дерди шўлқиллаб. — Яккалаб  
урдинг-га мени. Энди бу бет билан қайтиб уйга бора-  
ман, бола-чақанинг кўзига қандай кўринаман.

— Бу кунни неча йил илҳақ кутдим-а! — Шодиқул  
тепаликка термулиб, кўксини тирнарди. — Келасолиб  
тевани тавоб қилмоқчи эдим. Сен эса ебсан буни! Туп-  
роғини қайтиб жойига тўк! Йўқса, ўлигинг чиқади бу  
ердан!

— Тупроғини энди Каттаўрдан топасан. — Барот се-  
миз кафтига юқсан қонни тиззасига сурта-сурта ҳануз  
хиққилларди. — Раис кесин айтаман. Яккалади дейман,  
урди дейман.

— Уришам гапми, ўлдираман мен сени!

— Кучинг кўп экан, ана, раисни ур. Нега мени ура-  
сан?

Охири бу дийдиё Бозор оқсоқолнинг жонига тегди.  
Бас, дея овозини баландлатди.

Шодиқул ҳушёр тортди. Хатти-харакатларининг ни-  
хоятда аҳмоқоналигини фаҳмлади. Алининг ўчини Ва-  
лидан олаётганини англаб, оқсоқолга юзланиб деди:

— Тевани нима қип қўйдингиз, амаки?

— Аввал қўришмайсанми, нодон, — Бозор оқсоқол  
кўлинин чўзди.

Шодиқул унинг узатилган кўлинин олмади. Саволига  
жавоб кутиб, чақчайиб тураверди.

— Колхузди катталари шуни истабди, биз нимаям  
дердик, — деди Бозор оқсоқол оғриниб. — Айтишга  
айтдик, лекин гапимизга кўнишмади-да.

— Тевани йўқотиш нимага керак бўп колди?

— Ерга қўшишармиш.

— Ерга? — Шодиқул кенг даштга ҳайрат ила нигоҳ  
ташлади. — Шунча ер каммиди, тевага кўз тикишмаса.

— Бу гапингни бориб раисга айт, — деди даврадан  
кимдир тўнғиллаб.

— Нима, сизлар ўтгайми? — Шодиқул одамларга тўла юзланди. — Ахир бу тева энамиздек эди-ку. Баримиз шунинг устида ўйнаб-ўсганмиз... Энани бурдалатиб қараб ўтиравердиларингми?

Қарашлар лоқайд, турганларни тепанинг тақдиридан кўра, йигитнинг афт-ангори кўпроқ кизиктиради. Бечора қаримсик тортиб қолиби, у ёқда роса таъзирини еганга ўхшайди, деган ўй деярли барининг бошида ўйнарди. Буни сезган Шодиқулнинг энсаси котиб, тағин Барот семиз томонга ўгирилди.

— Сен котил! — деди бармоғини бигиз килиб. — Тева... Энатеванинг котили сен!

Барот семиз бу гапдан довдираб қолди. Ранги кув оқариб, чанг қўнган киприклари пириллаб, нималир деб эътиroz билдириди. Шодиқул эса чир айланиб, яна одамларга бетланди.

— Сизлар ҳам котил!

— Худога шукр, сенга ўхшаб ҳали ҳеч кимни чаvakлаганимизча йўқ, — деди кимдир бу гапни оғир олиб.

— У ёқни шўрвасини тотиганман деб, кўпам тилингга эрк бераверма, — дея уни кувватлади яна бирори.

— Теваям эна бўларканми, — деди унинг яккаланаштанидан ботирланган Барот семиз истеҳзоли оҳангда. — Қачондан бери энанг бўп қолди бу?

— Оёклаганимдан бери! — Шодиқул қичқириб юборди. — Сен семиз буни қаердан ҳам тушунардинг! Яхшиси, йўқол кўзимдан! Йўқса, нақ каллангни узиб ташлайман!

Барот семиз ортига тисарилаётib, кети билан ерга ўтириб қолди. Шодиқул фазаб тўла нигохини ундан узиб, тағин турганларга юзланди.

— Бошқа ерларда тулкининг уясини бузиш учун ҳам халқнинг фикри сўралади, — деди қачонлардир ўқиган бир мақола эсига тушиб. — Сизлар эса бутун бошли бир тевани бўғизлатиб ўтирибсизлар!

— Кишлоқ кенгаяяпти, Шодиқулвой, — деди Бозор оқсоқол оғир бўлишга тиришиб. — Ҳаммага жой керак. Бундай пайтда тева-пева деб ўтирадими. Масалан, менга теванинг ҳеч кераги йўқ. Текис ерда зўрға юраман, тева-га чикиш йўл бўлсин менга.

— Тева дегунча уйингга бор, — леди Бердикул де-  
гандари оғзидаги носини туфлаб. — Энанг йўлингта кўз  
тикиб ўтирибди.

Даврада фудранишга ўхшаш қулги кўтарили.

- Бунга эна эмас, тева керак.
- Тевани энам деяпти-ку...

Бесамар бу мунозара Барот семиз кетмагунча давом  
этди. У экскаватор моторини ўчириб, ағдарма машина-  
лардан бирига тирмашаркан, дағдага қилди:

— Раис кеп, ўчимни обермагунча қадамимни босмай-  
ман бу ерга! Шошма, урганинг учун жавоб берасан  
ҳали!

Барот семиз жўнагач, бошқалар ҳам секин-аста  
тарқалиб, тепалик ёнида Шодиқулдан бўлак ҳеч ким  
қолмади. У аламини кимдан олишини билмай, тепалик-  
ка ўгирилди. Бемор она бошида қайфуга ботган ўғилдек  
тепаликка ҳасратла тикилди. Сўнг қуи қисми ўпирил-  
ган сўқмоқдан юқорига кўтарили. Тиззаларини кучиб  
ўтиаркан, беихтиёр кўзларидан ёш қуилиб кела бош-  
лади: «Одамларга нима бўлган ўзи, а?»

У тепаликда ғам чекиб ўтиаркан, кўзи тўсатдан сал  
наридаги замбарак уясига тушди. Бу хил уя ва окоп из-  
лари. даштда сероб эди. Яхши эслайди, болалигига  
даштни ҳарбийлар босди. Узун хартумли тўпларини у  
ёқдан-бу ёққа судраб, роса машқ килишган. Шу машқ-  
дан тепалик ҳам четда қолмаганди. У пайтда қишлоқ  
кичкина эди. Кичкина қишлоқнинг катта оқсоқоллари  
малла сочли, тўла юзли командирдан илтимос қилишиб,  
тепаликда уялаган замбаракни олдириб ташлашганди.  
Эндингилар эса...

Шодиқул аста бошини кўтариб, қишлоқ томонга  
боқаркан, тупроқ йўлдан пилдираб келаётган энасини  
кўрди. Шўрлик қоқилиб-соқилганча, гоҳ суюниб, гоҳ  
койиниб келарди.

— Уйингдан илон чиққанми, болам! Тевада бойўели-  
дай бўлиб ўтиришинг нимаси? Сен болага ҳеч эс кирма-  
ди-кирмади-да. Кўрган кўз нима дейди. Тор қорнига  
сиққан, кенг уйига сифмабди-да дейишмайдими. Вой, бо-  
ласи тушмагур-а. Вой, эси йўғ-а.

Онасининг жиккаккина гавдасига кўзи тушиши би-  
лан Шодиқулнинг юрагини соғинч ҳисси қамради. Паст-

га учгудек бир важоҳатда иргиб ўрнидан туаркан, тағин кўзи тепаликнинг кемтиқ қисмига тушиб, инграб юборди

У энасини жуда соғинганди, тепаликни эса ундан-да кўйроқ соғинганди. Икки соғинич бир бутунликни ташкил этиб, қалбини нурлантириб турганди. Энди ушбу яхлитликка путур етган, у бир қаноти уриб синдирилган қушдай маҳзун бўлиб қолганди.

У маъюс бир киёфада тепаликдан пастта эна бошлади.

Эртаси тонгда Сафар милисанинг дарвоза қоқиб келишидан Шодиқул заррача ажабланмади. Шунингдек ҳайикмади ҳам. У аллақачон унча-бунча нарсадан чўчимайдиган бўлиб қолганди. Шу боис, бутун хатти-харакатидан дағдаға ёғилиб турган дароз ҳудуд нозирини пи-нак бузмай қаршилади.

— Сен бола, нега одамлар орасига қутқу солиб юрибсан? — дея дархол ўдағайлашга тушди Сафар милиса. — Нима, тепа энангни маҳрига тушганми? Ё отангдан қолган мулкми? Гап шу, бу сафар кечираман, бола. Агар яна гинг дейдиган бўлсанг, чиққан жойингта тикиб юбораман!

Шодиқул унинг пўписасига аҳамият бермай, гўштдор афтига синчков кўз ташларкан, Сафар милисанинг тепаликка ачинмаслигига ишонгиси келмади. Шу ўй унда умидга ўхшаш ниманидир туғдирди. Тепаликни хиёл таъриф этиб, бакиргунча тевани қутқаришга қўмак бering, деди.

Бошда Сафар милиса уни фавқулодда бир дикқат билан тинглади. Орада анчадан буён бўёқ юзини кўрмаган дарвозага бир сира кўз югуртириб чиқди. Сўнг тошдек ҳиссиз юзида ёқимсиз кулги пайдо бўлди.

— Нима бало, у ёқда уриб каллангни пўла қип кўйишганни дейман, — деди сарғиштоб кўзларини тикондек қадаб. — Тева қанакасига бизга эна бўларкан? Энатева эмиш. Сен бола ақлдан озибсан. Тунов куни биттаси шунга ўхшаш гап қилувди, обориб тиқдим. Яхшиси, бунаقا аҳмокона гапларингни йиғиштириб. Акс ҳолда сениям оборишимга тўғри келади. Дарвоқе, кечаги қилмишингни ўзи кия бўлиб кетишингга етиб ортади. Бугун Баротдан кечирим сўра. Кечирмаганига қўйма.

- Сўрамайман.
  - Нега?
  - Чунки у қотил! Сиз ҳам, қолганлар ҳам, умуман ҳаммангиз қотил!
  - Жонсиз нарсага даҳл қилган одамга нисбатан бу сифат ишлатилмайди, ўқимаган.
  - Ахир сиз ҳам шу тевада ўйнаб-ўсгансиз, наҳотки ичингиз ачимайди?
  - Йўқ, ичим ачимайди, — Сафар милиса совук кулди. — Лекин сенга ачиняпман. Бир оғиз ортиқча гап қилсанг; обориб тиқаман, бола!
  - Оборишингиздан қўрқмайман, ака, — Шодикул чирсиллади. — Аммо тевани бузишларига йўл қўймайман.
  - Фалвага бошингни тиқма, бола.
  - Тева учун шу бир бош садақа, ака!
  - Қани, машинага чик! — Сафар милиса унинг билагидан тортқилади. — Иззатингни билмадинг, чик энди машинага!
  - Фақат қўлга эрк берманг, ака!
- Сафар мелисанинг газаби қўзиб, уни машина томон сургай бошлади. Шодикул унга куч бермади. Бу қадар қаршиликни кутмаган нозирнинг баттар жони чиқди.
- Чик деялман!
  - Тевадан экскаваторни йўқотинг, истаган жойингизга бораман.
  - Тевани йўқотаман, сени эса камерага тиқаман!
  - Мен билан ёқалашгунча, обрўйингиз бор, катталар билан гаплашинг, тевани сақланг, ака.
  - Аввал сен билан гаплашай!
  - Ака, мен аламзадаман, — Шодикул ўзини босилига тиришиди. — Юрагим куюшиб оғрияпти. Тинчина кета қолинг.
  - Ўрлик қилма, бола! — Сафар милиса тирғалиб туриб олди. — Бутун бўлинмани бошлаб келиб бўлсада, изингни қуритаман бу ердан.
- Шодикул уни осонгина итариб ташларкан, бирдан хушёр тортди.
- Ана, экскаватор тариллади, тевани бузишяпти, ака, — деди.

- Хали сен менга күл күтарадиган бўлдингми! —  
Сафар милиса унга қайта ёнишди. — Давлат одамига-я!
- Экскаватор тариллаяпти деяпман!
- Қани, юр!
- Тевани бузишяпти, ака!

Кун қуёшли эди. Офтоб нури дарахт япроқларида ўйнар, ариқда жилдираб оқаётган сувда аксланар, кишилар юзида жилваланар, хуллас, бутун борлиқ майин нурга йўғирлганди. Томдаги бароқ мушук, бутоғ четидаги қалдирюч, кўча юзидаги ит, жамики жонлиқ нурга чўмилганди. Шодиқул кучли зарбадан ариқ ичига юмалаб тушган Сафар милисага бокаркан, қуёшли далани ортиқ кўролмаслигини англади. Тепаликда кечадиган ойдин тунлардан мосуво бўлганини фаҳмлади...

Энди у камера туйнугидан тушган бир парча нурга ғамгин термулиб ўтиаркан, бурчакдаги кўланка ўзи томон кўзғалганини сезиб, фаши келди. Юзини терс ўғириб олди. Шу тобда одам боласини кўришга тоқати йўқ эди.

— Омонмисиз, ака, — кўланка унинг ёнига келди. — Танимадингизми, мен Ўроқ чавандознинг ўғли Сардор бўламан. Мен ҳам сизни зўрга танидим.

— И, катта йигит бўп қопсан-ку. — Шодиқул нимадир дейиш лозим бўлгани учунгина фудранди. — Нима бу ўтириш?

— Шундай... — Сардор кинояомуз кулимсиради. — Нодонлар билан олишаман деб, тушиб ўтирибмиз.

— Нима гап? — Шодиқул йўлига сўради.

— Тунов куни ёзги таътилга қайтсам, қишлоқ бикинидаги тепаликни бузишаётган экан. Бундай карасам, қадимий ёдгорлик. Кўхна сопол буюмларнинг синиклари, қўрғон деворлари қўриниб турибди. Бузманглар, дея ялинаман, кани тинглашса. Раисдан тортиб туман катталаригача чиқдим. Айни дала ишлари қизиган лайтда қанақа тепаликни гапиряпсан, дея хайдаб солишиди.

Кеча Шодиқул сопол бўлакларини кўргандай бўлувди. Анчагина эди улар. Ҳозир шуни кўз олдига келтириб, таажжубланиб сўради:

- Кўрғон дейсанми?
- Ха, кўрғон. Чамаси учинчи асрларга тегипши.
- Буни сен қаердан биласан?

- Шунинг ўқишига ўқияпман-да. — Сардор ух тортди. — Минг йиллик қўрғон. Нодир кадимий топилма.
- Бўлса бордир, — Шодиқул ўз дардида ўртанишга тушди. — Менам тева вожидан бу ерга кеп ўтирибман. Кеча қамоқдан чикиб, бугун мана... Пешона шўр бўлса, қийин экан-да, иним.
- Тепани куткариш керак, ака.
- Қандай қилиб? — Шодиқул теваракка кўз солиб, ночор елка қисди.
- Нима, сиз ҳам муштлашдингизми?
- Ха, аввал Барот семиз, сўнг Сафар милиса билан.
- Мен эса раис билан ёқалашдим. — Сардор маъюс тортди. — Ўзимни ҳеч тутолмадим. Сизга айтсан, одам эмас у. Аҳмоқона иззат-нафсини деб, ҳакикий топилма ни хонавайрон қилмокда. Нодон одамнинг иззакашлиги жуда қиммат тураркан, ака.
- Шодиқул унга савол аломати билан тикилди. Сардор тўлиб турган экан, ҳар икки гапнинг бирида сўкиниб, гапда давом этди.
- Ўша ярамас бундан икки йил муқаддам, унда у агроном эди, тепанинг устида қишлоқ йигитларидан роса калтак еган. Аввалига бирга-бирга ичишиб, кейин муштлашган. Ўшанда, тепа-пепанг билан барингни куритмасам, энам хотиним бўлсин, деб қасам ичиб қўйган экан. Йигитларни-ку ҳеч нарса қилолмаса-да, лекин тепани боплаяпти. Янги ер очиш баҳонасида, туроргини Каттаўрга тўқдириб, тепаликни куритаяпти. Лекин ҳалиям кеч эмас, тепани куткариш керак, ака.
- Одамларни... худо уриб қўйибди-ку... — Шодиқул тиши оғригандай афтини буриштирди.
- Раис уларнинг кўлчилигига томорқа ваъда берган.
- Ё дариф! — Шодиқул инграб юборди. — Энадек азиз тевани бир парча ерга алмаштиридими улар! Энамиз-ку у! Баримизни елкасида катта қилган-ку у! Тевасиз эндиғи болалар нима қилишади? Боврини шамолга тутмаган, теваси бўлмаган қишлоқнинг нимаси қишлоқ...
- Ундаги жазава Сардорга ҳам кўчди.
- Нодирлигини айтмайсизми, нодирлигини, — дерди у титраб-қақшаб. — Тепанинг остида минг йиллик тарих яширин. Тарихни яксон қилишаяпти, тарихни...

— Агар тева бўлмаганда, мен қамоқда сиқилишдан ўлиб кетардим. — Шодиқул ўрнидан иргиб туриб тор хонада нари-бери юра бошлади. — Ёмон рухга асир бўлиб, одамлик қиёфасини йўқотардим. Тева қўнглимни ёритиб, умид түғдирган. Энамдек азиз у менга!

— Қадимий ашёларни кўз ўнгимда яксон қилишиди, — дея чинқиради Сардор. — Кўрғон деворидан чиққан фиштларни Бозор оқсоқол янги участкаси учун ташиб кетди. Катта бир хумни Салим кайфи уйига олиб кетди. Унда вино эзармиш. Бошқалар, тилла-пилла чиқиб қолса-я, деган умидда юришибди. Тепанинг ўзи ҳар қандай хазинадан қимматлиги билан эса ҳеч кимнинг иши йўқ...

— Боболаримизнинг қадами теккан ер у, — дерди Шодиқул унинг гапларини деярли тингламай. — Кўз очиб кўрганимиз шу тева бўлган. Оёғимиз чиқиб-чиқмай, тевага тирмашганимиз. Усиз қандай яшаймиз энди, а?

— Турк ҳоқонлиги даврига оид қимматли тепа шундоқцина кўз ўнгимида тупроққа корилмоқда, — аламидан Сардорнинг ранги гезариб, лаблари кўликланиб кетганди. — Тепалик жуда катта кўрғон, балки хон саройидир. Шакли ва жойлашиши шунга якин. Нималарни бағрига яширмаган у. Раис билан гидинглашиб юрмай, тўғри институтга чопсам бўларкан...

— Қамоқда ётганимда, — Шодиқул бошини тинмай сараклатарди. — қолган умримни тевада ўтказишга аҳд қилувдим. Энатевадан ҳеч қаёққа кетмайман девдим...

Улар бир-бирларини тинглашмаётганини тўсатдан пайқаб қолишиди. Ўртага оғир сукунат чўқди.

— Ака, тепани кутқариш керак, — деди бир оздан сўнг Сардор ердан бошини кўтармай.

Оёқлари учига тикилиб қолган Шодиқул уни қувватлади:

— Ҳа, уни кутқариш керак.

Улар бош кўтариб, камера деворларига, қалин темир эшикка, бир тутам нур тушиб турган панжарали туйнукка иложсиз боқишиди. Сардорнинг боши яна эгилиб тушди.

— Мен бу ерда, у ёқда эса тепа вайрон бўляяпти, —

деди сүңг йиғламсираган овозда. — Қандай бўлмасин уни кутқариш керак, ака.

Шодиқул темир эшикка ғазабкор тикилди. Назарина, озодликка бир одиму унга мана шу тўрт энлик темир монелик қилаётгандек, туро солиб эшикка ёпишди. Уни бор кучи билан тепа бошлади.

— Тепани кутқариш керак, оч!

Сардор шундай дея, унинг қаватига кирди. Энди иккоклашиб эшикни тепа бошладилар. Туйнук рахига кўнмоқ истаган беозоргина бир мусича бу тарақтуруқдан чўчиб, патиллаганча қайта осмонга кўтарили.

## ҚАРИНДОШЛАР

Тупроқ йўлни чангитиб келаётган автобус муюлишда тўхтаб, ундан кирқ беш ёшлар чамасидаги оқ-сариқдан келган жиккаккина жувон тушди. Аёл ерга оёқ қўйиши билан, ранги уннкан ковуши тупроққа ботди. Тупроқ иликқина, майнин тегди оёғига. Кўтарилган чанг секин тарқалди. У йўл бўйида ўзига қизиқсиниб тикилиб турган қизчанинг саломига алик олиб, каллакланган тутзор оралаб, қишлоқ томон юрди. Енгил шабада димогига янги ёпилган нон хидини урди.

Пастак уйлар каторидаги янги оқланган уйга етганда аёлнинг юраги алланечук ҳаприкли. Ҳовлига соғиничли назар ташлади. Четдаги сомонхонани демаса, барча иморатлар қайта қурилган. Аёл сомонхона ёнида бир зум тўхтаб, девордаги жажжи панжа изларига зехн солди, маъюс жилмайди.

Сомонхона солинаётганда у кичкина қизча эди. Акаси икки пахса юзини шапатилаб, панжа изларини туширишганди. Ҳа, ўшандан бери қанча сувлар оқди... Ҳаёт шу экан, йиллар ўтавераркан. Энди мана шуни курган ота ҳам йўқ, анча бўлган унинг ўлиб кетганига. Онаси неча йиллардан бўён уницида. Аёл акасини кўргани унда-мунда бир келади...

У ўига чўмган кўйи каттакон дарвозадан ҳовлига кирди. Кенг ҳовлида жон асарини кўрмай, сергак тортиди. Кия очиқ дахлиз эшигини итариб, кўрпага ўраниб ётган янгасини кўрди.

- Ия, янга, ётиб олибсиз-ку! Саломалейкүм.  
— Келинг, — янга ўрнидан күзгалди, чехраси ёришиди.  
— Яна елкангизми? Акам яхши юрибдиларми?  
— Ха, шукр. Шу, игна санчгандай оғрийди. Кишини қаери оғриса, жони ўша ерда деганлари рост экан. Ҳай, болалар соғ-саломатми? Ойбийим яхши юрибдиларми? Тўй ташвишлари билан чарчамаяпсизми? Ўтириңг. — Янга юқоридаги кўрпачадан жой кўрсатиб, кафтини очди: — Омин! Кенг феъл, кетмас давлат берсин! Хуш келибсиз, Бахшанда.  
— Хушвақт бўлинг. Дўхтири-пўхтирга бордингизми?  
— Бордим. Тухумдай келадиган шиша бонкачаларини кўрсатиб, шуни ёқ-да, елкангта қўй дейди. Акангиз қўйдиям, э-э, бу ёқдан тушиб кетаверди, куриб кетгур! У кун Ражаб кайвони янги сўйилган молнинг ўт пуфаги суюк оғриғига биттаю биттаю даво деган экан. — Янга оғилхонага ишора қилди. — Акангиз сўйидиртириди. Иссиққина ўт пуфагини бир кунча боғлаб ётдим, сал бо-силгандай бўлди. Йўқ, кечадан бери яна... — У елкаси-га қўл обориб, уқалаб-уқалаб қўйди.  
— Шамоллаттансиз-да, янга, иссиқ тутинг.  
— Ҳай, майли, чой қўяй, — янга ўрнидан турмоқчи бўлди.  
— Йўқ, чой ичмаган уйимми? Ётинг, овора бўлманг, — дея деразадан ташқарига қаради жувон. — Акам ҳам келиб қолар-а, янга?  
— Келадиган пайтиям бўлди. Э-э, шу табилчиликни тошишрсаям бўларди энди акангиз, тинка-мадори куриб кетди.  
— Анча бўлди табилчилик қилаётганларигаям?  
— Кариб ўттиз йил, Бахшанда. Ўзи бўладими!.. Буёғи кариб қолди.  
— Ха, янга. Акам уч кизни чиқарди, энди икки ўғилнинг фами... Болалар бир томондаи умрни этови экан. Мана, бошимга тушиб кўриб турибман... — Аёл кигизга тушиб қотиб қолган гуруч доналарини кафтига тера бошлади.  
— Ха, аста айтасизми! Иби, саватти тагида бир то-вок ош бор. Кеча қилувдим, қўл урилмаган. Шуни иси-тиб келай, ҳай, Бахшанда.

- Акам келсин, бирга ермиз...
- Нима гап? — Янга аёлнинг ташвишманд чехрасига синчков тикилди. — Кудангиз катта сўраяптими?
- Бир оз катта сўраяпти. ЗАГСни тўйдай қиламиз, минг қилсаям кенжамиз, дугоналари кўп, деяпти. Яна алламбало, оти нимайди... Ха, ансамбль. Шаҳарда қандайдир ансамбль бор экан...
- Артистлар-да?
- Ха-ха! Ўшани чақирсан, деган гап қилибди келин тушмагур Нуриддинга.
- Сиз аёл қудога айтмадингизми, ошириб килишга курбим етмайди, деб? Қолаверса, билади беш болани ёлғиз бош билан катта қилганингизни. Кетидан яна тўрттаси стилиб келаяпти.

Аёл жимгина кафтидаги гуруч доналарини санагандай титкилаб ўтиради.

- Шу ўғлинигизам нима киларди бурни кўтарилиганига оғиз солиб, ўз тенгидан топмайдими! Ҳали кўп қийнайди улар, олди-бердини чўзиб...
- Бир амалларман, янга. — Аёл оғир тин олди. — Шаҳардан артист чақирмасам ҳам, дабдабали қилмасам ҳам, эл қатори ўтказармиз. Кўнгил иши, Нуриддиндаям айб йўқ.

Шу пайт ташқаридан қадам товуши эшишилди. Аёл чаққонлик билан ўрнидан туриб, акасига пешвоз чиқди. Янга хушламайгина кўзғалиб, кўрпани тахмонга йиғедида, баҳмал нимчасини кийди.

Ховлида ака-сингил ахвол сўрашишарди:

- Уйга ўтмайсиз, ака? Онам сўраётувдилар.
- Ҳеч кўл тегмайди. Ўзинг биласан, пилла даври. Ҳали ўёқка чол, ҳали буёқка, яхшиям янганг қурт олмаган.

— Янгамниям мазаси бўлмай қолибди.

— Шуни айтаман-да.

Ака қўлларини сочиққа артиб даҳлизга кирди. Остоңага ўтириб оёғидаги кизғиши латта этигини ечди. Пайтавасини олиб, бир четта кўйди. Даҳлизни тер аралаш пайтава ҳиди тутди.

— Хўп, тўй қачон, тўй? — сўради у тўрга чиқиб чордона қуаркан.

— Энди, ака, бориб сиз ҳам қудолар билан гаплашиб кўринг, дегандим. — Аёл унинг ажин тимдалаган

қорамағиз юзидан күзини олиб ерга қаради. — Бир тоға етти отага тенг дейдилар.

— Түрику-я гапинг... — aka дастурхон күтариб кирган аёлига алахсиди. — Ҳа, сен қалайсан? Оғриғи босилғанми?

— Ўша-ўша, ҳалигача ётувдим...

Аёл туриб янгаси ортидан ўчоқ бошига юрди. Бир-пасдан сүнг бир товоқ ош олиб кирди. Ош ҳидини олган семиз бароқ мушук миёвлаб эшикдан бош сукқанди, янга бобиллаб берди:

— Пишт-э, қирилиб кеткур! Ошхонада сичқонлар ўйнайди, буни күзи дастурхонда! Пишт!

Аёл номига бир-икки чимдим ош еган бўлди.

— Ман қайтсан бўларди, ҳали-замон автобус бўлмай колади.

— Кетарсан, жиянинг келса, мопетида олиб бориб кўяр. — Ака бошини эгиб, кафтидаги гуруч доналарини сўриб-сўриб тортиди. — Пиллани териб олайлик... Бу раис анча бадфеъл чиқди. Бир кун кўринмай қолсанг...

— Бозор кунлариям бундай оёқ чўэмайдилар, — гапга аралашиб янга.

— Ол, ошдан ол! — Ака пиёладаги чойдан хўплади. — Энди сен ҳеч чўчимай тўйни бошлайвер. Ўзи ҳамма нарсанг етарлимни?

Аёл худди шуни кутиб тургандай ялт этиб акасига, сўнгра янгасига қаради. Ботинмайроқ гап бошлади:

— Кеча онам билан борини ҳисоб-китоб қилиб чиқдик. Етарлидай кўринди-ю, шу... бироз гуручига кўлим калталик қилиб турибди. Йиғилиб қолган пенсиямни акангдан сўра, харна бир томонини кўтаради, деб онам кўймай юборувдилар...

— Онам юбордиларми, ҳм-м... шунаقا де, — aka ош ейишидан тўхтаб, тағин чойдан хўплади. — Ҳа, бор ети-саккиз ойлик пули. Лекин уни йигиб кўяянман. Ўзига ярайди. Онани умрбод бермаган-ку! — у билагига оқаётган ёғни ялади-да, яна оинга қўл чўзди.

Аёл хозиргина эшиттанига ишонмагандай аввалига акасига қараб қолди. Сўнгра уятли бир гап эшиттандай кўзларини олиб қочди. «Нима деди акам? Ўзига ярайди... Нима? Ўлимлик... Акам онамни пенсиясидан унга ўлимлик йигаяпти! — Аёлнинг тирноғигача жимир-

лаб кетди. Кўз олди бирдан хиралашиб, дастурхон, ош, нон — хаммасини шарда тутди. — Ё товба! Акам онами ни ўлимини ўйлаб, пул йигаяти. Ман нимагадир бу хақда ўйламабман. Худди онам умрбод ўлмайдигандай... Мабода, ўлсаям, наҳотки унинг ўлимига пул то-полмасам?! Шу акаси шундай дедими? Наҳотки, шунчалик... Эҳ, нимагаям келди шу ерга?!

— Ҳа, қовоғинг осилди. Сан ҳам, онам ҳам эртани ўйламаяпсизлар! Тўй нима у, ўтади-кетади ўйин-кулги билан. Мана, ўн беш йилча бўлди-а, онам саникида, эринг ўлгандан бери, тўғрими? Шунча йил бериб, юбориб турдим. Ёлғиз кўл эдинг. Мана, энди каттанг каватингга кирди, кейингисиям кирайпти... Ҳа, энди эртаси-ниям ўйлаши керак-да, бу кампири! Саксонга борди, етар неварааларига едиргани...

Аёлнинг кулоғига гал кирмас, шундоқкина ёнида кимдир фўнғир-фўнғир овоз чиқараётгандай бўлаверди, бўғзига нимадир тиқилди.

Бундан ўн беш йил олдин эрининг жасади тепасида шундай бўлган: кўзини туман босган, кулоқлари том битган, бўғзига ёнғоқдек нарса тикилиб, на дод солиб йиғлашга кўяди, на унсизгина ўтиришга. Оғзини каппа-каппа очади, боши билан елкалари учиб-учиб тушади...

— ... мана ҳозир туради-ю кетади, ана, ҳозир. Ана шу остоңадан хатласа бўлди, кейин хаммаси яхши бўла-ди! Ана, ана шундай, яна бирпас юрсин, яна...

Ранги уникқан ковушлари тупрокка ботиб бораётганда, аёлнинг кўзлари хийла тиниклашган, қишлоқ узра оқшом чўкаётган эди.

## **МУНДАРИЖА**

### **Киссалар**

Шайдолик (A. Расулов)	3
Белбоғ	7
Тоғу тошларда	63
Фанимлар	125

### **Хикоялар**

Етим қолган гуллар	192
Кекса тут	197
Тунгги меҳмон	205
Қуёш тутилган кун	217
Қабртош	230
Сут сотувчи бола	239
Даштда	244
Алп онадан	253
Бүрон кўпган кун	260
Қудук	268
Қизча	278
Энатепа	286
Қариндошлар	298

**НОРМУРОД НОРҚОБИЛОВ**

**БЎРОН ҚЎПГАН КУН**

*Қисса ва ҳикоялар*

«Шарқ» нашриёт-матбаа  
акциядорлик компанияси  
Бош таҳририяти  
Тошкент — 2007

Мухаррир *И. Шоймарданов*

Рассом *Ш. Тўропов*

Бадиий мухаррир *М. Аъламов*

Техник мухаррир *Р. Бобохонова*

Мусахихлар: *Н. Охунжонова, Ш. Хуррамчова*

Саҳифаловчи *Л. Бацева*

Теришга берилди 11.01.07. Босишга руҳсат этилди 10.02.07.  
Бичими 84x108'/<sub>32</sub>. Петербург гарнитураси. Офсет босма. Шарти  
босма табори 15,96. Нашриёт-хисоб табори 15,99. Адади 5000 нусха.  
Буюртма № 3260. Баҳоси келишилгав нархда.

**«Шарқ» нашриёт-матбаа  
акциядорлик компанияси босмахонаси,  
100083, Тошкент шаҳри, Буюк Турон, 41.**